






N L L

MAG 2100



Copyrighted by Copyright






CLEMENTIS

UNDECIMI

Pontificis Maximi

ORATIONES

CONSISTORIALES.



ROMÆ M.DCC.XXII.

Apud Jo: MARIAM SALVIONI Typographum VATICANUM
In Archigymnasio SAPIENTIÆ.

SUPERIORUM PERMISSU.




100

JHEP07(2015)210

[illegible]

(III)

SANCTISSIMO DOMINO NOSTRO
INNOCENTIO XIII.
PONT. MAX.



ANNIBAL S. MARIE IN COSMEDIN DIACONUS
CARDINALIS ALBANUS S.R.E. CAMERARIUS
PERENNEM FELICITATEM.



QUOD SANCTITATI TUÆ humiliter offero,
Orationum Consistorialium Volumen
sinceram, genuinamque continet Tui
Prædecessoris Imaginem, quam eò
benigniori vultu excipiendam à Te fore arbitratus
sum, quò certius non externa corporis lineamenta,
ut coloribus depictæ tabulæ solent, sed præstantes Il-
lius animi dotes, quæ longè majori in pretio apud
om-

omnes habitæ semper fuere, luculenter exprimit, & ob oculos ponit. In ipsis siquidem Orationibus, BEATISSIME PATER, eximium conspicias Zelum, quo CLEMENS XI. perpetuò flagravît, ut Fidem vel in propinquioribus Regionibus incorruptam, & sartam tectam custodiret, vel ad remotissimas usque Orbis terrarum Nationes extenderet, & propagaret. Incensum præterea, & constans agnosces Ecclesiæ jura, Apostolicæque Sedis auctoritatem tuendi studium, ac eloquentiam, sacram equidem, qualis Summum Pontificem planè decet, sed non incomptam, imò nec illis destitutam luminibus, ac ornamentis, quæ gratiam ipsi, & pretium apud Eruditos, ac eos præsertim, qui latini sermonis puritatem, atque nitorem amant, conciliare consueverunt. Verumtamen ut consilium susciperem eas Sanctissimo Tuo inscriptas Nomine in lucem proferendi; illud præcipuo mihi incitamento fuit, quòd illustre in ipsis argumentum invenies egregiæ opinionis, & existimationis, quam Author de præclaris virtutibus tuis jamdudum animo conceperat, & reipsâ palàm declaravit, dum Te inter primos ad amplissimam Cardinalatus dignitatem evexit. At quàm uberi gloriæ fœnore erga CLEMENTEM XI., quot, quantisque erga illius Familiam beneficiis, SANCTISSIME PATER, accepto beneficio vicem rependisti! Quod ad ejusdem

Pon-

Pontificis gloriam attinet, satis fuerit tuam ad Catholicae Ecclesiae regimen assumptionem intueri; quæ cum unanimi omnium Electorum consensu, communique Nationum gaudio peracta sit, locuples jam testis est acerrimi, gravissimique judicii Prædecessoris tui in iis deligendis, qui ad supremas Sanctuarii Cathedras extolli deberent. Quod autem ad Albanæ Gentis rationes pertinet, nemo prope modum in eâ censetur, qui inter ipsa Imperii tui primordia gratiis, & honoribus munificentissimè cumulatus à Te non fuerit. Quæ verò clementia Tua liberali manu in nos contulit, maxima beneficia hic singillatim persequi mihi longum, ac in medium afferri Tibi forsitan ipsi grave, atque molestum accideret; cum magni, excelsique animi Principibus, qualis planè est SANCTITAS TUÆ, libenter beneficia, Divinitatis exemplo, tribuere, & æquè libenter ea oblivisci solemne sit: Nulla tamen ætas illorum in nobis extinguet memoriam, omnique tempore vos, & gratissimos profitebimur debitores, & subditos maximè fideles præstabimus SANCTITATI TUÆ, cui synceros hosce Cordium nostrorum sensus ipsa, ubi opus fuerit, sanguinis effusione comprobare, testatosque facere parati erimus. Ceterum si unâ tantum familiâ præclaris adèò ornata à Te fuit beneficiis, qualia profectò in eâ; in qua versamur, temporum diffi-

difficultate Ecclesia Dei à SANCITATE TUÀ sibi meritò polliceri non poterit? Communis certè plausus, quo Catholici Principes universi tuam ad Apostolicam Sedem provectionem exceperunt, firmam nos in spem adducit fore ut finis aliquando imponatur vexationibus, ærumnisque illis, quibus tandiù Ecclesia ipsa ubique ferè locorum per manifestam injuriam afflicta fuit. Ego verò, qui diuturno viginti, & amplius annorum spatio non tam publicarum calamitatum, quàm invictæ constantiæ, indefesseque CLEMENTIS XI. vigilantie proximus spectator extiti, eam temporum felicitatem SANCITATI TUÆ conceptis votis auguror, ut occasio Tibi præbeatur illam animi moderationem in prosperis adhibendi, quam Defunctus in adversis ostendere compulsus fuit. Hoc enixis insuper, accuratisque precibus à divina clementiâ flagitare nunquam intermittam; dum in genua provolutus Sanctissimos Tuos Pedes, qua par est, veneratione deosculor.



I M P R I M A T U R .

Si videbitur Reverendissimo Patri Sacri Palatii Apostolici
Magistro.

N. Episc. Bojan. Vicesg.

I M P R I M A T U R .

Fr. Gregorius Selleri Ordinis Præd. Sacri Palatii Apostolici
Magister.







IN PRIMO CONSISTORIO SECRETO

HABITO IN PALATIO APOSTOLICO VATICANO

Die 15. Decembris 1700.

ARGUMENTUM.

De sua ad summum Pontificatum assumptione Sacro S. R. E. Cardinalium Collegio gratias agit.

VENERABILES FRATRES.



I. Mpositam humeris nostris Apostolicæ servitutis farcinam, imbecillitate primùm, nostrâ suadente, sicuti nostis, quantum licuit, detrectavimus; Divinâ tandem impellente voluntate, cui non est, qui resistat, vel inviti suscepimus. Quanto id animi nostri dolore contigerit, cùm satis abundè Vobis perspectum sit, non est, quod pluribus nunc exponamus. Studemus jam mœrorem nostrum ita temperare, ut non oblivescamur officii. Hinc quoniam non verecundæ, sed ingratae mentis indicium est beneficia tacere Divina, & satis dignum est à Sacrificiis Dominicæ laudis obsequium consecrati Pontificis inchoare, agimus primùm, & semper acturi sumus Omnipotenti Deo uberrimas gratias, qui Nos, quantumvis indignos, tam altè iussit ascendere; gratum deindè erga Vos quoque animum profitemur, qui Divinæ voluntatis Interpre-

A

tes,

tes, ac Ministri, tantâ animorum, studiorumque consensione, tam honorificum, tam sanctum, etsi immeritum, de nostra humilitate iudicium protulistis. Et sanè quantum ob iudicium huiusmodi, licèt Nobis grave nimis, & permolestum, Vobis debeamus, exprimere verbis non possumus: re ipsa tamen declarabimus, quoties se Nobis occasio obtulerit benemerendi de commodis, ac Dignitate Ordinis Vestri. Ea interim Nos in tanto rerum discrimine constitutos vel maximè spes consolatur fore ut, qui elevans allisit Nos immenso oneri, quod subimus, supponat manum suam, ac Dextera ejus glorificetur in Nobis. Studium insuper, quod Vos tam alacriter, & constanter in Nos eligendo ad extremum retinuistis, Nobis in Pastoralis munere exequendo non desit; cùm præsertim ad vestram quoque laudem pertineat factum vestrum, vestrum quodammodò beneficium, tueri. Amoris profectò vestri fuit exiguitatem nostram ad hoc rerum humanarum fastigium, evehere; neque enim in id consilii devenire umquam potuistis, nisi solius ductu charitatis, quæ non cogitat malum, & in oculis vestris nostrorum operuit multitudinem peccatorum. Muneris modò vestri erit Electo assistere, oneratum sublevare, deficientem admonere, laboranti in excolenda Domini vinea allaborare. Nos certè operâ, consilioque vestro in Catholicæ Ecclesiæ regimine libentissimè utemur, ac nostris non fidentes viribus, quæ nullæ sunt, sed Divinâ, quæ sperantes in se confundi non patitur, virtute suffulti, non faciemus animam nostram pretiosiores, quàm Nos, dummodò consummemus cursum nostrum, & ministerium, quod accepimus à Domino Jesu, fideliter impleamus. Reliquum jam est Patrem misericordiarum potentem suscitare de lapidibus filios Abraham enixè à Vobis rogari, ut infirmitatem nostram ope suâ adjuvet, velitque electionem, quam per vos peregit, benè, ac feliciter Christianæ Reipublicæ evenire.



IN CONSISTORIO SECRETO

Habito die 21. Februarii 1701.

ARGUMENTUM.

Obitum Caroli II. Hispaniarum Regis Catholici impensè dolet. Defuncti laudes commemorat, & solemniū Exequiarum in Pontificio Sacello pro illius animæ suffragio celebrandarum diem designat. Postremò universale Jubileum ad divinam opem sui Pontificatus initio, & pro occurrentibus Ecclesiæ necessitatibus implorandam indicit.

VENERABILES FRATRES.



Bi primum, vel ipso rumore publico nunciante, Vobis innotuit cla. mem. Caroli Secundi, dum vixit, Hispaniarum Regis Catholici obitus, bene novimus quanta illum animorum commotione, non ut unius modò gentis, aut Regni, sed veluti communem quamdam Catholicæ Ecclesiæ jacturam exceperitis omnes unà Nobiscum, & dolueritis. In eo videlicet amissum religiosissimum Principem, ac de orthodoxa fide optimè meritum agnovistis. Perlati modò ad Nos, cùm Regiæ mortis nuncio, consuetis erga hanc Sanctam Sedem obsequii signifi-

II.

†
 cationibus, æquum, & tanti Regis dignitati consonum duximus Vobis ex hoc loco, ut moris est, ea de re verba facere, non tam ut communis doloris, eo etiam nomine Nobis acerbioris, quia gravissimum Apostolicæ servitutis onus humilitati nostræ impositum in mentem revocat, memoriam renovemus, quàm ut Vos omnes ad prosequendas Nobiscum pro Regis anima ad Deum preces, quod & hætenus Vos præstitisse non dubitamus, pro munere nostro impensius adhortemur. Interim publicas de more Vobiscum in Pontificio Nostro Sacello proximâ feriâ quartâ eidem Regi, ut par est, exequias celebrabimus, de vestra quidem pietate confisi, quòd exsolvendi jampridem funeris tarditatem charitatis ardore, compensabitis.

Ceterum, VENERABILES FRATRES, quod sub ipso ineuntis Pontificatus Nostri limine verebamur, quotidiano jam experimento cognoscimus: venisse nimirum Nos in altitudinem maris, in quo ne tempestas demergat Nos, efficere sola valet Omnipotentis Dei dextera, quæ mari, ventisque imperat. Auxilium itaque de Sancto solummodò expectantes inter tam gravia imminentium bellorum discrimina, aliasque tantas rerum, ac temporum difficultates, ad vestras, & universæ Ecclesiæ preces confugimus, quæ ut Dei auribus gratiores accedant, crediti Nobis Dominici gregis pietatem excitare decrevimus, concedendo Indulgentiam plenariam in forma Jubilei omnibus Christifidelibus in alma Urbe nostra quidem existentibus, qui intrâ spatium duarum sequentium hebdomadarum jejunaverint quarta, & sexta feriis, ac Sabbato alterius ex hebdomadis hujusmodi, & Basilicas S. Joannis in Laterano, Principis Apostolorum, & Sanctæ Mariæ Majoris, vel earum aliquam visitaverint, ibique oraverint, & peccata sua confessi Sacram Communionem sumpserint, nec non Pauperibus eleemosynam, prout sua cuilibet pietas suaserit,

erogaverint; Ceteris verò extra Urbem præfatam commorantibus, qui Ecclesiam, seu Ecclesias ab Ordinario designandam, seu designandas visitaverint, & alia omnia præfata adimpleverint. Qua in re non solum laudabilibus Romanorum Pontificum Prædecessorum nostrorum hoc, veluti periculosi itineris viatico, Pontificatum auspicantium exemplis insistimus, sed temporis etiam opportunitati occurrimus, cum advenierint dies acceptabiles, dies salutis, qui sicuti Nos ad impensius orandum, ita Divinam clementiam ad liberalius indulgendum invitant, & spem certam faciunt consequendi veram illam, & cœlestem pacem, finè qua nequit & ipsa, quam Nos inter Catholicos Principes tam sollicitè custodire satagimus, pax humana consistere. Agite ergo, VENERABILES FRATRES, Deum, qui est multæ misericordiæ omnibus invocantibus se, sine intermissione obsecrate, ne tam turbulento tempore, quo Catholicæ Ecclesiæ præesse Nos voluit, viribus deficiamus, sed veniat in Nos Spiritus Sapientiæ, & Intellectus, Spiritus Consilii, & Fortitudinis, Spiritus Scientiæ, & Pietatis, quo timidæ cogitationes, & incertæ providentiæ nostræ roborentur, ut ea & investigemus, & dignoscamus, quibus per omnia Divinæ complacentes bonitati, eidem in omnibus conformemur.





IN CONSISTORIO SECRETO

Habito die 18. Aprilis 1701.

ARGUMENTUM.

Audax facinus Friderici Marchionis Brandenburgensis, qui nomen, & insignia Regis Prussiae, insciâ Sede Apostolicâ sibi arrogaverat, improbat, ac damnat, simulque palàm facit se monuisse Catholicos Principes, ne præsumptos à dicto Marchione honores ullo officii genere illi tribuant.

VENERABILES FRATRES.

III.



Nnotuit Nobis dudum, imò & terrarum ubique jam fama percrebuit Fridericum Marchionem Brandenburgensem nomen, & insignia Regis Prussiae, profano prorsùs, ac fortè inaudito hæcenus apud Christianos more, omni Ecclesiae Dei autoritate contemptâ, nec sinè gravi antiqui juris, quod in ea Provincia Sacro, & Militari Teuthonicorum Ordini competit, violatione sibi publicè arrogasse; illorumque proinde numero se nimis incautè junxisse, quos increpat simul, & reprobatur sermo ille Divinus: ipsi regnaverunt, & non ex me, Principes extiterunt, & non cognovi. Hoc sanè factum quantum Apo-

sto-

stolicæ Sedi injuriosum, quantum Sacris Canonibus, quibus hæreticum Principem antiquis potius cadere, quàm novis augeri honoribus constitutum est, adversum fuerit, egregiæ pietati, ac perspecto zelo vestro explicare supervacaneum, ducimus; Scire tamen Vos volumus Nos illud minimè dissimulasse, quinimò, ut muneri nostro, quantum in Nobis erat, hac in re satisfaceremus, audax, & irreligiosum ejusmodi facinus datis ad Catholicos Principes literis apertè damnassee, simulque illos seriò admonuisse, ne præsumptos à præfato Marchione honores ullo officii genere approbantes, venerabilem, sacramque Regiam Dignitatem, quæ ut Dei singulare munus agnosci, veræque columen Religionis, atque ornamentum esse debet, in Acatolico Principe vilescere patiantur. Hæc habuimus, VENERABILES FRATRES, quæ Vobis hodie significarem, ut & consiliorum nostrorum participes sitis, & Nos in tuenda pro viribus Orthodoxæ Fidei, & hujus Sanctæ Sedis dignitate vigiles, atque constantes, adjuvante Domino, esse velle intelligatis.





P. Le Gros, fecit a. 1701.

IN CONSISTORIO SECRETO

Habito die 8. Augusti 1701.

ARGUMENTUM.

Suum, & Apostolicæ Sedis de Latere Legatum deputat D. Cardinalem Archintum ad Sabaudia Principissam, Philippi V. Hispaniarum Regis Catholici Sponsam, brevi ex Italia discessuram.

VENERABILES FRATRES.

IV.



Ro eâ, qua Charissimum in Christo Filium Nostrum Philippum Hispaniarum Regem Catholicum in Domino prosequimur, charitate ad Regiam illius Sponsam Sabaudia Principissam propediem, ut accepimus, ex Italia, benedicente Domino, discessuram Romanorum Pontificum Prædecessorum Nostrorum morem secuti, Nostrum, & Apostolicæ Sedis de Latere Legatum deputare intendimus dilectum filium nostrum Josephum S.R.E. Presbyterum Cardinalem Archintum, qui novæ Reginae Apostolicam Nostram benedictionem deferat, Regale connubium gratuletur, faustumque, ac felix in Hispaniam iter, nec non lætam, & copiosam sobolem, cujuslibet Conjugum virtute,

pie-

pietate, & Religionē dignam, ex intimo nostri Cordis affectu apprecetur, ad laudem, & gloriam Omnipotentis Dei, Fidei Catholicæ incrementum, Christianæque Reipublicæ quietem, & pacem. Quid Vobis videtur?

Auctoritate Omnipotentis Dei, Sanctorum Apostolorum Petri, & Pauli, ac Nostra

Supradictum Josephum Cardinalem Archintum, Nostrum, & Sedis Apostolicæ de Latere Legatum deputamus, & declaramus ad præmissa peragenda.

In nomine Patris †, & Filii †, & Spiritus † Sancti. Amen.





IN CONSISTORIO SECRETO

Habito die 3. Octobris 1701.

ARGUMENTUM.

Obitum Jacobi Secundi Magnæ Britannię Regis DD. Cardinalibus significat, ejusque laudes, & quæ pro Orthodoxa Religione subierat, damna honorificâ commemoratione prosequitur.

VENERABILES FRATRES.

V.



Cerbissimum, ac verè luctuosum cla. me. Jacobi Magnæ Britannię Regis obitum, quem sinè maximo paterni cordis nostri mœrore audire non potuimus, suspiria inter, & lacrymas Vobis nunciamus, nec fanè ullum Nobis dubium esse potest, quin animos æquè vestros ingenti dolore affecerit gravissima hæc Christianæ Reipublicæ jactura, quam in amissio verè Catholico Principe, verè Ecclesiæ Filio, verè Fidei Defensore, impensissimè deflemus. Verùm quia juxta monitum Apostoli contristari de dormientibus non debemus, sicut & cæteri, qui spem non habent: jubet Nos præclara defuncti Regis pietas, quam nulla umquam ætas delebit, nulla feræ posteritatis

extinguet oblivio, jubet heroicis illius rerum omnium humanarum pro religione contemptus, quippe cui Rex optimus Patriam, opes, Regnum, & Vitam ipsam posthabere non dubitavit, jubet demum mors ab eo piissimè, ac constanti animo obita justè Nos sperare debere Religiosissimum Principem à Deo Optimo Maximo, sicut dum viveret, tanquam aurum in fornace probatum, ita post mortem, quasi holocausti hostiam, acceptum esse. Nostras nihilominus pro Anima Regis de hac Apostolica Sede optimè meriti ad Deum preces, atque suffragia deesse charitatis ratio non patitur. Id & privatim hætenus Nos ipsi agere non omisimus, & publicis quoque in Pontificio nostro Sacello exequiis, Romanorum Pontificum Prædecessorum nostrorum exemplo, suo tempore præstituri sumus. Cæterum eximiam, & Regio planè ejus animo dignam Charissimi in Christo Filii Nostri Ludovici Francorum Regis Christianissimi virtutem hac occasione filere non possumus, qui quemadmodum olim eundem Jacobum Regem è Regno nefariè deturbatum cum Regia Conjuge, & Nato magnificè, & liberalissimè exceperat, ita ei semper omnibus benevolentia, & humanitatis officiis usque ad extremum adstitit, & quod illustrius est, superstitem illius Filium à Charissima in Christo Filia nostra Maria Regina ejus Matre in paternarum virtutum æmulationem educatum benignè complexus, uti verum Britannici Regni hæredem, difficillimo hoc tempore, omni prorsus proprii commodi ratione neglecta, palàm agnovit, eumque in Catholicæ fidei, quacumque demum adveniente fortunâ, fortiter asserendæ proposito egregiè confirmavit. Qua sanè in re cùm ipsius Christianissimi Regis zelus, & animi magnitudo mirificè eluceant, Nostræ, & omnium Vestrum laudes ei meritò debentur, quas quidem uberrimas posterius omnes illi reddent, dum præclari facti memoriam recolent numquam interituram. Hæc etsi

Vobis, vel ipso rumore publico nunciante, innotuisse jam credimus, nuperrimè tamen ad Nos per celerem Cursorem à Venerabili Fratre Philippo Antonio Archiepiscopo Athenarum, nostro, & hujus Apostolicæ Sedis apud eundem Christianissimum Regem Nuncio, qui omnia cognovit, & vidit, fideliter allata, confestim ex hoc loco referre æquum, & opportunum duximus, ut scribantur in generatione altera, novumque hinc paternæ Nostræ erga Vos charitatis argumentum accedat, VENERABILES FRATRES, quorum fortibus humeris, piisque votis impositum infirmitati nostræ onus, quod his afflictis, turbidisque temporibus gravius semper in dies experimur, levatum iri confidimus.





IN CONSISTORIO SECRETO

Habito die 21. Novembris 1701.

ARGUMENTUM.

Propositis, quæ Italiæ, Europæ, & Ecclesiæ impendebant, gravissimis malis ob exortum inter Imperatorem, & duos Reges de Hispanica successionem atrox bellum, ac paternis commemoratis officiis ad illud amoliendum frustra adhibitis, DD. Cardinalibus consilium aperit, quod susceperat, mittendi Nuncios extraordinarios ad eosdem Catholicos Principes, ut eos ad Christianam Concordiam, & Pacem revocare pro viribus studeat, ac publicæ tranquillitati prospiciat.

VENERABILES FRATRES.



X quo supremum hoc Catholicæ Ecclesiæ culmen non minus inviti, quàm immerentes, Deo sic jubente, conscendimus, multiplices, easque gravissimas Christianæ Reipublicæ calamitates, majoraque in dies Italiæ, Europæ, ac Ecclesiæ ipsi impendentia mala Paterno nobiscum animo reputantes, primò quidem ex intimo cordis ingemuimus, charitate magistrâ edocti flere cum flentibus; sed eo tum indè loco positos Nos esse contemplati, quo non deplorare ista sufficiat, nisi & emendare

pro

VI.

pro viribus studeamus, ab ipso ineuntis Pontificatus nostri limine, qua fufis privatim, qua publicè indiſtis precibus apud Deum, adhibitis etiam, atque opportunè, & importunè congeminationis hortationibus, & officiis imminentis inter Catholicos Principes atrociffimi belli perniciem amoliri curavimus: memores fanè Illius Nos vices gerere in terris, qui naſcens ex Virgine per cœlicos Cives pacem hominibus bonæ voluntatis annunciavit, ac reſurgens ex mortuis, & aſcendurus in Cœlum pacem itidem ſuis reliquit Diſcipulis, ut & ipſi ejus imitantes exemplum pacem aliis edicerent. Cùm verò annum jam ferè præteriſſe cernamus, nec tamen adhuc paternas voces, quibus pacem ubique clamavimus, exaudiri, neque Pontificias curas in idipſum hætenus impenſas noſcamus aliquid profeciſſe; quinimò proximos armorum ſtrepitus quotidie crescentes auribus penè noſtris audiamus, ac, quod deterius eſt, Hæreticorum Vires Catholicorum diſſidiis proficientes magis invaleſcere, non ſine maximo Orthodoxæ Religionis periculo, conſpiciamus, ne publicæ Cauſæ pro paſtorali munere noſtro, inter præſentium malorum, ſenſum, & metum futurorum, deeſſe ullatenus videamur, Romanorum Pontificum Prædeceſſorum noſtrorum veſtigiiſ in hærentes per extraordinarios Noſtros, & Sedis Apoſtolicæ Nuncios ad Chariffimos in Chriſto Filios Noſtros Leopoldum Romanorum Regem in Imperatorem electum, alioſque duos Reges quantociùs tranſmittendos, publicæ tranquillitatis negotium hoc præſertim tempore, quod hybernis imminentiſ armorum tractationi minus opportunum videtur, majori, qua poſſumus, animi contentione urgere decrevimus, parati ſtadium omne, laborem, & diligentiam impendere, ac Noſmetipſos quoque, ſi opus fuerit, exemplo boni Paſtoris, qui animam ſuam dat pro ovibus ſuis, ſuperimpendere, ut Catholicos Principes ad veram, Chriſtianoque nomine

dignam charitatem, atque concordiam revocemus. Hæc Vos scire volumus, VENERABILES FRATRES, ut conatus, & sollicitudines nostras rei non minus arduæ, quàm salutare intentas, operâ, consiliisque Vestris, quibus libentissimè utimur, in primis verò enixis apud Patrem misericordiarum precibus, proximis potissimum Dominici Adventus diebus, qui sicuti Nos ad impensius orandum, ita Divinam clementiam ad liberalius indulgendum invitant, juvare possitis.





IN CONSISTORIO SECRETO

Habito die 5. Decembris 1701.

A R G U M E N T U M.

Christianæ Religionis statu in Sinarum, & aliis finitimis Indiarum Orientalium Regnis exposito, exortisque nuper inter Missionarios Apostolicos illarum partium dissidiis commemoratis, DD. Cardinalibus proponit susceptum à Sanctitate Sua consilium mittendi ad eas Regiones Vistatorem Apostolicum cum potestate Legati de Latere, congruo Missionariorum comitatu honestatum. Mox ad id Ministerium eligit Carolum Thomam Maillard de Tournon Taurinensem, Pontificium Cubicularium honoris nuncupatum; quem demum Antiochenæ Ecclesiæ Patriarcham constituit.

VENERABILES FRATRES.

VII.



Speculatores Domus Israel, super Cathedram Principis Apostolorum, inscrutabili Divinæ Providentiæ arcano constituti, non modò gravissimâ Ecclesiarum omnium sollicitudine premimur, sed ad universam, quæ sub Cælo est, ex omni tribu, & lingua, & populo, & natione gentium multitudinem mentis nostræ oculos jugiter circumferimus. Quantum siquidem in Nobis est, à Solis ortu usque ad occasum laudari nomen Domini summopere cupimus, adeoque etiam ad remotissimas

ab hac Sanctâ sede Regionis Pastoralis vigilantia nostrâ curam extendimus, ut ibidem Christiana Religio quotidianâ Infidelium accessione latius propagetur, & quò recens induta fuit, magis in dies, benedicente Domino, stabiliatur. Paternum tamen præ cæteris animum pulsat, studiumque nostrum excitat, & impellit amplissimum Sinarum Imperium, in quo strenuâ Euangelicorum Ministrorum opera à multis jam annis Christus annunciat, & colitur, majoresque inde fructus (Deo incrementum dante) expectari meritò possunt. Verùm quia in latissimis illis regionibus, quæ albæ sunt jam ad messem, inimicus homo ab aliquot annis multipliciter zizania superfeminare non cessat, nè Christianæ fidei seges, quæ, ut audivimus, ab ethnicis illarum partium potestatibus crescere sinitur, Ejus profectò ope, qui olim suscitavit spiritum Cyri Regis Persarum, ut juberet prædicari in universo Regno suo etiam per Scripturam, Apostolicorum Missionariorum, quod maximè deslendum esset, in diversâ tendentium dissidiis, veluti spinis, suffocetur, & pereat; utque insimul pluribus, variisque vastissimæ illius Missionis necessitatibus prospiciatur, ejusdemque status, ac in ea laborantium Operariorum studia huic Sanctæ Sedi fideliter innotescant; Divino priùs per Nos diuturnis, atque accuratis precibus implorato præsidio, ut mentem nostram lumine suæ claritatis instrueret, habitâque super præmissis cum quibusdam ex Fraternitatibus Vestris, nempe cum particulari Congregatione Cardinalium negotiis propagandæ Fidei præpositorum deliberatione maturâ, Virum aliquem morum integritate, doctrina, atque prudentia commendatum, Visitatorem Apostolicum cum potestate Legati de Latere ad præfatum Sinarum, aliæque finitima Indiarum Orientalium Regna unâ cum congruo Missionariorum comitatu in nomine Domini mittere constituimus. Quò verò is majori cum honorificentia ad Dei glo-

C

riam,

riam, animarumque pretiosissimo Unigeniti Dei Filii Domini nostri Jesu Christi Sanguine redemptarum salutem, tanto fungi valeat ministerio, Patriarchali cum titulo Antiochenæ Ecclesiæ de præsentis vacantis decorare intendimus; opportunum scilicet ducimus, ut qui ad novos Christifideles mittendus est, ejus potissimum Civitatis Pastor existat, ubi, ut in Apostolorum actibus habemus, primum cognominati sunt discipuli Christiani.

Vacat igitur Ecclesia Patriarchalis Antiochena per obitum Michaelis Angeli Matthæi ultimi illius Patriarchæ.

Antiochena Civitas inter Regias Syriæ Urbes primaria, dignitate non minùs, quàm magnitudine celeberrima, nunc penè inhabitata sub Turcarum Tyrannide reperitur; ideò illius statum desleri magis, quàm enarrari congruum est.

Eidem Ecclesiæ Patriarchali præficere intendimus eum, quem, ut diximus, uti Visitatorem Apostolicum cum potestate etiam Legati de Latere ad Sinarum, aliaque Indiarum Orientalium Regna mittere decrevimus, videlicet dilectum Filium Carolum Thomam Maillard de Tournon ex Catholicis, & nobilibus parentibus in Civitate Taurinensi ortum, Juris utriusque Doctorem, Sacræ Theologiæ Magistrum, in sacro Presbyteratus Ordine à pluribus annis constitutum, ac Cubicularium nostrum honoris nuncupatum, virum sanè, quemadmodum etiam familiari experienciâ novimus, pietate, doctrinâ, & prudentiâ longè præstantem. Quid Vobis videtur?

Authoritate Omnipotentis Dei, Sanctorum Apostolorum Petri, & Pauli, ac nostrâ,

Providemus Ecclesiæ Patriarchali Antiochenæ de persona præfati Caroli Thomæ, præficientes eum in Patriarcham, & Pastorem, cum retentione omnium, & quorumcumque, quæ obtinet.

In nomine Patris †, & Filii †, & Spiritus † Sancti. Amen.

IN



IN CONSISTORIO SECRETO

Habito die 8. Maji 1702.

ARGUMENTUM.

Deputat D. Cardinalem Carolum Barberinum suum, & Apostolicæ Sedis de Latere Legatum ad Philippum V. Hispaniarum Regem Catholicum, Neapoli commorantem.

VENERABILES FRATRES.



Um, sicuti nostis, Charissimus in Christo Filius noster Philippus Hispaniarum Rex Catholicus nuperrimè ab Hispaniis in Italiam transmiserit, Nos, ne opportunitatem hanc eidem in tanta Urbis vicinitate verfant, quæ, & quanta sit paterna nostra erga eum charitas, declarandi præterlabi patiamur, Romanorum Pontificum Prædecessorum nostrorum exemplis ducti, nostrum, & Apostolicæ Sedis de Latere Legatum Dilectum Filium Nostrum Carolum S. R. E. Presbyterum Cardinalem Barberinum, cui præter domestica gentis suæ in eandem Sedem, merita, prudentia, integritas, doctrina, animi magnitudo, aliæque eximix virtutes ad amplissimum hoc munus gerendum egregiè suffragantur, ad prædictum Philippum Regem depu-

VIII.

tare intendimus, ut Apostolicam Nostram Benedictionem illi deferat, incolumem in Italiam adventum gratuletur, nostraque illi explicet vota, ut hic idem ejus adventus in exoptatæ publicæ tranquillitatis cedat auspiciū.

Quid Vobis videtur?

Auctoritate Omnipotentis Dei, Sanctorum Apostolorum Petri, & Pauli, ac nostra,

Supradictum Carolum Cardinalem Barberinum nostrum, & Sedis Apostolicæ de Latere Legatum deputamus, & declaramus ad præmissa peragenda cum facultatibus, & clausulis solitis, & opportunis.

In nomine Patris †, & Filii †, & Spiritus † Sancti. Amen.





IN CONSISTORIO PUBLICO

Habito die 20. Julii 1702.

ARGUMENTUM.

Excepit benignè D. Cardinalem Carolum Barberinum ab Apostolica Legatione, de qua proximè, reducem ; qui Sanctitatem Suam his verbis allocutus fuit.

BEATISSIME PATER.



Erfunctus munere, quod SANCTITAS VESTRA eximiâ in me Clementiâ, immerenti licet, imponere dignata est ; Sistor Sanctissimis Pedibus tuis, quibus, qua par est, demissione advolutus, quod unum profiteri verissimè possum, hoc est Sacrosanctam Apostolicam Dexteram tuam suscepisse me, ac in virtute sua deduxisse me, eandemque cum gaudio reduxisse me ; adeò ut exploratum planè sit votorum tuorum pretium extitisse, obedientiæ meæ in exequendis mandatis tuis complementum.

Quæ autem, SANCTISSIME PATER, Catholico Hispaniarum Regi Philippo V. de tenerrimi amoris tui, paternæque Benevolentiae, ac intimæ Pontificiæ charitatis sensu exposui, longè minora fuerunt eloquio tuo præ exilitate sermonis mei.

Quæ verò reposuit Rex pietate, ac zelo præclarus de suâ

filiâ-

filiali devotione, parataque obedientia in Sanctitatem Vestram, ac in Sanctam Sedem Apostolicam, quos ambos Parentes suos amantissimos iteratò compellavit, signanter dum exciperet auream Domini Crucem, gemmis terrenis, atque cœlestibus pretiosissimè ditatam, ipsique à SANCTITATE VESTRA dono missam, hæc, inquam, majora profectò sunt, quàm ego verbis ullis valeam explicare. Reliquum est, ut meum esse dignoscam, in quibus aut defecerim, aut defuerim, veniam humillimè, ac obnixè deprecari. Tuum deindè fuerit, BEATISSIME PATER, ingenti, qua unicè polles, animi magnitudine, benignissimè ignovisse, ac Apostolica largitate condonasse.

Ad hæc Sanctitas Sua ita respondit :

IX.

INjunctum tibi munus, Dilecte Fili Noster, tam præclarè gessisti, votisque, ac expectationi de te nostris tam cumulatè, ac prorsus ex hujus Sanctæ Sedis dignitate respondisti, ut meritò tibi nunc à peracta Legatione feliciter redeunti Pontificiæ laudes, Collegarum plausus, ac universæ planè Urbis gratulationes debeantur. Ceterum quæ de eximia Charissimi in Christo Filii Nostri Philippi Hispaniarum Regis Catholici pietate, filialique in nos, & Apostolicam Sedem observantia retulisti, tametsi Nobis plurimorum literis, & sermone, imò etiam fama ipsa nunciante, jampridem innotuerint, à te tamen hoc loco commemorari libenter audivimus; hinc siquidem omnium, quotquot hîc adsunt, preces excitari confidimus ad divinam bonitatem exorandam, ut cor Regis in dies roboret ad ea peragenda, quæ Christianæ Reipublicæ, ac Catholicæ Ecclesiæ læta esse possunt, & salutaria; inter quæ illud fanè præcipuum esse omnes intelligunt, ut tam Ipse, quàm reliqui Christiani Principes, translatis in infidelium terras iisdemmet, quibus inter se digladiantur, armis, non alia in posterum, quàm bella Domini, præliantur.

IN



IN CONSISTORIO SECRETO

Habito die 15. Januarii 1703.

ARGUMENTUM.

Concussa ingenti terræmotu proximâ nocte, ac magnoperè deterritâ Urbe, DD. Cardinales admonet recentem hanc calamitatem perspicuum esse cœlestis iræ peccatis hominum laceratæ argumentum, eosque ad illa edenda veræ pœnitentiæ, & Christianæ pietatis exempla, quibus Divina Misericordia concilietur, accendit.

VENERABILES FRATRES.



Ræteritâ nocte, ut probè nostis, dedit Dominus metuentibus se significationem ut fugiant à facie arcus. Commovit terram, & conturbavit eam: sanavit contritiones ejus, quia commota est: Iratus est, & misertus est nobis. Sunt hæc profectò miserationis Dei monita, qui ostendit populo suo dura, ut potaret nos vino compunctionis; sunt Patris amantissimi voces, quas Nos, uti filios obsequentissimos, auscultare convenit, ne aliàs inter tot, quibus circumdamur, obstrepentium malorum pericula miserè indormientes, exprobrari Nobis audiamus propheticum illud: percussisti, eos, & non doluerunt, attrivisti eos, & renuerunt accipere disciplinam. Fecerunt peccata nostra,

ut

X.

ut in ea propemodum luctuosa tempora incidisse videamur, de quibus Salvator noster prædixit: *Surget gens contra gentem, & regnum adversus regnum, & erunt terræmotus per loca*. Quod tamen, Christi Domini verbis utentes, non sine lacrymis dicimus: *hæc omnia initia sunt dolorum*. Adeamus igitur, nullâ interpositâ morâ, ad thronum gratiæ, & deposito per veram pœnitentiam peccatorum pondere, obsecrationibus, jejuniis, elemosynis, aliisque pietatis operibus, Divinam Nobis misericordiam conciliemus, & Domino, cujus dies propè est, corda nostra præparemus. Hæc autem ut ferventiori charitate, uberiorique fructu fiant, cœlestium munerum thesauros, quorum dispensationem Nobis credidit Altissimus, quantociùs proferre, & liberali manu erogare non omittemus. Interim iis omnibus, qui mox Deo dante, ad gloriosum, & nunquam desitutum Beatorum Apostolorum Urbis nostræ Patronorum Sepulchrum Nobiscum accedent, ac nostris opportunam necessitatibus opem, quam Nos privato nostro Sacrificio ibidem hac ipsâ die humiliter invocavimus, conjunctis precibus implorabunt, triginta annos, & totidem quadragenas de injunctis eis, aut aliàs quomodolibet debitis pœnitentiis in forma Ecclesiæ consueta relaxamus. Agite ergo, VENERABILES FRATRES, quippe qui statuti estis custodes super muros Jerusalem, noctu, atque interdiu clamate, ac iram Domini flagitiis hominum provocatam placare contendite. Exinanite calicem furoris, & ruinæ, calicem doloris, & tribulationis. Arripite thuribulum, hoc est, preces Sanctorum, & medii inter ignem, & arsurum populum consistite. Ponite ob oculos institutum, quod profitemini, personam, quam sustinetis, sacram, & Christi Sanguine rubentem purpuram, quam induistis. Sint pedes vestri pedes euangelizantium pacem, ut ita conterantur arcus, & sagittæ, atque imperet Deus ventis, & faciat tranquillitatem.



IN CONSISTORIO SECRETO

Habito die 19. Februarii 1703.

ARGUMENTUM.

Concussa iterum vehementiori terramotu Urbe in Festo Purificationis B.V., quo tempore Pontifex cum DD. Cardinalibus in Sixtino Sacello Sacris operabatur, Sanctitas Sua honorificè primum commemorat Christianæ pietatis exempla, quæ tum DD. Cardinales, tum populus universus, ediderant ad avertendum atrox Divinæ iracundiæ flagellum. Indicit subindè Cappellam solemnè ritu celebrandam in Basilica Vaticana die 22. præfati Mensis Februarii pro agendis Deo gratiis ob præservationem Urbis à periculo ejusdem nuperi terræmotus, nec non ad Divinam opem in posterum implorandam. Denique pervigilium Festi Purificationis B.V. deinceps Romæ quotannis cum jejuniis servari, ac in eodem Festo post solemne Sacrum, quod in Pontificia Cappella de more peragitur, hymnum Te Deum laudamus perpetuò decantari decernit.




Quantas misericordias novissimis hisce diebus nobiscum fecerit Dominus optimè nostis, VENERABILES FRATRES, quippe qui tot, tantisque Christianæ pietatis exemplis fideli populo præeuntes, Divinæ iracundiæ terrores in nostrorum medelam vulnerum convertistis. Cognovistis perfectò tempus visitationis vestræ, cognovit & populus, dum eadem propemodum Dei voce, qua fundamenta montium

XI.

D

con-

conturbata sunt, & commota sunt, ad salutarem pœnitentiam vocatus verè expertus est, illuxisse coruscationes Domini Orbi terræ, dum commota est, & contremuit terra. Patri igitur misericordiarum, à quo tanta hæc nobis bona effluxere, sacrificandum est sacrificium laudis, ut, quos meritò castigare minatus est errantes, foveat sua miseratione correctos. Ad eandem proinde aram, ad quam publicis indictis supplicationibus primò confugimus, pro acceptis beneficiis gratias acturi, iterum redire constituimus; proximam idcirco Festivitatem Antiochenæ Cathedræ B. Petri Apostolorum Principis, quæ erit feria quinta post Cineres, in ejus Basilica cum solemnî Missâ Vobiscum celebrabimus, ipsius Apostolorum Principis patrocinio confisi, ut nullis de cætero permittat Nos Dominus perturbationibus concuti, quos in Apostolicæ confessionis petra solidavit. Præterea, ut in memoria æterna sit dies, qua cogitantem Dominum dissipare murum filiæ Sion, impavida precum vestrarum humilitate, placastis, singulis annis in Festo Purificationis Beatissimæ Virginis Mariæ absoluto Sacro, quod ea die in Pontificia Cappella de more peragitur, hymnum *Te Deum laudamus* perpetuò decantari, ipsiusque Festi pervigilium in ejusdem Deiparæ obsequium cum jejunio, Dilectis Filiis Senatu, Populoque Romano id ipsum quàm enixè expetentibus, perpetuò itidem in hac Almâ Urbe nostra servari omninò volumus, ac præcipimus. Reliquum est, VENERABILES FRATRES, ut quæ tam grandia Nobis contulit dona Divina dignatio, constanti, quæ Dei Ministros maximè decet, Christianarum virtutum exercitatione perennia reddamus.



IN CONSISTORIO SECRETO

Habito die 17. Decembris 1703.

ARGUMENTUM.

Creat S.R.E. Presbyterum Cardinalem Franciscum Pignatellum Archiepiscopum Neapolitanum.

VENERABILES FRATRES.



Ecurrunt dies Orationi, ac jejunio consecrati. Ideò juxta priscum Majorum nostrorum morem ad gloriam Omnipotentis Dei, Sanctæque Romanæ Ecclesiæ præsidium, ac decus, creare intendimus unum Presbyterum Cardinalem, videlicet Venerabilem Fratrem Franciscum Archiepiscopum Neapolitanum; æquum enim censemus, ut Prædecessoris nostri, qui carnem, & sanguinem respicere constantissimè usque ad obitum recusavit, meritis Agnatus, non minùs hoc nomine, quàm ob egre-

XII.

gias suas, & sacro Antistite dignas virtutes commendatus Pontificiæ nostræ largitatis primitias experiatur.

Quid vobis videtur?

Authoritate Omnipotentis Dei, Sanctorum Apostolorum Petri, & Pauli, ac nostrâ, creamus S. R. E. Presbyterum Cardinalem Franciscum Pignatellum Archiepiscopum Neapolitanum, cum clausulis necessariis, & opportunis.

In nomine Patris †, & Filii †, & Spiritus † Sancti. Amen.





IN CONSISTORIO SECRETO

Habito die 18. Maji 1705.

ARGUMENTUM.

*Leopoldi I. Romanorum Regis in Imperatorem electi obitum
DD. Cardinalibus denunciat, ejusque virtutes honorificâ lau-
datione commemorat.*

VENERABILES FRATRES.



Llatum ad Nos hesternâ die tristissimum
nuncium de obitu cla. me. Leopoldi Roma-
norum Regis in Imperatorem electi, non
sine maximo paterni cordis nostri mœrore,
Vobis hodie communicare volentes, iisdem
planè verbis utemur, quibus Beatus olim

XIII.

Ambrosius suam in Theodosii Imperatoris funere exorsus est
laudationem : *Hoc nobis* (inquit ille) *hoc nobis motus ter-
rarum graves minabantur, quod clementissimus Imperator
recessurus esset è terris.* Eam itaque Christianæ Reipublicæ
jacturam, quam nuper nutante solo natura ipsâ præsenferat,
dolenti quidem, & amaro animo, nullâ tamen interpositâ
morâ, nimirum statim, ac illam per celerem Curforem acce-
pi-

pimus, Vobis similiter denunciamus, non tam ut de tanti Principis morte nobiscum impensè doleatis, quàm ut ipsius Animam precibus, aliisque Ecclesiæ suffragiis celerius juvare possitis. Quamvis enim eximia ejus in Deum pietas, in homines comitas, atque clementia, ceteræque illius egregiæ virtutes, animique potissimum & in prosperis moderatio, & in adversis mira planè constantia, sperare Nos faciant eum è terreno ad coeleste Regnum, quò omnes Christiani tendimus, miserante Domino, fuisse translatum; nihilominus quoniam, qui aliis præsumus, aliis durius, (quod trementes dicimus) judicandos Nos esse, sacris admonentibus literis, dubitare, nequaquam possumus; ideò & ratione ducimur, & debito Christianæ charitatis urgemur, ut sacrificiis, orationibus, & obsecrationibus defuncti Principis Animæ solatium comparemus. Id porro & privatim Nos ipsi jam agere cœpimus, Vosque unà Nobiscum prosequi optamus; hoc ipsum publicis suo tempore in Pontificio nostro Sacello Exequiis, postquam scilicet debitæ, ac consuetæ erga hanc Sanctam Sedem obsequii significationes ad Nos perlata fuerint, statà die Vobis indicendâ, juxta Prædecessorum nostrorum morem, solemni ritu præstare non omittemus.





Philippus de S. S. S. S.

Bartholomaeus de S. S. S. S.

Marcellus de S. S. S. S.

IN CONSISTORIO SECRETO

Habito die 17. Maji 1706.

ARGUMENTUM.

*Creat viginti S. R. E. Cardinales, ex quibus novendecimi evul-
gat, unum verò in pectore reservat, arbitrio suo quando-
cumque declarandum.*

VENERABILES FRATRES:



Ostulat Roma, postulat Curia, postulat Ec-
clesia, ut imminutum jam valde Fraterni-
tatum Vestrarum numerum augeamus. Hinc
Christi Domini exemplo moniti, qui ante-
quam è Discipulis suis eligeret Apostolos,
exiit in montem orare, & fuit pernoctans
in oratione Dei, illiusque potissimum temporis opportuni-
tatem nacti, quo iidem Apostoli post Christi Domini conscen-
sum in Caelos, mox adventuro Spiritu veritatis replendi, erant
omnes unanimiter in oratione perseverantes: enixis tam no-
stris, quam aliorum precibus Patrem misericordiarum exo-
ravimus, ut Nobis divinae suae gratiae lumine adestet, quo ta-
les ad sublime hoc in Ecclesiâ Dei munus deligeremus, qui

exi-

XIV.

eximiam pietatem, ac zelum Vestrum æmulantes, gravissimum infirmitati nostræ impositum onus levare, ac Pastorem sollicitudinem nostram opere, & consilio juvare non præmitterent. Hac igitur, quam tam ferventer imploravimus, cœlesti ope confisi, ad majorem Omnipotentis Dei gloriam, Sanctæque Romanæ Ecclesiæ decus, & utilitatem, creare intendimus cos omnes, nempe viginti, qui ad septuagenarium Vestrum numerum complendum in præsens desunt, Cardinales, & ex his novendecim nunc evulgare, videlicet.

Franciscum Martellum Patriarcham Hierosolymitanum.

Joannem Badoero Patriarcham Venetiarum.

Laurentium Casonum Archiepiscopum Cæsareæ.

Laurentium Corfinum Archiepiscopum Nicomediæ.

Laurentium de Flisco Archiepiscopum Januensem.

Franciscum de Aquaviva Archiepiscopum Larissensem.

Thomam Ruffum Archiepiscopum Niceæ Cubiculi nostri Præfectum.

Horatium Philippum Archiepiscopum Spadam Episcopum.
Lucanum.

Philippum Antonium Archiepiscopum Gualterium Episcopum
Imolensem.

Christianum Augustum è Ducibus Saxonæ Episcopum Jaurinensem.

Raynutium Pallavicinum Almæ Urbis nostræ Governatorem.
Carolus Columnam Protonotarium Apostolicum, & Palatii
nostri Apostolici Præfectum.

Jo: Dominicum Paraccianum Protonotarium similiter Apostolicum, & Auditorem nostrum.

Alexandrum Caprara, &

Josephum de la Tremoille Rotæ Romanæ Auditores.

Petrum Priolum Cameræ nostræ Apostolicæ Clericum, ac fel.

rec. Alexandri PP. VIII. Prædecessoris nostri Pronepotem,
cujus memoriæ notum omnibus est quantum debeamus.

Nicolaum Grimaldum Congregationis Episcoporum, & Regu-
larium Secretarium.

Carolus Augustinus Fabronius Congregationis de Propa-
ganda Fide Secretarium.

Gabrielem Philippucium Signaturæ Justitiæ Votantem.

Unum in pectore reservare intendimus, arbitrio nostro quan-
documque evulgandum.

Quid vobis videtur?

Authoritate Omnipotentis Dei, & Sanctorum Apostolorum
Petri, & Pauli, ac nostrâ, creamus S. R. E. Presbyteros,
& respectivè Diaconos Cardinales

Franciscum Martellum Patriarcham Hierosolymitanum.

Joannem Badoero Patriarcham Venetiarum.

Laurentium Casonum Archiepiscopum Cæsareæ.

Laurentium Corfinum Archiepiscopum Nicomedie.

Laurentium de Flisco Archiepiscopum Januensem.

Franciscum de Aquaviva Archiepiscopum Larisensem.

Thomam Ruffum Archiepiscopum Niceæ.

Horatium Philippum Archiepiscopum Spadam Episcopum
Lucanum.

Philippum Antonium Archiepiscopum Gualterium Episcopum
Imolensem.

Christianum Augustum à Ducibus Saxonie Episcopum Jauri-
nensem.

Raynutium Pallavicinum.

Carolus Columna.

Jo: Dominicum Paraccianum.

Alexandrum Caprara.

Josephum de la Tremoille.

Petrum Priolum.

Nicolaum Grimaldum.


Carolus Augustinus Fabronum.

Gabrielem Philippuccium.

Cum dispensationibus, derogationibus, & clausulis necessariis,
& opportunis. Unum in pectore reservamus arbitrio nostro
quandocumque declarandum.

In nomine Patris ꝑ, & Filii ꝑ, & Spiritus ꝑ Sancti. Amen.





IN CONSISTORIO SECRETO

Habito die 7. Junii 1706.

ARGUMENTUM.

Cardinalatus recusationem à R. P. D. Gabriele Philipuccio rite factam admittit, & in ejus locum S. R. E. Presbyterum Cardinalem creat Reverendissimum D. Michaelem Angelum de Comitibus Archiepiscopum Tarsensem.

VENERABILES FRATRES.



Inter eos, quos in præterito Consistorio, de unanimi Fraternitatum Vestrarum consilio pariter, & assensu, Cardinales creavimus, fuit; sicuti nostis, dilectus Filius Gabriel Philippuccius Signaturæ Justitiæ votans. Curaverat is quidem prius Nobis non obscure indicari animum suum à tantæ Dignitatis, quam sibi deferendam audierat, fulgore refugientem; sed, ut verum ingenuè fateamur, Christiana hæc, & rara Viri humilitas potius Nos in suscepto consilio magis confirmavit. Clariùs ille postmodum, ac disertius sensus suos aperuit supplici libello Nobis in eodem Consistorio per Dilectum filium Nostrum Galeatum Cardinalem Marefcottum porrecto, cujus tenorem tunc audivistis, & hodie iterum audictis. Noluimus

XV.

hac in re quidquam tunc inconsultâ celeritate decernere : sed solum eidem Gabrieli longius tempus ad deliberandum concedere velle declaravimus, ut tam suis, quàm aliorum precibus divinam voluntatem accuratius exploraret ; sperantes profectò, tametsi à compellendo invitum verè essemus alieni, quod ipse serius animo reputans se per ministerium nostrum à Deo vocatum fuisse, iudicio tandem nostro acquiescere deberet, ac non minus amicorum lacrymis, quàm suasionibus flecti. Verùm aliter omninò res accidit ; ille siquidem propositi tenax, accepto gestæ rei nuncio, idem, quod antea, constantissimè semper sensit, idem, quod antea, demississimè semper precatus fuit. Nullum interea Nos, adhibitâ ad id spectatæ pietatis, & prudentiæ Virorum operâ, hortationis genus omisimus, quo optimum Senem de susceptâ sententiâ deduceremus, ac rationes, quibus ille causam suam, orabat, rejiceremus ; omnia tamen irritò conatu : nec solum irritò, sed ei insuper gravi adeò, & molesto, ut ipsa ejus vita in propinquum inde discrimen penè adducta fuerit. In hoc rerum statu quid consilii capere deberemus, à compluribus ex Fraternitatibus Vestris, quarum fideli in sinu Pontificiæ sollicitudinis curas deponere consuevimus, libentissimè exquisivimus, & sanè re maturè, ac diligenter, quemadmodum vestri moris est, discussâ, nullam renuenti vim adhibendam esse unanimes censuistis. Interim idem Philippuccius, ne de constanti ejus voluntate recusandi, refutandi, ac etiam renunciandi Cardinalatum unquam dubitari contingeret, omnia, & singula in supplici superiùs enunciato libello contenta confirmando, & ampliando, uberiùs adhuc, & solemniùs animum suum hac in re declaravit, publico desuper celebrato Instrumento, quod mox à Secretario Collegii vestri legendum erit.

Perle&um subindè fuit à D. Secretario Sacri Collegii elata

voce memoratum Instrumentum, cujus absolutâ recitatione Sanctissimus inceptam Orationem his verbis prosecutus est.

His omnibus attentis, B. Gregorii Prædecessoris nostri exemplum sequentes, qui invitum neminem Episcopale onus subire Apostolica jussione coegisse unquam reperitur: recusationem, repudiationem, seu renunciationem à præfato Gabriele Philippuccio, sicut præmittitur, factam, admittere intendimus, eidem Gabrieli forsan aliquando illud ipsum dicturi, quod prædictus B. Gregorius cuidam Sebastiano, qui commissum sibi ab Anastasio Patriarcha Ecclesiæ regimen recusaverat, rescripsit, videlicet: *Sensum, ac sapientiam vestram valde ego libenter amplexus sum, laudavi vehementer, & Vos felices, me infelicem esse deputavi, qui hoc tempore regimen Ecclesiæ suscepisse consensi.* Faxit Divina Bonitas, quæ omnia sapienter disponit, ex humili hac amplissimæ Dignitatis recusatione non minus utilitatis, & ornamenti in Ecclesiam derivari, quàm ex tot præstantium Virorum laboribus, qui gravia ejusdem Dignitatis onera non refugerunt.

Quid Vobis videtur?

Auditis postmodum singulorum Eminentissimorum Cardinalium sententiis, qui unanimes oblatam à R. P. D. Philippuccio Cardinalatus recusationem admittendam censuerunt, Sanctissimus Apostolico Decreto sequentibus verbis concepto ejusmodi recusationem admisit, & approbavit.

Auctoritate Omnipotentis Dei, Sanctorum Apostolorum Petri, & Pauli, ac nostrâ admittimus recusationem, repudiationem, seu refutationem, & quatenus opus sit, renunciationem, ac dimissionem juris, quod acquisivit, vel acquirere potuit præfatus Gabriel Philippuccius ex ejus promotione ad Cardinalatum in superiori Consistorio per Nos facta, ejusque locum vacantem, ut prius, declaramus, perinde ac si promotio de illius persona facta numquam fuisset. Præterea, quatenus opus sit,

fit, & ad abundantiorē cautelam, concedimus ei retentionem Canonicatus, & Præbendæ Ecclesiæ Sancti Joannis in Laterano, nec non Officii Doctoris Decretorum Pœnitentiariæ Apostolicæ, ac pensionum omnium Ecclesiasticarum, quas de præsentī obtinet, cum derogationibus, & clausulis necessariis, & opportunis.

In nomine Patris ꝑ, & Filii ꝑ, & Spiritus ꝑ Sancti. Amen.

Deventum postea fuit, ut moris est, ad propositionem, & respectivè præconium plurium Ecclesiarum, quibus finitis Sanctissimus ita rursus locutus est.

VENERABILES FRATRES.

XVI.

Locum Collegii Vestri, quem admisā nuper recusatione, repudiatione, seu renunciatione Dilecti Filii Gabrielis Philippucci, ut prius, vacare declaravimus, absque ulla cunctatione implere volumus, adeoque ad majorem Omnipotentis Dei gloriam, ac Sanctæ Romanæ Ecclesiæ præsidium, & decus creare intendimus Presbyterum Cardinalem Venerabilem Fratrem Michaelē Angelum de Comitibus Archiepiscopum Tarfensem. Quid Vobis videtur?

Auditis DD. Cardinalium votis promotionem antedicti Reverendissimi de Comitibus Archiepiscopi Tarsensis, apud Regem Portugalliæ Nuncii Apostolici ordinarii, unanimiter approbantium, eundem Archiepiscopum Presbyterum Cardinalem creavit, adhibitā consueta verborum formula, videlicet.

Auctoritate Omnipotentis Dei, & SS. Apostolorum Petri, & Pauli, ac nostra creamus S. R. E. Presbyterum Cardinalem, Michaelē Angelum de Comitibus Archiepiscopum Tarfensem cum derogationibus, & clausulis necessariis, & opportunis.

In nomine Patris ꝑ, & Filii ꝑ, & Spiritus ꝑ Sancti. Amen.



Dono Les Doccine q'on del et d'oul.

IN CONSISTORIO SECRETO

Habito die 6. Decembris 1706.

ARGUMENTUM.

Rationes exponit, quibus ad promulgandum biduo ante Jubileum adductus fuerat. Subinde DD. Cardinales ad implorandam enixius à Deo inter Christianos Principes pacem excitat. Ac demum eos, ut & assidua bonorum operum, illustrumque virtutum exempla ipsi edant, & domesticorum suorum vigilem curam habeant, ac illos præcipuè, qui ordinis sunt Clericalis, urgeant ad Sanctionem de Clericalis habitus disciplinâ, quam propediem evulgare decreverat, exactè observandam adhortatur.

VENERABILES FRATRES.



X illa die, qua mirabilia fecit Nobiscum Dominus, ac humilitatem nostram ad Catholicæ Ecclesiæ gubernacula, hoc est ad munus, & sua amplitudine gravissimum, & temporum iniquitate, molestiarum, periculorumque plenissimum vocare voluit: seriò cogitantes quantum oneris, & laboris impositum fuerit imbecillitati nostræ, cujus Nobis probè confcii sumus, quantifque, & quàm gravibus Christiana Respublica malorum procellis

agi-

XVII.

agitaretur, crebra ex imo corde suspiria, ac uberes ex oculis lacrymas fundere coacti fuimus, ingenti sanè pavore correpti, ne in altitudinem maris delati, surgentibus undique tempestatibus demergeremur. Quæ tamen inter gravissimas, multiplicesque curas, quibus assidue urgemur, animum nostrum acrius, vehementiusque angit, sollicitudo ea est, quam de fervente inter Christianos Principes gravi, atrocique bello, quod florentissimas Europæ Provincias cædibus, ruinis, excidiis, & vastationibus complet, omniaque sacra, & prophana miscet, corde jugiter versamus. Nullum propterea, ex quo hunc locum non minùs inviti, quàm immerentes, Deo sic disponente, conscendimus, vel laborem recusavimus, vel officii genus omisimus, quo publicæ tranquillitatis opus omni animi contentione, studio, atque operâ promoveremus: parati insuper rem hanc non minùs arduam, quàm salutarem, majori conatu etiam in posterum urgere, præsertim verò beneficio temporis, quod nunc labitur, longè opportunius negotiorum, quàm armorum tractationi. Verùm quia non hoc humanæ vires, aut terrena consilia moliri possunt, sed illius donum dumtaxat esse debet, *super quem est disciplina pacis nostræ, qui aufert spiritum Principum, atque increpat mari, & obmutescit*; idcirco ut misericordiam ab eo consequamur, & gratiam inveniamus in auxilio opportuno, laudabilia Prædecessorum nostrorum vestigia sectantes ad vestras, & universæ Ecclesiæ preces confugere, Fideliumque pietatem prolati ad id liberali manu cœlestium munerum thesauris excitare, decrevimus. Hanc ob rem animum induximus, ut plenariam omnium peccatorum Indulgentiam in forma Jubilei concederemus omnibus Christianis in Alma Urbe nostra quidem degentibus, qui solemnî Processioni, quam feriâ quinta currentis hebdomadæ à Cappella publica Palatii Nostri Apostolici in Vaticano ad Basilicam Principis Apostolorum, benedicente

Domino, agemus, devotè interfuerint, vel S. Joannis in Laterano, ejusdem Principis Apostolorum, ac S. Mariæ Majoris Ecclesias, vel earum aliquam intrà spatium ejusdem, vel proximè subsequētis hebdomadæ visitaverint; ibique oraverint, ac quarta, & sexta Feriis, ac Sabbato alterius ex præfatis hebdomadis jejunaverint, & peccata sua confessi, sacram Communionem sumpserint, pauperibusque eleemosynam, prout sua cuilibet pietas suaferit, erogaverint. Ceteris verò extra Urbem prædictam ubicumque degentibus, qui Ecclesias ab Ordinariis locorum designandas spatio similiter duarum hebdomadarum visitaverint, & alia omnia præmissa adimpleverint. Agite igitur, VENERABILES FRATRES, opportuno hoc, atque acceptabili Dominici Adventus tempore Deum, qui est multæ misericordiæ omnibus invocantibus se, sine intermissione obsecrate, ut *auferens bella usque ad finem terræ, arcum conterat, & confringat arma, & scuta comburat igni*; in oratione, in lacrymis, in jejuniiis, atque eleemosynis scindite corda vestra, atque estote cœlestis iræ, & divinæ ultionis placamina. In omnibus, ut Apostolus admonet, & Vos, miserante Domino, facere consuevistis, præbete Vos ipsos exemplum bonorum operum; sublimemque, ac præclarum locum, quem in Catholicâ Ecclesiâ obtinetis, eximiarum virtutum splendore illustrare pergite. Enixè Vobis potissimùm commendamus, ut vigilem Domesticorum vestrorum curam habeatis, quorum aliquandò vitiis ipsa Dominorum virtus obnubilatur. Illos proinde ita regite, atque instruite, ut in omnibus suis actibus nil, nisi grave, moderatum, ac Religione plenum præferrerant; ab iis porrò, quos ex illis in fortem Domini vocatos esse contigerit, exactè adeò, ac fideliter Sanctionem illam, quam pro veteri Clericalis habitus disciplinâ instauranda, ac abusibus, qui hac in re deplorandum in modum irrepserunt, tollendis propediem evulgari curabimus, observari studete; ut

per decentiam habitus extrinseci; (Concilii Tridentini verbis loquimur) morum honestatem intrinsecam ostendant , aliisque exemplo esse possint, sicut decet Ministros Mysteriorum Dei. Splendor vester facit, VENERABILES FRATRES, ut peccare sine summo Reipublicæ detrimento, ac periculo non possitis. Ab iis quippe, quibus plus datum est, plus etiam requiretur. Vos estis lux mundi, ac Civitas supra montem posita; In quos ex universa Ecclesia Populi, tanquam in Speculum, oculos suos conjiciunt; Necesse ergo est, ut ex Vobis habeant, quod imitentur.





IN CONSISTORIO SECRETO

Habito die 21. Februarii 1707.

ARGUMENTUM.

Petri Portugalliæ, & Algarbiorum Regis obitum, extremâ devoti ejus in se, & Apostolicam Sedem studii declaratione honorificè commemoratâ, D. D. Cardinalibus nunciat; tum paterne monita, quibus novum Regem defuncti Natum ad æmulanda Majorum suorum de Catholica Fide optimè meritorum exempla incitaverat, exponit.


VENERABILES FRATRES.



Tſi Vobis, vel ipſo rumore publico nunciante, jampridem innotuiſſe non dubitemus cla. me. Petri, dum viveret, Portugalliæ, & Algarbiorum Regis obitum: illum tamen, quem nuperrimè per ſuas ad Nos datas literas uberibus erga hanc Sanctam Sedem obſequii, atque obedientiæ declarationibus refertas Chariffimus in Chriſto Filius noſter Joannes Rex ejus Natus, Regniſque ſucceſſor Nobis ſignificavit, ex hoc loco, ut moris eſt, nullâ interpoſitâ morâ, Vobis denunciamus, ut pro eâ, qua ſublimes Principes, qui in Catholicæ Eccleſiæ communio-

XVIII.

ne piè obierunt, prosequi apud Deum soletis, pietate, suffragiis vestris defuncti Regis animæ æterna gaudia comparare, non omittatis. Id ipsum & Nos privatim hætenùs agere non prætermisimus, ac publicis in Pontificio nostro Sacello celebrandis Exequiis, juxta Prædecessorum nostrorum morem, statâ die Vobis indicendâ, solemniter peragemus; câ profectò Nos ad id impellente paternâ charitate, qua eundem Regem semper prosecuti fuimus, quamque Ille proximè moriturus magis promeruit, addictum suum, ac Nobis, & Apostolicæ Sedi obsequentem animum suspiria inter, & lacrymas explicando, dum ei à Dilecto Filio Nostro Michaelè Angelo Cardinale de Comitibus Nuncio illic nostro extrema Pontificiæ largitatis officia amplissimis cœlestium munerum prolatis thesauris exhiberentur. Interim quemadmodum novum, ac juvenem Regem datis ad eum literis paternè hortati fuimus, ut in Regiæ Dignitatis fastigio collocatus Majorum suorum inclytæ memoriæ Regum, ac de Orthodoxa Fide optimè meritum exempla æmulari contendat, relaturus benedictiones à Deo, qui colentes se, & creditæ B. Petro, ejusque Successoribus potestati obsequentes sinè uberi mercede esse non patitur: ita misericordiarum Patrem, in cujus manibus sunt corda Regum, enixè exoramus, ut gressus servi sui Regis in viam mandatorum suorum dirigat, ejusque animum jugiter inflamet ad ea peragenda, quæ Christianæ Reipublicæ tot calamitatibus afflictæ, ac Catholicæ Ecclesiæ tam diuturnis Filiorum suorum diffidiis agitata læta esse possint, & salutaria.



IN CONSISTORIO SECRETO

Habito die 8. Junii 1707.

ARGUMENTUM.

Gestis aliquot ante dies in causa electionis Episcopi Monasteriensis breviter commemoratis, exponit Episcopum Paderbornensem, & Canonicos Monasteriensis Ecclesiæ, qui cum elegerant, humili retractatione emendasse quidquid contra Pontificium mandatum de proroganda Episcopi Monasteriensis electione quovis modo peccaverant, & recitatis literis tum ab Episcopo Paderbornensi, tum etiam à prædictis Canonicis ea de re ad Sanctitatem Suam datis, ad propositionem ejusdem Monasteriensis Ecclesiæ de more procedit.

VENERABILES FRATRES.



Iebus elapsis, ut probè nostis, cum in Congregatione rerum Consistorialium coram Nobis habita maturè, ac diligenter discussa fuisset celebris causa electionis Episcopi Monasteriensis, complurium ex Fraternitatibus Vestris, nec non complurium itidem ex Romanæ Curiae Prælatiis, qui eidem Congregationi interfuerunt, auditis Votis, electiones quidem à dilectis Filiis Capitulo, & Canonicis Ecclesiæ Monasteriensis inter se discordibus

fa-

XIX.

factas, utpotè nullas, & invalidas, minimè confirmandas esse censuimus; hujusmodi verò electionibus reprobatis, ac penitus abrogatis, decrevimus insimul vacanti Ecclesiæ prædictæ ex integro providere de persona Venerabilis Fratris Francisci Arnoldi Episcopi Paderbornensis, juxta modum à Nobis præscribendum. Modus porro, quem præscribere intendebamus, is fuit, ut tam idem Episcopus, quàm Canonici illi, qui cum nulliter elegerant, quicquid contra nostrum Pontificium mandatum de proroganda Episcopi Monasteriensis electione quovis modo peccaverant, humili priùs retractatione emendarent, atque ita Episcopus ipse non aliàs demùm, quàm omni prorsus erga nos, & hanc Sanctam Sedem inobedientiæ suspitione deterfa, ad Monasteriensem Ecclesiam à Nobis transferretur. Impleverunt jam omnes, quod debebant, suasque ad Nos Literas dederunt tam uberibus in nos, & eandem Sedem sincerae fidei, ac devotionis significationibus refertas, ut nihil jam pro explicanda præficiendi Episcopi vera obedientia, quæ Nobis debetur, nihil pro asserenda Apostolica auctoritate, cujus vindices sumus, Nobis optandum superfit. Leget illas mox Collegii Vestri Secretarius, iisque perlectis ad ipsius Ecclesiæ propositionem juxta consuetum morem procedemus.

Ingressus hic fuit Consistorium D. Secretarius Sacri Collegii, & alta voce legit literas à Reverendissimo Episcopo Paderbornensi, atque etiam à Canonicis Monasteriensis Ecclesiæ ad Sanctitatem Suam conscriptas; Quarum lectione absoluta Sua Sanctitas providit ex integro Ecclesiæ Monasteriensi de persona ejusdem Episcopi Paderbornensis servatis aliàs de more servandis.



IN CONSISTORIO SECRETO

Habito die 1. Augusti 1707.

ARGUMENTUM.

Quæ Ecclesiasticæ libertati, & Autoritati in Regno Neapolis, in Ducatu Sabaudia, & Principatu Pedemontii, ac nuperrimè in Ducatu Parmæ, & Placentiæ à laica potestate illata fuerant, gravissimis detrimentis summatim commemoratis, palàm facit sibi decretum, fixumque esse, quando in irritum ceciderant interpositæ plurics paternæ admonitiones severiora remedia infligendis Ecclesiæ vulneribus adhibere, ac ea, quæ Pastoralis officii ratio postulabat, viriliter exequi. Quod re ipsa, & illicò præstitit, promulgatis eo ipso tempore, quo Sua Sanctitas hæc in Consistorio diserebat, publicisque, & consuetis locis Urbis affixis tribus literis Apostolicis typis editis (Brevia vocant) quibus ea omnia, quæ in antedictis Dominiis gesta fuerant, Ecclesiasticæ jurisdictioni, ac immunitati præjudicialia damnavit, & nulla, ac irrita declaravit, pluraque alia pro Ecclesiæ libertate, & Pontificiæ Autoritatis tuitione constituit.

VENERABILES FRATRES.

XX.



X quo Catholicæ Ecclesiæ gubernacula non minùs inviti, quàm immerentes, Deo sic disponente, tractanda, suscepimus, venissè nos in altitudinem maris benè novimus, innumerasque, & sanè gravissimas è sublimi hac Apostolica specula Pontificatui nostro ingruentes tempestates benè prospeximus: nullam tamen difficultatis, & periculi pleniorè prævidimus, quàm quæ subeunda nobis erat adversùs sæculi potestates, nova in dies, & minimè toleranda Authoritati, libertatique Ecclesiasticæ præjudicia inferre molientes. Non proptereà concidimus animo, in eo confisi, qui sperantes in se confundi non patitur; Dei enim promissio est, quæ præterire non potest: *Quoniam in me speravit, liberabo eum*. Arguimus, obsecravimus, increpavimus, instantes *opportunè, importunè*, juxta Apostoli monitum, *in omni patientia, & doctrina*; pluries idcirco, suadente justitia, asperiora quæque aggredi parati fuimus: pluries, monente charitate, mitiora amplexi consilia, Pastoralis officii cursum inhibuimus; pluries manum extendimus ad virgam: pluries subtraximus; nihil sanè curantes, quomodò interim homines modum hunc agendi nostrum interpretarentur, qui sciremus Deo æquè *per infamiam, ac bonam famam* serviendum esse. Nota res est, de qua loquimur: satis enim comperta sunt, & pervulgata, quæ ante aliquot annos adversùs Ecclesiæ jura in Regno Neapolis, in Ducatu Sabaudia, & Principatu Pedemontii, ac nuperrimè in Ducatu Parmæ, & Placentiæ contigerunt; illa proinde Vobis, qui omnia nostis, & quorum consilio semper his in rebus usi fuimus, singillatim referre prætermittimus. Nos certè viæ, quam hucusque inivimus, minimè pœnitet, tum quia aliqua, nec

sanè

sanè leviora in præfato Regno Neapolis, ut Vobis notum est, condignâ, ac debitâ emendatione reparari obtinuimus, tum quia omnibus jam Pontificiæ lenitatis impletis officiis pro iis, quæ non pauca supersunt, ad severiora remedia, tamen si non sinè maximo cordis nostri dolore, fidentiùs tamen, & alacriùs devenire jam possumus. Cùm enim auctis in dies scandalis, & inauditis Ecclesiasticæ autoritatîs violationibus multiplicatis, eò nunc jam adducta res sit, ut nulla amplius sacris Altarium Ministris, nulla Episcopali dignitati, nulla Ecclesiis, nulla Nobis, nulla Deo reverentia superfit, adeoque omni prorsus spe dejecti simus paternam longanimitatem nostram quidquam in posterum profuturam, dura quidem, sed tamen inevitabilis implendi muneris nostri necessitas exigit, ut inflicta Ecclesiæ vulnera non lentâ jam, nec levi manu tractemus. Decretum proindè nobis, fixumque est sinè majori cunctatione ea hodie viriliter exequi, & palàm promulgare, quæ Pastoralis officii ratio postulat, quæque diuturnis tam nostris, quàm alienis precibus humiliter imploratum, cœlestis gratiæ lumen Nobis ostendit. Nec sanè absque peculiari Divinæ Providentiæ consilio contigisse arbitramur, ut hac ipsâ die, qua cum honorem, qui profanis olim Gentilium celebritatibus tribuebatur, sacris illis B. Petri Vinculis piè deferimus, quibus Apostolorum Princeps, orante sinè intermissione Ecclesia ad Deum pro eo, mirabiliter solutus fuit, Nos similiter, post divinam opem enixè invocatam, vincula illa, quæ sæcularis potestas injicere tentavit Ecclesiæ, quæ non ancilla, sed libera est, Apostolicæ severitatis gladio disrum-pamus. Nullus profectò labor, nullum periculum deterre-re Nos poterit ab ea, quam tam justè suscepimus, Apostolicæ Sedis, & Ecclesiæ juriùm defensione: magno, fortique gradu pergemus ire, quò cœpimus, animo recolentes præclara illa Apostoli verba: *Si quid patimini propter justitiam, beati.*

Deum interim Omnipotentem, cujus tremendo iudicio potentissimi quique Gentium Principes pavidi, ac nudo latere palpitantes subesse debent, nostræ, seu potius suæ causæ vindicem, & assertorem invocamus; levantes cor, & oculos nostros in montem excelsum, & sanctum, unde omne nobis auxilium affuturum speramus, fidenterque cum Propheta clamantes: *Dominus illuminatio mea, & salus mea, quem timebo?* Reliquum est, VENERABILES FRATRES, ut Vos quoque, qui in partem solitudinis nostræ vocati estis, quæ consilio vestro egimus, iugibus vestris apud Deum votis, & assiduis precationibus juvenis, divinam bonitatem in contritione cordis obsecrantes, ut suâ cœlesti ope curis, & conatibus nostris clementer adesse non dedignetur.

Post hæc declaravit S. R. E. Presbyterum Cardinalem Josephum Vallemanum Archiepiscopum Atheniensem Palatii Apostolici Præfectum, quem in Consistorio secreto habito die 17. Maji 1706. unâ cum aliis novendecim Cardinalibus creaverat, & in pectore reservaverat. Præterea alium similiter Presbyterum Cardinalem creavit, ac renunciavit; videlicet R. P. D. Carolum Thomam Maillard de Tournon Patriarcham Antiochenum in Sinarum, & aliis Indiarum Orientalium Regnis cum potestate Legati de latere Generalem Vistatorem Apostolicum.

VENERABILES FRATRES:

XXI.

AD gloriam Omnipotentis Dei, Sanctæque Romanæ Ecclesiæ utilitatem, ac decus, palàm hodie evulgare, ac declarare intendimus unum Presbyterum Cardinalem, quem dudum, nempe in Consistorio secreto habito die 17. Mensis Maji anni proximè præteriti, unâ cum aliis novendecim Cardinalibus creavimus, & in pectore reservavimus, videlicet: Venerabilem Fratrem Josephum Vallemanum Archiepiscopum Atheniensem,

Palatii nostri Apostolici Præfectum; cujus virtutes non recensemus, quia Vobis satis compertæ sunt, ac notæ. Præterea cum non minùs iis, qui longè, quàm illis, qui prope sunt, debitores simus, ac Operarios in vineâ Domini, non modò sub oculis nostris, sed etiam in longinquiore Orbis terrarum partibus strenuè, fideliter, ac fructuosè laborantes præclarioribus Apostolicæ liberalitatis præmiis decorari maximè deceat: ut Christianæ Religionis, ac Catholicæ fidei in remotissimis ab hac Sancta Sede Regionibus solidiori stabilimento, & latiori propagationi omni, qua possumus, ratione opportunè consulamus, creare similiter intendimus alium Presbyterum Cardinalem, videlicet. Venerabilem etiam Fratrem Carolum Thomam Maillard de Tournon Patriarcham Antiochenum, quem ferè ex sexennio, ut Vobis notum est, de Fraternitatum Vestrarum consilio pariter, & assensu, Nostrum, & Apostolicæ Sedis Generalem Visitatorem in Sinarum, & aliis Indiarum Orientalium Regnis cum potestate itidem nostri, & ejusdem Sedis de Latere Legati, deputavimus.

Quid Vobis videtur?

Auctoritate Omnipotentis Dei, Sanctorum Apostolorum Petri, & Pauli, ac nostrâ declaramus, ac respectivè creamus S. R. E. Presbyteros Cardinales Josephum Vallesmanum Archiepiscopum Atheniensem, ac Carolum Thomam Maillard de Tournon Patriarcham Antiochenum cum derogationibus, & clausulis necessariis, & opportunis.

In nomine Patris †, & Filii †, & Spiritus † Sancti. Amen.



IN CONSISTORIO SECRETO

Habito die 15. Aprilis 1709.

ARGUMENTUM.

Creat S. R. E. Cardinales Ulysses Josephum Gozzadinum Archiepiscopum Theodosiæ, Pontificiorum Brevium ad Principes à Secretis, ac etiam alium, quem in pectore reservat.

VENERABILES FRATRES.

XII.



D majorem Dei gloriam, Sanctæque Romanæ Ecclesiæ utilitatem, ac decus, Fraternitatum Vestrarum, numero adscribere intendimus Venerabilem Fratrem Ulysses Josephum Gozzadinum Archiepiscopum Theodosiæ, Brevium nostrorum, quæ ad Principes scribuntur, Secretarium, cujus virtutes longâ jam familiari experientiâ Nobis probatæ, Vobis pariter satis perspectæ sunt; ac etiam alium, quem tamen rationabilibus ex causis in pectore volumus reservare.

Quid Vobis videtur?

Auctoritate Omnipotentis Dei, SS. Apostolorum Petri, & Pauli, ac nostra, creamus S. R. E. Cardinales Ulysses Josephum Gozzadinum Archiepiscopum Theodosiæ, ac alium, quem in pectore reservamus, quovis loco, & tempore arbitrio nostro declarandum, cum clausulis necessariis, & opportunis.

In nomine Patris †, & Filii †, & Spiritus † Sancti. Amen.

IN



De Philippo Mediceo sen. et filio

Francisco Mediceo et Philippo Mediceo

Maximiliano Mediceo et Philippo Mediceo

IN CONSISTORIO SECRETO

Habito die 19. Junii 1709.

ARGUMENTUM.

Cardinalitiæ Dignitatis abdicationem à Domino Cardinali Francisco Maria Mediceo spontè factam admittit.

VENERABILES FRATRES.



Significavit Nobis Dilectus Filius Noster Franciscus Maria S. Mariæ in Domnica Diaconus S. R. E. Cardinalis Medices nuncupatus, quod tametsi ipse suâ sorte, quæ fors Domini est, valdè contentus, animum semper habuerit Cardinalitiæ dignitatem, quam dudum à fel. rec. Innocentio PP. XI. Prædecessore nostro accepit, usque ad extremum suæ vitæ spiritum retinendi, nihilominus præsens, ac satis notus ejus Familiæ status talis est, ut etiam invitus, ac dolens non modò illius propagandæ ratione, quàm Italiæ tranquillitatis custodiendæ studio adductus, pristinam suam sententiam mutare, atque ad laicalia vota transire compellatur. Hinc Nos supplex exorat, ut Dignitatis hujusmodi cessionem benignè admittere non recuse-

mus,

XIII.

mus, præsertim cùm ipse non minùs Nobis, quàm Prædecessoribus nostris annuentibus in nullo ex sacris, imò neque ex minoribus Ordinibus constitutus reperiatur, nec populorum suæ Gentis dominio subjectorum voces, ac desideria patiantur eum diutiùs in priori sua vocatione perseverare. Fusiùs hæc exponet ejusdem Cardinalis Procurator, quem ipse hac de causâ specialiter constituit, ac deputavit; Illum proindè introducendum, ac audiendum esse censemus.

Introducitur subinde fuit in Aulam Consistorii R. P. D. Vincentius Amadorius de Manieris Signaturæ Justitiæ Votans, & D. Cardinalis resignantis Procurator; post quem introducti pariter fuere D. Philippus Sacripantes Advocatus Consistorialis, Reverendissimi P. P. D. D. Ludovicus Picus Patriarcha Constantinopolitanus, Palatii Apostolici Præfectus, & Joseph Cajetanus Patriarcha Alexandrinus: R. R. P. P. D. D. Antonius Bancherius, & Maphæus Farsettus Protonotarii Apostolici de numero Participantium: R. R. P. P. D. D. Annibal Albanus ex Germano Fratre Sanctitatis Suæ Nepos Camera Apostolicæ Præses, & Fabius Oliverius Brevium Secretorum à Secretis, tamquam utriusque Signaturæ Referendarii: Reverendissimus D. Antonius Franciscus Sanvitalis Electus Urbinas, Pontificii Cubiculi Præfectus cum duobus intimis Cubiculariis, scilicet D. D. Bartholomæo Masseo, & Antonio Maria Rasponio Cappa indutis: Reverendissimus P. D. Petrus Marcellinus Corradinus Archiepiscopus Athenarum Sanctitatis Suæ Auditor, D. Jo: Christophorus Battellus Cappa rubeâ indutus in locum D. Cardinalis Gozzadini Brevium ad Principes Secretarius deputatus, D. Jacobus de la Croix Clericus Nationalis Gallus in locum D. Guidi Passionei Sacri Collegii Secretarii substitutus, & D. D. Cæremoniarum Magistri.

Quibus omnibus assistentibus D. Sacripantes Advocatus Consistorialis è Regione Pontificiæ Sedis constitutus flexis genibus Sanctitatem Suam ita allocutus est.

BEATISSIME PATER.

R. P. D. Vincentius Manierius de Amadoris Signaturæ Justitiæ Votans, & Francisci Mariæ Cardinalis Medicei specialis Procurator legitimo suffultus mandato ad solemniter dimittendam Cardinalatus Dignitatem habet ad Sanctitatem Vestram, & Sacrum Collegium literas, quas humiliter supplicat recipi, iisque lectis audiri, quæ habet in mandatis.

Illic idem D. Advocatus Consistorialis tradidit Domino Casina Magistro Cæremoniarum antiquiori tum literas à Domino Cardinali Resignante ad Sanctitatem Suam ea de re datas, tum etiam alias literas ab Eminentia Sua Sacro Collegio conscriptas. Priores jussu Sanctitatis Suae mox traditæ sunt D. Battello, qui stans inter Scamnum DD. Cardinalium, & Sedem Pontificiam conversus ad DD. Cardinales eas elata voce legit, erantque tenoris, qui sequitur, videlicet:

AD SANCTITATEM VESTRAM

BEATISSIME PATER.

Romanæ Purpuræ Dignitatem, qua à sa. me. Innocentio XI. anno 1687. ornatum me gloriabar (Sanctissime Generis humani moderator CLEMENS XI. Pont. Max.) Tibi nunc reddere, & ad pedes Sanctitatis Tuæ in genua provolutus cum summa venerandi dimissione cogor deponere. Debui siquidem, accedente etiam judicio Sanctitatis Tuæ gravissimo, & maximo (quod numquam cogitaveram futurum) omni rerum mearum, ac antea vitæ meæ instituti ratione posthabitâ, non tam privato meo, quàm publico Domus nostræ, & forsan Italiæ commodo consulere, difficillimis istis Christianæ Reipublicæ temporibus, & quantum in me est, quieti, ac tranquillitati servire, si Deo visum fuerit Domum hanc (nulla extante virili pro-

le) aliquo per me munimento , mihi liberos largiendo , fulcire , ut consistat . Petit hoc à me Patriæ charitas , exigunt vota Populorum , Etruriæ bonum : consilia prudentum persuadent , ut acquiescam , & obtemperem . Quamobrem me ab Urbe diffito , & non unâ causâ legitimè impedito Vincentius Amadorius de Manieris Signaturæ Justitiæ Votans , tanquam Procurator ad hoc specialiter à me deputatus , preces , qua par est submissione porriget Sanctitati Tuæ , ut mihi fas sit Dignitatem istam ritè dimittere : quod consilium valde placitum , & ex alto rerum humanarum apice spero Apostolicæ Benedictionis gratiâ probatum iri , dum hac fiduciâ fretus , Sanctitatem Tuam propensum erga me animum , ac paternam voluntatem benignè servaturam confido . Vicariam in terris Numinis potestatem gerenti Sanctitati Tuæ pronus ad pedes procumbens , quæ est tuæ clementissimæ Majestatis humanitas , eam rogo , & obtestor , ut si expectationem , ac officii numeros non impleverim : sique Majorum meorum dotes non æquaverim , magnanimè ignoscas . Intereà , ut Sanctitas tua gravissima rerum momenta feliciter tractet , terras moderetur , ac tueatur D.O. M. supplex exoro , & libato ad Sanctissimos pedes osculo , iterum Apostolicâ Benedictione muniri venerabundus expostulo .

Florentiæ 8. Junii 1709.

Sanctitatis Vestræ .

Humill. Devot. , & Obf. Servus :

Franciscus Maria Cardinalis Medicæ .

Aliæ verò literæ ad Sac. Collegium datæ jussu pariter Sanctitatis Suae traditæ fuerunt D. Clerico Nationali , qui eas mox ibidem alta voce legit , & erant tenoris sequentis .

Emi, & Rm̃i Domini mei Observandissimi.

PRO rerum humanarum varietate mutanda sæpius esse consilia, diversumque vitæ cursum instituendum, in me experior, Eminentissimi Domini mei, cùm aliquot ab hinc annis, ut Domus nostræ commodo servirem, in qua (ut neminem Vestrũ latet) nulla virilis proles existit, me debere intellexi posteritati, & sanguinis propagationi consulere, & idcirco de dimittendâ Purpurâ seriò cogitare. Quare divinæ voluntati mihi obsequendum cognoscens, quamvis valde me pigeat, insignis Collegii Vestri decus exuere, quo juvenis me ornatum jucundè suspexi, statui tandem sequi consilia prudentum, ut mutationem istam subirem. Et sanè nisi superiora ista, nisi horum vota populorum, nisi publica quies, temporum conditio, & fortasse bonum Italiæ, me impulissent, profectò difficile animum inducere potuissẽ, ut consilium istud amplecterer, & ab amplissimo, fraternoque consortio vestro sejungerer. De isto quippe sacro Ordine, quàm semper magnificè senserim, atque præclare, innumera mihi sum conscius argumenta protulisse, quibus animi mei constans in Vos obsequium, Patres amplissimi, metiremini. Delegi igitur, ac deputavi Procuratorem meum Vincentium Amadorium de Manieris, Signaturæ Justitiæ Votantem, qui meis verbis Sanctitati Pontificis Maximi (quem humano generi Vicariâ Majestate præesse Deus voluit) demissè supplicaret, ut ipso annuente, liceat mihi Cardinalatus Dignitatem dimittere. Quod dum E. E. V. V. vehementer animo commotus hisce significo, rogo Vestrum singulos, ut qua auctoritate, & gratia plurimum valetis, me solitâ benevolentia profèqui pergatis, qui Vos prudentia, rerum gerendarum usu, & sublimi virtute præditos admiratus, tamquam coram Vos alloquerer, ut unicuique Vestrum venerationis meæ officia deferrem, Vobis perpetuò me devinctum fateor, omneque studium,

H

dium,

dium, ac diligentiam pollicitus, fausta cuncta, feliciaque precor, manusque vestras pronus osculor.

Florentiæ 8. Junii 1709.

E. E. V. V.

Humill. Devot. Servus Verus
F. Maria Cardinalis Medices.

Peractâ ejusmodi literarum recitatione præfatus Clericus Nationalis legit etiam alta voce mandatum Procuræ D. Cardinalis resignantis sibi traditum à memorato Cæremoniarum Magistro, cujus tenor omittitur.

Perlecto ejusmodi mandato D. Advocatus Consistorialis suam Orationem, & supplicationem prosecutus est his verbis:

Amplissimam Cardinalitiam Dignitatem, quam singulari benignitate sa me. Innocentii XI. Sanctitatis Vestræ Prædecessoris à quatuor cum dimidio lustris obtinuissè, & retinuissè gloriatur Franciscus Maria Medices, ad extremum usque suæ vitæ spiritum continuare sperabat; unde inexplicabile dictu est quàm gravem animi ægritudinem senserit, quando notissimis suæ Familiæ casibus ad innovationem adeò sibi grati, & illustri status Ecclesiastici in connubialem thalamum adactum se sensit. Prudens tamen, imò necessarium putavit consilium omne suæ voluntatis arbitrium inscrutabilis Divinæ dispositionis nutibus subjicere, & publicis votis tam totius Familiæ, quàm subditorum privata sua commoda, & desideria sacrificare, & postponere; certâ spe fretus quòd etiam à Sanctitatis Vestræ judicio benignam promereri possit approbationem idem consilium, per quod non solum populorum ejus Familiæ dominio subditorum quies, sed finitimæ ditionis Ecclesiæ, ac totius Italiæ tranquillitas mediante prole à Divina benignitate imploranda promoveatur, & celsissima Familia propagetur terrâ, marique præpotens, quæ nullum majus decus, & ornamentum extollit, quàm reverentiam, & obsequium huic Sanctæ Sedi illibatè servatum. Qua

de re Pedibus Sanctitatis Vestræ provolutus idem Procurator dicti Cardinalis Medicei nullo Sacrorum Ordinum, sed solum Clericali tonsura S. Sedis Apostolicæ benigna dispensatione initiatus eâ, quâ decet, reverentiâ, præfatam Cardinalatus Dignitatem cum omnibus, & singulis præeminentiis, insignibus, prærogativis, & titulis in manibus Sanctitatis Vestræ spontè, & libere dimittit, resignat, & cedit, humiliter supplicans, ut hanc dimissionem, resignationem, & cessionem benignè dignetur admittere, ipsique Juramenta quæcumque, & vincula occasione dicti Cardinalatus contracta remittere, & relaxare, & de omnibus commissis, omisissis, & neglectis absolvere, paternamque benedictionem impetiri.

Finis dicti Advocati Consistorialis Oratione Dominus Castina Cæremoniarum Magister antiquior rogavit DD. Protonotarios præsentés, ut de Instantia admissionis, & resignationis hujusmodi publicum conficerent Instrumentum, ita locutus.

Protonotarii Apostolici hîc præsentés erunt rogati de hujusmodi instantia, facta à Procureto Francisci Mariæ Cardinalis Medices, vigore specialis Mandati per Clericum Nationalem Sacri Collegii nunc perlecti super admissione cessionis, & resignationis Dignitatis Cardinalatus, nec non omnium, & quorumcumque jurium ad ipsum ratione ejusdem Dignitatis spectantium, & pertinentium, ut quandocumque opus fuerit, de his unum, vel plura publicum, seu publica Instrumentum, sive Instrumenta conficere possint, & valeant.

Tunc R.P. D. Banckerius Protonotarius Apostolicus antiquior non tam ad R.R. P.P. D.D. Referendarios, quàm ad ceteros ibi præsentés conversus eos Actorum hujusmodi testes adhibuit his verbis: Vobis testibus:

Pacta, receptaque in hunc modum instantia, Consistorio exie-

runt omnes, ut supra, introducti, ita ut Sanctissimus cum DD. Cardinalibus solus remanserit, qui subinde ipsos DD. Cardinales his verbis allocutus est.

Attenta instantia Nobis nuper facta non minùs pro ea, qua inelytam Domum Mediceam tot nominibus claram, ac singulari in primis erga hanc Sanctam Sedem devotione præfulgentem paterna complectimur charitate, quàm publicæ quieti opportunè prospiciendi ratione potissimùm suadente, admittere intendimus dimissionem petitam.

Quid Vobis videtur?

Post hæc singuli DD. Cardinales, servata Ordinis, ac loci prærogativâ, suffragium de more tulerunt, cumque Cardinalatus resignationem à d. D. Cardinali Mediceo ritè factam admittendam esse unanimes censuissent, Sanctissimus ejusmodi resignationem Apostolico solemnî Decreto sequentibus verbis concepto admisit, atque probavit:

Auctoritate Omnipotentis Dei, Beatorum Apostolorum Petri, & Pauli, ac nostrâ, admittimus cessionem, & dimissionem Cardinalatus, & Diaconîæ S. Mariæ in Domnica in manibus nostris factam unâ cum omnibus privilegiis, & insignibus ad Dignitatem Cardinalitiâ, & dictam Diaconiam quovis modo spectantibus, itaut ipse Franciscus Maria Medices dimittens deinceps nullo modo sit Cardinalis, nec talis nominari possit, neque in ullis actibus ad Cardinales pertinentibus, & præcipuè in electione Summi Pontificis vocem activam, vel passivam habere, vel in illis se ingerere quoquo modo, uti Cardinalis valeat. Illum proindè absolvimus à vinculo quorumcumque Juramentorum præstitorum tam occasione Cardinalatus, & ejusdem Diaconîæ, quàm ratione Monasteriorum, & Beneficiorum Ecclesiasticorum ab eo obtentorum; Decernentes insuper hæc omnia Monasteria, & Beneficia, quæ obtinet, per admisionem hujusmodi eo ipsò vacare, illumque pariter absolventes à qui-

buf-

busvis transgressionibus circa prædictorum Juramentorum observantiam forsan commissis.

In nomine Patris †, & Filii †, & Spiritus † Sancti. Amen.

Pronunciato demum Pontificio Decreto reseratum est Consistorium, è quo surgens Sanctissimus suas secretiores Cameras repetiit. Dum autem Cubiculum Consistoriali Aulæ proximum pertransiret, R.P.D. Manerio Procuratori in genua provoluto dixit: Admisimus Cessionem Cardinalatus: obtulit tunc ille super pollubrum argenteum Galerum Cardinalitium ab altero ex Cæremoniæ Magistris receptum, & pedem Sanctitatis Suae super eum Crucis signum producentis reverenter osculatus est.





IN CONSISTORIO SECRETO

Habito die 22. Julii 1709.

ARGUMENTUM.

R. P. D. Annibalem Albanum Sanctitatis Suae Germani Fratris Filium deputat Nuncium extraordinarium ad Imperatorem, aliosque Reges, & Principes, ut in Pacis tractationibus inter eos propediem ineundis Apostolicæ Sedis dignitatem, & orthodoxæ Fidei rationes pro viribus tueatur.

VENERABILES FRATRES.

XXIV.



Uperioribus diebus ineundæ propediem, inter Christianos Principes Pacis audito rumore, optatam tandem quietem, & tranquillitatem diuturno, ac sanè acerbissimo bello fessis gentibus reddendam fore speravimus. Verùm nondum oblito Domino delicta populi sui, ac de nostris potissimùm graviorem vindictam fumere cogitante, ingemiscere cum Propheta compellimur: *Expectavimus Pacem, & non est bonum: tempus iræ, & ecce formido: tempus curationis, & ecce turbatio*; Si enim, ut cum ejusdem Prophetæ verbis loqui prosequamur, *si enim egressus fuero ad agros, ecce occisi gladio: & si introiero in Civitatem,*

ecce

ecce attenuati fame. Quod tamen magis deplorandum est, atque dolendum, malorum hæc non sunt summa nostrorum; timendum quippe magis est, nec immerito timendum, nè filiis tenebrarum, qui prudentiores filiis lucis in generatione sua sunt, adnitentibus, deterior bello pax ita forsan ex inopinato coalescat, ut exclamare cogamur: *Ecce in pace amaritudo mea amarissima*. Nos sanè in tanto rerum discrimine constituti, cor primùm, & oculos nostros in montem excelsum, & sanctum, unde omne nobis auxilium affuturum confidimus, levare non prætermisimus, enixè Dominum deprecantes, ut qui facit pacem in sublimibus, & Reges in thronis collocat, arctam non modò, & indissolubilem animorum concordiam, sed & parem Catholicæ Fidei, conjunctis viribus, & consiliis, tuendæ, & propagandæ zelum Orthodoxis Principibus largiatur. Hæc porrò Nos ipsi iisdem Principibus majori, qua possumus, animi contentione suasuri, allegare decrevimus ad Charissimos in Christo Filios nostros Josephum Romanorum Regem in Imperatorem Electum, aliosque Reges, nec non ad ceteros Principes, quibus fas erit, Dilectum Filium Annibalem Albanum, nostrum secundùm carnem ex Fratre germano Nepotem, ac Cameræ Apostolicæ Præsidem, qui gravissimum hoc negotium non tam apud illos, quàm aliàs ubicumque opus fuerit, urgere valeat. Ibit igitur ipse, ibit quamprimùm, non in curribus, neque in equis, sed in nomine Domini. Ibit Reipublicæ, Ecclesiæ, Religionis, adeòque nostram, atque hujus Sanctæ Sedis causam acturus. Ibit quocumque injunctum sibi ejusmodi munus eum vocabit: ad ipsum etiam locum, in quo tractationes pacis habendæ erunt, profecturus, si, & quomodo hoc ipsum, & Apostolicæ Sedis dignitas pati, & orthodoxæ Fidei rationes, in quibus vera dignitas sita est, postulare videbuntur. Ibit demum benè edoctus Pontificium Regnum, ad instar Regni Christi, non aliud, quàm Crucis Regnum esse;

mini-

minimè proinde petens in eo sedere ad dexteram, vel ad sinistram: calicem tamen laborum, quem Nos ei propinamus, alacriter bibiturus. Hæc Vos hodie scire volumus, VENERABILES FRATRES, ut pro parte sollicitudinis, ad quam vocati estis, curas, & conatus nostros rei non minùs arduæ, quàm salutare intentos tum operâ, & consilio, tum jugibus ad Deum votis, & precationibus juvetis; sicuti perspecta pietas, & religio vestra, ac perpetuum Catholicæ Ecclesiæ, & Causæ publicæ studium abundè Nobis pollicentur.

Post hæc declaravit S. R. E. Presbyterum Cardinalem Antonium Franciscum Sanvitalem Archiepiscopum Urbinatem, Pontificii Cubiculi Præfectum, quem in Consistorio secreto habito die 15. Aprilis proximè præteriti unà cum Eminentissimo Gozzadino Cardinalem creaverat, & in pectore reservaverat.

VENERABILES FRATRES.

Xxv.

ADmonet Nos Natalis noster hic dies præcipuæ illius, quam Patriæ debemus, charitatis; neque enim ortus nostri tempus reminisci possumus, nisi etiam loci, in quo orti fuimus, recordemur. Ut itaque hac die & Urbi, in qua nati, & Ecclesiæ, in qua renati fuimus, gratos Nos exhibeamus, illustri utramque Pontificii amoris testimonio decorare, illarumque Præfulem, quem nuper, nempe die 15. Aprilis proximè præteriti, S. R. E. Cardinalem creavimus, & in pectore reservavimus, palàm hodiè evulgare, ac declarare constituimus, videlicet Venerabilem Fratrem Antonium Franciscum Sanvitalem Archiepiscopum Urbinatem, Cubiculi nostri Præfectum, cujus eximiæ, ac Sacro Antistite planè dignæ virtutes satis vobis innotescunt.

Quid Vobis videtur?

Au-

Auctoritate Omnipotentis Dei, Sanctorum Apostolorum Petri, & Pauli, ac nostrâ declaramus S. R. E. Presbyterum Cardinalem Antonium Franciscum Sanvitalem Archiepiscopum Urbinatem cum derogationibus, & clausulis necessariis, & opportunis.

In nomine Patris †, & Filii †, & Spiritus † Sancti. Amen.





De La Grange, Ferraria

IN CONSISTORIO SECRETO

Habito die 9. Septembris 1709.

ARGUMENTUM.

Suos, & Apostolicæ Sedis de Latere Legatos deputat, ac declarat, Bononiæ Laurentium Casonum, Romandiolæ Thomam Ruffum, & Ferrariæ Laurentium Corsinum S.R.E. Cardinales.

VENERABILES FRATRES.

Xxvi.



Ergente jam in finem triennio, ad quod Legationem Bononiensem demandavimus Dilecto Filio Nostro Nicolao S.R.E. Cardinali Grimaldo, qui eam pari cum justitiæ, ac prudentiæ laude, difficillimo tempore exercuit: ad eandem nunc Legationem transferre intendimus à Legatione Ferrariæ, tametsi consueto hujus tempore nondum expleto, Dilectum pariter Filium nostrum Laurentium ejusdem S.R.E. Cardinalem Casonum, qui hujusmodi Legationem Ferrariensem summâ fide, ac sanè semper inter malorum, aut præsentium sensum,

aut

aut metum futurorum forti animo, ut probè nostis, administravit.

Quid Vobis videtur?

Auctoritate Omnipotentis Dei, SS. Apostolorum Petri, & Pauli, ac nostrâ transferimus à Legatione Ferrariensi ad Bononiensem præfatum Cardinalem Casonum; cumque declaramus, ac deputamus nostrum, & Sedis Apostolicæ de Latere Legatum Bononiæ ad triennium, cum facultatibus solitis, & clausulis opportunis.

In nomine Patris †, & Filii †, & Spiritus † Sancti. Amen.

Labitur itidem triennium, ad quod Legationem Roman-diolę commisimus Dilecto Filio Nostro Philippo Antonio S.R.E. Cardinali Gualterio, qui eam inter tot nimium notas rerum, ac temporum difficultates, sedulò, ac fideliter sustinuit. Eidem nunc proindè Legationi præficere intendimus Dilectum pariter Filium Nostrium Thomam ejusdem S.R.E. Cardinalem Ruffum, de cujus fide, integritate, probataque in regendis illius Provinciæ populis prudentia plurimum in Domino confidimus.

Quid Vobis videtur?

Auctoritate Omnipotentis Dei, Sanctorum Apostolorum Petri, & Pauli, ac nostrâ declaramus, & deputamus Nostrium, & Sedis Apostolicæ de Latere Legatum Romandiolæ præfatum Cardinalem Ruffum ad triennium, cum facultatibus solitis, & clausulis opportunis.

In nomine Patris †, & Filii †, & Spiritus † Sancti. Amen.

Vacante jam etiam Legatione Ferrariæ per translationem nuper inde à Nobis factam, ut audistis, Dilecti Filii Nostri Laurentii S.R.E. Cardinalis Casoni ad Legationem Bononiensem, præficere intendimus primodictæ Legationi Dilectum pariter Filium Nostrium Laurentium ejusdem S.R.E. Cardinalem Corfinum, de cujus fide, prudentia, integritate, rerum usu, ac in præcipuis

Reipublicæ muneribus gerendis experiētiā plenē in Domino confidimus.

Quid Vobis videtur?

Auctoritate Omnipotentis Dei, Sanctorum Apostolorum Petri, & Pauli, ac nostrā: declaramus, ac deputamus Nostrum, & hujus Sanctæ Sedis de Latere Legatum Ferrariæ præfatum Cardinalem Corfinum ad triennium, cum facultatibus solitis, & clausulis opportunis.

In nomine Patris †, & Filii †, & Spiritus † Sancti. Amen.





IN CONSISTORIO SECRETO

Habito die 14. Octobris 1709.

ARGUMENTUM.

Consilium, quod susceperat, Serenissimum Austriae Archiducem Carolum honestandi titulo Regis Catholici Hispaniarum ad normam Clementinae: Si Summus Pontifex &c. DD. Cardinalibus aperit.

VENERABILES FRATRES.



Ustum sanè, ac salutare consilium, quod Charissimi in Christo Filii Nostri Iosephi Romanorum Regis in Imperatorem electi germanus Frater nuper suscepit, palàm explicandi filiale suum, ac debitum in hanc Sanctam Sedem obsequium; ac aliàs Nobis, & Ecclesiae ad Canoniarum Sanctionum praescriptum satisfaciendi, mutuas à Nobis paternae nostrae charitatis significationes expostulat. Idcirco, quemadmodum illum Hispaniarum Regis Catholici titulo nuncupare constituimus, ita ei, quoad ditiores, quas tenet, seu forsàn ipsum de cetero tenere contigerit, Jurium illi annexorum usum minimè in posterum denegabimus. Ut tamen hæc omnia ritè, ac rectè, & sinè alterius cu-

XXVII.

jus-

jusquam injuria, aut præjudicio à Nobis peragi notum sit, scire Vos volumus, Nos hac in re normam omninò sequi Constitutionis fel. rec. Clementis Papæ V. Prædecessoris nostri in Concilio Viennensi editæ, qua cautum fuit, quòd siquem Summus Pontifex sub titulo cujuslibet Dignitatis ex certa scientia verbo, constitutione, vel literis nominet, honoret, seu quovis alio modo tractet, per hoc in Dignitate illa ipsum approbare non intelligatur, aut quicquam ei tribuere novi juris. Hanc itaque Constitutionem, quam, ut probè nostis, non absimilium contentionum occasione etiam rec. me. Pius II. Joannes XXII., & Sixtus IV. Romani Pontifices pariter Prædecessores nostri approbarunt, & innovarunt, Nos eorundem Prædecessorum nostrorum exemplis adducti, illisque expressè inhærentes, similiter approbamus, & innovamus; ut ita non minus quæcumque nostra, quàm aliena, ac præsertim amborum de Hispanica successione contententium, quæ verè nullatenus cognovimus, aut discussimus, jura, æqualiter salva, & illæsa remaneant: Nos verò nec ad dexteram, neque ad sinistram declinantes, ab eo, quem semper secuti fuimus, Apostolicæ Sedis more minimè recedamus. Hæc habuimus, Venerabiles Fratres, quæ Vobis hodie ex hoc loco significaremus; Ut quæ sit nostra mens ab injuncto Nobis divinitus Pastoralis munere, adeòque à recto Justitiæ tramite numquam aliena, apertè dignoscatis: Patremque Misericordiarum enixè simul rogare possitis, ut ea, quæ agimus, Christianæ Reipublicæ, Catholicæ Ecclesiæ, atque huic Sanctæ Sedi benè, ac feliciter faciat evenire.



Pinx. L. B. Sculp. S. del. et Scul.

IN CONSISTORIO SECRETO

Die 19. Februarii 1710.

ARGUMENTUM.

Quæ cum à Carolo Hispaniarum Rege Catholico, tum ab ejus Administris in Ducatu Mediolanensi, ac in Regno Neapolis gesta fuerant, ut detrimenta utrobique Ecclesiasticæ auctoritati illata sarcirentur; quæque insuper à Sanctitate Sua, ejusque permisso à DD. Cardinalibus Archiepiscopis Mediolanensi, & Neapolitano peracta fuerant; ut uberius Ecclesiæ satisficeret, DD. Cardinalibus luculenter exponit.

VENERABILES FRATRES.



Unciavimus Vobis in præterito Consistorio justum, ac salutare consilium, quod Charissimi in Christo Filii Nostri Josephi Romanorum Regis in Imperatorem electi germanus Frater susceperat, palàm explicandi filiale suum, ac debitum in hanc Sanctam Sedem obsequium, ac aliàs Nobis, & Ecclesiæ ad Canoniarum Sanctionum præscriptum satisfaciendi super iis, quæ ejus nomine in gravissimum Ecclesiasticæ non minùs authoritatjs, quàm Pontificiæ Dignitatis detrimentum, tam in Ducatu Me-

XXVIII.

dio-

diolanensi, quàm in Regno Neapolis jamdudum contigerant; Illum propterea de cætero Charissimi in Christo Filii Nostri Caroli Hispaniarum Regis Catholici titulo, ad limites tamen Constitutionis fel. rec. Clementis PP. V. Prædecessoris nostri in Concilio Viennensi editæ, & non aliàs, nuncupare Nos statuissse Vobis significavimus. Æquum nunc itidem, ac ab ea, qua Vos in Domino complectimur, singulari charitate non alienum ducimus Vobis ex hoc loco edicere susceptum, ut supra, ab eodem Carolo Rege consilium, confecto jam opere, impletum fuissse; editâ siquidem generali, absolutâ, ac publicâ abrogatione, rescissione, & revocatione illorum Edictorum, & Decretorum, quæ in Ducatu Mediolanensi, ac in Regno Neapolis tam super prohibitione extrahendi, sive extrahi faciendi ab utroque Dominio pecunias ad hanc almam Urbem, aliave loca Ditionis Ecclesiasticæ deferendas, quàm super interceptione proventuum Ecclesiasticorum ad possessores extra eadem dominia degentes pertinentium, dudum promulgata fuerant: iussûque insuper quorumvis interceptorum proventuum hujusmodi fideli, atque integra restitutione: ac iis demùm additis, quæ Nos, ut uberiùs Ecclesiæ satisfieret, utrobique peragi curavimus, detrimenta omnia, & damna, quæ Ecclesiasticæ auctoritati ex memoratis Edictis, atque Decretis obvenerant, reparata fuissse non ambigimus. Hæc sanè Vobis magna ex parte jam innotuissse non dubitamus; quia tamen non omnia omnibus perspecta esse arbitramur, scire ideò Vos volumus, statim ac inaudivimus eundem Carolum Regem suis die 28. Augusti superioris anni datis literis Edictorum, ac Decretorum hujusmodi rescissionem mandasse, Nos minimè in primis omisissse Regem ipsum paterna charitate admonere, ac hortari, ut conscientiæ suæ consulere, attributâ ad id ejus Confessario facultate ab Ecclesiasticis Censuris, & pœnis, quas propter præmissa incurrerat, ipsum absolvendi. Præterea ut Ecclesiasticæ

indemnitati, præter perperam gestorum emendationem eadem autoritate, qua illa peracta fuerant, ut supra, faciendam, Apostolici etiam iudicii nostri accessione plenius consultum esset, per binas nostras in forma Brevis die 5. Octobris proximè præteriti expeditas literas Edicta, & Decreta præfata cum omnibus, & singulis indè secutis, ac quandocumque secuturis, nulla prorsus, & inania fuisse, & esse pronunciavimus, viribusque, & effectu penitus vacuavimus; firmis remanentibus Censuris, & pœnis, quas ii omnes, & singuli, qui præmissa perpetraverant, sive aliàs in illis culpabiles fuerant, quovis modo incurrerant. In iisdem porrò literis pium Ecclesiæ morem secuti, quæ recurrentibus ad ipsam post excessum cum humilitate filiis se propitiam exhibere solet, & benignam, Dilectis Filiis Nostris Josepho, & Francisco S.R.E. Cardinalibus Archinto, & Pignatello nuncupatis, Metropolitanarum Ecclesiarum Mediolanensis, & Neapolitanæ ex concessione, & dispensatione Apostolica respectivè Præsulibus, facultatem concessimus omnes, & singulos prædictos, seu illos ex eis ad se recurrentes, qui veræ pœnitentiæ signa ostendissent, à Censuris, & pœnis supradictis in forma Ecclesiæ consueta misericorditer absolvendi, prout fusiùs ex earundem literarum exemplis percipietis, quæ à Secretario Brevium nostrorum Secretorum mox legentur.

Hic ingressus fuit Consistorium R. P. D. Oliverius Secretarius Brevium Secretorum Sanctitatis Suae, & legit Brevia prædicta, quorum absoluta lectione Sanctissimus reassumpsit in hæc verba:

Facultate igitur sibi, ut audistis, attributâ utentes ambo Cardinales prædicti absolutionis beneficium juxta formam in nostris literis traditam iis impenderunt, qui propter præmissa culpabiles ea, qua par erat, humilitate, ipsomet Carolo Rege eos ad id excitante, absolvi petierunt, quos inter complures

fuere ex præcipuis utriusque Domini Ministris, quemadmodum documenta ab eisdem Cardinalibus eâ de re ritè confecta, & ad Nos authenticè transmissâ testantur. Demùm nonnullos libros, & scripta jam pridem typis vulgata, quibus eâ potissimùm Edicta, & Decreta propugnantur, per quæ secularis potestas, ut diximus, exterorum Beneficia sequestro committi mandaverat, per alias nostras in simili forma Brevis hesternâ die promulgatas literas damnavimus, & prohibuimus, meritâque, ac gravi Censurâ confiximus, ut ita illata Ecclesiæ gravamina cumulatius sarcirentur, omnibusque perspectum fieret non aliàs eidem Carolo Regi, etiam quoad ditiones, quas tenet, Regiorum Jurium usum à Nobis admissum fuisse, nisi postquam Ecclesiæ, quoad Edicta, & Decreta præfata, usquequaque satisfactum fuisse compertum esset, quemadmodum Nobis ab initio proposuimus, ac postmodum in ejusmodi proposito constanti semper animo permanimus. Hæc Vobis, VENERABILES FRATRES, qui Pastoralem sollicitudinem nostram in Sanctæ Dei Ecclesiæ administratione operâ, & consilio sublevare non prætermittitis, communicanda hodie existimavimus, tum ut justum hinc gaudium capiat, uberesque Nobiscum D. O. M. gratias agatis, quod dederit Regi cor docile ad faciendas justificationes suas: tum ut enixas vestras assiduis nostris precibus adjungere velitis apud Patrem Misericordiarum, quatenus sua cœlesti ope eos similiter conatus nostros juvare non dedignetur, quos nullis parentes laboribus indefinenter impendere non desistimus, ut in aliis quoque, quæ sunt multa, ac etiam ab aliis, qui sunt multi, quæ Dei sunt, & Ecclesiæ, Deo, & Ecclesiæ reddantur.

His peractis devenit ad præconia, & propositiones plurimum Ecclesiarum, quibus absolutis Sanctitas Sua iterum allocuta fuit DD. Cardinales in hæc verba:

VENERABILES FRATRES.

VAcatur adhuc Legatio Ferrariæ per translationem, quam inde fecimus, Dilecti Filii Nostri Laurentii S. R. E. Cardinalis Casoni ad Legationem Bononiensem; cum eas, quas Dilectus etiam Filius Noster Laurentius ejusdem S. R. E. Cardinalis Corfinus allegavit, rationes, ne ad ejusmodi munus, quod ei, ut benè nostis, commiseramus, suscipiendum adigeretur, probandas, atque admittendas esse duxerimus. Ad eandem proinde Ferrariensem Legationem transferre nunc intendimus à Legatione Romandiolæ Dilectum pariter Filium Nostrum, Thomam Cardinalem Ruffum, qui hanc Romandiolæ Legationem non quidem à multo tempore, sed multa cum laude administrat.

Quid Vobis videtur?

Auctoritate Omnipotentis Dei, Sanctorum Apostolorum Petri, & Pauli, ac nostrâ transferimus à Legatione Romandiolæ ad Legationem Ferrariæ præfatum Cardinalem Ruffum ad triennium cum facultatibus solitis, & clausulis opportunis. In nomine Patris †, & Filii †, & Spiritus † Sancti. Amen.





IN CONSISTORIO SECRETO

Habito die 7. Maji 1710.

ARGUMENTUM.

Expositis primùm iis, quæ decernenda censuerat de Pacificationis tractatu ab Augusto Poloniæ Rege dudum cum Svecis inito: tum etiam iis, quæ idem Rex egerat, ut inustam ex eodem tractatu Regio Nomini labem prorsus abstergeret, & Pontificiæ voluntati obsequeretur: DD. Cardinalibus susceptum consilium aperit præficiendi viduatis Poloniæ Ecclesiis personas, pro quibus idem Rex de more supplicaverat. Demum plura subjicit admodum honorifica de filiali ipsius Regis in Sanctam Sedem obsequio, ac de Regia deliberatione adjungendi quamprimum Principi ejus nato pios, probosque viros, qui illum orthodoxæ Fidei præceptis, ac ritibus imbuant.

VENERABILES FRATRES.

Xxx.



Quartus jam labitur annus, ex quo, non sine gravi animi nostri dolore, Ecclesiis in Regno Poloniæ existentibus, quas suis intereâ destitui Præsulibus contigit, novos Episcopos præficere, ob notas nimium illius Regni perturbationes, intermisimus. Elapsis porro mensibus ubi primùm à Svecis improspere pugnatum fuisse percepimus, optatam tandem tranquillitatem ab Eo, qui potens est statuere procellam in auram, & facere fluctus ejus

file-

filere, eidem Regno reddendam esse sperantes, advenisse jam tempus existimavimus, quo Ecclesias præfatas à diuturnioris viduitatis incommodis vindicaremus. Verùm cùm ex prisco hujus Sanctæ Sedis more, Polonorum Regum pro idoneis personis, quæ dictis Ecclesiis præficiendæ sunt, supplicantium preces eandem Sedem exaudire consuetam esse cogitaremus, illius profectò Regis supplicationibus hac in re minimè annuendum esse credidimus, cujus nomine infelix ille, ac sanè ultra quàm satis est, pervulgatus, pacificationis tractatus initus noscebatur, quo gravissima non minùs orthodoxæ Fidei, quàm Ecclesiasticæ libertati detrimenta inferri compertum fuerat: nisi priùs non modò Regem ipsum, expressà tractatus hujusmodi damnatione, ab hac turpissima labe purgari contingeret, sed & ipsa tractatus damnatio Apostolici nostri judicii accessione robur, ac pondus acciperet. Idcirco, tametsi omnium sermone notum esset tractatum illum pravâ operâ, ac malâ fide, seu potius proditione Commissariorum à Charissimo in Christo Filio Nostro Augusto Poloniæ Rege Illustri constitutorum conflatum fuisse, atque hoc ipsum idem Rex publicè editâ suæ mentis declaratione universo terrarum Orbi testatum, atque perspectum esse voluerit, nihilominus id Nos minimè sufficere reputantes, statim ac ipsum Augustum Regem redeundi in Poloniam consilium suscepisse audivimus, nostras ad eum literas, compluribus ex Fraternitatibus Vestris ita suadentibus, ejusmodi in re dandas esse censuimus, juxta exemplum, quod à Secretario Brevium nostrorum Secretorum mox legetur.

Hic ingressus fuit Consistorium R. P. D. Oliverius Secretarius Brevium Secretorum Sanctitatis Suæ, ac Breve Poloniæ Regi scriptum die 21. Septembris 1709., quod brevitatibus gratia omittitur, alta voce perlegit; cujus absolutâ lectione Sanctissimus Orationem reassumpsit in hæc verba:

Excepit Rex singulari in hanc Sanctam Sedem devotione Literas nostras, supremoque ejusdem Sedis judicio se humiliter submittens, nuperrimè ita respondit.

Hic idem R. P. D. Oliverius Regium responsum legit Varfavia datum die 2. Aprilis proximè præteriti, quo perleſſo Sua Sanctitas allocutionem suam ita prosecuta fuit :

Ex iis jam, quæ audivistis, abstersam non modò, ac penitè deletam quamcumque maculam, quæ Regio nomini ex Tractatu Altranstadenſi quoquo modo irrogata cenferi poterat, planè conspiciſſis; sed indè Regem ipsum datam sibi opportunitatem filiale suum in hanc B. Petri Cathedram obsequium, uberiùs ostendendi, syncerumque, quo fervet, pro Catholica Religione zelum non solùm verbis, sed etiam re ipsa apertiùs declarandi, prompto, ac libenti animo amplexum fuisse, gaudere Vos cernimus. Verùm, ut gaudium hoc vestrum plenius sit, & cumulatiùs, latere Vos nolumus, quæ priùs idem Augustus Rex binis suis ad Nos die sexta Octobris elapsi anni, ac die 10. Februarii proximè præteriti respectivè datis Literis scripserat, ex quibus & gratum, ac devotum in Nos, & hanc Sanctam Sedem ejus animum, quemadmodum & illum ex aliis præfati Regis ad unumquemque vestrum conscriptis, ac Vobis, ut audivimus, nuper redditis Literis conjicere potuistis, abundè percipietis: ac insuper (quod sanè valdè notandum est, Vobisque per jucundum erit) falsa prorsùs fuisse, & esse, quæ de quibusdam pactiõibus non minùs Catholicæ Religionis rationibus quàm Reipublicæ Polonæ juribus, ac libertati adversantibus ab ipsomet Rege occasione sui in Poloniam reditus cum A catholicis Principibus, ut ferebatur, initis vulgata fuerant, satis superque intelligatis. Legantur igitur etiam hujusmodi Literæ.

Perleſſæ hic fuerunt à prædiſſo R. P. D. Oliverio duæ Regiæ Epistolæ linguâ Italicâ ad Sanctitatem Suam dudum, nempe

die

die 6. Octobris elapſi anni, ac die 10. Februarii proximè præteriti reſpectivè datæ, quibus lætis Sanctitas Sua ſequentibus verbis Orationem ſuam abſolvit:

Abſtinemus nunc ab iis prætercà commemorandis, quæ idem Auguſtus Rex urgente potiſſimùm rem hanc apud ipſum Dilecto Filio Annibale Albano noſtro ſecundùm carnem Nepote, de inito à ſe conſilio adjungendi quamprimum Principi ejus nato pios, ac probos Viros, qui illum orthodoxæ Religionis præceptis, ac ritibus imbuant, non ita pridem ad Nos fuſè perſcripſit, ſuamque ea de re Nobis Regiam fidem diſertis verbis obſtrinxit; id enim ad eam differimus diem non longè, ut ſperamus, Deo propitiante, abſuturam, qua hujusmodi conſilium omninò peractum, impletumque fuiſſe perceperimus: Interim ex iis, quæ retulimus, ſatis luculenter Vobis perſpectum fore confidimus Auguſtum Regem abundè promereri, ut pro iis, qui viduatis in ejus Regno Eccleſiis de more præficiendi erunt, Paſtoribus Regias ejus preces ex conſueta hujus Sanctæ Sedis benignitate exaudire diutiùs non differamus. Nec ſanè abſque Divinæ Providentiæ conſilio eveniſſe arbitramur, ut jamdiù vacanti Cracoviænſi Eccleſiæ hac ipſa die S. Stanislao ſacrâ, qui tanta illi cùm ſanctitatis, & paſtoralis ſolicitudinis laude præfuit, Præſulem conſtituamus: inde etenim felix accipimus omen fore, ut tam is, quem eidem Eccleſiæ Cracoviænſi mox præficiemus, quàm reliqui ad alias dicti Regni Eccleſias ſive hodie, ſive in poſterum promovendi, ejuſdem Sanctiſſimi Epiſcopi, ac Martyris virtutes, & exempla ſibi imitanda proponant, ejuſque potiſſimùm ope, qui præcipuus Poloniæ Patronus habetur, à Patre miſericordiarum conſequantur, ut pacatis penitùs, quæ idem Regnum tamdiù jaſtarunt, diſſidiorum, ac bellorum fluctibus, priſtina demùm illi quies, ac plena ſerenitas reſtituatur, atque indè Regius animus in dies magis inflammetur ad ea alacriùs peragenda, quæ Chriſtia-

Excepit Rex singulari in hanc Sanctam Sedem devotione Literas nostras, supremoque ejusdem Sedis judicio se humiliter submittens, nuperrimè ita respondit.

Hic idem R. P. D. Oliverius Regium responsum legit Varſaviæ datum die 2. Aprilis proximè præteriti, quo perleſſo Sua Sanctitas allocutionem ſuam ita proſecuta fuit :

Ex iis jam, quæ audiviftis, abſterſam non modò, ac penitùs deletam quamcumque maculam, quæ Regio nomini ex Tractatu Altranſtadenſi quoquo modo irrogata cenſeri poterat, planè conſpiciſtis; ſed indè Regem ipſum datam ſibi opportunitatem filiale ſuum in hanc B. Petri Cathedram obſequium, uberiùs oſtendendi, ſyncerumque, quo fervet, pro Catholica Religione zelum non ſolùm verbis, ſed etiam re ipſa apertiùs declarandi, prompto, ac libenti animo amplexum fuiſſe, gaudere Vos cernimus. Verùm, ut gaudium hoc veſtrum plenius fit, & cumulatiùs, latere Vos nolumus, quæ priùs idem Auguſtus Rex binis ſuis ad Nos die ſexta Octobris elapſi anni, ac die 10. Februarii proximè præteriti reſpectivè datis Literis ſcripſerat, ex quibus & gratum, ac devotum in Nos, & hanc Sanctam Sedem ejus animum, quemadmodum & illum ex aliis præfati Regis ad unumquemque veſtrum conſcriptis, ac Vobis, ut audivimus, nuper redditis Literis conjicere potuiſtis, abundè percipietis: ac inſuper (quod fanè valdè notandum eſt, Vobiſque per jucundum erit) falſa prorsùs fuiſſe, & eſſe, quæ de quibuſdam paſſionibus non minùs Catholicæ Religionis rationibus quàm Reipublicæ Polonæ juribus, ac libertati adverſantibus ab ipſomet Rege occasione ſui in Poloniam reditus cum A catholicis Principibus, ut ferebatur, initis vulgata fuerant, ſatis ſuperque intelligatis. Legantur igitur etiam hujusmodi Literæ.

Perleſſæ hic fuerunt à prædiſſo R. P. D. Oliverio duæ Regiæ Epiſtolæ linguâ Italicâ ad Sanctitatem Suam dudum, nempe

die

die 6. Octobris elapsi anni, ac die 10. Februarii proximè præteriti respectivè datæ, quibus lætis Sanctitas Sua sequentibus verbis Orationem suam absolvit:

Abstinemus nunc ab iis præterea commemorandis, quæ idem Augustus Rex urgente potissimum rem hanc apud ipsum Dilecto Filio Annibale Albano nostro secundum carnem Nepote, de inito à se consilio adjungendi quamprimum Principi ejus nato pios, ac probos Viros, qui illum orthodoxæ Religionis præceptis, ac ritibus imbuant, non ita pridem ad Nos fusè perscripsit, suamque ea de re Nobis Regiam fidem disertis verbis obstrinxit; id enim ad eam differimus diem non longè, ut speramus, Deo propitiante, abfuturam, qua hujusmodi consilium omninò peractum, impletumque fuisse perceperimus: Interim ex iis, quæ retulimus, satis luculenter Vobis perspectum fore confidimus Augustum Regem abundè promereri, ut pro iis, qui viduatis in ejus Regno Ecclesiis de more præficiendi erunt, Pastoribus Regias ejus preces ex consueta hujus Sanctæ Sedis benignitate exaudire diutiùs non differamus. Nec sanè absque Divinæ Providentiæ consilio evenisse arbitramur, ut jamdiù vacanti Cracoviensi Ecclesiæ hac ipsa die S. Stanislao sacrâ, qui tanta illi cùm sanctitatis, & pastoralis sollicitudinis laude præfuit, Præsulem constituamus: inde etenim felix accipimus omen fore, ut tam is, quem eidem Ecclesiæ Cracoviensi mox præficiemus, quàm reliqui ad alias dicti Regni Ecclesias sive hodie, sive in posterum promovendi, ejusdem Sanctissimi Episcopi, ac Martyris virtutes, & exempla sibi imitanda proponant, ejusque potissimum ope, qui præcipuus Poloniæ Patronus habetur, à Patre misericordiarum consequantur, ut pacatis penitus, quæ idem Regnum tamdiù jactarunt, dissidiorum, ac bellorum fluctibus, pristina demùm illi quies, ac plena serenitas restituatur, atque indè Regius animus in dies magis inflammetur ad ea alacriùs peragenda, quæ Christia-

næ Reipublicæ, & Catholicæ Ecclesiæ læta esse possunt, & salutaria.

His peractis deventum fuit ad propositiones, & præconia plurium Ecclesiarum, inter quas primò idem Sanctissimus proposuit Ecclesias Kiovien., & Halicien. Ritus Græci iuvicem unitas, ac subindè Cracoviensem, & Posnaniensem in Regno Poloniæ.





Singulariter in Spe Constituisti me. Ps. 4.

IN CONSISTORIO SECRETO

Habito die 19. Maji 1710.

ARGUMENTUM.

Sacro Collegio nunciat Antonium Ulricum Ducem Brunsvicensem, & Luncburgensem, ejuratâ palâm Lutheranâ hæresi Catholicam Religionem suscepisse.

VENERABILES FRATRES.



Hristus Dominus majus gaudium esse dixit in Cœlo, & coram Angelis Dei super uno peccatore pœnitentiam agente, quàm super nonaginta novem justis, qui non indigent pœnitentia. Ut hoc ipsum gaudium hodie percipiat, consentaneum arbitramur ex hoc loco palâm edicere, quod famâ ipsâ nunciantem, Vobis jam innotuisse non dubitamus, videlicet Dilectum Filium Nobilem Virum Antonium Ulricum Ducem Brunsvicensem, & Luncburgensem, inclytæ suæ stirpis longè omnium Principem, & Caput, magno non tam annorum, quàm singularium animi dotium numero spectabilem Senem, ob illustria Regiarum Affinitatum decora præclarum, ob excelsæ, ac non vulgariter

XXXI.

L

CRU-

eruditæ mentis ornamenta præstantem, nullo præcipitis consilii incitamento commotum, nulla ingenii levitate, sive instantia impulsus, nulla temporalis sui commodi illecebra allectum: post diuturnam complurium annorum deliberationem, post prævisum ingruentium sibi discriminum, ac molestiarum gravissimum cumulum, sola agnitæ veritatis ratione excitatum, sola supernæ gratiæ illustratione perfusum, solo demum animæ suæ salutis desiderio incensum, Lutherana hæreseos, in qua natus, & educatus fuerat, erroribus ejuratis, Catholicam Religionem, ac fidem amplexum fuisse. Quatuor profectò ante menses faustissimum hunc eventum Vobis nunciare potuissimus, quippe qui per id temporis nedum à Dilecto Filio Annibale Albano nostro secundum carnem Nepote, qui suis in eum finem collatis studiis oblatam sibi opportunitatem orthodoxæ Religionis causam agendi captare non omisit, sed etiam ab ipso met Duce suis ad Nos die 11. Januarii proximè præteriti datis literis significatus fuerat. Verùm quia idem Dux rem hanc ad aliquod tempus silentio tegi majorem in modum exoptavit, ab ea tunc Vobis aperienda abstinuimus; non tamen propterea abstinuimus à prædicto Duce enixis adhortationibus excitando, ut grandi illa fretus charitate, quæ foràs mittit timorem, mirabilia, quæ in eo fecit Dominus, quamprimum evulgare non formidaret; & sanè paternis hisce monitionibus nostris absque ulla cunctatione morem gerens optimus Princeps, acerbis, & adversis quibuscumque, quæ sibi subeunda fore probè intelligebat, magna animi virtute contemptis, Lutheranam denuò hæresim in Bambergensi Civitate palàm ejuravit, publicamque emisit fidei professionem in manibus Venerabilis Fratris Archiepiscopi Moguntini S. R. I. Principis Electoris, qui ejus rei authenticum documentum à compluribus testibus subsignatum ad Nos misit, atque edita ea occasione à præfato Duce magnâ cum animi sui tranquillitate eximiæ pietatis argumenta luculen-

ter explicavit. Cùm itaque, benedicente Domino, prosperè jam confecta res sit; diutius nunc Nobis cunctandum non esse duximus, quin eam Vobis apertè indicaremus. Literæ igitur ejusdem Ducis ad Nos scriptæ, ac illæ itidem, quas ad eum rescripsimus, perlegantur.

Hic perlectæ fuerunt ab eodem R. P. D. Oliverio duæ epistolæ Sanctissimo perscriptæ à D. Antonio Ulrico Duce Brunsvicensi, unâ cum literis in forma Brevis, quibus Sanctitas Sua ad illarum priorem rescripsit; quarum absoluta lectione Sanctitas Sua ita allocutionem suam absolvit:

Reliquum jam est, ut Patri misericordiarum, & Deo totius consolationis, qui Ducem Brunsvicensem de tenebris vocare dignatus est in admirabile lumen suum, humiles, atque uberes gratias agamus ob maximum tam læto eventu gravissimis curis nostris levamen allatum, eumque enixè obsecremus, ut memorato Principi cœlestium donorum incrementa largiatur, quorum subsidio illorum plurimos, quos ipse habuit in suo errore socios, habere etiam possit in sua pœnitentia consortes.





IN CONSISTORIO SECRETO

Habito die 1. Decembris 1710.

ARGUMENTUM.

Quæ à Leopoldo Lotharingæ, & Barri Duce piè non minùs, quàm justè peracta fuerant pro revocandis iis, quæ in Codice Leopoldo nuncupato jussu ejusdem Ducis jampridem edito, & à Sanctitate Sua damnato adversùs Ecclesiæ jura continebantur, aliisque inde secutis plenè emendandis, latè exponit.

VENERABILES FRATRES.

XXXII.



Eptem jam lapsi sunt anni, ex quo Codicem *Leopoldum*, nuncupatum, hoc est, Constitutiones quasdam, seu Ordinationes nomine Dilecti Filii Nobilis Viri Leopoldi Lotharingæ, & Barri Ducis pro justitiæ administratione editas, utpote Ecclesiasticæ Immunitati Dei ordinatione, ac Canonicis Sanctionibus constitutæ non uno ex capite adversantes prævio, ut par erat, maturo examine per nostras in forma Brevis literas reprobavimus, earumque lectionem, retentionem, & usum omnibus Christifidelibus

libus pro muneris nostri debito interdiximus. Subinde verò cùm Nobis innotuisset in vulgus circumferri quædam folia, quibus actus appellationis à Procureatore Generali Curia ejusdem Ducis adversus literas nostras supradictas interpositæ non minùs Nobis, quàm Ecclesiæ summoperè injuriosus continebatur, illa similiter damnavimus, & prohibuimus. Eidem porrò censuræ aliam post hæc editam præfati Ducis Constitutionem, quam additionalem, seu ampliativam vocarunt obnoxiam pariter declaravimus, quippe qua confirmari potius priores à Nobis reprobata Constitutiones videbantur, quàm emendari. Interea Ducem ipsum, cujus insuper nomine literarum nostrarum adversus easdem Constitutiones, actumque appellationis præfatum publicatio in ejus Ditionibus interdicta fuerat, paternè, ac sedulo admonere non omisimus, ut irrogatam Ecclesiæ injuriam repararet, inflicto mederetur vulneri, simulque conscientia suæ confuleret, ac Dignitati, quam non in evertenda, sed in tuenda Ecclesiæ libertate, fovendis juribus, amplificandisque privilegiis sitam esse, & ipse per se planè intelligere poterat, & ab inclytis Progenitoribus suis, qui pietate sanè, & in Ecclesiam obsequio, quàm Principatu ipso clariores extitere, uberiùs didicerat. Ostendimus iteratis literis quàm turpe esset Catholicum Principem, ac præsertim Lotharingæ Domus tot hujus Sanctæ Sedis beneficiis auctæ, à primo sui regiminis limine sacrosancta Ministrorum Dei jura impetere, libertatemque violare, ac veluti Principatus initia ab Ecclesiæ injuriâ auspicari. Protulimus sanctas veterum Patrum Regulas, quæ immunem à Laicorum Potestate Ecclesiam, ac Venerabilem Clerum ubique clamant, nihilque ad sæculi Principes in Ecclesiasticis negotiis præter reverentiam pertinere. Ediximus non imminutis, sed auctis Clericorum in sortem Domini vocatorum privilegiis florere Regna, firmari dominia, Sacerdotumque potissimum precibus felicitati publicæ consuli. Denunciavimus demum pa-

rata superni Judicis flagella, imminentemque Potentibus sempernam perniciem, si in Ecclesiam peccassent, eamque conquerentem minimè audivissent. Audivit eam tamen Religiosus Princeps, nostrisque monitis excitatus, Constitutiones illas, quas inconsultò, ut credimus, & aliorum potius suggestione impulsus, ac subreptione deceptus promulgari permiserat, in iis, quæ Ecclesiæ juribus adversabantur, omninò abolere constituit. Hinc primùm quidem per Ablegatos suos, deindè verò datis etiam ad Nos literis novi Codicis editionem Nobis obtulit, quo veteris per Nos reprobati Codicis *Leopoldi*, nec non editæ subinde additionalis Constitutionis omnimodà abrogatione præmissà, nihil profus, de iis, quæ ad Ecclesiam spectant, statuere-
tur, sed ea tantum, quæ ad seculare dominium; & regimen pertinent, præscriberentur. Et sanè ut promissis satisfaceret, fidemque suam hac in re liberaret, fermè ante tres annos veteri Codice cum sua additionali Ordinatione penitùs revocato, ac deletò, novum edidit Codicem, simulque cavit, ne quidquam in illum induceretur, quod Ecclesiasticam Jurisdictionem directè, vel indirectè restringeret. Novum hunc Codicem haud multo post Dux ipse ad Nos misit literis suis, quæ ex Gallico idiomate in Italicum fideliter versæ à Secretario Brevium nostrorum Secretorum mox legentur.

Hic ingressus fuit Consistorium R. P. D. Oliverius Secretarius Brevium Secretorum Sanctissimi, legitque literas D. Ducis Lotharingiæ ex Gallico idiomate in Italicum versas ad Sanctitatem Suam datas die 23. Maji 1708. quarum absoluta lectione Sanctitas Sua reassumpsit in hæc verba:

Certiores præterea Nos fecit idem Dux se literas illas, quibus dudum ejus nomine vetita fuerat promulgatio in suis Ditionibus literarum nostrarum adversùs præfatum veterem Codicem editarum insimul revocasse, transmissò ad id documento, quod nunc audietis.

Lecta hic fuit à prædicto R. P. D. Oliverio Epistola Encyclica similiter ex Gallico idiomate in Italicum versa, qua transmissus fuit per loca Ditioni D. Ducis Lotharingæ subiecta novus Codex illius jussu promulgatus anno 1708. ea porro perlecta Sanctitas Sua sequentibus verbis suam allocutionem profecuta fuit :

His, quæ audistis, nondum adhuc Nobis, & Ecclesiæ à Duce Lotharingæ plenè satisfactum fuisse arbitrati fuimus. Cùm enim in Mandato quodam, sive Ordinatione, ut vocant, novo Codici præfixa diserte decerni animadverterimus quoad ea, quæ in eodem novo Codice expressa minimè reperiabantur, observari debere Edicta, & Ordinationes Ducum Lotharingæ, nec non Regulas, mores, & consuetudines Regionis; valde timuimus, ne ejusmodi verbis attentis ea, quæ adversùs Ecclesiæ jura, & libertatem ante aliquot annos in Lotharingæ Ditionibus innovata fuisse compertum est, etiam abolito, ac de medio sublato vetere Codice, tamquam mores, & consuetudines Regionis quibusdam forsàn etiam Edictis, & Ordinationibus innixas, præservari contingeret. Prætereà in eorum abrogatione, quæ adversùs nostras literas supradictas attentata fuerunt, specialem, ac expressam illius appellationis, quam meritò damnavimus, revocationem desiderari deprehendimus. Curavimus proindè super his ab eodem Duce ea impleri, quibus plena Ecclesiæ reparatio haberi posset; Egit de his cum Ministris à dicto Duce deputatis Dilectus Filius Annibal Albanus noster secundùm carnem ex Fratre Nepos, qui sanè benè memor in suo ab Urbe discessu non alias, quàm Ecclesiæ, ac Orthodoxæ Religionis causas sibi à Nobis commendatas fuisse, rem totam feliciter perfecit. Quid porro ipse egerit, quid itidem egerit præfatus Dux, ut Nobis, & Ecclesiæ cumulatè satisfaceret, ex iis, quæ legentur, ac hesternæ die per celerem Tabellarium ad Nos pervenerunt, abundè percipietis.

Hic

Hic idem R. P. D. Oliverius legit alias literas D. Ducis Lotharingiæ pariter ex Gallico idiomate in Latinum versas ad Sanctitatem Suam nuperrimè, nempe die 18. Novembris proximè elapsi datas unà cum documentis inibi introclusis. His perleſtis Sua Sanctitas iterum suam Orationem reassumpsit, ut sequitur:

His Lotharingiæ Ducis literis, quas audivistis, nuperrimè receptis, rescribere illicò duximus in hunc sensum.

Hic perleſtum fuit ab eodem R. P. D. Oliverio Breve Sanctitatis Suae hesternæ die datum, quo postremis D. Ducis Lotharingiæ literis responsum fuit. Brevis hujusmodi lecto, Sanctitas Sua ita allocutionem suam absolvit:

Dum læta hæc, VENERABILES FRATRES, inter tot tristia, quibus circumdamur, hac hilari die, qua Vos in Aula ista, postquam illa splendidius ornata fuit, primum alloquimur, Vobis nunciamus, liceat Nobis Christi Servatoris nostri verba illa usurpare: *Hæc locutus sum Vobis: ut gaudium meum in Vobis sit, & gaudium vestrum impleatur.* Uberes itaque agamus gratias Patri Misericordiarum, & Deo totius consolationis, qui Duci Lotharingiæ, cui nostræ, & omnium Vestrum laudes meritò debentur, dedit cor docile, ut cognosceret probum, ac sapientem Principem minimè dedecere, ea, quæ minùs rectè gesta sunt, retractare, majorisque esse gloriæ malè acta corrigere, quàm illa cum Ecclesiæ, Deique offensione propugnare.





IN CONSISTORIO SECRETO

Habito die 27. Aprilis 1711.

ARGUMENTUM.

Immaturum, ac verè inopinatum obitum cla. me. Josephi I. Romanorum Regis in Imperatorem electi DD. Cardinalibus denunciat, eâque occasione ad defuncti Principis laudem refert consilium ab illo susceptum Apostolicæ Sedi ea omnia, quæ obedientissimum S. R. E. Filium decebant, per Oratorem suum cumulatè exhibendi. Accepto siquidem à Majoribus suis more suas jam ad id literas miserat ab eodem Oratore Sanctitati Sux solemniter reddendas, aliaque omnia hac in re ita disponi curaverat, ut quæ Romæ demum agenda supererant, antiquis Romanæ Ecclesiæ moribus plenè conformarentur.

VENERABILES FRATRES.



Eracerbum, ac sanè luctuosum nuncium immaturæ mortis cla. me. Josephi, dumvixit, Romanorum Regis in Imperatorem electi per celerem Curforem ad Nos nuperimè allatum, sinè mora Vobis hodie communicamus, non dubitantes unicuique Vestrum communem esse dolorem, quem in hoc inopinato, ac funestissimo casu supra omne id, quod dici potest, maximum experimur, ob summè periculofam rerum, ac temporum con-

XXXIII.

M

di-

ditionem, qua illum contigisse cognoscimus. Nec sanè ququam non agnoscit, (nisi ineffabilis Dei misericordia in bonum monstra convertat) quàm alieno Reipublicæ tempore electus Imperator, non relicto in spem successionis Romanorum Rege, ab humanis decesserit. Ardet siquidem adhuc cum gravissimò totius Europæ incendio maximè pertinax inter Christianos Principes bellum, quo florentissimæ olim, nunc miseræ, Christiani Orbis Provinciæ tot per annos agitatæ, tamquam virgâ furoris Domini, affliguntur. Crescunt quotidie plurimis in locis, & quod maximè dolendum est, etiam in ipsis Catholicorum Principum ditionibus, absque ullo jam sacrarum, & prophanarum rerum discrimine, Hæreticorum vires, & fraudes, in orthodoxæ Fidei verè deplorandam perniciem. Suecus præcipuè acceptis antea cladibus irritatus, novo, & ingenti armorum apparatu ferociter instat, palam minatur Poloniæ, sed an alia etiam clam meditetur, ignoramus. Vocatus in ejus auxilium Turcarum Tyrannus, collectis tot Provinciarum, & Regnorum, quæ Tyrannide suâ opprimit, viribus, Christianas Regiones stragibus involvere, suæque perfidiæ abominationem in agro Dei viventis plantare, & latius propagare molitur. Sed quid jam mala singula recensere contendimus? Ubique terror, ubique luctus, ubique desolatio: undique percutimur, undique amaritudinibus replemur; ita ut si umquam aliàs, certè nunc gravem manum Domini sentiamus, flagitiis hominum ejus iram jugiter provocantibus. Accedit ad augendum dolorem nostrum, quòd electus Imperator obiit nondum peracto opere, in quod, ut antiqua hujus Sanctæ Sedis jura vindicaremus, vigilias plurimas, plurimosque labores insumpsimus; Decreverat scilicet Ille jampridem (quod ad defuncti Principis laudem commemoramus) accepto à Majoribus suis more, ea omnia, quæ obedientissimum S. R. E. Filium decent, per suam apud Nos, &

eandem Sedem Oratorem, cumulatè Nobis præstare ; quinimò suas etiam ad id jam literas miserat, ab eodem ejus Oratore Nobis reddendas, quibus quidquid olim post solemnem eorundem illius Majorum in Romanorum Reges, & Imperatores electionem Romani Pontifices Prædecessores nostri facere, & concedere consueverunt, id totum à Nobis similiter fieri, si-bique concedi debitâ reverentiâ postulabat. Nec ipsi Josepho hac in re ullatenus defuissent Pontificiæ charitatis, atque auctoritatis argumenta illa, quæ ejus Majoribus delata fuerunt. Re ipsa tamen, Deo sic disponente, opus istud minimè perfectum fuit non aliâ quidem ratione ab Oratore Cæsareo dilatum, cùm cæteroqui alia omnia essent in promptu, nisi ut solemniori pompâ, pro qua paranda diuturniori tempore indigebat, demandatum sibi munus exequi posset. Cumulum demum addit dolori nostro, quòd idem electus Imperator diem suum clausit extremum, non expleto consilio, quod iniverat, restituendi Nobis, & S. R. E. Civitatem nostram Comacini, quam ejus militares copiæ ante tres annos, ut benè nostis, occupaverant. Nescimus an id fecerint peccata nostra, vel potius Deus ob inscrutabilia sua judicia hoc ipsum evenire permisit, ut clariùs semper addiscamus, cum de iis agitur, quæ ad Animæ salutem pertinent, non esse neccendas moras, neque expectandam altitudinem illam dici, quam David metuebat, sed absque ulla cunctatione, celeriter, diluculò, ac festinanter securitati conscientiæ consulendum. Cùm tamen non tam ea, quæ, ut ferunt, defunctus Princeps hac in re agere seriò constituerat, quàm quæ de pio, constanti, ac Christiano illius obitu Nobis nunciata fuerunt, sperare. Nos faciant eum misericordias Domini expertum fuisse, Christianæ charitatis debito urgemur, ut sacrificiis, orationibus, & obsecrationibus illius Animæ solatium comparemus. Id porrò & privatim Nos ipsi jam agere cœpimus, Vosque

unà Nobiscum prosequi optamus, hoc ipsum publicis suo tempore in Pontificio nostro Sacello exequiis statâ die Vobis indicenda juxta Prædecessorum nostrorum morem solemnî ritu præstituri. Rogemus interim Eum, qui dominatur potestati maris, & motum fluctuum ejus mitigat, ut non respiciens peccata nostra, sed suam bonitatem, avertat mala à populo suo, converfisq; in pacem, ac tranquillitatem illismet periculis, quæ nuper deflevimus, suscitet sibi Servum fidelem, qui defuncto Josepho succedens, turbatissimis hisce rebus opportunè subveniat, eaque feliciter peragat, quæ Apostolicæ Sedi tot injuriis vexatæ, Ecclesiæ tot vulneribus laceræ, ac Christianæ Reipublicæ tot calamitatibus afflictæ læta esse possint, & salutaria.





IN CONSISTORIO SECRETO

Habito die 11. Maji 1711.

ARGUMENTUM.

Galliæ Delphini obitum DD. Cardinalibus nunciat, commemoratisque ejus virtutum laudibus exequias pro refrigerio illius Animæ in Pontificio Sacello de more celebrandas indicit.

VENERABILES FRATRES.



Ignificavimus Vobis in præterito Consistorio acerbam jacturam, quam ante paucos dies fecerat Germanicum Imperium, suo sibi Capite immaturè nimis erepto. Aliam hodie æquè inopinatam, quam florentissimum Galliæ Regnum fecit, itidem jacturam, amisso nuperrimè ejusdem Galliæ Delphino, Christianissimi Regis Primogenito, non sinè gravi paterni cordis nostri dolore Vobis similiter nunciamus. Utramque mors clarissimam Domum æquo pede pulsavit, ambobus Principibus eadem fermè hebdomadà pari festinatione, nec sanè dispari morbo sublatis. Sic ludens in orbe terrarum divina Sapientia novis Nos in dies edocet exemplis nihil tam sublime esse, & excelsum in terris, quod fluxum, & caducum non sit, ut tandem non alibi corda nostra figere addiscamus, quàm ubi vera sunt gaudia in æternum mansura. Quomodò enim, ubi hæc evenire conspiciamus, fieri un-

quam

Xxxiv.

quam potest ita hominum animos terrenarum rerum externâ specie, ac fūco deliniri, volupratum illecebris irretiri, sensuum lenociniis capi, dignitatum, atque honorum fulgore perstringi; ut quem ad exitum hæc omnia festinent, quem ad scopulum allisa, quæcumque hîc suspicimus, brevi frangantur: quas demum in tenebras, & solitudinem cujusvis celsioris humani fastigii claritudo, ac majestas redigatur, vel stultè non animadvertant, vel ineptè dissimulent, vel temerè inficientur? Sed jam unde nostra instituta fuit Oratio, revertamur. Ludovicus Galliæ Delphinus Regis filius, Regis itidem Parens, ardenti, quod cum lacte haustum semper retinuit, conservandæ, ac propagandæ orthodoxæ Religionis studio commendatus, eximia animi moderatione, comitate, prudentiâ, ac constanti potissimum in Regium inclytum Genitorem, quam in provectiori etiam ætate semper exhibuit, reverentiâ spectatus, relicto universis populis sui desiderio planè singulari, ab humanis decessit. Illi igitur extremum paternæ nostræ charitatis officium præstituri, nondum adhuc iis persolutis iustis, quæ Romanorum Regi in Imperatorem Electo nuper de more decrevimus, alias nunc exequias indicare cogimur pro refrigerio animæ ipsius Delphini die Vobis nunciandâ in Pontificio nostro Sacello celebrandas. Sequimur hac in re exemplum fel. rec. Pauli Papæ III. Prædecessoris nostri, qui anno 1536. alteri tunc temporis defuncto Galliæ Delphino solemnî ritu de tunc existentium S. R. E. Cardinalium unanîmi consilio, & assensu similiter parentavit. Hæc Vobis, VENERABILES FRATRES, confestim, & absque ulla mora ex hoc loco edicere æquum duximus, ut quemadmodum Nos ipsi privatim jam egimus, ita & Vos interim pro ea, qua sublimes Principes, qui in Catholicæ Ecclesiæ communione piè obierunt, prosequi apud Deum soletis, pietate vestris quoque suffragiis defuncti Principis Animæ æternam pacem comparare studeatis.



IN CONSISTORIO SECRETO

Habito die 14. Octobris 1711.

ARGUMENTUM.

Obitum piæ recordationis Caroli Thomæ S.R.E. Cardinalis de Tournon Macai in Sinarum Imperio die 8. Junii 1710. secutum DD. Cardinalibus communicat, ejusque præclaræ Ecclesiam, Apostolicam Sedem, Catholicamque Religionem meritis fusè commemoratis, exequias pro suffragio ejus Animæ in Pontificio Sacello solemniter celebrandas indicit. Deputat deinde suum, & Apostolicæ Sedis de Latere Legatum Josephum Renatum S.R.E. Diaconum Cardinalem Imperialem ad Carolum III. Hispaniarum Catholicum, nec non Hungariæ, & Bohemiæ Regem Illustrem, qui nuperrimè à Civitate Barchinonensi in Italiam profectus Mediolani constitit, & hinc Germaniam repetere constituerat.

VENERABILES FRATRES.



Æpius Nos ex hoc loco publica mala deflevimus: domesticam hodie nostram, ac vestram itidem jacturam dolemus; Nisi tamen & publica dici illa mereatur, quæ cùm nostra, & vestra sit, censeretur etiam debet universæ Ecclesiæ calamitas. Benè jam intelligitis de acerbo Nos obitu Caroli Thomæ Cardinalis de Tournon verba facturos. Amisimus, VENERABILES FRATRES, amisimus orthodoxæ Religionis zelatorem maximum: Pontificiæ autho-

rita-

Xxxv.

ritatis intrepidum defensorem: Ecclesiasticæ disciplinæ assertorem fortissimum: magnum Ordinis Vestri lumen, & ornamentum. Amisimus Filium nostrum, Fratrem vestrum: plurimis, quos pro Christi causa suscepit, laboribus attritum: diuturnis, quas pertulit, ærumnis confectum; contumeliis, quas forti, magnoque animo sustinuit, innumeris, velut aurum in fornace probatum. Hæc tamen si rectè perpendantur, tantum abest, ut ad cumulandum luctum nostrum sint apta, ut potiùs omnem doloris sensum ab animis nostris abstergant. Neque enim juxta monitum Apostoli contristari de dormientibus debemus, sicut & ceteri, qui spem non habent. Pretiosam in conspectu Domini piissimi Cardinalis mortem fuisse justè sperare Nos jubet eximius ille Catholicæ Fidei propagandæ zelus, quo ubi primum ad Apostolicum Ministerium à Deo vocatus per Nos fuit, illicò humiliter obtemperans, Aulam, Urbem, Parentes, Confanguineos, Amicos, eaque omnia, quæ natura cuique gratissima facit, alacri, sicut nostis, animo dereliquit, longissimoque itineri, ac periculorum pleno se committere non dubitavit. Sperare Nos jubet ardens illa charitas, qua tot rémotissimis terrarum, mariumque spatiis peragratis, numquam fecit animam suam pretiosiores, quàm se: ac foras misso timore locutus fuit de testimoniis Domini in conspectu Regum, & non fuit confusus: semperque in tribulationibus gaudens, pergratum Deo, & Angelis ejus spectaculum exhibuit. Sperare Nos jubet excelsus ille humanarum rerum contemptus, quo amplissimam Dignitatem, ad quam, suis ita abundè exigentibus meritis, à Nobis evectus fuerat, & à qua nihil aliud, quàm pro Ecclesia, & pro Christo usque ad Sanguinis effusionem inclusive imperterritè decertandi onus, ac monitum acceperat, dimissurum se potius, quàm in Europam, Missionibus Sinicis derelictis, remigraturum seriò ad Nos scripsit, & palàm professus fuit. Sperare Nos jubet singularis illa pietas, qua in su-

premis suis tabulis, relicta pauperibus pecuniâ, consanguineis legata Cruce, propagandæ Fidei Opus verè sanctissimum ex assè scripsit hæredem : illustre Nobis documentum relinquens, quæ, & qualia esse debeant eorum testamenta, qui de Altari vixerunt, & Ecclesiæ Ministeriis se addixerunt. Sperare Nos demùm jubet invicta illa Sacerdotalis roboris constantia, qua Vir verè Apostolicus, tametsi sustentaretur pane tribulationis, & aquâ angustię, officium tamen suum nunquam dimisit : ac non minùs diuturnæ custodię injuriis, quàm aliis gravissimis vexationibus ad supremum usque vitæ spiritum fortiter toleratis bonum certamen certavit, cursum consummavit, fidem servavit. Quid ergo reliquum est, nisi quod & meritò etiam speremus repositam ei fuisse coronam justitię. Ita fanè, & justè sperare Nos convenit. Verùm quia id facit humana fragilitas, ut de mundano pulvere etiam religiosa corda sæpè fordescant, nostra pro defuncti Cardinalis animâ ad Deum preces, atque suffragia deesse, Christianæ charitatis ratio non patitur. Id & privatim hætenùs Nos ipsi sapius agere non omisimus, ac, ut aliquid præter morem erga insuetæ virtutis Viri memoriam peragamus, publicis insuper in Pontificio nostro Sacello Exequiis, statâ die Vobis indicendâ, solemnî ritu præstabimus. Firmam interim in spem adducimur fore, ut Cardinalis de Tournon Sinensem Missionem, quam vivens dilexit, etiam è cœlesti statione benigno vultu respicere non dedignetur, suæque ope id in primis efficiat, ut quod ipse anxius ad eò votis exoptavit, avulsis tandem ex illo agro, quæ inimicus homo superfeminavit, zizaniis, Catholicæ Fidei seges illic reflorescat, & ad majorem Divini nominis gloriam uberius in dies multiplicetur.

IN EODEM CONSISTORIO.

Absolutis propositionibus, & præconiis variarum Ecclesiarum, Sanctitas Sua ita rursus locuta fuit.

VENERABILES FRATRES.

XXVL

CUM Charissimus in Christo Filius Noster Carolus Hispaniarum Catholicus, nec non Hungariæ, ac Bohemiæ Rex Illustris, binis ad Nos datis literis, filialis suæ in Nos, & hanc Sanctam Sedem devotionis significationibus abundè refertis, quas Dilectus Filius Nobilis Vir ejusdem Caroli Regis apud Nos, & Sedem præfatam Extraordinarius Orator Nobis reddidit; prioribus quidem de consilio, quod susceperat, è Civitate Barchinensi brevi in Italiam, ac inde in Germaniam transmittendi: posterioribus verò de felici suo ad oram Saonensem appulsu, certiores Nos fecerit: Nos ne opportunitatem hanc dicto Regi declarandi, quæ, & quanta sit paterna nostra in eum charitas, irritam dimittamus, Romanorum Pontificum Prædecessorum nostrorum exemplis, quæ aliàs etiam Nos ipsi, sicuti nostis, secuti fuimus, adducti, ad eundem Carolum Regem, quem ante duos annos hac ipsa die, videlicet decima quarta Octobris, in Consistorio Nostro Secrêto Hispaniarum Regis titulo nuncupare decrevimus, Nostrum, ac dictæ Sedis de Latere Legatum deputare intendimus Dilectum Filium Nostrum Josephum Renatum S. R. E. Diaconum Cardinalem Imperialem, cui eximie virtutes, ac in primis pietas, prudentia, integritas, aliæque præclaræ generis, atque animi dotes, ad amplissimum hoc munus è dignitate Apostolicæ Sedis gerendum egregiè suffragantur; ut quamprimum sic deputatus Mediolanum se conferat, nostram ibi Apostolicam Benedictionem Regi deferat, incolumem in Italiam adventum gratuletur, felix, faustumque in Germaniam, quam repetit, iter apprecetur, ac nostra demùm Illi explicet

vota, ut hoc idem ejus iter in exoptatæ publicæ tranquillitatis cedat auspiciū.

Quid Vobis videtur ?

Auctoritate Omnipotentis Dei, Sanctorum Apostolorum Petri, & Pauli, ac nostra supradictum Josephum Renatum Cardinalem Imperialem nostrum, & Sedis Apostolicæ de Latere Legatum deputamus, & declaramus ad præmissa peragenda, cum facultatibus, & clausulis opportunis.

In nomine Patris †, & Filii †, & Spiritus † Sancti. Amen.





IN CONSISTORIO SECRETO

Habito die 23. Decembris 1711.

ARGUMENTUM.

Creat S. R. E. Diaconum Cardinalem Annibalem Albanum Sanctitatis Suae ex Fratre germano Nepotem, utriusque Signaturæ Referendarium, Camera Apostolicæ Præsidentem, ac nuper ad Tractum Rheni, aliasque partes inferioris Germaniæ Nuncium Apostolicum extraordinarium.

VENERABILES FRATRES.

Xxxvii.



Ongo jam mortalis ævi spatio indolem, vitam, mores Dilecti Filii Annibalis Albani nostri secundum carnem ex Fratre germano Nepotis probare studuimus, illumque, quem admodum ferè ab ineunte ætate huic Apostolicæ Sedi singulari quodam cultu additum novimus, ita ferventiore semper erga illam studio incensum multiplici experimento comperimus. Sperantes proinde eum illustribus Fraternitatum Vestrarum exemplis perficiendum, Deo, & Ecclesiæ fructuosiore in dies exhibiturum esse famulatum, amplissimo Vestro Cœtui illum adscribere cogitamus. Cum tamen è contra valde Nos terreant verba illa Constitutio-

nis

nis fel. rec. Innocentii XII. Prædecessoris nostri, quibus cùm ea præscribitur disciplina, quæ quoad Nepotes, aliosque Confanguineos Romanorum Pontificum ad Cardinalatum promovendos servanda est, satis apertè innuitur non alios ex iis ad hanc sublimem Dignitatem assumendos esse, quàm quibus eximia ad id merita suffragantur, justo timore corripimur, ne in ejusmodi judicio ferendo carni, & sanguini nimium indulgentes illius jurisjurandi, quo ab ipso Pontificatus nostri limine obstricti reperimur, immemores videamur. Cœlestem idcirco luminum Patrem suppliciter in primis rogamus, ut si quod agere meditamur, memoratæ Constitutioni, quam Nos usque ad extremum vitæ spiritum inconcussè observare spondimus, & nunc iterum Deo, & hominibus spondemus, quoquo modo repugnet, seu aliàs in nostræ, aut etiam in ipsius Nepotis nostri animæ perniciem cessurum sit, adhærere faciat Omnipotens Dominus linguam meam faucibus meis, ne hac de re edendum de more, Decretum pronunciare valeamus: Deindè Vos, VENERABILES FRATRES, enixè obsecramus, & in Domino obtestamur, ut in tam gravi deliberatione labia vestra non prohibeatis, sed quâcunque humanâ ratione posthabitâ, ac solum Deum præ oculis habentes, syncerè, ac liberè sententiam vestram feratis.

Quid itaque Vobis videtur?

Auctoritate Omnipotentis Dei, Sanctorum Apostolorum Petri, & Pauli, ac nostra creamus S. R. E. Diaconum Cardinalem Annibalem Albanum cum clausulis necessariis, & opportunis. In nomine Patris †, & Filii †, & Spiritus † Sancti. Amen.



IN CONSISTORIO PUBLICO

Habito die 30. Januarii 1712.

ARGUMENTUM.

Excepit Dominum Cardinalem Josephum Renatum Imperialem, qui ab Apostolica Legatione ad Carolum III. Hispaniarum Regem Catholicum Mediolani obitâ feliciter ad Urbem redierat, & Sanctitatem Suam his verbis allocutus fuit:

BEATISSIME PATER.



Ansistatis Vestræ mandatis obtemperans, Apostolicâ fretus Benedictione, Mediolanum me contuli, Catholico Hispaniarum Regi Carolo III. nuper in Imperatorem electo Sanctitatis Vestræ nomine felicem in Italiam adventum gratulatus sum, prosperumque eidem in Germaniam iter auspicatus, paternæ benevolentia, ac intimæ Pontificiæ charitatis sensus simul exposui. Præclara hæc Apostolicæ benignitatis argumenta filiali, qua par erat, devotione eximius pietate, & zelo Rex excepit, paratumque sæpius se professus est ad ea omnia erga Sanctitatem Vestram, & Sanctam Sedem Apostolicam præstanda, quæ obedientissimum Filium deceant; quam Regii animi propensionem jam

non

non verbis tantum, sed & factis (quoad per tempus licuit) confirmavit. Quidquid demum in hac legatione feliciter gestum est, id totum Sanctitati Vestræ acceptum refero. Si quid verò minus prosperè, id tenuitati meæ tribuo; summæ autem Sanctitatis Vestræ benignitatis erit ignoscere.

Ad hæc Sanctitas Sua ita respondit.

Vides, Dilecte Fili Noster, quàm uberi lætitiæ sensu Urbs penè tota felicem tuum, & incolumem reditum Tibi gratuletur. Vides quàm effusè exultantes Venerabiles Fratres Nostri, Collegæ tui, tuos in amplexus occurrant. Debentur hæc eximio zelo, ac singulari prudentiæ, quibus demandatam Tibi à Nobis provinciam magnificè, fideliter, ac prorsus ex hujus Sanctæ Sedis dignitate explevisti. Hinc & Nos ipsi, quemadmodum Tibi dudum abeunti paternâ charitate benediximus, ita nunc Te feliciter redeuntem eo, quo par est, grato animo expansis ulnis complectimur: debitas D. O. M. gratias agentes, quòd Charissimus in Christo Filius Noster in Imperatorem. Electus avitâ pietate imbutus Pontificiæ nostræ in eum benevolentix officia, quæ sibi à Te delata fuerunt, animo, ut asseris, adeò obsequenti exceperit, ut meritò sperare possimus eum filiale illud studium, quod in Nos, & Sanctam Romanam Ecclesiam tam disertis protestatus est verbis, præclarioribus in dies reipsâ comprobaturum esse argumentis.

xxxviii.





IN CONSISTORIO SECRETO

Habito die 16. Martii 1712.

ARGUMENTUM.

Acerbum Galliæ Delphini obitum, qui alteri Delphino ejus Patri ante paucos menses defuncto successerat, DD. Cardinalibus nunciat, relatisque amplissimè ejus laudibus, Exequias pro suffragio illius Animæ in Pontificio Sacello de more celebrandas indicit.

VENERABILES FRATRES:

XXXIX.



On adhuc exaruerant lacrymæ, quibus Gallia Delphinum suum Christianissimi Regis Filium immaturâ morte sublatum elapso anno defleverat, cùm aliâ, & sanè asperiori acceptâ clade, quasi rescissâ gravissimi vulneris cicatrice, non tam novum suscipere dolorem; quàm pristinum vehementiùs continuare nuperrimè coacta fuit: crepto sibi, crepto Ecclesiæ, crepto Orthodoxæ Religioni alio Delphino, extincti non ita pridem Decessoris sui Primogenito, Regis Nepote inclyto, nec modò magnæ spei, sed magnæ jam, & maturæ virtutis Principe, unanimi bonorum omnium voce laudatissimo. Accessit ad tanti cumulum mœ-

roris, quòd eodem elatâ funere lectissimâ ejus Conjuge, nonnisi ante sex dies demortuâ, datoque per hæc Nobis grandi humanæ caducitaris exemplo, luctuosum præbuerunt ambo spectaculum acerbissimæ calamitatis. Dum itaque allatum ad Nos hac de re tristissimum nuncium, non sinè maximâ paterni cordis nostri amaritudine, Vobis hodie communicamus, non utique ambigimus, quin animos æquè vestros ingenti dolore affecerit funestissima hæc non quidem unius gentis, aut Regni, sed veriùs universæ Christianæ Reipublicæ jactura, quam in amisso Religiosissimo Principe prudentiâ, pietate, doctrinâ, animi magnitudine, potissimùm verò singulari in Ecclesiam cultu, filialique in hanc Sanctam Sedem observantiâ summoperè commendato, impensisimè lugemus. Non minùs propterea ratione ducimur, quàm debito Christianæ charitatis urgemur, ut sacrificiis, orationibus, & obsecrationibus illius Animæ, cui mors terrenum abstulit Regnum, cœleste comparare satagamus. Id porro & privatim Nos agere hætenus non prætermisimus, & Vos unâ Nobiscum prosèqui enixè optamus, hoc ipsum suo tempore publicis in Pontificio nostro Sacello Exequiis, statâ die Vobis indicendâ, solemnî ritu præstituri. Illum interim, per quem Reges regnant, suppliciter rogemus, ut ad publici doloris levamen tamdiù integrâ, vivacique senectâ fospitem, & incolumem servet Christianissimum Regem, quamdiù Regius Puer novus Delphinus ab eo educandus defuncti Patris virtutes exæquaverit, annos excesserit. Quæ sanè res propè est una, quæ non minùs nostras, quàm Galliæ lacrymas possiet abstergere, ac Nobis tandem persuadere, ut spe Filii pari disciplinâ instituendi extincti Parentis desiderium leniamus.



IN CONSISTORIO PUBLICO

Habito die 20. Aprilis 1712.

ARGUMENTUM.

*Consilium suum promovendi Canonizationem Beatorum Pii V.,
Andree Avellini, Felicis à Cantalicio, & Catharinæ de Bono-
nia Sacro DD. Cardinalium Collegio aperit, eorumque sen-
tentias exquirat.*

VENERABILES FRATRES.

xL.



Niversam planè Christianam Rempubicam,
tot undequaque calamitatibus pressam, sæ-
visque potissimum, ac diuturnis bellorum
procellis agitatam Apostolicæ charitatis ocu-
lis contemplantes, suspiria inter, & lacrymas
cum Propheta Regio exclamare compelli-
mur: *Terrores tui conturbaverunt me: circumdederunt me, sicut
aqua tota die, circumdederunt me simul.* Ubique terror, ubique
luctus, ubique desolatio: undique percutimur, undique amari-
tudinibus replemur; adeò ut novum propemodum, atque inau-
ditum tot veterum discordiarum æumnis inter Christianos po-
pulos additum videamus disfidium, ut de suis quisque cladi-
bus pugnet, & in hoc calamitatum certamine unaquæque gens
aliarum misérias vicisse contendat. Quod tamen magis deplo-

ran-

randum est, atque dolendum, malorum hæc non sunt summa nostrorum. Timendum magis est, nec immeritò timendum, ne filiis tenebrarum, qui prudentiores filiis lucis in generatione sua sunt, adnitentibus, deterior bello pax, hoc est, orthodoxæ Religioni maximè perniciosà ita forsàn ex inopinato coalescat, ut ingemiscere cogamur: *Exspectavimus pacem, & non est bonum: tempus medelæ, & ecce formido: tempus curationis, & ecce turbatio.* In tanto itaque rerum discrimine constituti, hinc bellorum damna sentientes, indè pacis pericula formidantes, cor primùm, & oculos nostros in montem excelsum, & sanctum, undè omne Nobis auxilium affuturum confidimus, levare non prætermisimus: enixè Dominum deprecantes, ut non contineat in ira misericordias suas, sed qui facit pacem in sublimibus, & Reges in Thronis collocat, arctam non modò, & indissolubilem animorum concordiam, verùm, & parem Catholicæ fidei conjunctis viribus, & consiliis tuendæ, ac propagandæ zelum Christianis Principibus largiatur. Novos deindè, ac validos afflictis Ecclesiæ rebus apud Divinam bonitatem Patronos quærere decrevimus, qui scilicet scripti sint in judiciis temporum lenire iracundiam Domini, & conciliare cor Patris ad filios, adeò ut illorum ope & pacem in diebus nostris à Domino dandam sperare possimus, & ita dandam, ut non in Nos auctam cœlestem indignationem, sed verè placatam fuisse dignoscamus. Animum propterea, ac studia nostra convertimus ad promovendas causas Canonizationis Beatorum Pii Quinti Summi Pontificis, Andreæ Avellini, Felicis à Cantalicio, & Catharinæ de Bononia, quò eorum splendida merita universæ Ecclesiæ venerationi proposita, ac veluti super candelabrum collocata, luceant omnibus, qui in domo sunt, sciantque fideles populi sibi in iis datum esse & calamitatum præsidium, & virtutum exemplar. De illorum idcirco præclaris gestis, & eximiis miraculis narrationem, servato à Præ-

decessoribus nostris more, in præsentì Consistorio referri, & à Vobis audiri exoptamus.

Absolutà per D. Cardinalem de Abduar relatione Vitæ, Virtutum, & Miraculorum B. Pii V. Summi Pontificis, Sanctitas Sua DD. Cardinalium sententias super ejusdem Beati Canonizatione exquisivit his verbis.

EXcepistis, VENERABILES FRATRES, quas, & quantas Altissimus in Beato Pio Quinto virtutes collocaverit, & quàm mirabilis in eo fuerit, qui facit mirabilia magna solus. Placet igitur ne Vobis, ut ad tanti Pontificis, qui in diebus suis placuit Deo, & inventus est justus, adeoque in tempore iracundiæ esse poterit reconciliatio, solemnem Canonizationem juxta consuetum Apostolicæ Sedis morem procedamus?

Responderunt omnes: Placet.

Postmodum absolutà relatione Virtutum, & Miraculorum B. Andreæ Avellini, sic Sanctitas Sua locuta fuit.

INtellexistis, VENERABILES FRATRES, quàm præclarè Beatus Andreas Avellinus in omnibus se exhibuerit, sicut Dei Ministrum, in multa patientia, in tribulationibus, in necessitatibus, in angustiis, in plagis, in laboribus, in vigiliis, in jejuniis, in longanimitate, in suavitate, in Spiritu Sancto, in charitate non ficta. Intellexistis pariter quàm illustribus Omnipotens Dominus ejus Sanctitatem testimoniis comprobaverit. Videtur ne itaque Vobis expedire, ut ad illius quoque Canonizationem solemni ritu deveniamus?

Approbaverunt omnes per verbum: Placet.

Similiter absolutà relatione de Beato Felice à Cantalicio, Sanctitas Sua subjunxit.

VENERABILES FRATRES. Ex iis, quæ audistis, perspectum satis est, quomodo Beatus Felix à Cantalicio, qui non cognovit literaturam, introiverit in potentias Domini: Vir sanè simplex, & rectus, ac timens Deum; quomodò itidem illius memoria

jam-

jamdiù sit in benedictione populorum, qui illum verè Francisci filium, hoc est, pauperem, & humilem, non tam heroicarum virtutum meritis insignem, quàm illustrium miraculorum gloriâ præfulgentem, piâ devotione deprædicant. Placet ne igitur Vobis, ut ad solemnem illius Canonizationem juxta Ecclesiæ institutum procedamus?

Concordibus suffragiis annuerunt omnes per verbum: Placet.

Denique absolutâ relatione Virtutum, & Miraculorum Beatæ Catharinæ de Bononia, DD. Cardinalium suffragia sequentibus verbis exquisivit.

A Udists, VENERABLES FRATRES, quàm singularibus patientiæ, humilitatis, obedientiæ, & flagrantissimæ charitatis experimentis Beatæ Catharinæ Sanctitas probata fuerit. Audistis similiter quàm præclaris, & mirabilibus signis Divinus illam Sponsus decoraverit. Audistis demùm, quomodo heroicæ illius virtutes ita ejus corpus cœlestibus imbuerint aromatibus, ut illud incorruptione quæsitâ, quasi cinnamomum, & balsamum aromatizans, & quasi myrrha electa, perennem dederit odorem suavitatis. Placet ne igitur Vobis, ut etiam ad illius solemnem Canonizationem ritè procedamus?

Unanimi consensu responderunt omnes: Placet.





IN CONSISTORIO SEMIPUBLICO

Habito die 6. Maji 1712.

ARGUMENTUM.

Sententias DD. Cardinalium, Patriarcharum, Archiepiscoporum, & Episcoporum super Canonizatione B. Pii V. exquirat.

VENERABILES FRATRES.

xLi.



Uanta eximiae non minùs Sanctimoniae, quàm Pontificiae Dignitatis luce in Ecclesia Cælo mirabiliter coruscaverit Beatus Pius V., quanta itidem fecerit ipse, & docuerit: adeòque quàm meritò vocandus sit magnus in Regno Cælorum, fatis superque Vos agnovisse confidimus ex iis, quæ de heroicis illius virtutibus, ac præclaris miraculis relata tum in publico Consistorio præteritis diebus habito audivistis, tum in alia ad Vos transmissa fidei narratione legistis. Reliquum nunc est, ut in hoc Sacro Confessu veterum Conciliorum Romanorum imaginem præferente de Sanctorum cultu solemniter ei decernendo, qui verè, dum esset Summus Pontifex, terrena non metuit, sed ad cœlestia Regna gloriosus migravit, diuturniori quavis cunctatione posthabitâ, deliberemus. Nec sanè absque peculiari Divinæ Pro-

videntiæ consilio contigisse arbitramur, ut eo planè tempore, quo orthodoxæ Religioni tot ab ejus hostibus undequaque, struuntur insidiæ: quo Sacrorum Canonum salutaris norma tam impudenter contemnitur: quo turbulenti homines continuâ novitatum prurigne laborantes, damnatos dudum errores subdolis artibus instaurare conantur: quo abundante nequitia Christiani Populi charitas plurimum refrigescit: quo sæculi Potestates nova in dies vulnera Ecclesiasticæ libertati inferre moliantur: quo demum, supremâ hæc B. Petri Sedes tot injuriis palam afficitur, ipsæque traditæ Nobis à Domino Claves temerè impetuntur: is Pontifex, recurrente propemodum natali ejus die, in Sanctorum album referendus, adeoque nostræ non minus, ac vestræ, quàm Episcoporum omnium imitationi exhibendus proponatur, in quo fuit, ut Ecclesiæ jampridem de eo sic loquentis verbis utamur, *Religionis propagandæ perpetuum studium, in Ecclesiasticâ disciplinâ restituenda indefessus labor, in extirpandis erroribus assidua vigilantia, in sublevandis egentium necessitatibus indeficiens beneficentia, in Sedis Apostolicæ juribus vindicandis robur invictum*. Hac itaque gravissimâ de re, dum divini luminis opem humiliter præstolamur, vestras quoque sententias, servato à Prædecessoribus nostris more, libenter exquirimus.

Omnium sententiis auditis Sanctitas Sua sequentibus verbis allocutionem absolvit.

VENERABILES FRATRES. Summoperè lætamur suffragia omnium Vestrum, & sanè speciali jure etiam tot Præsulum Orientalis Ecclesiæ sub Turcarum Tyrannide miserè gementis, adeoque ope, ac tutelâ Beati Pii V. plurimum indigentis, unanimiter in eum sensum, qui noster jamdiu fuit, convenisse; in magnam siquidem Omnipotentis Dei gloriam, nec non S. R. E. præsidium, ac decus singulare solemnem Sanctis-

fimi

fimi hujus Prædecessoris nostri Canonizationem cessuram esse non dubitamus; Ceterum illius celebrandæ diem brevi indicemus, postquam scilicet in sequentibus Consistoriis etiam super aliorum Beatorum Canonizatione, quam similiter, Deo dante, peragere intendimus, vestras sententias exceperimus. Precibus interim, jeuniis, eleemosynis, aliisque piis operibus incessanter à Domino postulare pergamus, ut in re tanti ponderis, quod, & quale sit divinæ suæ, atque incomprehensibilis Sapientiæ beneplacitum, Nobis ostendere non dedignetur.





Præsentia Sancti Andreae

IN CONSISTORIO SEMIPUBLICO

Habito die 9. Maji 1712.

ARGUMENTUM.

Sententias DD. Cardinalium, Patriarcharum, Archiepiscoporum, & Episcoporum super Canonizatione B. Andreae Avellini exquirat.

VENERABILES FRATRES.



Rẽtam mandatorum Domini viam, quæ ducit ad vitam, B. Andreas Avellinus, jugiter dilatante cor ejus Spiritu Sancto, feliciter ingressus fuit, felicius cucurrit, felicissimè consummavit. Deduxit eum scilicet per hanc viam perfecta illa in Deum, ac

xLII.

Proximos Charitas, quæ foras mittit timorem; Hoc ipse exardescens igne exultavit, ut Gigas, ad currendam viam; sibique proposito ardui itineris termino, labores, ærumnas, probra, injurias, vulnera, contumelias læto, fortique animo sustinuit; Hac incensus flammâ pœnitentiæ austeritatem cùm innocentie candore mirabiliter conjunxit: summamque terrenarum rerum inopiam uberrimâ cœlestium charismatum copiâ largiter compensavit; Neque enim ei reliquarum virtutum agmen deesse

P

por-

poterat, lucem, & facem illis præferente charitate; Hanc illæ omnes secutæ sunt ancillæ Reginam. Charitate itaque, quæ numquam excidit, dirigente ejus gressus, quicquid ad hominem in fortem Domini vocatum, sive inter sæculi fluctus degentem, sive in portum vitæ religiøsæ receptum perfectè formandum, severiora veterum Patrum documenta statuere, Beatus hic Vir, qui cùm in humanis ageret, utramque Personam præclarissimè gessit, abundè complevit. Hæc omnia Vos ipsi ex relata aliàs mirabilium ejus gestorum serie benè colligere potuistis, atque inde etiam inferre, quantum publico Ecclesiæ bono congruere possit Andream in utroque statu admirandum, miseris hisce collabentis veteris disciplinæ temporibus, universo fidelium cœtui, præsertim verò tum sæculari, tum regulari Clero, peculiari imitatione colendum proponi, ut qui prodigium factus est multis, fiat omnibus adjutor fortis. Ita planè heroicæ Virtutes, quibus emicuit, insignia miracula, quibus claudit, postulare videntur, ut cœlestes in terris Sanctorum honores illi decernantur, qui mirâ humilitate contempsit, humanos. Verùm ut in re tanti momenti omnes accuratissimi judicii partes impleamus, sententias primùm vestras exposcimus.

Omniū suffragiis exceptis Sanctitas Sua adjecit hæc verba.

VENERABILES FRATRES. Sententiis vestris de B. Andrea Avellino in Sanctorum Canonem referendo concorditer eò collimantibus, quò noster quoque animus, post diuturnam rei meditationem, sponte suâ ferebatur, celebrandæ solenni ritu illius Canonizationis diem opportunè indicemus. Præscripta interim orationum, aliorumque piorum operum subsidia enixiùs instauremus, humiliter, ac ferventer petentes à Domino, ut Nos misericorditer edocere velit quid in re tanta ad sui Nominis gloriam, fideliumque ædificationem agere debeamus.



IN CONSISTORIO SEMIPUBLICO

Habito die 11. Maji 1712.

ARGUMENTUM.

Sententias DD. Cardinalium, Patriarcharum, Archiepiscoporum, & Episcoporum super Canonizatione B. Felicis à Cantalicio exposcit.

VENERABILES FRATRES.



Legit olim Dominus David servum suum, tametsi inter filios Jesse minimus natus esset, sustulitque eum de gregibus ovium, ut in thronis Regum collocaret. Elegit novissimè servum etiam suum Felicem à Cantalicio Assisientis Patriarchæ minimum filium, & de post foetantes accepit eum, ut in medio Magnatorum confedere illum faceret, Ecclesiamque suam, quam humilitate vult crescere, præclaris illius virtutibus illustraret. Sic Felix, electus à Domino, elegit & ipse abjectus esse in Domo Dei sui, magis quàm habitare in tabernaculis peccatorum; pusilloque eorum gregi, quibus æterno Patri complacuit dare Regnum; adscribi cupiens, ut magnum construeret ædificium sanctitatis, alta priùs jecit fundamenta humilitatis. Sapientiam hujus mundi,

xLIII.

quæ stultitia est apud Deum, semper despexit, stultusque sæpius haberi studuit propter Christum, ut verè esset Sapiens: illa scilicet sapientiâ, quam docet charitas Christi: charitas, quæ patiens est, benigna est, non æmulatur, non inflatur, non irritatur: charitas, quæ omnia suffert, omnia credit, omnia sperat, omnia sustinet. Hoc divini amoris igne mirabiliter æstuans B. Felix jugi meditationis studio, & assiduâ oratione per arduum Christianæ perfectionis tramitem ad superiora conscendit: quò sui abnegatione demissior, eò Divinarum rerum contemplatione sublimior. Asperimis carnis afflictationibus, jejuniis, rigidissimis, ac ferè perpetuis vigiliis, mortificationem Crucis jugiter in suo corpore portavit: Illudque severioris poenitentiae austeritate ita prorsus edomitum, ac spiritui subjectum, reddidit, ut in carne ambulans non secundum carnem militaverit, ac licet frequentibus nimium miseri hujus sæculi periculis humilis ministerii sui ratione, quod longo mortalis ævi spatio exercuit, in singulos ferè dies obnoxius fuerit, adhuc tamen nullam sæculi maculam contraxerit. Verus Christi athleta, verus Francisci sectator, & filius per arctissimam paupertatem cursum illum, in quem, vestimentis abjectis, ne succumberet, nudum se commiserat, gloriose, ac feliciter consummavit: Evangelicâ rerum omnium terrenarum abdicatione infra homines positus, insignium miraculorum fulgore, quibus cum decoravit Altissimus, supra homines collocatus. Hæc omnia exactissimis comprobata documentis, quæ Vobis abundè innotuisse non ambigimus, disertè satis efflagitare videntur, ut dilectum Deo, & hominibus Virum, quem divinâ fruentem in Cœlis Beatitudine dudum colimus, in terris etiam Authoritate Nobis à Domino tradita Sanctorum Fastis solemniter adscribamus. Postulant id ipsum Viri Principes; postulat Religiosus Cappuccinorum Ordo: Fidelium penè omnium postulant vota. Verùm priùs quàm hoc decernamus, quemadmodum sedium æterna-

rum assistricem Sapientiam implorare non intermittimus, ita vestras etiam sententias hac in re audire summopere exoptamus.

Omniū Votis singillatim auditis Sanctitas Sua ita subjunxit.

VENERABILES FRATRES. In illum, qui noster jam erat, sensum suffragia vestra plenissimè conveniunt: ut Sancti scilicet nomen, & cultus B. Felici à Cantalicio Apostolicâ Authoritate decernatur, adeoque ejus gloriam nunciare possit Ecclesia, cujus laudes jam pridem omnes, ac præsertim hujus Almæ Urbis nostræ Populi, enarrabant. Tantæ itaque, ac tam expetitæ celebritatis diem in sequenti Consistorio, adjuvante Domino, indicemus; à Vobis interim petentes, ut (quod in hujusmodi negotiis Ecclesiæ solemne est) assiduis precibus, aliisque præscriptis piis operibus eo potissimum tempore, quo advenientis Paracliti Spiritus memoriam anniversaria supplicatione recolemus, auxilium Nobis de Sancto impetretis, ut rem in terris cœlestem, juxta divinum beneplacitum omninò conficere valeamus.





IN CONSISTORIO SEMIPUBLICO

Habito die 18. Maji 1712.

ARGUMENTUM.

Sententias DD. Cardinalium, Patriarcharum, Archiepiscoporum, & Episcoporum super Canonizatione B. Catharinæ de Bononia exquirat.

VENERABILES FRATRES.

xLIV.



Uliorem fortem non procul, neque ab ultimis finibus vocatam, sed nostris in terris natam invenimus; quæ non modò præliando bella Domini insignes de humani generis hostibus victorias reportavit, sed os suum aperiens Sapientiæ, quibus armis iidem hostes vincantur, scripto hac de re volumine mirabiliter edocuit. Benè jam intelligitis Mulierem hanc fuisse B. Catharinam de Bononia, quæ ab ipsis ferè incunabulis manus suas misit ad fortia: dum adhuc puella consuetis illius ætatis illecebris perpetuum bellum indixit: adultior verò adeò levavit se supra se, ut infirmitatem sexus in prodigium fortitudinis converterit. Nihil in illa, nisi sanctum, nisi mirabile. Innocentia nedum securioribus inclusa septis, sed etiam inter Aulæ pericula sanctissimè

cu-


custodita: Virginitas illibata: paupertas arctissima: obedientiâ admiranda: abstinentia semper austerior: amor in Deum quotidie intensior: charitas in proximos undique exæstuans; profunda humilitas: contemplatio sublimis: conversatio cœlestis. Non est igitur quod miremur Catharinæ, quæ non aliàs, quàm de Deo, vel cum Deo loquebatur, futuros rerum eventus, revelante Deo, innotuisse. Non est quod miremur innocentem, ac pœnitentem Virginem, quæ Christi bonus odor fuit in omni loco, etiam in sepulchro reconditam, perennem dedisse odorem suavitatis. Fuit hæc Virgo sapiens, quam Dominus in multâ patientiâ, in tribulationibus, in laboribus, in castitate, in scientia, in Spiritu sancto, semper vigilantem invênit. Verè de numero prudentum, quæ sumpsit oleum secum Divini amoris, eoque refertam lampadem suam usque ad Sponsi Cœlestis occursum inextinctam gestavit, omnium virtutum meritis, omnium charismatum donis prælucentem. Hæc omnia satis, superque Nobis persuadent, ut peractis jam iis, quæ ad humanæ prudentiæ modum pertinebant, splendidam hanc sanctimoniz lucernam, quam Deus ipse insignium miraculorum luce fulgidiorum reddidit, non in abscondito, neque sub modio, sed super Candelabrum Ecclesiæ solemniter collocemus: Adeoque Beatam Catharinam de Bononia Sanctæ appellatione, parique appellationi cultu, ac Sanctis Virginibus debito, honorandam pronunciemus. Quia tamen de re statuendum est, quæ humana transcendit, divinam opem ferventius semper implorare non cessantes, maturius adhuc de eadem re cum Fraternitatibus Vestrīs deliberandum censemus. Vestræ itaque pietatis, ac sapientiæ erit edicere, quid in hac gravissima consultatione sentiatis.

Habitis omnium suffragiis sic Pontifex locutus est.

VENERABILES FRATRES. Votis nostris consilia vestra respondent. Pro solemnī itaque Canonizatione, benedicente Domino, peragenda tam B. Catharinæ de Bononia, de qua hodie locuti fuimus, quàm reliquorum Beatorum, nempe Pii V., Andreæ Avellini, ac Felicis à Cantalicio, de quibus in præteritis Consistoriis actum fuit, indicimus tandem diem Dominicam proximam, hoc est vigesimam secundam currentis Maji, quæ Festum Augustissimæ Trinitatis hoc anno celebrabimus. Vos interim sinè intermissione orantes enixiùs semper à Domino petite, ut ipso favente, ac inspirante, maximæ huic rei supremam ritè manum imponere possimus ad Divini nominis gloriam, ad exaltationem Fidei Catholicæ, & Christianæ Religionis augmentum.

Demum cum in aliquo ex suffragiis audivisset fieri mentionem cujusdam prædictionis B. Catharinæ, quæ Orientalis Imperii excidium, casuramque Constantinopolitanam Urbem in Turcarum manus in Peruvigilio Pentecostes anni 1453. prænuñciaverat, conversus ad Orientales Episcopos, qui plures aderant, ita ex tempore subjunxit:

Vos verò, Orientales Præsules, Cœlesterni misericordiarum Patrem potissimùm exorate, ut intercedentibus B. Catharinæ meritis, quæ Imperii Orientalis excidium, Græcorum in Spiritum Sanctum blasphemii ita promerentibus, prædixit, per ineffabilem Divinæ suæ bonitatis abundantiam Græciæ vestræ, quam Nos in visceribus gerimus paternæ charitatis, post diuturnam poenitentiam, hoc est, miseram tot annorum servitutem, concedere tandem dignetur, ut pristinam consequi libertatem, suosque valeat errores detestari.



IN CONSISTORIO SECRETO

Habito die prædicta post Semipublicum.

ARGUMENTUM.

Creat octodecim S. R. E. Cardinales, ex quibus tamen undecim tantum evulgat, reliquos septem in pectore, ut vocant, reservat arbitrio suo quandocumque evulgandos.

VENERABILES FRATRES.



Odem planè tempore, quo Nos afflictis Ecclesiæ rebus operæ laturi Sanctorum Catalogo nova nomina adjungere cogitavimus, Vestrarum etiam Fraternitatum numerum, pari ejusdem Ecclesiæ rationibus opportunè consulendi studio ducti, novis nominibus augere constituimus; Ut ita non tam cœlestibus, quàm humanis subsidiis, quantum in Nobis est, publicæ Causæ succurramus. Enixis proinde, ac diuturnis precibus Deum Opt. Max. humiliter dudum exoravimus, ut in ejusmodi re quod, & quale esset Divinæ suæ, atque incomprehensibilis sapientiæ beneplacitum; Nobis ostendere dignaretur. Temporis subinde opportunitatem nacti, quo delapsi olim è Cœlo Divini Spiritus memoriam anniversariâ supplicatione celebravimus, supremum

xLv.

Q

lu-

luminum Patrem ferventiùs iterum rogavimus, ut mentem nostram cœlesti suâ luce perfunderet. Hodiernam demum junio consecratam diem ex veteri Prædecessorum nostrorum more ad rem ipsam, benedicente Domino, perficiendam delegimus. Faxit Deus, ut omnes in amplissimum vestrum Ordinem cooptandi, muneris, ad quod vocantur, debito ita respondeant, ut in eis glorificetur Deus, Ecclesia lætificetur, ac Sacerdotale Ministerium honorificetur. Ad majorem igitur Omnipotentis Dei gloriam, Sanctæque Romanæ Ecclesiæ decus, & utilitatem, intendimus creare eos omnes, nempe octodecim, qui ad septuagenarium Vestrum numerum complendum in præsens defunt, Cardinales, eosque, quantum Nobis fas est, ex omnibus Christianitatis Nationibus assumere, ut de iis, qui Personas Sanctorum Apostolorum repræsentare debent, verè dici valeat: *In omnem terram exivit sonus eorum*: Ex illorum tamen numero, gravibus ex causis animum nostrum moventibus, undecim dumtaxat nunc evulgare censemus, videlicet:

Joannem Antonium Archiepiscopum de Via Episcopum Ariminensem.

Augustinum Archiepiscopum Cusanum Episcopum Papiensem.

Julium Archiepiscopum Piazza Episcopum Faventinum.

Antonium Felicem Zondarium Archiepiscopum Damasce-num.

Armandum de Rohan Episcopum Argentinensem.

Nunum de Cunha de Attayde Episcopum Targensem.

Vvolfgangum Annibalem ex Comitibus de Schrottembach Episcopum Olomucensem.

Aloysium Priolum Rotæ Romanæ Auditorem.

Josephum Mariam de Thomasiis Congregationis Clericorum Regularium Theatinorum.

Jo: Baptistam Ptolomæum Soc. Jesu.

Fran-

Franciscum Mariam ab Aretio Ordinis Fratrum Minorum
Cappuccinorum Palatii nostri Apostolici Concionatorem.
Alios septem in pectore reservare intendimus arbitrio nostro
quandocumque evulgandos.

Curavimus feligere Viros, sive Ecclesiarum sibi commissarum
administratione, sive illustribus Legationibus, sive aliis Aposto-
licæ Sedis Ministeriis diù probatos; Non negleximus Regulares,
ut aliquam Religiosorum Ordinum benè de Ecclesia, & Ortho-
doxa Religione meritò rationem habuisse videamur.

Quid igitur Vobis videtur?

Auctoritate Omnipotentis Dei, Sanctorum Apostolorum,
Petri, & Pauli, ac nostra creamus S.R.E. Presbyteros Cardinales
Joannem Antonium Archiepiscopum de Via Episcopum Ari-
minensem.

Augustinum Archiepiscopum Cusanum Episcopum Papien-
sem.

Julium Archiepiscopum Piazza Episcopum Faventinum.

Antonium Felicem Zondodarium Archiepiscopum Damasce-
num.

Armandum de Rohan Episcopum Argentinensem.

Nunum de Cunha de Attayde Episcopum Targensem.

Vvolffgangum Annibalem ex Comitibus de Schrottembach
Episcopum Olomucensem.

Aloysium Priolum.

Josephum Mariam de Thomasiis.

Jo: Baptistam Ptolomæum.

Franciscum Mariam ab Aretio.

Cum dispensationibus, derogationibus, & clausulis necessariis,
& opportunis.

Alios septem in pectore reservamus arbitrio nostro quandocum-
que declarandos.

In nomine Patris †, & Filii †, & Spiritus † Sancti. Amen.

stulabat . Illa idcirco subsidia , quæ summæ , nimiumque notæ in hac temporum calamitate Apostolici Ærarii patiebantur angustia ; memoratis Pagis Catholicis alacri animo contulimus . Illos insuper Pastoralibus monitis vehementer excitare non prætermisimus , ut forti , strenuoque animo pro aris , & focis pugnarent , ac mutuam in primis , & in hoc rerum statu , si unquam aliàs , maximè necessariam animorum , consiliorumque concordiam foverent . Enixis præterea officiis orthodoxos Reges adhortati , & obtestati fuimus , ut afflictis illic Catholicorum rebus celeri , validaque ope succurrerent , conjunctisque studiis Aatholicorum conatus , & audaciam coercerent . Verùm dum Nos tam accenso studio Catholicæ Helvetiæ indefinenter adesse curabamus , non sinè ingenti , & planè acerbo cordis nostri dolore percepimus Catholicos ipsos , vel privatis abreptos simultatibus , & dissidiis , vel inani , ac prorsus insueto fortissimæ illi Nationi metu perculsos , nec piâ , ut par erat , mente reputantes , quod non est differentia in conspectu Dei Cœli liberare in multis , & in paucis , plura non levis momenti loca , & oppida deferuisse , quæ faciliè tutari posse videbantur , quæque subindè ab Etherodoxis nullo labore occupata magnam eos in spem erexerunt graviora , quæ moliuntur , optatum ad exitum feliciter perducendi . Ad hæc à Tigurinis , ac Bernensibus copiis , nec non à Doggiensis Comitatus rebellibus celeberrimum S. Galli Monasterium cum universo territorio , & locis ei subiectis repentino incurfu , apertâque vi occupatum fuisse , simulque Catholicorum Militum Duces per summam perfidiam interemptos , Monachos omnes in exilium compulsos , expilatam Ecclesiam , direptum Monasterium , Divina officia intermissa , ac orthodoxam Fidem ab illis partibus penè exterminatam audivimus . In summum proindè , ac penè extremum discrimen Catholicæ rei causam apud Helvetios jam adductam , lacrymantibus Pontificæ charitatis oculis intuentes , tametsi nova iterum subsidia

in tam gravem, ac necessariam causam, in quam sacra quoque vasa impendi æquum esse novimus, & Patribus olim nostris usitatum, parare non omittamus: tametsi novis itidem officiis ne dum Charissimos in Christo Filios Nostros Carolum in Imperatorem electum, ac Regem Christianissimum, sed & alios etiam Catholicos Principes ad suscipiendum illarum Gentium patrocinium, ac opportunam eis opem sinè majori cunctatione ferendam, etiam per citatos Tabellarios urgere constituerimus: verè tamen non aliam, quàm in Divina ineffabili bonitate spem habentes periclitanti in Helvetia Religioni subveniendi, ejusque cultores è gravibus, quibus premuntur, ac majoribus, quas metuunt, angustiis eripiendi, ad Eum, qui dives est in misericordià, toto corde clamare non cessamus, ut non concludat in gladio populos suos, sed qui conterit bella ab initio, erigat brachium suum, sicut ab initio, eosque ab iracundiæ suæ terroribus liberet, ac sua cœlesti ope perpetuò roboret, atque custodiat. Verùm, ut Nobiscum idipsum illi potissimum Christifideles, qui in hac veræ Religionis arce commorantur, concordibus votis agere studeant, eorum ad id pietatem, ac zelum, prolatis cœlestium munerum thesauris, quorum dispensationem Fidei nostræ commisit divina dignatio, incitare non omitemus. Hæc indicare Vobis hodie volumus, VENERABILES FRATRES, ut vestris consiliis, ope etiam vestrà, gravissimam hanc Causam juvare possitis, eamque in primis impensè commendare Domino exercituum, ut non contineat in ira misericordias suas, ne hæreditatem suam spernat, sed exurgat in adjutorium populi sui, Catholicæque Religioni tot fluctibus, ac periculis undique jactatæ in fortitudine brachii sui, infirmitates nostras commiserando, succurrat.



IN CONSISTORIO SECRETO

Habito die 26. Septembris 1712.

ARGUMENTUM.

Declarat quatuor dumtaxat ex septem S. R. E. Cardinalibus, quos aliàs, nempe in Consistorio secreto habito post Semipublicum die 18. Maji proximè præteriti, unà cum aliis undecim Cardinalibus tunc publicatis creaverat, & in pectore referaverat.

VENERABILES FRATRES: •



Temeritis militibus debita honorum præmia diutiùs non retardemus: ac subinde aliorum multitudini in nostra piscina expectantium aquæ motum, quantum Nobis fas est, solatium aliquod afferre possimus; enixis priùs, atque accuratis precibus cœlesti ope invocata, his præsertim novissimis diebus septimi mensis jejunio consecratis, ad gloriam Omnipotentis Dei, Sanctæque Romanæ Ecclesiæ utilitatem, ac decus, palàm hodie evulgare, ac declarare intendimus quatuor dumtaxat ex septem Cardinalibus, quos aliàs, nempe in Consistorio nostro secreto habito post semipublicum die decima octava Mensis Maji proximè

xLxvii.

ximè præteriti, unà cum aliis undecim Cardinalibus tunc publicatis, creavimus, & in pectore reservavimus, videlicet: Ludovicum Picum de Mirandula Patriarcham Constantinopolitanum, Palatii nostri Apostolici Præfectum.

Jo: Baptistam Archiepiscopum Bussium Episcopum Anconitanum.

Petrum Marcellinum Corradinum Archiepiscopum Atheniensem, Auditorem nostrum.

Curtium Origum Protonotarium Apostolicum.

Quorum virtutes non recensemus, quia Vobis satis compertæ sunt, ac notæ.

Alios tres in pectore, ut diximus, reservados, justis ex causis animum nostrum moventibus, iterum similiter reservare intendimus, arbitrio nostro quodcumque evulgandos.

Quid Vobis videtur?

Auctoritate Omnipotentis Dei, Sanctorum Apostolorum Petri, & Pauli, ac nostrâ declaramus S. R. E. Cardinales Presbyteros quidem

Ludovicum Picum de Mirandula Patriarcham Constantinopolitanum.

Jo: Baptistam Archiepiscopum Bussium, Episcopum Anconitanum.

Petrum Marcellinum Corradinum Archiepiscopum Atheniensem.

Diaconum verò

Curtium Origum.

Cum derogationibus, & clausulis necessariis, & opportunis. Reliquos tres, quos in pectore aliàs reservavimus, hodie iterum reservamus, arbitrio nostro quodcumque declarandos.

In nomine Patris †, & Filii †, & Spiritus † Sancti. Amen.



IN CONSISTORIO SECRETO

Habito die 5. Octobris 1712.

ARGUMENTUM.

Principem Franciscum Ludovicum ex Comitibus Palatinis Rheni Electum Wormatiensem, Administratorem Ecclesiæ Uratislauiensis, nec non Theutonicæ Militiæ Magnum Magistrum, deputat Coadjutorem Archiepiscopi Moguntini, & quæ Illæ de Apostolicis Nunciis honorificè excipiendis, nec non de Altranstadiensibus Pactionibus, ac recessu Religionis pro inferiori Palatinatu, ita habendis, perindè ac si nunquam emanassent, pollicitus fuerat, DD. Cardinalibus palàm facit, recitatis tum ejusdem Francisci Ludovici literis ad Sanctitatem Suam datis, tum etiam plurium aliarum literarum exemplis, quæ Sanctitas Sua ad Imperatorem, Electorem Palatinum, ac ipsum Franciscum Ludovicum bis de rebus perscripserat.

VENERABILES FRATRES.



Indulgere cupientes enixis, diuturnis, atque iteratis precibus Venerabilis Fratris Lotharii Francisci Archiepiscopi Moguntini ob gravem ætatem, & attritis viribus incommodam, tenuemque suam valetudinem, unà cum Dilectis Filiis Capitulo, & Canonicis Ecclesiæ Moguntinæ, Coadjutorem sibi à Nobis deputari supplicantis, ne turbatis hisce temporibus, Ecclesiam ipsam Moguntinam periculosa vacationis exponi contingat detri-

R

men-

XLVIII.

antis, Coadjutorem hujusmodi, ut dictæ Ecclesiæ utilitati, ac tranquillitati tutius prospectum sit, de unanimi eorundem Canonicorum consensu, præfato Archiepiscopo deputare constituimus, cum spe futuræ successionis.

Moguntia est Urbs superioris Germaniæ in Palatinatu sita ad Rhenum Fluvium, & quindecim mille incolas circiter continet, qui pro tempore existenti illius Archiepiscopo Sacri Romani Imperii Principi Electori etiam in temporalibus subjacent.

Metropolitanam habet Ecclesiam antiquæ, sed instauratæ structuræ, Sancto Martino dicatam, cui plures suffragantur Episcopi, ac inserviunt quinque Dignitates, quarum prima Præpositura, vigintiquatuor Capitulares, & octodecim Domicellares Canonici, quadraginta Cappellani, alique Presbyteri, & Clerici divinis operantes; defunt tamen Theologalis, & Pœnitentiaria Præbendæ.

Ejus Sacrarium Suppellectili sacrâ abundè ditatur. Ædes verò Archiepiscopales parum distant ab Ecclesia, & quamvis adhuc non absolutæ, attamen ad Archiepiscopi, suorumque habitationem opportunè sufficiunt. Præter Metropolitanam præfatam novem in Civitate Parochiales extant Ecclesiæ, decem Collegiatæ, octo virorum, & totidem Monialium Cœnobîa, plures Laicorum Confraternitates, quinque Hospitalia, Seminarium, & Academia, sed deficit Mons Pietatis.

Fructus taxantur ad Florenos decem mille, ascendunt autem, deductis expensis, ad quinque millia scutorum monetæ Romanæ.

Prædicto Lothario Francisco Archiepiscopo Coadjutorem cum futura successione deputare intendimus Dilectum Filium Franciscum Ludovicum ex Comitibus Palatinis Rheni, Episcopum electum Vvormatiensem, Administratorem Ecclesiæ Ura-tislaviensis, nec non Theutonicæ Militiæ Magnum Magistrum,

cujus

cujus qualitates aliàs ab hac Sancta Sede approbatæ, cum præfatis Uratislaviensi, & deinde Vvormatiensi Ecclesiis præfectus fuit, antiquis Neoburgicæ Domus in Catholicam Religionem promeritis, ac novis ipsius Francisci Ludovici erga eamdem Sedem exhibitis obedientiæ, ac reverentiæ argumentis plurimum commendantur :

Priusquam tamen hac in re, VENERABILES FRATRES, vota vestra exquiramus, scire Vos volumus, Nos minimè immemores fuisse eorum, quæ anno præterito in Conventu Electorali Francofurtensi contigerunt : ideòque seriò cogitasse quibus rationibus nedum similia in posterum averti possent, sed & quæ inibi secuta fuerunt, opportunâ reparatione sarcirentur. Curavimus propterea per eum, qui Archiepiscopo Moguntino dandus erit Coadjutor, literas ad Nos scribi, quibus, postquam ad sui favorem factus fuerit locus, successioni in regimine Ecclesiæ Moguntinæ, omnes honoris, ac reverentiæ significationes nostris, & Apostolicæ Sedis Nunciis sive ordinariis, sive extraordinariis quandocumque, & ubicumque juxta antiquum morem se exhibiturum, & delaturum esse spondeat tam expressis, ac disertis verbis, ut omni prorsus ambiguitate sublata, nihil jam ejusmodi in re Nobis desiderandum superfit : quemadmodum ex iisdem literis, quas Secretarius Brevium nostrorum secretorum mox recitabit, abundè percipietis :

Hic ingressus fuit Consistorium R. P. D. Oliverius Secretarius Brevium secretorum Sanctissimi, legitque literas D. Electi Episcopi Vvormatiensis, ac Administratoris Uratislaviensis ad Sanctitatem Suam datas die 27. Aprilis proximè præteriti ; quarum absolutâ lectione Sanctitas Sua reassumpsit hæc verba.

Indicabunt profectò hæc literæ quid etiam ab aliis, quos Ecclesiis pari Electoralis S. R. I. Principatus prærogativâ gauden-
tibus de cetero præfici continget, similiter præstari debeat : quid

itidem ab iis, qui in præfato Conventu Francofurtensi debita ejusmodi honoris, ac reverentiæ testimonia Nuncio nostro tribuere abnuerunt, gerendum sit, ut in pristinam nostram, & hujus Sanctæ Sedis gratiam restitui valeant.

Ceterum ne exprobari Nobis posset effatum illud Sancti Bernardi ad Eugenium : *Vides omnem Ecclesiasticum zelum fervere solâ pro dignitate tuendâ : honori totum datur ; Sanctitati nihil, aut parum*, ferventiori sanè zelo Catholicæ Religionis Causam tueri studuimus, quàm nostram, & Sanctæ hujus Sedis Dignitatem vindicare. Cùm enim aliàs ea omnia, quæ sive in deplorandis illis Altranstadenfibus Pactionibus, quas dudum, nempe anno 1707. ab Administris cla. me. Josephi, dum viveret, in Romanorum Imperatorem electi Sueci Administristi extorserunt : sive in declaratione illa, quam Recessum Religionis vocarunt, multò anteq̃a, videlicet anno 1705. nomine Dilecti Filii Nobilis Viri Joannis Vvilhelmi Ducis Neoburgi Comitis Palatini Rheni S. R. I. Principis Electoris pro inferiori Palatinatu edita, continentur, non minùs Orthodoxæ Fidei, Divino cultui, atque animarum salutis, quàm Ecclesiæ, & Apostolicæ Sedis Authoritati, libertati, aliisque juribus adversantia, inania prorsus, ac irrita declaraverimus, & quatenus opus esset, traditâ Nobis à Domino potestate abrogaverimus, & irritaverimus; illa nimirum, quæ in præfatis Altranstadenfibus Pactionibus Uratislaviensem, quæque in Recessu supradicto Vormatiensem respectivè Diœceses respiciunt; exempla idcirco literarum, quas ad Charissimum in Christo Filium Nostrum Carolum in Imperatorem electum, nec non ad præfatum Electorem Palatinum desuper respectivè dedimus, quæque ab ipsis æquo non minùs, quàm demisso, ac reverenti animo receptæ fuerunt, ad illum, qui utrique Diœcesi, Vormatiensi scilicet, ac Uratislaviensi ex concessione, & dispensatione Apostolica nunc præest, mittenda duximus : Nec aliàs de

illius

illius tamdiù petita deputatione in Coadjutorem Archiepiscopi Moguntini agi permisimus, nisi priùs accepto ejus responso, quo ea omnia, quæ tum in Pactionibus, tum in Recessu præfatis Apostolici censuræ judicii confiximus, ita se habiturum esse apertè declararet, perindè ac si numquam emanassent, ac insuper se enixè curaturum esse sponderet, ut illa in Vvormatiensi, ac Uratislaviensi respectivè Diœcesibus sibi commissis omni prorsus effectû de cetero carerent. Excipietis nunc tum nostras ad ipsum Vvormatiensis, ac Uratislaviensis Ecclesiarum Præsulem hac de re datas literas, tum eis adjuncta aliarumstrarum ad Imperatorem Electum, & ad Electorem Palatinum literarum exempla, tum denique ejusdem Præsulis Responsum, quod eâdem de re accepimus, pio, Catholico, ac verè huic Sanctæ Sedis obsequenti Antistite dignis sensibus refertum.

Hic ab eodem R. P. D. Oliverio lecta fuerunt exempla plurium literarum Sanctitatis Suae, priorum scilicet ad Vvormatiensis, & Uratislaviensis Ecclesiarum Præsulem datarum die 12. Augusti: tum aliarum ad Imperatorem electum super reprobatione, ac cassatione quarundam Pactionum, quas anno 1707. in Castris Altranstadenfisibus ab Administris cla. me. Josephi, dum viveret, in Imperatorem electi Sueci Administri extorserrunt, datarum die 4. Junii: deinde aliarum ad Electorem Palatinum super reprobatione, & cassatione cujusdam declarationis ab eo editæ anno 1705. Recessus Religionis pro Palatina nuncupatæ, datarum die 30. Julii 1712., ac demum Responsi à prædicto Vvormatiensis, & Uratislaviensis Ecclesiarum Præsule ad literas Sanctitatis Suae dati nuperrimè, videlicet die 1. Septembris proximè elapsi. Quibus perlectis Sanctitas Sua ita allocutionem suam absolvit.

Audistis quibus verbis Avunculus Cæsaris Pontificio nostro judicio humiliter se subjiciens de Pactionibus ab ipsomet Cæsare initis loquatur: quibus itidem verbis Electoris Palatini germa-

nus Frater Edictum, sive Recessum ab ipso ejus Fratре promulgatum pro irrito habeat, ac nullo; atque inde benè conjiçere potuistis non minùs pietatem, æquitatem, ac zelum, quàm summam in Nos, & hanc Sanctam Sedem obedientiam præclari hujus Antistitis.

Quid igitur his attentis de petità Coadjutoris Moguntini Deputatione Vobis videtur?

D. Cardinalis Acciajulus Episcopus Portuensis, uti antiquior Cardinalis, protulit votum suum per hæc verba.

BEATISSIME PATER.

Digna, & verè commendanda provisio; magis tamen commendandus eximius zelus Sanctitatis Vestræ, quo non minùs Catholicæ Religioni, & Ecclesiæ, quàm Pontificiæ Dignitati illatas injurias tam opportunè propulsavit.

Reliqui omnes DD. Cardinales id ipsum annuendo censuerunt; unde Sanctitas Sua sequens edidit Decretum.

Auctoritate Omnipotentis Dei, Sanctorum Apostolorum Petri, & Pauli, ac nostrâ deputamus Coadjutorem cum futura successione in regimine, & administratione Ecclesiæ Moguntinæ prænominatum Franciscum Ludovicum cum retentione Ecclesiarum Uratislaviensis, & Vormatiensis, nec non Magni Magistri Militiæ B. Mariæ Theutonicorum *ad ejus Vitam*, & cum Decreto, quod factò dictæ successioni loco Canonicatus, & Præbenda, quos in Ecclesia Moguntina obtinet, vacent eo ipso, ita ut de illis per Sedem Apostolicam tantum disponi possit, quodque nonnisi factò successioni hujusmodi loco, Consecrationis munus suscipere teneatur: ita tamen, ut ab obligatione, quam habet illud suscipiendi ratione aliarum duarum Ecclesiarum, quibus nunc præest, nullatenus propterèa exemptus intelligatur: nec non cum retentione Præposituræ Elvacensis, ac Canonicatum, & Præbendarum Ecclesiarum Colonien., &

Leodien., ac ceterorum omnium, & quorumcumque, quæ obtinet juxta Decreta particularis Congregationis rerum Confistorialium; ac insuper cum alio Decreto, quod, postquam factus fuerit eidem successioni locus, Theologalem, & Pœnitentiariam Præbendas instituat, Montemque pietatis erigi curet, ejus conscientiam super his onerantes.

In nomine Patris ꝑ, & Filii ꝑ, & Spiritus ꝑ Sancti. Amen.





IN CONSISTORIO SECRETO

Habito die 30. Januarii 1713.

ARGUMENTUM.

Commemoratis quamplurium S. R. E. Cardinalium brevi tempore extinctorum funeribus, ac inter eos Cardinalis Thomasi novissimè defuncti virtutibus præcipuà laude celebratis, declarat reliquos tres Cardinales, qui supererant ex iis, quos præterito anno creaverat, & in pectore reservaverat, nimirum Emmanuelem Arias Archiepiscopum Hispalensem, Benedictum Sala Episcopum Barchinonensem, Melchiorem de Polignac Rotæ Romanæ Auditorem. Creat insuper duos alios Cardinales, nempe Benedictum Odescalcum Archiepiscopum Mediolanensem, & alium, quem in pectore reservat, arbitrio suo quandocumque evulgandum.

VENERABILES FRATRES.

IL.



Dmonent nos multiplicia funera, quæ paucos intrà menses quamplurium ex Fraternitatibus Vestris, non finè gravi paterni cordis nostri dolore, contigerunt, ut ad tot, tantasque Apostolici Senatus jacturas opportunè reparandas animum convertamus; Nec sanè dissimulare possumus cæteris acerbiorē Nobis accidisse novissimam omnium, quam fecimus, eximii, ac piissimi Viri Cardinalis Thomasi; molestè siquidem sensimus, ni-

mia

mia celeritate Nobis creptum fuisse verum exemplar sanctioris veteris disciplinæ, quod in ejus moribus, & doctrina suspiciebamus. Humiliantes Nos nihilominus sub potenti manu Dei, cujus Providentia in sui dispositione non fallitur, Davidicum illud coram Domino recolere non prætermisimus: *Obmutui, & non aperui os meum, quoniam tu fecisti*; Sperantes interea adfuturum Nobis ope sua apud Deum in Cœlis, qui consiliis suis diù Nobis adesse non potuit in terris. Hoc igitur incensi studio jacturas Ordinis Vestri novorum Senatorum accessione fariendi, aliisque gravissimis rationibus animum nostrum moventibus adducti, nolumus diutiùs absconditas esse sub modio lucernas illas, quæ super candelabrum collocari debent, ut omnibus, qui in domo sunt, præluceant: adeoque reliquos tres S. R. E. Cardinales, qui supersunt ex iis, quos dudum, nempe die decima octava Maji anni proximè elapsi creavimus, & in pectore reservavimus, ne amplius lateant, sed suarum fulgore virtutum universam Ecclesiam illustrare valeant, palàm hodiè evulgare, ac declarare intendimus, videlicet:

Emmanuelem Arias Archiepiscopum Hispalensem.

Benedictum Sala Episcopum Barchinonensem.

Melchiorem de Polignac Rotæ Romanæ Auditorem.

Præterea ad majorem Dei gloriam, Sanctæque Romanæ Ecclesiæ utilitatem, ac decus creare intendimus duos alios Cardinales, nempe:

Benedictum Odescalcum Archiepiscopum Mediolanensem, cujus virtutes fatis Vobis compertæ sunt, & notæ: ac alium, quem tamen rationabilibus ex causis in pectore reservare constituimus, arbitrio nostro quandocumque evulgandum.

Quid Vobis videtur?

Auctoritate Omnipotentis Dei, Sanctorum Apostolorum Petri,
& Pauli, ac nostra declaramus, & respectivè creamus S. R. E.
Cardinales

Emmanuelem Arias Archiepiscopum Hispalensem :

Benedictum Sala Episcopum Barchinonensem .

Melchiorem de Polignac Rotæ Romanæ Auditorem .

Benedictum Odescalcum Archiepiscopum Mediolanensem :

Alium demùm in pectore reservamus, arbitrio nostro quando-
cumque declarandum.

In nomine Patris †, & Filii †, & Spiritus † Sancti. Amen .




Singulariter in Spe Constituta me. 114

IN CONSISTORIO SECRETO

Habito die 28. Aprilis 1713.

ARGUMENTUM.

Cum aliquot ante dies ad Urbem venisset Religiosus Vir Joannes Joseph Mazet Ordinis Fratrum Minorum S. Francisci de Observantia nuncupatorum Professor à Venerabili Viro Samuele Capasulis Patriarcha Alexandrino Ritus Græci missus, ac Procurator ad infra scripta specialiter constitutus, literasque attulisset ejusdem Patriarchæ Græco idiomate conscriptas, quibus ille Sanctissimo Patri significabat se divino illustratum lumine vetus Græcorum Schisma, ejusque errores ejurasse, ac Orthodoxæ Fidei professionem emisisset, transmissis ea de re opportunis documentis: eundem propterea summum Pontificem, quem ut verum B. Petri Successorem agnoscebat, humiliter obsecrans, ut suum Alexandrinæ Ecclesiæ Præsulatum Apostolica auctoritate confirmaret, eique Pallium mittere dignaretur: attributa demum antedicto Mazet plenâ facultate supplendi quidquid à se omissum fuisset, suoque nomine agendi ea omnia, quæ in præmissis necessaria, ac opportuna Sanctitati Sux visa fuissent. Idem Sanctissimus Pater, ne quid in re tanti momenti, nisi quæ par erat, maturitate, ac seriâ adhibita consultatione decerneret, scripta, & postulata memorati Patriarchæ, discutienda

commisit primum quidem Congregationi DD. S. R. E. Cardinalium negotiis propagandæ Fidei præpositorum, subinde verò particulari Congregationi nonnullorum ejusdem S. R. E. Cardinalium, & aliquot Romanæ Curiae Prælatorum, ac Theologorum à Sanctitate sua specialiter ad id deputatorum, quos ipsamet Sanctitas Sua coram se de hac re differentes audire voluit. Illorum itaque auditis sententiis, nec non auditis pariter, & sanè pluries Sacrarum Cæremoniarum Magistris, ac iis omnibus, quæ ad actionem ritè, & ordine, ac prorsus ex dignitate Sanctæ Sedis Apostolicæ perficiendam conducere visa sunt, sedulo expensis, dispositis, & constitutis, Sua Sanctitas Consistorium indixit, in quod hac ipsa die habitum ab uno ex DD. Cæremoniarum Magistris, antequam fores de more clauderentur, introductus fuit R. P. D. Prosper de Lambertinis, utriusque Signaturæ Referendarius, Prælati Domestici Pontificii, & Advocati Consistorialis, simulque introducti etiam fuere prædictus Joannes Joseph Mazet Patriarchæ Alexandrini Procurator, nec non duo Monachi Ordinis Sancti Basilii Ritus Græci, qui ab eodem Patriarcha pariter ablegati fuerant, illius literas, aliaque ab eo transmissa documenta elevatis manibus deferentes, à pluribus Græcis, qui in eorum comitatu erant, associati.

Quibus omnibus, nec non Prælati, & Nobilibus plurimis, qui frequentissimi convenerant, ac præsertim Episcopis, quos Pontifici Solii Assistentes nuncupant, & nonnullis Protonotariis Apostolicis præsentibus, antedictus R. P. D. Prosper de Lambertinis è regione Pontificæ Sedis constitutus, flexis genibus Sanctitatem Suam ita allocutus est.

BEATISSIME PATER.



Lacuit Divinæ bonitati dissipato muro, qui Alexandrinam Ecclesiam ab hac Apostolica Sede dividebat, atrâque errorum caligine sublatâ, Venerabilem Virum Samuelem Capasulis Patriarcham Alexandrinum Græci ritus in admirabile lumen suum vocare, eique viam salutis ostendere, ut ad suam, & omnium fidelium Matrem Romanam Ecclesiam rediret, ac Sanctitatem Vestram, uti verum Jesu Christi in terris Vicarium, totiusque Christiani Populi communem Patrem, & Pastorem, libero non minùs ore, quàm sincero corde fateretur, & crederet. Fautissimum hujus rei nuncium ad Pedes Sanctitatis Vestræ provolutus humillimè defert Religiosus Vir Joannes Joseph Mazet Ordinis Fratrum Minorum Sancti Francisci de Observantia nuncupatorum Professor, ab eodem Samuele Patriarcha Procurator specialiter ad hæc constitutus; nec sanè dubitat gaudium, quod indè sumet uberrimum Sanctitas Vestra ad instar illius gaudii, quod Christus Dominus majus esse dixit in Cœlo, & coram Angelis Dei super uno peccatore pœnitentiam agente, quàm super nonaginta novem justis, qui non indigent pœnitentiâ, completum undique fore, & cumlatum. Summâ proindè animi sui demissione flagitat idem Procurator, ut prædicti Samuelis Patriarchæ literæ, & alia, quæ cum illis attulit, totius ab eo peractæ rei documenta, benignè excipiantur, & perlegantur.

Subindè memoratus Joannes Joseph Mazet acceptas à duobus Monachis supradictis Patriarchæ Alexandrini literas, unâ cum aliis ab eo transmissis documentis reverenter omnia obtulit Sanctitati Sæ, cujus jussu ejusmodi scripta D. Carolus Majella Vaticanæ Bibliothecæ Præfectus, seu primus Custos, stans inter scannum DD. Cardinalium, & Sedem Pontificiam, conver-
sus

ſus ad DD. Cardinales, eo ipſo Græco idiomate, quo exarata erant, elatâ voce perlegit.

Mox R. P. D. Fabius Oliverius Secretarius Brevium Secretorum, loco R. P. D. Joannis Chriſtophori Battelli Brevium Epiſtolarium ad Principes Secretarii legitimè impediti, alia itidem voce legit prius literas, ac ſubindè abjurationem prædicti Patriarchæ in Latinam linguam à memorato D. Majella translataſ, quarum tenor hic ſubjicietur.

Tenor Literarum Patriarchæ Alexandrini.

BEATISSIME, AC SANCTISSIME IN CHRISTO PATER, ET DOMINE.

AD Paternum amorem Veſtræ Beatitudinis humiliter accuro, tamquam ad benignum meum Patrem, & Paſtorem legitimum, & verum. Membrum enim Ego etiam ſum Universalis Corporis Chriſti in Spiritu legitimè, & canonicè electus in Præſulatum Patriarchalis Cathedralis ſecundùm omnem Conſtitutionem hujus noſtræ Orientalis Eccleſiæ; ambulans, quemadmodum edoctus eram ab adoleſcentia mea, atque inſtitutus à præfatæ Eccleſiæ Præſulibus, & Magiſtris; nec non Sancto meo Seni, & Prædeceſſori meo Patriarchæ D. Geraſimo Palladæ multos annos miniſtrans; non defuit unquam illius recta doctrina, ſimpliciſſimè tamen, propter metum, aut inſufficientiam. In Divina igitur miſericordia me doctrinam excipiente, tamquam diſpoſito, & paulùm veritati addicto divinus zelus augebatur, ſed modus non ſuppeteſbat, donec Magnus Deus, qui vult ſalutem omnium, judiciis ſuis ineffabilibus permisit, ut in afflictiones intolerandas inciderem, & graves neceſſitates. Elapſo enim à legitimo Patriarchatu octo menſium ſpatio, Coſmas quidam Episcopus Conſtantinopoli degens, contemptis legibus, & Canonibus Eccleſiaſticis, inſiluit, & numeratâ pecuniâ Tyrannicæ Curia, quæ ſupra Nos eſt, nullâ eorum, qui Eccleſiæ illius erant, habitâ ratione, extemplo ſo-

lus Alexandria Patriarcha renunciatus est, & per potentian Magistratus illic approbarunt. Misit autem etiam huc graves literas, & homines idoneos, qui dominium exercerent, & me in exilium pellerent. Verum, qui hic erant Christiani, quamquam pauperrimi essent, inito consilio constituerunt, ut Prævaricato rem nequaquam admitterent; cum autem pecuniâ destituti essent, acceperunt vasa, & vestes sacras, & vendentes tradiderunt Magistratibus, & irritos illius conatus effecerunt. Non autem hic substitit; etenim Adversarius rursus per validiores vires non oppugnabat. Cum verò nihil proficeret, huc se ipse persona liter contulit cum potentia novi Ducis, & rursus re infecta reversus est; Justus enim Deus. Remansit tamen hic Sanctissimu Thronus omnino desertus, & nudatus Ecclesiastico ornameto & quod gravius est, constrictus remansit gravissimo ære alieni supra triginta millium regalium Hispaniæ; et quidem usque gravis est, & foeneratores alienigenæ; et inimicus non cessavi adhuc fodere foveas in nos, & damna inferre, & validè oppugnare. Talis est nostra miseria, BEATISIME PATER, quam confiteor secundum Divinam permissionem. Enim verò usque adhuc averfabar cognitionem veritatis, quam tenet, docet, & prædicat Sancta Christi Catholica, & Apostolica Romana Ecclesia, sine qua veritate nemo salvus esse potest. Quamobrem saluti quoque meæ curam gerens Magnus Deus, volensque de Schismate me liberare, tantas tribulationes me subire permisit, ut per ipsas rectam viam invenirem, quæ ducit ad Regnum Cælorum quam & inveni, eique gloriam reddo, qui benefecit. Sic autem accidit. Miseriâ tribulationum oppressus, & omni undique spoliatus, inaudivi quod Deus misisset huc in Ægyptum Reverendissimum Patrem Laurentium à Sancto Laurentio Custodem Sanctæ Jerusalem. Hunc convenire cupiebam, tum propter reverentiam; & bonam famam, tum propter consolationem, & narrationem salutaris desiderii mei. Cum autem ad ean

voluptatem capiendam accessissem, *inveni* Virum Reverendum in omnes partes reverentiâ dignum, qui & cognovit tribulationes meas, & omni cum alacritate, ac pietate occœpit me consolari, & ad lumen *veritatis* dirigere, & sanum membrum Sanctæ Catholicæ, & Apostolicæ Romanæ Ecclesiæ constituere, atque in hujus sanctâ, & verâ Fide, rectorumque dogmatum confirmare in summa submissione, firmâque obedientiâ erga Te Summum Sacerdotem, Universalem, & verum JESU CHRISTI Vicarium, & Pastorem Oecumenicum. Verùm dictus Reverendissimus Pater Hierosolymam rediturus dedit mihi consolatorem, et ductorem loco sui admodum Reverendum P. Archangelum à Melita, qui mihi adest tum per se ipsum, tum per discipulum quemdam suum P. Joannem Josephum Mazet Apostolicum Terræ Sanctæ Missionarium; ac veritatem ritè edoctus, constitutus, et exceptus sum in Gratiâ Dei, et confiteor veram Fidem, quam tenet Sancta Catholica, et Apostolica Romana Ecclesia, et hujus Sanctissima, et Apostolica Cathedra, et horum dogmata. Averfans omnes falsas contrarietates, contradictiones, et schismata, meque committens paternis brachiis Sanctitatis Vestræ; agnoscens secundùm antiquissimum Sanctæ Ecclesiæ morem, quod ad regimen hujus spiritualis navis, per tot diversas, graves, et vehementes procellas agitata, conveniat secundùm præcepta Fidei confiteri me, quòd Patriarchæ, et omnes Archiepiscopi confirmari debeant à Sanctitate Vestra Capite Universali Sanctæ Ecclesiæ. Sinè qua confirmatione non possumus verè pascere proprium gregem in rectæ doctrinæ firmitate. Ad Te igitur confugio, BEATISSIME MI PATER, Præsidem meum, verum Successorem B. Petri, cui Dominus noster Jesus Christus dixit: *Pasce oves meas*; &: *Ego rogavi pro Te, ut non deficiat fides Tua*; &: *Tu es Petrus, & super hanc Petram ædificabo Ecclesiam veracem*, in tuis verbis scilicet, et in tuis doctrinis, & *portæ inferi non prævalebunt ipsi*. Precor igitur, ut inveniam gra-

tiam, & misericordiam apud Te, ut confirmes mihi Præfultatum, & mihi Pallium mittas. Ut autem Sanctitas Vestra certa remaneat de conscientia mea circa sanam doctrinam, mitto fidei meæ professionem, & abjurationem, quam feci, contra omnes falsas doctrinas, & contradictiones coram R. P. Joanne Josepho Mazet, quem elegi in Procuratorem meum, ut hæc sistat Sanctitati Vestræ nomine meo cum ea, quæ convenit, obedientiâ; illi tribuens plenam facultatem, & potestatem, non solum ad hæc confirmanda, & subscribenda, tanquam vices meas tenenti, sed ad supplendum, si quid defuerit, & quemadmodum statuta fuerint, quæcumque placuerint Sanctitati Vestræ, & Sanctæ Fidei debito more perficiendum nomine meo. Certissimus equidem mihi sum, me ne minimum quidem recedere à sententiis, & præceptis Tuæ Beatitudinis, sed & perfectum me esse in tuâ sanctissimâ intelligentiâ, & Catholicâ Doctrinâ, secundum quam, ut verus Magister totius Oecumenicæ Ecclesiæ, teneas, & doces. Utinam sanctis tuis precibus non caream. Amen.

Dat. in Ægypto in meo diversorio Anno salutis M. DCC. XII. Mense Julio Indictionis V.

Culminis Vestri Beatissimi, & Sanctissimi.

Servus humilis, & in Christo Filius obsequentissimus

Samuel Patriarcha Alexandriæ.

Locus ✠ Sigilli

Circa sigillum:

Samuel misericordia Dei Papa, & Patriarcha Magnæ Urbis Alexandriæ, & Judex Terræ.

Sigillum exhibet imaginem Sancti Marci, circa quam legitur:

SANCTUS MARCUS.

Foris

IpsiUS SANCTISSIMÆ BEATITUDINI:

Tenor abjurætionis ejusdem Patriarchæ .

EGo Samuel Capafulis à Chio Filius Demetrii Capafulis, Dei misericordia Patriarcha Alexandriæ per directionem admodum Rev. P. Archangeli à Melita, & coram RR. PP. Ægidio à Lacu Nigro Vice Præfecto Miſſionis in Ægypto, & Joanne Joſephſo Mazet Apoſtolicis Terræ Sanctæ Miſſionariis, & cum aſſenſu Patrum Minorum cum iisdem exiſtentium, habens coram me Sancta Euangelia, iisſque proprias meas manus imponens, juro ſuper iſſis, et ex corde credo, atque ore confiteor illam Sanctam Fidem Catholicam, et Apoſtolicam, quam Sancta Romana Eccleſia credit, docet, confitetur, et ſervat, et conſequenter reſpuo, averſor, et execror omnes hæreſes cujuſcumque Sectæ erroneæ, et quorumcumque Hæreticorum, qui Sanctæ Catholicæ, et Apoſtolicæ Romanæ Eccleſiæ adverſantur.

Item juro, quòd credo, et confiteor, corde, et ore, quòd Spiritus Sanctus ex Patre, Filioque procedat, tanquam ex uno Principio, uno Spiratore, et una Spiratione, et quòd Filius ſit principium hypoftaſis Spiritus Sancti, quemadmodum et Pater; et quòd hoc Verbum (Filioque) licitè, et rationabiliter Nicæno, et Conſtantinopolitano Symbolo ſit appoſitum ab Occidentali Eccleſiâ, tanquam neceſſaria explicatio ad cohibendas hæreſes, quæ tunc temporis vigeabant: et quòd in pane triticeo, ſive azymo, ſive fermentato Sacramentum Euchariſtiæ verè conficiatur: et quòd Sacerdotes alterutrum conſecrare oporteat, unumquemque ſecundùm propriæ Eccleſiæ morem, ſive Occidentalis, ſive Orientalis: & quod animæ verè pœnitentium, qui non plenè pro commiſſis, et omiſſis ſuis ſatiſfecerunt, atque eatenùs in Dei charitate deceſſerunt, poſt mortem Purgatorii pœnis expientur; ad quas liberandas conducunt vivorum fidelium ſuffragia, Miſſarum ſcilicet Sacrificia, Orationes, et Eleemoſynæ, atque alia mſericordiæ opera, quæ à Fidelibus, ſecundùm Eccleſiæ traditionem, pro animabus illis

fieri consueverunt . Firmiter etiam affirmo, ac teneo animas eorum, qui post susceptum Baptismum nullam peccati maculam incurrerunt, nec non eorum, qui post Baptismum in lethale peccatum lapsi sunt, sed expiati in corporibus suis per poenitentiam, aut extra corpus in Purgatorio, statim in Cœlestem gloriam recipi, Deumque Trinum, & Untum, uti est, clarè intueri. Animas autem decedentium in peccato mortali, sive actuali, sive solo originali mox in infernum descendere, ubi pro ratione diversorum demeritorum diversimodè puniuntur. Præterea Sancta, & Apostolica Romana Cathedra, atque eam tenens Pastorum Princeps, & Summus Sacerdos Primatum habet super omnem terram; atque hic est Successor Sancti Petri primi, & Principis Apostolorum, verusque Vicarius JESU CHRISTI Domini Nostri, Caput totius in Christo Ecclesiæ, Dominus noster, & Pater, & Magister omnium Christianorum, ut quod ipsi in persona B. Petri data est plenissima potestas à Christo Domino nostro pascendi, regendi, et gubernandi Catholicam Ecclesiam.

Item juro, quòd amplector, et veneror omnes Sanctas Synodos, quas recipit Sancta Catholica, & Apostolica Romana Ecclesia, & præcipuè duo Oecumenica Concilia Florentinum, et Tridentinum, & respuo omnes falsas doctrinas veritati superscripti Dogmatis repugnantes, et veræ Fidei Sanctæ Romanæ Ecclesiæ, sinè qua nemo salvari potest .

Juro autem super his Sacris Euangeliiis, quòd nunquam consentiam, aut eligam admittere hæresim aliquam, aut amplecti dogma fidei contrarium Catholicæ, et Apostolicæ Romanæ Ecclesiæ, et veræ ipsius Fidei . Ita promitto, quòd nunquam hæreticorum libris fidem adhibebo, aut illos recipiam; sed reprobo, et omnes pariter hæreses superscriptæ veræ fidei contrarias rejicio, & execror. Hæc spondeo hodie coram Deo Trino in Personis, et Uno in Natura, et in præsentia supradicto-

rum Testium, Reverendorum Patrum scilicet subscriptorum .
Anno salutis 1712. Mense Majo die 26. fer. 2., secundum antiquum computum, Indiēt. V. secundum novum verò die 6. Mensis Junii ejusdem anni . In diversorio dictorum Patrum Missionariorum Apostolicorum Terræ Sanctæ in Ægypto .

Locus † Sigilli .

Ego Samuel Capafulis à Chio filius Demetrii Sacerdotis Capafulis, Dei gratia Patriarcha Alexandriæ liberè, & spontaneè exposui præsentem abjuracionem hæresum Catholicæ Doctrinæ, & veræ fidei oppositarum, quam nunc confiteor.

Ego Fr. Archangelus à Melita Minoris Observantiæ, & Superior apud Cairum veterem per Terram Sanctam Missionarius Apostolicus præsentem abjuracionem in manibus meis emissam recepi .

Ego Fr. Ægidius de Lacu Nigro Pro - Præfectus Missionum in Terra Sancta in Ægypto testor me præsentem adfuisse in emissionē prædictæ abjuracionis .

Ego Fr. Joannes Joseph Mazet Missionarius Terræ Sanctæ præsens adhuc prædictæ abjuracioni .

Peraetâ ejusmodi recitatione R.P.D. Lambertinus suam Orationem, & supplicationem ita prosecutus fuit .

BEATISSIME PATER.

Audivit jam Sanctitas Vestra, quid afferant literæ Patriarchæ Alexandrini; audivit quid alia, quæ modò lecta sunt, contineant: audivit filium matris ubera humiliter petentem, qui diù errans ab utero locutus fuerat falsa. Audire nunc Sanctitas Vestra non dedignabitur Orthodoxæ Fidei professionem, quàm ultra aliam, & sanè plenissimam ab eodem Patriarcha emissam, & Sanctitati Vestræ exhibitam, illius nomine mox emittet Religiosus hic Vir Joannes Joseph Mazet, speciali ad id suffultus mandato, juxta formam Græcis ad unitatem S. R. E. redeuntibus à Sede Apostolica præscriptam, solemni additâ promissione, quod fidei professionem hujusmodi juxta formam prædictam idem Patriarcha ratam, & gratam habebit, et publicum ritè confectæ ratificationis Instrumentum ad Sanctitatem

Vestram, et hanc Sanctam Apostolicam Sedem intrā tempus competens omninò transmittet.

Surgens hic prædictus Jo: Joseph Mazet ab uno ex-DD. Cæremoniarum Magistris ante Pontificiam Sedem deductus fuit, ibique flexis genibus Fidei professionem juxta formulam Græcis ad unitatem S. R. Ecclesiæ redeuntibus à Sede Apostolica dudum præscriptam ejusdem Patriarchæ nomine solemniter emisit, seu potius renovavit, recitatâ alia voce eadem formulâ tenoris, qui sequitur, videlicet.

EGO F. Joannes Joseph Mazet Ordinis Min. S. Francisci de Observantia Procurator Venerabilis Fratris Samuelis Capasulis Patriarchæ Alexandrini Græci Ritus ad Pedes Sanctitatis Vestræ constitutus procuratorio nomine prædicti Samuelis Patriarchæ mei principalis infra-scriptam Sanctæ orthodoxæ Fidei professionem juxta formam Græcis ad unitatem S. R. E. redeuntibus à Sede Apostolica jamdudum præscriptam factururus, & emissurus promitto pro eodem Samuele Patriarcha meo Principali, quòd ipse illam ratam, & gratam habebit, ac suscipiet, & acceptabit, & intrā tempus competens ratificabit, & emologabit, atque de novo juxta eandem formam de verbo ad verbum, Græco tamen idiomate, faciet, & mittet, ac sua manu subscriptam, suo sigillo ob-signatam, ad Sanctitatem Vestram, & hanc Sanctam Apostolicam Sedem transmittet. Sanctam igitur Catholicam Fidem explicitè, & expressè profitendo firmâ fide credo; & profiteor omnia, & singula, quæ continentur in Symbolo Fidei, quo S. R. E. utitur, videlicet: *Credo in unum Deum &c.*

Reliqua, ut in professione orthodoxæ Fidei à Græcis facienda jussu Fel. rec. Gregorii Papæ XIII. edita.

Hanc verò Catholicam Fidem, extra quam nemo salvus esse potest, quam in præsentī sponte profiteor, & veraciter teneo, eandem integram, & inviolatam usque ad extremum vitæ spiritum

constantissimè, Deo adjuvante, retinere, & confiteri, atque à meis Subditis, vel illis, quorum cura ad me in munere meo spectabit, teneri, doceri, & prædicari, quantum in me erit, curaturum.

Ego idem F. Jo: Joseph Mazet Procurator supradicti Venerabilis Fratris Samuelis Patriarchæ Procuratorio illius nomine, ut supra, spondeo, voveo, ac juro; sic me Deus adjuvet, & hæc Sancta Dei Evangelia.

Absolutâ prædictæ formulæ recitatione, eâque propriâ manu subscriptâ, idem Jo. Joseph Mazet priorem locum repectiit, præfatus verò R. P. D. Lambertinus suam orationem his tandem verbis conclusit.

BEATISSIME PATER.

IN literis Patriarchæ Alexandrini, aliisque actis, quæ nuper lecta fuerunt, præter hæresum, errorum, ac luctuosi schismatis ab eo amplissimè factam ejurationem, præter perpetuam, ac debitam obedientiam, & subjectionem Sanctitati Vestræ, atque huic Sanctæ Sedi plenissimè præstitam, habetur etiam petitio, quæ juxta veterem morem, ac Romani Cærimonialis præscriptum, nonnisi in hoc loco, & ab aliquo ex Consistorialis Aulæ Advocatis exponi potest. Cùm idcirco summâ Sanctitatis Vestræ beneficentiâ sim inter illos adscitus, Majorum consuetudini morem gerens, quæ supplex petit idem Patriarcha paucis exponam.

Samuel itaque Capasulis Patriarcha Alexandrinus omni, quo par est, obsequio, animique totâ submissione, Pallium petit, quod è Sancti Petri corpore sumitur, & in quo Pastoralis officii plenitudo continetur. Non inani spe innititur fore, ut voti compos fiat, cùm Alexandrina Ecclesia eximie hujus prærogativæ honorem non uno equidem nomine mereatur. In primis siquidem S. Marcus Evangelista Beatissimi Apostolorum Principis in Christo Filius, & ab eo Alexandriam missus Ecclesiam il-

lam fundavit, & rexit, unde jure optimo eadem Ecclesia censenda est peculiaris hæreditas B. Petri, qui per filium suum, & ejus salutarem Euangelij prædicationem sibi eam comparavit. Illius porro primi Christiani morum integritate, ac sanctis exemplis vitam adeò commendatam duxerunt, ut, teste D. Hieronymo, Philo Hebræus Essenorum mores penè Angelicos laudans, Alexandrinorum illius temporis virtutes omni ex parte spectatas indigitare voluerit, illarum, vel admiratione ductus, vel sanctitate permotus. Merita præterea Antistitum celebris illius Ecclesiæ id ipsum exigunt, nam ut nemo ferè ignorat, Alexandrini Patriarchæ plurimùm elaborarunt, omnique ope, ac zelo contenderunt, ut turbæ, quas controversia de die, quo Pascha ritè celebraretur inter Christianos excitaverat, componerentur; præcæteris autem, quod Ecclesiæ monumenta luculenter produnt, S. Athanasius in asserenda, ac propugnandâ divinâ cum Patre Filij consubstantialitate meritorum gloriâ emineuit, Fidei causâ quæque aspera, & acerba perpeffus. His accedit Alexandrinam Ecclesiam, post Romanam, primam fuisse usque ad Lateranensem Concilium sub Innocentio III., qui subindè ejusmodi honorem Ecclesiæ contulit Constantinopolitanæ. Ipse quoque Samuel Patriarcha eo, quod flagitat, Pallio se dignum præbet, quippe qui, ut ex literis nuper audivimus, damnato schismate, eique annexis erroribus ejuratis, ad Romanæ Ecclesiæ unitatem recipi, & admitti suppliciter petit, Sedique Apostolicæ se totum tradit, ac subjicit syncerâ Orthodoxæ Fidei professione, suam cum Catholica Ecclesia consensionem testatus, rarò quidem exemplo, nec passim obvio. Hic quidem Samuel Patriarcha non adest: illius tamen adest nomine legitimus iste Apocrisarius, qui Patriarchæ Pallii honorem supplex flagitat. Quod si in Canonicis Sanctionibus inter eos, quibus Pallii decus Apostolica Sedes conferre solet, Alexandrinus Patriarcha illustrem obtinet locum, honorifica, & speciali appellatione laudatus, & Sanctus

Gregorius Pontifex Maximus Pallium dari pro antiqua Ecclesiæ consuetudine, cùm petentium merita precibus non inane commendationis pondus adjiciunt, suâ testatur auctoritate, nihil planè ob stare videtur, quod clementissimæ Sanctitatis Vestræ dignationi moram afferat, quin Oratoris precibus instanter, instantius, & instantissimè emissis indulgeat, ac vota consoletur, ea potissimum etiam de causa, quòd sperare facile possumus Patriarcham hoc obstrictum, atque illectum beneficio ardentius enixurum, ut Populos Pastoralis suæ curæ commissos, simulque Episcopos suæ Jurisdictioni subiectos, quibus prævit exemplo, ad Ecclesiæ Romanæ obedientiam sollicito zelo secum perducatur.

Illicd Sanctissimus Pater ejusmodi orationi, ac petitioni in hæc verba respondit.

Benedictus Deus, & Pater Domini Nostri Jesu Christi, Pater Misericordiarum, & Deus totius consolationis, qui consolatur Nos in omni tribulatione nostra. Intuens scilicet piissimus Dominus Catholicam Ecclesiam innumeris agitari turbibus, faustissimo illam eventu, hoc est humili, ac sincero ad eam reditu Venerabilis Fratris Samuelis Patriarchæ Alexandrini, lætificare voluit, eoque maximum angustiis nostris levamen afferre dignatus est. Non tamen in uno Patriarcha sistit lætitia nostra; perpendentes enim eximiam illius pietatem, cujus tam præclarum accepimus hodie testimonium, nec non singularem, quam, ut Nobis innotuit, apud suas latè gentes existimationem obtinet, uberiores in dies spiritualium gaudiorum messem expectamus; ad eadem siquidem sequenda vestigia omnibus Græci ritus Populis, ac præsertim Episcopis, valido incitamento futurum Patriarchæ tam illustre exemplum summopere confidimus. Plurimas propterea, ac debitas supremo bonorum omnium Auctori gratias agimus, quòd Alexandrinum Antistitem ad Beatissimi Apostolorum Principis, indignum licèt, ac imme-

rentem Successorem, hoc est Marcum ad Petrum, Discipulum ad Magistrum, Filium ad Patrem, iis propemodum diebus, quibus ipsius Beati Marci, nec non Sanctissimi Alexandrini Episcopi Athanasii festa celebramus, quod certè non sine peculiari Divinæ Providentiæ consilio contigisse arbitramur, per ineffabilem Divinæ suæ bonitatis abundantiam vocare voluerit: felix inde omen accipientes, quod Is, cujus perfecta sunt opera, Alexandrinæ Ecclesiæ Gregem universum Pastoris sui exemplo ad hanc Petram fidei confugere, & ad hunc Montem Domini ascendere similiter faciet, ut legem accipiat in Sion, & Verbum Domini audiat in Hierusalem. Expansis interim Pontificiæ charitatis brachiis, magnæque cum animi nostri exultatione, unâ cum istis Venerabilibus Fratribus Nostri S. R. E. Cardinalibus, plenam, ac debitam ab eodem Patriarcha Alexandrino, tam per suas mox perlectas literas, quàm per legitimum Procuratorem suum Nobis, & huic Sanctæ Sedi præstitam obedientiam, ac subjectionem libenter recipimus: nostram illi vicissim, & ejusdem Sanctæ Sedis gratiam, benevolentiam, & patrocinium amantissimè exhibentes. Petitiæ insuper concessioni Pallii de Beati Petri corpore sumpti, in quo est plenitudo Pontificális Officii, eidem Samueli Patriarchæ, postquam orthodoxæ Fidei professionem ab ejus Procuratore hîc renovatam ratificaverit, ab illo, cui rem hanc delegabimus, jussu nostro tradendi, similiter annuimus; præviâ tamen ipsius Samuelis Patriarchæ in utroque foro absolute à Censuris, sententiis, & poenis Ecclesiasticis quibuslibet, quas ipse propter Schisma, hæreses, & errores, quos tenuit, & nuper ejuravit, quovis modo incurrit: præviâ insuper cum eo dispensatione super irregularitate per ipsum præmissorum occasione quomodolibet contracta, itaut illâ, & iisdem præmissis minimè obstantibus, Clericali charactere, quò antea insignitus fuit, illiusque privilegiis uti, ac in omnibus etiam Sacris, & Presbyteratus Ordinibus antea pariter susceptis, etiam in Altaris mi-

nisterio ministrare ; nec non Patriarchali Ecclesiæ Alexandrinæ, cui nunc præest, quoad vixerit, præesse, & munere Consecrationis per eum etiam antea suscepto uti liberè, & licitè possit, & valeat ; ac demùm præviâ ejusdem Samuelis Patriarchæ ad hæc omnia, & singula, & aliàs ad quemcumque effectum adversus præmissa opportunâ rehabilitatione. Reliquum nunc est, ut Deum Optimum Maximum impensè rogemus, quatenus opus, quod ipse operatus est, confirmare dignetur, illudque in unitate Fidei, & vinculis charitatis lætioribus in dies perficiat incrementis.

Finito Sanctissimi Patris responso D. Nicolaus Jacobatius Sanctitatis Suae, & Camera Apostolicæ Procurator Generalis ad RR. PP. DD. Protonotarios, & Notarios Apostolicos ibi præfentes conversus, eos in hunc modum interpellavit.

EGO, Nicolaus Jacobatius Sanctissimi Domini Nostri, & Camera Apostolicæ Procurator Generalis, rogo Vos omnes Protonotarios, & Notarios Apostolicos hic præfentes, ut de delatione, ac præsentatione eidem Sanctissimo Domino Nostro facta per Fratrem Joannem Josephum Mazet Ordinis Minorum Sancti Francisci de Observantia nuncupatorum literarum Venerabilis Patris Samuelis Capasulis Patriarchæ Alexandrini Græci ritus, continentium omnimodam obedientiam, & subjectionem, quam idem Patriarcha præstat, & exhibet Sanctitati Suae, & Sanctæ huic Sedi Apostolicæ : Nec non authentici documenti ejurationis à prædicto Patriarcha factæ schismatis, & quorumcumque errorum, in quibus priùs versabatur, ipsarumque literarum, & ejurationis lectione : Ac insuper de professione Fidei à præfato Fratre Joanne Josepho procuratorio nomine ejusdem Patriarchæ juxta formam Græcis ad unitatem Sanctæ Romanæ Ecclesiæ redeuntibus à Sede Apostolica præscriptam in manibus Sanctitatis suæ solemniter emissâ ; Ac demùm de petitione Pallii de corpore Beati Petri sumpti pro prædicto Patriarcha fa-

ēta, Decretoque super illius concessione à Sanctitate Sua benigne edito unum, seu plura, publicum, seu publica conficiatis Instrumentum, vel Instrumenta ad perpetuam rei memoriam.

Tunc demum R.P.D. Prosper Columna Protonotarius Apostolicus antiquior non tam ad RR. PP. DD. Referendarios, quàm ad ceteros omnes ibidem præsentes conversus, eos Actorum hujusmodi Testes adhibuit his verbis: Vobis Testibus.

Peraçto in hunc modum, absolutoque Alexandrinæ legationis negotio, prædictus Procurator Mazet, ac ceteri alii ex Græca Natione Pedem Sanctitatis Suae super eos Crucis signum producentis reverenter osculati sunt, ac subindè tum ipsi, tum reliqui omnes dimissi fuerunt, itaut Sanctissimus cum D.D. Cardinalibus, foribus de more clausis, solus remanserit; Porro alia occurrentia negotia ibidem aggrediens, antequam propositiones, & præconia Ecclesiarum inchoarentur, ipsos DD. Cardinales his verbis in hoc Consistorio secreto allocutus est.

VENERABILES FRATRES.

L.

E Sublimi Sanctæ hujus Sedis specula ad gravia potissimum, ac multiplicia incommoda, quibus tot in Hispaniarum Regnis vacantes Ecclesiæ jamdudum obnoxie reperiuntur, Pastoralis vigilantie nostræ oculos jugiter convertentes, diu sanè, multumque incerti hæsimus, quid pro instantiâ nostrâ quotidianâ, sollicitudine scilicet omnium Ecclesiarum, agendum Nobis esset, ut impositum Nobis per ineffabilem Divinæ bonitatis abundantiam Apostolicum Ministerium hac in re implemus. Hinc siquidem admonebat Nos Sacrorum Canonum rigor, ut quos ad easdem Ecclesias à Charissimo in Christo Filio Nostro Philippo Hispaniarum Rege Catholico Nobis præsentari contigisset, minimè admitteremus, nisi prius nostra, & Ecclesiæ jura, ibidem tam publicè, ac graviter læsa opportunis mediis sarcita fuissent. Urgebat illinc, ac vehementer impellebat Nos Ponti-

ficia charitas, ut spiritualibus illarum animarum necessitatibus, quæ jam à multo tempore Pastoris solatio destitutæ sunt, incunctanter consulereamus. Expensis porrò in utramque partem rationum momentis, vicit demum charitas Christi, quæ patiens est, benigna est, omnia suffert, omnia credit, omnia sperat, omnia sustinet. Ejusmodi proindè Ecclesiarum diuturnâ viduitate commoti, aliisque gravibus causis animum nostrum moventibus adducti, de quamplurium ex Fraternitatibus Vestris consilio pariter, & assensu, longiori quavis sublatâ morâ, Ecclesiis præfatis Pastores præficere constituimus, cumque in finem indulgimus, ut in hoc ipso Consistorio consueta dictarum Ecclesiarum præconia, quemadmodum audietis, inchoentur. Id tamen egimus, ac agere prorsus intendimus, non quidem animo ullâ ex parte relaxandi ea, quæ Nobis, & Ecclesiæ pro congruâ notarum læsionum reparatione debentur, sed potiùs spe Nobis proposita fore, ut idem Rex Catholicus novo hoc, & sanè præclaro Paternæ nostræ in ipsum benevolentia documento allectus: Christianissimi insuper Regis Avi sui, cujus insignis zelus, & pietas hac etiam occasione eximiè refulsit, iteratis officiis, accuratisque studiis excitatus: ipsâ demum suæ regiae mentis æquitate, ac magnitudine impulsus, ad ejusmodi reparationem alacrius, & cumulatius præstandam adducatur. Hæc omnia, VENERABILES FRATRES, Vobis hodie communicanda existimavimus, tum ut compertum Vobis sit, quo animo deliberationem hanc suscepimus, tum etiam, ut pro egregiâ pietate, ac perspecto zelo vestro apud Misericordiarum Patrem enixis precibus agatis, quatenus consilium nostrum cœlesti sua ope juvare, optatumque ad exitum perducere benignè velit, unde lætiora de cætero, quemadmodum impensè cupimus, ac in Domino confidimus, Vobis nunciare possimus.

Decanatus, quadraginta duo Canonici, inter quos Theologus, & Pœnitentiarius, ac centum ferè Presbyteri, & Clerici Divinis inservientes.

Sacrarium ejusdem Ecclesiæ est omni sacra Supellectili ornatum; Ædes verò Episcopales, quæ Cathedrali Ecclesiæ adherent, nulla indigent restauratione.

In præfatâ Civitate Tornacensi præter Cathedralem, septem recensentur Ecclesiæ Parochiales, quinque Virorum, & sex Mulierum Monasteria, plures Confraternitates, aliquot Hospitalia, & Seminarium; prætereà adest alius locus publicus Monti Pietatis ferè consimilis.

Fructus taxantur in libris Cameræ ad Florenos quinque mille; ascendunt autem ad triginta quinque millia librarum Turo-nensium, nullâ pensione gravati.

Hujusmodi Ecclesiæ provisio (cessante jam Indulto ad illam nominandi Personam idoneam, quod dudum à fel. rec. Clemente Papa IX. Prædecessore nostro, sub certis modo, & forma tunc expressis, Charissimo in Christo Filio Nostro Ludovico, ejusque Successoribus Francorum Regibus Christianissimis, qui pro tempore dictam Civitatem Tornacensem possedissent, concessum fuerat) ad Nos, & Sedem Apostolicam liberè omnino nunc spectat; Idcirco, ut ex injuncto Nobis Pastoralis muneris debito, non minùs Catholicæ Religionis rationibus, quàm aliis spiritualibus illius Ecclesiæ indigentis, quæ ob diuturnam novissimi Episcopi absentiam, aliasque nimium notas causas gravissima sustinuit detrimenta, quantocius possumus, opportunè consulamus; jure nostro utentes, eidem Ecclesiæ præficere intendimus Dilectum Filium Joannem Ernestum ex Comitibus à Lovvenstein de legitimo Conjugio ex Catholicis, Nobilibusque Parentibus in Diœcesi Herbipolensi procreatum, quadragessimum quintum ætatis annum agentem, & in Sacro Subdiac-natus Ordine constitutum, Metropolitanæ Ecclesiæ Colonien-

Canonicum, nec non Decanum, & Canonicum Cathedralis Ecclesiæ Argentinæ, ac Præpositum, & Canonicum Ecclesiæ Collegiæ Sancti Petri junioris pariter Argentinæ, quarum singulis laudabiliter per plures annos inservivit, & in unaquaque earum plura pietatis, doctrinæ, ac prudentiæ exhibuit argumenta.

Quid Vobis videtur?

Auctoritate Omnipotentis Dei, Sanctorum Apostolorum Petri, & Pauli, ac nostrâ providemus præfatæ Ecclesiæ Tornacensi de Persona prænominati Joannis Ernesti, præficientes eum in Episcopum, & Pastorem, cum dispensatione super eo quod non fuerit ante sex menses, imò nec adhuc de præfenti sit Presbyter, sed dumtaxat in Sacro Subdiaconatus Ordine constitutus, neque ullo Doctoratus, Magisterii, aliove gradu decoratus reperitur, ac cum retentione ad decennium Canonicatus, & Præbendæ Ecclesiæ Colonienfis, quos obtinet, & ad sui vitam Canonicatus, & Decanatus Ecclesiæ Argentinensis, unâ cum Monasteriis S. Vincentii, & alterius S. Joannis à Pratis, S. Benedicti, & S. Augustini Canonicorum Regularium, Laudunensis, & Audomarenfis respectivè Ordinum, & Diocesium; ac insuper cum Decreto, quod à die captæ possessionis Ecclesiæ Tornacensis, Canonicatum, & Præposituram Collegiæ S. Petri junioris Civitatis Argentinensis intrâ sex menses dimittere debeat; quoddque regimini, & administrationi prædictæ Ecclesiæ Tornacensis nullatenus se immisceat, nisi priùs Sacris Diaconatus, & Presbyteratus Ordinibus fuerit insignitus; quoddque antequam munus Consecrationis suscipiat, Fidei professionem emittere, & ad Urbem intrâ præfixum tempus transmittere omninò teneatur.

In nomine Patris †, & Filii †, & Spiritus † Sancti. Amen.



IN CONSISTORIO SECRETO

Habito die 18. Septembris 1713.

A R G U M E N T U M.

Confirmat electionem de personâ Raymundi Ferdinandi ex Comitibus de Rabatta in Episcopum Ecclesiæ Passaviensis ab illius Capitulo, & Canonicis, tametsi eadem Ecclesia per obitum bo. me. Cardinalis de Lamberg vacaret, adeoque Sedis Apostolicæ dispositioni specialiter reservata existeret, ritè factam, attento peculiari Indulto à S. M. Innocentio XII. ante promotionem defuncti Cardinalis, tunc Episcopi, ad Sacram Purpuram, præfatis Capitulo, & Canonicis benignè concesso: præviâ cassatione Capitulationum ab ipsis initarum, & cum suppletionem quorumcumque defectuum.

VENERABILES FRATRES.

LII.



Acat Ecclesia Passaviensis per obitum bo. me: Joannis Philippi, dum vixit, Sanctæ Romanæ Ecclesiæ Cardinalis de Lamberg ultimi illius Præfulis.

Civitas Passaviensis sita est in Bavaria inferiori inter Danubium, & Oenum fluvios, ac bis mille circiter habitatores continet, qui pro tempore existenti ipsius Civitatis Episcopo etiam in temporalibus subiacent.

Exstat

Extat in ea Cathedralis Ecclesia in honorem Sancti Stephani Protomartyris dicata, modernæ structuræ, nullâ indigens reparatione; cui duæ inserviunt Dignitates, quarum prima Præpositura, viginti quatuor Canonici, Præbendis tamen Theologali, & Pœnitentiariâ carentes, nonnulli Cappellani, aliique Presbyteri, & Clerici divinis addicti.

Ejusdem Ecclesiæ Sacrarium Sacra Suppellectili sufficienter instructum reperitur. Episcopales Ædes Cathedrali sunt proximæ, nullâque egent reparatione.

Præter Cathedralem prædictam alia tantum in Civitate existit Parochialis Ecclesia; Adsunt tamen tria Virorum, ac unum Mulierum Monasteria, duo Hospitalia, & Seminarium; sed desideratur Mons Pietatis.

Fructus taxantur in libris Camerae ad Florenos quinque mille, ascendunt verò ad centum millia, et ultra Florenorum monetæ illarum partium, pluribus oneribus gravati.

Eidem Ecclesiæ præficere intendimus Dilectum Filium Raymundum Ferdinandum ex Comitibus de Rabatta, ex legitimis nuptiis, Catholicisque, ac Nobilibus Parentibus in Dioecesi Aquilejensi progenitum, quadragenario majorem, à pluribus annis Presbyterum, nec non præfatæ Ecclesiæ Passaviensis Canonicum, qui à Dilectis Filiis Capitulo, et Canonicis ejusdem Passaviensis Ecclesiæ, vigore specialis Indulti eis ab hac Sancta Sede concessi, in Episcopum electus fuit; Illis siquidem fel. record. Innocentius Papa XII. Prædecessor noster per suas litteras in forma Brevis, pridie quàm novissimè defunctum Joannem Philippum Cardinalem de Lamberg; tunc Episcopum Passaviensem, ad Sacram Purpuram promoveret, hoc est, die vigesima Maji anni millesimi septingentesimi expeditas, de specialis dono gratiæ indulgit, ut si contingeret eundem Joannem Philippum Episcopum etiam apud Sedem Apostolicam obire, licet ipsa Ecclesia Passaviensis per obitum hujusmodi ex quovis capi-

te, etiam speciali nota, & expressione digno, ejusdem Sedis dispositioni generaliter, vel specialiter reservata, aut quovis modo affecta tunc reperiretur, nihilominus electio personæ idoneæ in locum memorati Joannis Philippi Episcopi prædictæ Ecclesiæ Passaviensis in Episcopum à Romano Pontifice pro tempore existente ad electionem hujusmodi præficiendæ ad ipsos Capitulum, & Canonicos, ad quos cæteroqui eadem electio juxta Concordata dudum inter Sedem Apostolicam præfatam, & inclytam Nationem Germanicam inita, vel Privilegia Apostolica, aut aliàs legitimè spectare dignoscebatur, similiter omninò spectaret, & pertineret in omnibus, & per omnia, perindè ac si ipsa Ecclesiæ Passaviensis dictæ Sedis dispositioni nullatenus reservata, vel affecta existeret, & aliàs, prout in præfatis ejusdem Innocentii Prædecessoris literis uberius continetur.

Quid Vobis videtur?

Auctoritate Omnipotentis Dei, Sanctorum Apostolorum Petri, & Pauli, ac nostrâ confirmamus, & approbamus Electionem, sicut præmittitur, factam à præfatis Capitulo, & Canonicis Ecclesiæ Passaviensis, eidemque Ecclesiæ providemus de persona prænominati Raymundi Ferdinandi, præficientes eum dictæ Ecclesiæ in Episcopum, & Pastorem; præviâ tamen cassatione, rejectione, & abolitione Capitulationum, seu Pactionum ab eisdem Capitulo, & Canonicis ante ipsam Electionem cum reservatione Apostolicæ confirmationis initarum, & per eorum, quemlibet juramento vallatarum; quas propterea juxta formam novissimæ Constitutionis memorati Innocentii XII. Prædecessoris nostri die vigesima secunda Septembris anno millesimo sexcentesimo nonagesimo quinto hac in re editæ, quæ incipit: *Ecclesiæ Catholicæ*: ne ex quovis temporis lapsu, aut ex quacunque alia causa tacitè, vel expressè per Nos, & Sedem Apostolicam approbatæ, seu confirmatæ censeri, vel præsumi umquam possint; disertè, & expressè nullas, irritas, & invalidas, viribusque,

que, & effectu penitus, & omnino vacuas, ac nullius roboris & momenti esse, & perpetuo fore, neminemque ad illarum, seu cujuslibet earum observantiam teneri, aut obligatum existere vel fore, perinde ac si illæ nunquam factæ, initæ, aut jurata fuissent, declaramus; Ac tam ipsi Raymundo Ferdinando Electo, quàm omnibus aliis quodcumque juramentum de observandis Capitulationibus, seu Pactionibus hujusmodi ab eis, ut præfertur, præstitum, quatenus opus sit, relaxamus. Cum suppletionem omnium, & quorumcumque defectuum etiam substantialium, siqui quomodolibet in eadem Electione intervenireint, juxta Decretum Congregationis rerum Consistorialium nec non cum dispensatione super defectu gradus in Electo, ac Decreto, quòd ipse Præbendas Theologalem, & Pœnitentiam instituat, Montemque Pietatis erigi curet, ejus conscientiam super his onerantes.

In nomine Patris †, & Filii †, & Spiritus † Sancti. Amen.





IN CONSISTORIO SECRETO

Habito die 27. Novembris 1713.

ARGUMENTUM.

Declarat, ac deputat suum, Sedisque Apostolicæ de Latere Legatum Romandiolæ D. Cardinalem Gozzadinum.

VENERABILES FRATRES.

LIII.



Acante jamdudum Legatione Romandiolæ, per translationem, quam indè fecimus fere à quatuor annis Dilecti Filii Nostri Thomæ Sanctæ Romanæ Ecclesiæ Cardinalis Ruffi ad Legationem Ferrariæ, præficere modò intendimus eidem Legationi Romandiolæ Dilectum pariter Filium Nostrum Ulysses Josephum ejusdem S. R. E. Cardinalem Gozzadinum, de cujus fide, doctrina, prudentia, atque integritate plurimùm in Domino confidimus.

Quid Vobis videtur?

Auctoritate Omnipotentis Dei, Sanctorum Apostolorum Petri, & Pauli, ac nostrâ declaramus, & deputamus nostrum, & Sedis Apostolicæ de Latere Legatum Romandiolæ præfatum Cardinalem Gozzadinum ad triennium cum facultatibus solitis, & clausulis opportunis.

In nomine Patris ꝑ, & Filii ꝑ, & Spiritus ꝑ Sancti. Amen.



Die 16. Februarii 1714.

ARGUMENTUM.

Excepit benignè coram sex DD. Cardinalibus, videlicet de Abdua, Sacripante, Paulutio, Imperiali, Columna, & Albano, Marchionem de Priè Caroli Sexti Romanorum Regis in Imperatorem electi Oratorem, specialiter à Majestate Sua delegatum ad illa omnia ejus nomine Sanctitati Suæ præstanda, & ad ea respectivè postulanda, quæ illius Majores in Romanorum Reges, & Imperatores recens electi Romanis Pontificibus præstare, & ab iis respectivè postulare consueverunt.

Admissus ad audientiam Sanctitatis Suæ idem Marchio de Priè Orator coram supradictis sex DD. Cardinalibus, & quidem sedentibus, primò osculatus fuit Pedes Sanctitatis Suæ, ac genuflexus eidem exhibuit literas electi Imperatoris, quæ à Sanctitate Sua traditæ fuerunt D. Cardinali Paulutio suo Secretario Status, ut illas legeret, prout fecit alta voce omnibus sedentibus. Porro ipsarum literarum tenor est, qui sequitur, videlicet.

Foris. BEATISSIMO IN CHRISTO PATRI DOMINO CLEMENTI UNDECIMO
DIVINA PROVIDENTIA SANCTÆ ROMANÆ, AC UNIVERSALIS
ECCLESIAE SUMMO PONTIFICI DOMINO REVERENDISSIMO.

Intus verò :

BEATISSIME IN CHRISTO PATER DOMINE REVERENDISSIME.



Ost officiosissimam commendationem filialis observantiæ continuum incrementum. Injungimus nostro apud Sanctitatem Vestram Oratori Illustri, & Magnifico, Sacrique Imperii fideli dilecto Herculi Josepho Ludovico Turinetti Marchioni de Priè, ut Sanctitati Vestræ tum obitum Augustissimi Romanorum Imperatoris Josephi Fratris nostri charissimi, tum suscepta à Nobis fuisse Imperii gubernacula, ea, qua par est, animi devotione significet, & Sanctæ Sedi Apostolicæ more Majorum nostrorum omnem illam observantiam, & filialis amoris affectum testetur, qui observantissimum Sanctæ Ecclesiæ Filium, Imperatorem verè Christianum, atque Catholicum decet, eâ firmâ, ac filiali spe freti, quam Nobis sincera, piæque mentis tribuit fiducia, fore ut id officii Sanctitati Vestræ tam gratum, acceptumque accidat, quàm nos integrè, devotèque intendimus ea omnia facere, & præstare, quæ ad majorem Divini Numinis gloriam, Sanctæque Romanæ Ecclesiæ incrementum, nec non Sanctitatis Vestræ solatium facere, & spectare possunt. De quibus omnibus cùm dictus Orator noster explicabit pluribus mentem nostram, reverenter postulamus ab eadem Sanctitate Vestra, ut plenam ipsi fidem adhibeat, simulque, uti confidimus, solitos Pontificiæ benevolentia fructus Nobis impertiatur. Eidem de cætero vitam à Deo beatam, ac diuturnam ad majus Ecclesiæ Sanctæ decus ex animo precamur. Datum in Urbe nostra

Vien-

Viennæ die decimaquinta Mensis Octobris Anno Domini millesimo septingentesimo duodecimo, Regnorum Nostrorum, Romani primò, Hispanicorum decimò, Hungarici, & Bohemici verò secundo.

SANCTITATIS VESTRÆ.

Obsequens Filius
Carolus.

Completa literarum lectione prædictus Orator stans locutus fuit, ut sequitur.

BEATISSIME PATER.

E T si Sacra Cæsarea Majestas Dominus meus Clementissimus Sanctitatem Vestram tam de obitu Augustissimi Romanorum Imperatoris Josephi Fratris sui omni ævo plurimum colendi, quàm de suâ Imperialis Solii consecensione literis suis jam pridem edocuerit, nihilominus ut isthoc officium eò solemnius perficeretur, Sanctitati Vestræ utrumque denuò hisce significari, eandemque per me de constanti filialis suæ erga Sanctitatem Vestram, Sedemque Apostolicam observantiæ studio certiolem fieri voluit. Quod uti Majorum suorum exemplo quacumque opportunitate testatum reddere, omniaque ea, quæ obedientissimum Sanctæ Romanæ Ecclesiæ Filium, strenuumque ejusdem Advocatum, ac defensorem decent, re ipsâ præstare promittit; ita vicissim Sanctitatem Vestram enixè, reverenterque rogat, ut quidquid ejusdem Prædecessores in rei Imperialis, & Austriacæ commodum, & incrementum quovis modo contulerunt, ac deinceps conferendum esset, id quoque Sanctitas Vestra Sacræ Suæ Cæsareæ Majestati, Augustæque Dömui Austriacæ liberaliter impertiri velit; quod dum altè memorata Sacra Cæsarea Majestas de Paterno Sanctitatis Vestræ affectu omninò sibi pollicetur, ab eadem Benedictionem Apostolicam instantissimè deprecatur.

Huic

Huic Orationi Sanctitas Sua respondit illicò in hæc verba, quæ audita fuerunt à dicto Marchione de Priè Oratore, similiter stante, DD. Cardinalibus, ut supra, sedentibus.

LIV.

Singularem, ac planè exultantem lætitiâ, quam ex faustissima Charissimi in Christo Filii Nostri Caroli in Romanorum Regem, & futurum Imperatorem electione jampridem suscepimus, plurimum hodie auctam, ac verè completam experimur, ob præclaras ejusdem Caroli Regis in Nos, & hanc Sanctam Sedem constantis suæ, ac filialis observantiæ significationes, quas abundè Nobis tam suis ad Nos datis literis reddi voluit, quàm uberius à Te, Nobilis Orator, explicari mandavit: ut certi scilicet magis, magisque esse possemus Majestatem suam ab inclytis, & Augustis Majoribus suis minimè degenerem, ad omnia, quæ obedientissimum hujus Sanctæ Romanæ Ecclesiæ Filium decent, quavis sibi datâ occasione, accuratè, ac studiosè præstanda semper fore paratissimam. Quàm læta hæc Nobis, & grata acciderint, planè Tibi persuasum, atque exploratum esse non ambigimus; Scire tamen Te volumus eo etiam nomine acceptiora fuisse, quòd Nobis à Te declarata fuerint, cujus singulares dotes, ac eximia decora Almæ huic Urbi nostræ apprimè perspecta, sicut omnium ad se animos jamdudum allexerant, ita Pontificiam nostram benevolentiam in primis meruerant. Piissimi itaque Cæsaris ad Catholicæ Religionis patrocinium, ad Ecclesiæ incrementum, ad Apostolicæ Sedis tutelam tam magnificè exhibita officia grato animo excipimus: omnia illi vicissim, quæ Romani Pontifices Prædecessores nostri erga electos Romanorum Reges, seu Imperatores juxta veterem ejusdem Sedis morem peragere consueverunt, cumulatè, ac plenissimè reddituri; Nullum siquidem ab Eo ex consuetis Pontificiæ largitatis argumentis, quæ illius Majoribus delata fuerunt, desiderari patiemur; Deumque Optimum Maximum intereà rogabimus, ut cœlesti sua ope
diri-

dirigat semper optimi Principis gressus in viam salutis, & pacis, illiusque animum ad ea perficienda, quæ læta Ecclesiæ, læta Reipublicæ, læta itidem Apostolicæ Sedi esse possint, assiduè magis inflammet.

Absoluto Sanctitatis Sux responso omnes sederunt, & pauld post dimisso Oratore DD. Cardinales cum Sanctitate Sua diutius remanserunt, ut ita omnia juxta consuetos mores exactè peragerentur.

De præmissis omnibus duo Protonotarii Apostolici, videlicet R. P. D. Bancherius, ac R. P. D. Collicola rogati fuerunt: R. P. D. Alexandro Bonaventura Archiepiscopo Nazianzeno, ac R. P. D. Prospero Marefusco Episcopo Cyrenen. testibus.





IN CONSISTORIO SECRETO


Habito die 16. Aprilis 1714.

ARGUMENTUM.

Declarat Bononiæ de Latere Legatum D. Cardinalem Cusanum.

VENERABILES FRATRES.

Lv.



A large, ornate initial 'I' is positioned at the top left of the page, partially overlapping the engraving. The engraving depicts a scene with several figures, including one who appears to be rising from a tomb or a similar structure, with other figures in the background. The style is characteristic of 17th-century religious art.

Quid Vobis videtur?

Auctoritate Omnipotentis Dei, Sanctorum Apostolorum Petri, & Pauli, ac nostrâ declaramus, & deputamus nostrum, & Sedis Apostolicæ de Latere Legatum Bononiæ præfatum Cardinalem Cusanum ad triennium cum facultatibus solitis, & clausulis opportunis.

In nomine Patris †, & Filii †, & Spiritus † Sancti. Amen.

IN



IN CONSISTORIO SECRETO

Habito die 7. Maji 1714.

ARGUMENTUM.

Antonii Ulrici Ducis Brunsvicensis, & Luneburgensis obitum cum honorifica illius virtutum commemoratione DD. Cardinalibus nunciat, ejusque animæ refrigerium publicis Exequiis in Ecclesia Collegii de Propaganda Fide coram illis Cardinalibus, qui ejusdem Propagandæ Fidei negotiis præpositi sunt, celebrandis comparari mandat.

VENERABILES FRATRES.



Uatuor ferè lapsi sunt anni, ex quo maximâ cum animi nostri lætitiâ Vobis ex hoc loco significavimus Antonium Ulricum Ducem Brunsvvicensem, & Luneburgensem, inclytæ suæ stirpis Principem, & Caput, nullo præcipitis consilii incitamento commotum: nullâ ingenii inconstantia impulsûm: nullâ temporalis sui commodi illecebrâ allectum: post diuturnam complurium annorum deliberationem, post prævisum ingruentium sibi discriminum, ac molestiarum gravissimum cumulum, solâ agnitæ veritatis ratione excitatum, solâ supernæ gratiæ illustratione

perfusum, solo demum animæ suæ salutis desiderio incensum, Lutherana hæreseos, in qua natus, educatusque fuerat, erroribus palam ejuratis, Catholicam Fidem amplexum fuisse. Acerbum hodie, ac verè luctuosum ejusdem Principis obitum, quem Nos novissimè non sinè magno Paterni cordis nostri mœrore audire potuimus, Vobis similiter denunciamus; non dubitantes, quin animos æquè vestros pari tristitia afficiat gravis hæc Orthodoxæ Religionis jactura, quam in amisso Principe Sanctæ huic Sedi mirum in modum addicto summoperè dolemus. Plurimum sanè lenire possunt dolorem nostrum non minùs eximiæ defuncti Principis virtutes, quàm mors ab eo piissimè, & constanti atque hilari animo obita; postquam scilicet ille zelo Domus Dei mirificè incensus, primum quidem magnificam Ecclesiam in Brunsvicensi Civitate ad usum Catholicorum extrui, atque exornari curaverat: deindè verò paucis ante obitum diebus Natorum, Statuumque suorum obtento consensu, liberum, publicum, atque perpetuum Orthodoxæ Religionis exercitium suis in ditionibus stabiliverat; quo sanè magno confecto, absolutoque opere non aliud potiùs exoptare mira animi sui exultatione professus fuit optimus senex, quàm ut numerus dierum suorum finiretur brevi, quemadmodum, annuente Domino ejus votis, re ipsa contigit. Hæc profectò sunt, quæ non minùs lacrymas nostras abstergere, quàm Nos magnam in spem adducere possunt, ut quemadmodum Antonii Ulrici memoria in benedictione est, ac diù erit in terris, ita ipse debito nunc virtutibus suis præmio potiatur in Cœlis. Sed adhuc pro anima Principis de Catholica Ecclesia, & de Apostolica Sede multis nominibus meriti nostras ad Deum preces, atque suffragia deesse Christianæ charitatis ratio non patitur. Quod sanè, & privatim hætenus Nos ipsi agere non prætermisimus, & Vos similiter exequi vehementer optamus; quin imò id ipsum publicis quoque Exequiis in Ecclesia Collegii

de Propaganda Fide coram iis ex Vobis, qui ejusdem Propagandæ Fidei negotiis præpositi sunt, quamprimum celebrandis præstari mandavimus. Faxit Deus, ut quod memoratus Princeps anxiiis adeò votis, dum viveret, exoptaverat, è superna statione opus perficiat, ut nimirum non modò reliqui omnes clarissimæ suæ Domus Principes, sed universi etiam populi illius ditioni subiecti monstratam ab eo viam feliciter incant, novaque, ac splendida Romanæ Ecclesiæ adjiciant ornamenta.





Pope Benedict XIV. May 28. 1714.

IN CONSISTORIO SECRETO

Habito die 28. Maji 1714.

ARGUMENTUM.

Ferrariæ de Latere Legatum declarat D. Cardinalem Piazza.

VENERABILES FRATRES.

LVI.



Errariensẽm Legationem, quam Dilectus Filius Noster Thomas S. R. E. Cardinalis Ruffus longè ultra triennium, ad quod ei illa à Nobis demandata fuerat, sedulò, ac fideliter administravit, committere nunc intendimus Dilecto pariter Filio Nostro ejusdem S. R. E. Cardinali Piazza; de cujus fide, prudentiâ, probatâque diù in tot, tantisque, & sanè gravissimis laudabiliter ab eo gestis muneribus, integritate plurimum in Domino confidimus.

Quid Vobis videtur?

Auctoritate Omnipotentis Dei, Sanctorum Apostolorum Petri, & Pauli, ac nostra declaramus, & deputamus nostrum, & hujus Sanctæ Sedis de Latere Legatum Ferrariæ præfatum Cardinalem Piazza ad triennium cum facultatibus solitis, & clausulis opportunis.

In nomine Patris †, & Filii †, & Spiritus † Sancti. Amen.

IN



IN CONSISTORIO SECRETO

Habito die 20. Augusti 1714.

ARGUMENTUM.

Suum, & Apostolicæ Sedis de Latere Legatum deputat D. Cardinalem Gozzadinum ad Principissam Parmensem Philippi V. Hispaniarum Regis Catholici Sponsam, brevi ex Italiâ discessuram.

VENERABILES FRATRES.



Mplectimur libenter novam Nobis oblatam opportunitatem palàm, & in omnium oculis declarandi paternam illam, & adhuc constantem charitatem, qua Charissimum in Christo Filium Nostrum Philippum Hispaniarum Regem Catholicum in Domino prosequimur. Plurimis idcirco Romanorum Pontificum Prædecessorum nostrorum exemplis, quæ etiam Nos ipsi, sicuti nostis, non semel secuti fuimus, adducti ad Regiam illius Sponsam Principissam Parmensem propediem, ut accepimus, ex Italiâ discessuram nostrum, & Apostolicæ Sedis de Latere Legatum deputare intendimus Dilectum Filium Nostrum Ulyssæm Josephum S. R. E. Cardinalem Gozzadinum, qui novæ Reginæ in

di-

Lviii.

ditione huic Sanctæ Sedi etiam quoad temporalia subiecta, in qua nata, & educata fuit, adhuc commoranti Apostolicam nostram Benedictionem deferat, Regale Connubium, gratuletur, nec non faustum, ac prosperum in Hispaniam iter, aliaque omnia, cœlesti accedente Benedictione, felicia ex intimo nostri cordis affectu apprecetur ad laudem, & gloriam Omnipotentis Dei, Christianæque Reipublicæ tranquillitatem, & pacem.

Quid Vobis videtur?

Auctoritate Omnipotentis Dei, Sanctorum Apostolorum Petri, & Pauli, ac nostrâ supradictum Ulyssæm Josephum Cardinalem Gozzadinum Nostrum, & Sedis Apostolicæ de Latere Legatum deputamus, & declaramus ad præmissa peragenda cum facultatibus, & clausulis opportunis.

In nomine Patris ꝑ, & Filii ꝑ, & Spiritus ꝑ Sancti. Amen.





IN CONSISTORIO SECRETO

Habito die 7. Decembris 1714.

A R G U M E N T U M.

Gravibus malorum procellis, quibus ab ipso suscepti Pontificatus initio agitatus semper fuerat, novisque in dies acerbioribus vulneribus, quæ Ecclesiasticæ libertati, Pontificiæ authoritati, imò etiam Orthodoxæ Religioni inferiebantur, commemoratis, consilium aperit suum impavido, strenuoque animo exequendi ea, quæ Pastoralis officii ratio postulabat, cumque in scopum DD. Cardinales vehementer hortatur, ut occasione Indulgentiæ à Sanctitate Suâ in forma Jubilci nuperrimè concessæ per accuratas eorum preces divinam illi opem tam necessario tempore conciliare studeant.

VENERABILES FRATRES.



Uatuordecim jam lapsi sunt anni, ex quo, nullo licet meritorum nostrorum suffragio, placuit divinæ bonitati, cui proprium est infirma mundi eligere, humilitatem nostram ad Supremi Apostolatus fastigium evocare. Quantis interea, & quàm gravibus malorum procellis agitati semper fuerimus, optimè nostis, quippe qui in partem sollicitudinis nostræ vocati, magnam etiam calamitatum nostrarum partem sustinuisistis. Lætiora in posterum spe-

Z

ra-

Ltx.

rare nos juberent vota illa, quæ Nobis anniversario assumptionis nostræ die nuperrimè detulistis, & craftina die decimum quintum Pontificatus Nostri annum, benedicente Domino, incuntibus pro consueto humanitatis vestræ more iterum deferetis. Dolemus tamen ex animo nedum verè nullam effulgere adhuc spem temporis serenioris: Sed quod maximè deplorandum est, nova semper in dies, & semper acerbiora à filiis perditionis Ecclesiasticæ libertati, Pontificæ authoritati, imò etiam ipsimet Orthodoxæ Religioni vulnera infligi; adeout si res eò, quo ire cœperunt, gradu procederent, & possent divina promissâ deficere, brevi profectò fieret, ut manante ab iis, in quibus hæc accidunt, ad alias Catholici Orbis Provincias exempli consensione, nullam propemodùm ubique gentium Ecclesiæ reverentiam, nullum Nobis, & huic Sanctæ Sedi pristinæ dignitatis vestigium, nullam denique fidelibus in doctrinâ fidei certitudinem relinqui contingeret. Verùm, Cælo etiam, & Terra transeuntibus, divinæ promissionis verba non transibunt. Respiciet Dominus de Cælo, visitabit, perficiet, & custodiet vineam, quam plantavit: erit ipse nobiscum usque ad consummationem sæculi: Aderit Nobis, aderit Ecclesiæ, aderit causæ suæ, si Nos officio nostro non defuerimus. Decretum proindè Nobis, fixumque est ad tot, tantasque Ecclesiæ, Apostolicæ Sedi, ac ipsi Religioni illatas injurias vindicandas ea omnia, adspirante Superni Factoris auxilio, quamprimum exequi, quæ injuncti Nobis divinitus Apostolici muneris ratio postulat, quæque enixis tam nostris, quàm aliorum precibus imploratum cœlestis gratiæ lumen ostenderit. Idcirco memoria recolentes tunc maximè Apostolorum Principi, cujus locum immeriti tenemus, cœleste præsidium adfuisse, cùm oratio fiebat ab Ecclesia sinè intermissione ad Deum pro eo, ad communes hujus almæ Urbis Christifidelium preces confugere decrevimus; atque ut hoc ipsum promptiùs peragatur, Eccle-

siæ thesauros, quorum dispensationem Nobis credidit Altissimus, Apostolica liberalitate protulimus: iisdem scilicet fidelibus certa pietatis opera adimplentibus nonnullas de injunctis eis, aut aliàs quomodolibet debitis pœnitentiis relaxantes: ac insuper plenariam omnium peccatorum suorum Indulgentiam in forma Jubilei illis concedentes, qui intrâ spatium duarum sequentium hebdomadarum jejunaverint quartâ, & sextâ feriâ, ac Sabbato alterius ex hebdomadis hujusmodi, nec non Basilicas Sancti Joannis in Laterano, Principis Apostolorum, & Sanctæ Mariæ Majoris, vel earum aliquam visitaverint, & ibidem oraverint, ac peccata sua confessi Sacram Communionem sumperint, pauperibusque eleemosynam, prout sua cuilibet pietas suaserit, erogaverint. Agite igitur, VENERABILES FRATRES, quorum præstanti operâ, ac consiliis, & juvari debemus, & utimur libentissimè: opportuno hoc, atque acceptabili tempore Dominici Adventus Deum Optimum Maximum, qui est multæ misericordiæ omnibus invocantibus eum, jugiter obsecrate, ne viribus deficiamus, sed veniat in Nos Spiritus Sapientiæ, & Intellectus, Spiritus Consilii, & fortitudinis, Spiritus Scientiæ, & Pietatis, quo timidæ cogitationes, & incertæ providentiæ nostræ roborentur, ut strenuè Vobiscum stantes in prælio, atque opposcentes murum pro domo Israel, fortiter illius causam tueri possimus, à quo Nos per Beatum Petrum, ejusque successores potestatem accepimus in terris maximam, quæ in indigno hærede non deficit.





IN CONSISTORIO SECRETO

Habito die 21. Januarii 1715.

ARGUMENTUM.

Nupræ Pacificationis inter Imperatorem, & Imperii Principes ex una, ac Regem Christianissimum ex altera partibus in Opido Badensi stabilitæ Capitibus, Orthodoxæ Fidei, Ecclesiæ, Sanctæque Sedi tum favorabilibus, tum etiam præjudicialibus explicatis: recitari mandat Protestationem ibidem à R. P. D. Passioneo jussu Sanctitatis Sux factam; deinde differit de ingenti bellico apparatu, quem Turcarum Tyrannus adornabat, & DD. Cardinales hortatur, ut Deum obsecrent, quatenus fructuosas esse velit Pontificias monitiones, & preces, quibus Christianos Principes ad fortiter occurrendum periculo rei Christianæ à Barbaris impendenti vehementer pro Pastoralis officii debito incitaverat.

VENERABILES FRATRES.

Lx.



Bi primum superioribus mensibus inaudivimus in Conventu Badensi Pacem tandem inter Charissimum in Christo Filium Nostrum Carolum Romanorum Regem in Imperatorem Electum, ac Germanici Imperii Principes ex una, nec non Charissimum item in Christo Filium Nostrum Ludovicum Francorum Regem Christianissimum ex altera partibus fuisse firmatam, ereximus illicò, priusquam scilicet ejusdem Pacis articuli ad Nos affer-

afferrentur, oculos, manusque in Cœlum supplices, tum uberes Divinæ bonitati gratias agentes, quòd votis nostris ab initio belli, hoc est, ab ipso Pontificatus nostri primordio susceptis, magna jam ex parte annuerit: tum misericordiarum Patrem enixè, ac humiliter obsecrantes, ut opus inchoatum perficeret, & gaudium nostrum implere vellet, Pacemque ipsam tam initam, quàm ineundam cœlesti sua illi admodum manu stabilem, perpetuamque esse dignaretur. Fraternitates tamen Vestras hac de re alloqui hucusque distulimus, expedire rati, ut priùs nedum sancitæ Pacis capita, ambarumque Partium ratihabitionis documenta oculis intueremur, verùm etiam sedulò exploraremus, quis tandem exitus contigisset multiplicibus illis, indefessis, diuturnisque curis à Nobis adhibitis, ut ejusmodi Pax absque ullo Ecclesiæ, Sanctæ hujus Sedis, atque Orthodoxæ Religionis detrimento perficeretur; ac ubi peccatis nostris facientibus, res ex animi nostri sententiâ usquequaque non processissent, cognosceremus saltem, an; qua par erat, sedulitate, ac fide executioni demandata fuissent ea omnia, quæ ut Ecclesiæ, Apostolicæ Sedis, & Catholicæ Religionis indemnitati consultum esset, illarumque Jura undequaque salva, illæsa, ac inviolata conservarentur, de quamplurimum ex Fraternitatibus Vêstris consilio commisimus Dilecto Filio Dominico Passioneo in utraque Signatura nostra Referendario, ac Prælato Domesticò nostro, quem videlicet hunc in finem, uti nostrum, ac ejusdem Sedis verum, & legitimum Procuratorem, Actorem, & negotiorum gestorem, tametsi absque ulla extrinseci tituli, seu Ministerii specie, ad memoratum Badensem Conventum ante septem menses allegavimus; licet enim Apostolicæ servitutis oneri ferendo Nos omninò impares, & servum inutilem esse probè intelligamus, ac jugiter ingemiscamus; in hoc tamen Pacis negotio ita promovendo, ut absque ulla Orthodoxæ Fidei, Apostolicæ Sedis, Sanctæ Romanæ, aliarum-

que

que Ecclesiarum quarumcumque injuria Pax ipsa coalesceret, nulla in re videmur Nobis à conscientia redargui Pastoralis officio nostro defuisse. Nunc verò, cum ad Nos allata jam fuerint memoratæ Pacis capita, de quibus Badæ conventum fuit, ab utrifque partis Legatis, seu Plenipotentariis, ut vocant, die 7. Septembris anni proximè præteriti subsignata, unà cum ratihabitionibus tam Imperatoris Electi, quàm Regis Christianissimi, in eodem Badensi Oppido ab utriusque Legationis Secretariis die 28. mox elapsi mensis Octobris invicem permutatis; Cumque insuper ea omnia recognoverimus, quæ à prædicto Dominico Passioneo pari solertiâ, ac fide in executionem mandatorum nostrorum gesta fuerunt: ac tandem ab utraque Aula, nostrisque Nunciis utrobique residentibus certiores abundè facti fuerimus de reliquis omnibus, quæ scire Nobis necesse erat, ut sublatis, quæ fortè occurrere poterant, dubitationibus, totius rei statum undique perspectum, exploratumque haberemus: non ampliùs cunctandum Nobis esse arbitramur, quin Vobis rem totam ex hoc loco communicemus. Primum itaque negare non possumus magnum Nos suscepisse solatium ex iis, quæ in tertio potissimum, ac decimo sancitæ Pacis capitibus, quoad Risvvicensis Pacificationis articulos tam in sacris, quàm in prophanis inviolabiliter servandos ita firmantur, ut nullatenùs jam ambigendum sit per illa ad Catholicæ Religionis favorem satis perspicuè quartum ejusdem Risvvicensis Pacificationis articulum, pro quo scilicet diù, multumque laboravimus, fortiter obsistentes multiplicibus, ac validissimis A catholicorum conatibus, qui illum prorsus abolitum, ac revocatum cupiebant, non modò integrum, factum tectum, ac omninò inviolatum conservari: verùm etiam, sicubi idem articulus executioni minimè mandatus fuisset, vel aliquid post executionem contra illius formam immutari contigisset, omnia in eum statum, qui per tractatum Risvvicensem præscriptus fuit,

reponenda esse : quibus sanè verbis sanctionem, seu declarationem illam, quam Recessum Religionis pro inferiori Palatinatu, eique annexis ditionibus nuncuparunt, anno 1705. nomine Dilecti Filii Nobilis Viri Joannis Vvilhelmi Comitis Palatini Rheni S. R. I. Principis Electoris editam, ac subindè à Nobis abrogatam, & improbatam, similiter abrogari, & improbari non obscurè demonstratur. Probè quidem novimus non idcirco A catholicos acquievissè, nec inquieturos deinceps fore; neque enim ignoramus illos nunc maximè nihil intentatum relinquere, neque in posterum relicturos esse tam in Imperialibus Comitibus, quàm alibi, ut nefarii voti compotes efficiantur. Contra tamèn Nos pariter pravis eorum consiliis, & machinationibus omni ope adversari non prætermisimus, ac, infirmitatem nostram confortante Domino, cujus causa agitur, numquam prætermitemus; quinimò cùm eorum prævisa studia antevertere curaverimus, novissimè denuò interpositis apud Aulas Viennensem, ac Parisensem enixis, accuratissimisque officiis, ab utrâque responsum accepimus quoscunque A catholicorum hac in re conatus irritos, & inanes futuros esse, ac quemadmodum eorum postulata Badæ repulsa fuerunt, ita ubicumque illa instaurari contingat, repulsum iri, adeoque pro certo habendum esse, quòd solemnes adeò tractationes, ut sunt Badenses, initæ, atque confirmatæ ex parte Imperatoris Electi vigore facultatum non à Catholicis tantùm, sed etiam ab A catholicis Imperii Principibus sibi amplissimè attributarum, nullo umquam tempore immutari, multoque minus infringi possint. Plurimùm insuper lætati sumus legentes in XV. ejusdem Badensis Pacificationis articulo conventum esse, quemadmodum vehementer exoptabamus, de plenaria, ac integra duorum Fratrum S. R. I. Principum Electorum, nimirum Venerabilis Fratris Josephi Clementis Archiepiscopi Colonienfis, & Dilecti Filii Nobilis Viri Maximiliani Emma-

nuc-

nuelis utriusque Bavarix Ducis pristinum in statum restitutione, cujus sanè plenariæ, ac integræ restitutionis vigore dubitandum non est, quin aboleatur, revocetur, ac prorsus è medio tollatur quicquid occasione præteriti belli, non sinè gravi tam Ecclesiasticæ libertatis, quàm Pontificiæ Authoritatis offensâ, adversus utramque fieri contigit, adeout *omnia*, (ut ejusdem XV. Articuli verbis utamur) *æterna oblivione extincta remaneant*. Illud prætereà lætitiâ nostram auxit, quod in memorato XV. articulo inter cetera ad ejusdem Archiepiscopi Colonienfis favorem stabilita, quod ad Hildesiensem Ecclesiam attinet, cui ille dudum ab hac Sancta Sede præfectus fuit, in hæc verba conventum fuerit. *Capiet etiam speciatim possessionem Episcopatus Hildesienfis cum omnibus prærogativis, juribus, & bonis ad dictum Episcopatum, & Ecclesiam spectantibus, uti ea ante præteritum bellum Episcopi sui Prædecessores, & Ecclesia possederunt, aut possidere debuerunt, itaut nulla litis, aut prætensionis ratio à quocumque mota, seu movenda, integram ejus restitutionem impedire possit*. Quibus verbis non tantùm arcetur, ac prorsus adimitur timor olim conceptus, quòd Badensibus tractationibus inferi, & comprobari possent iniquæ ille pactiones, ad quas Dilecti Filii Capitulum, & Canonici Ecclesiæ Hildesienfis ante tres annos cum Acatolico Principe, nonnisi vi, ac metu cogentibus, devenerunt, quæque à Nobis, utpotè non minùs Catholicæ Fidei, Divino cultui, ac animarum saluti, quàm ipsius Hildesienfis Ecclesiæ, illiusque Episcopi, & Capituli, ac illorum Mensarum, Episcopalis, & Capitularis juribus sommoperè adversantes, solemniter damnatæ, cassatæ, ac reprobatæ fuerunt, sed quavis insuper illarum executio disertè, ac luculenter excluditur; cum earundem iniquarum pactionum observatio congruere nequaquam possit cum Articulo illo, in quo apertè firmatur Archiepiscopum Coloniensem frui, ac potiri debe-

re Hildesienſi Episcopatu: *cum omnibus prærogativis, juribus, & bonis ad dictum Episcopatum, & Eccleſiam ſpectantibus, uti ea ante præteritum bellum Episcopi ſui Prædeceſſores, & Eccleſia poſſederunt.* Ad hæc non leve Nobis ſolatium attulit, quod Articulo XXVII. expreſſè cautum vidimus, ut nimirum in territoriis, Civitatibus, & locis Belgii, quæ à Rege Chriſtianiffimo Imperatori Electo ceduntur, omnia, quæ Religionem Catholicam Apoſtolicam Romanam concernunt, in ſtatu, quo ante bellum fuerant, immutata cuſtodiantur: Magiſtratus etiam nonniſi Catholici eſſe poſſint, & ut antea fuere, permaneant: Episcopi in primis, & Capitula, Monasteria, bona Ordinis Melitenſis, & generaliter univerſus Clerus conſerventur in omnibus Eccleſiis, libertatibus, immunitatibus, juribus, prærogativis, & honoribus, quæ ſub præcedentibus Regibus Romano-Catholicis habuere, & ſi quavis ratione deſtituti fuerint, in ea reſtituantur. Quoniam demum, nondum forſan obliſo Domino peccata populi ſui, publica univerſalis tranquillitas, quam ardentiffimè cupiebamus, per memoratam Badenſem Pacem conciliari non potuit, gaviſi nihilominus ſumus quietem ſaltem, & neutralitatem Italiæ, quæ propius Nos tangit, in Articulo XXX. ejuſdem Pacis ita firmari, ac ſtabiliri, ut ſub quocumque titulo, vel obtentu perturbari de cetero numquam poſſit; confidentes interea fore ut, divina ope ſuffragante, novis tractationibus aditus quamprimum aperiſi poſſit, unde operis complementum tandem exoriatur. His adducti rationibus præmiſſa Badenſis Pacis capita cum voluptate perlegimus. Ex nonnullis tamen aliis ejuſdem Pacis capitibus non pauca, nec levia Nobis ſimul allata fuerunt argumenta doloris. Animadvertimus ſiquidem in primis Pacem Vveſtphalicam dudum ab Apoſtolica Sede in pluribus ſuis Articulis non ſemel damnatam, ac reprobatam, pro ejuſdem Pacificationis Badenſis normâ, baſi, ac fundamento inter ce-

tera constitutam fuisse; multa insuper ex nuperis Ultrajectensibus, ac Radstadiensibus tractationibus desumpta eidem Badensi Pacificationi adjecta fuisse, quæ eandem planè Apostolici Judicii censuram promerentur. Hæc inter præcipuum sibi vindicant locum Dignitatis Electoralis recognitio in Hannoverano Duce dudum à Nobis pluries, ut benè nostis, ac palàm improbata: Regius titulus Marchioni Brandeburgensi delatus contra nostram itidem satis notam, ac publicam interdictionem: cessio insuper eidem, aliisque etiam A catholicis Principibus facta variarum Ditionum Catholicarum cum evidenti periculo subversionis illarum animarum, ac omnimodi Orthodoxæ Religionis in illis partibus excidii: Præterea manifesta violatio libertatis, ac Immunitatis Ecclesiasticæ propter conditionem restitutioni bonorum Ecclesiasticorum tempore præteriti belli occupatorum adjectam, quæ hisce verbis in Articulo XXV. explicata legitur: *Ita tamen ut nihil ratione fructuum, seu proventuum perceptorum, & tempore præteriti belli usque ad diem publicationis tractatus Radstadiensis cessorum petere possint*. Grave etiam præjudicium, quod etiam in temporalibus Sedi Apostolicæ irrogari attentatum est circa directum, ac supremum Dominium, quod ei in Regnum utriusque Siciliæ ultra, & citra Pharum manifestè competit, non tantum mentione de illo citra Pharum, hoc est de Neapolitano Regno in Badensibus, & Radstadiensibus tractationibus habitâ absque ulla Pontificii assensus præservatione, sed multò etiam magis liberâ illâ, absolutaque ratione, qua de eodem Regno Siciliæ ultra Pharum in Ultrajectensibus tractationibus constitutum fuit, perindè ac si nullum in eo jus ad Nos, & Sanctam Sedem pertineret. Præcipua hæc sunt Capita, quæ gravem Nobis, ac molestam nuperam Pacificationem effecerunt. Negare tamen non possumus, quin animi nostri mœror haud parum lenitus fuerit ex declarationibus, atque protestationibus

bus à præfato Dominico Passioneo jussu nostro factis, & juxta praxim ab Apostolicis Administris in ejusmodi casibus, ac potissimum Vvestphalicæ, & Noviomagensis Pacificationum occasione servatam diligenter exaratis, quemadmodum Vos pariter ex illarum authentico exemplo ad Nos transmissio per Secretarium Brevium nostrorum Secretorum mox legendo, uberiùs percipietis.

Hic ingressus fuit Consistorium R. P. D. Oliverius Secretarius Brevium Secretorum, legitque Breve Sanctissimi die 26. Junii 1714. datum, in quo continentur facultates R. P. D. Dominico Passioneo in utraque Signatura Sanctitatis Sux Referendario, ejusque Præfato Domestico attributæ; ac subindè declarationem, seu protestationem ab eodem R. P. D. Passioneo, primò quidem Badæ in Ergovia factam die 10. Septembris 1714., deindè verò renovatam in Senatu Reipublicæ Lucernensis die 20. ejusdem Mensis; quibus perlectis Sanctitas Sua ita Orationem profecuta fuit.

AUDISTIS VENERABILES FRATRES, quomodò Ablegatus noster, cum in Badensi Conventu tractationes de Pace haberi invenisset, insueto prorsus more, hoc est nemine ibidem Mediatoris partes agente, qui contradicentium protestationes reciperet, secutus fuerit illorum exemplum, qui in novissimo Ultrajectensi Conventu non absimili illic subortâ difficultate adversùs ea, quæ inibi conventa fuerant, sive illorum aliqua protestari voluerunt; quinimò non modò ejusmodi exemplum secutus fuerit; sed verè plenius, uberiùs, atque solemnius demandatam sibi provinciam impleverit, suamque declarationem, ac protestationem non solum, prout illi fecerunt, coram Magistratu Loci emisit, verùm & eam Legatis, seu Plenipotentariis tam Cæsareis, quàm Gallicis, aliisque pluribus aliorum Principum Ministris notam fecerit, ac demùm in pleno, ac publico Reipublicæ Lucernensis Senatu apertè renovaverit.

Audistis itidem quomodò præfatus Ablegatus noster ejusmodi suam declarationem, & protestationem, juxta mentem nostram sibi notam, etiam ad ea omnia, quæ Catholicæ Religioni, Sanctæ huic Apostolicæ Sedi, Ecclesiis, & Ecclesiasticis Juribus quibuscumque præjudicialia in Radstadiensibus, ac multò magis in Ultrajectensibus tractationibus conventa fuerunt, prudenti non minùs, quàm necessario consilio extendere non prætermiserit. Qua sanè, tametsi generali protestatione ea potissimùm, quæ legibus omnibus violatis, adversùs Charissimum in Christo Filium Nostrum Jacobum Magnæ Britanniae Regem, cum maxima non solùm ipsius Regis, sed etiam Catholicæ Religionis injuriâ, in eisdem Ultrajectensibus tractationibus quovis modò acta fuerunt, omninò comprehensa esse, & comprehendi ab initio intelleximus, ac nunc ita intellexisse, & intelligere Vobis significamus; licèt mentem hanc nostram in Badensi publica protestatione clariùs, ac disertius explicari consultò prohibuerimus: ne graviora scilicet A catholicorum odia in optimum, ac piissimum Regem de Ecclesia, de hac Sancta Sede, ac de Orthodoxa Fide meritisimum concitarem: & sanè absque ulla necessitate; cùm ea, quæ in ipsius perniciem geri contigit, utpote per se manifestè nulla, & injusta, nequeant clarissima illius jura ullatenùs imminuere, nec ullâ ad id indigeant nostrâ, aliorumve quorumlibet protestatione. Audistis demùm quomodò idem Administrator noster arreptâ occasione differendi de infausta Pacificatione Araviensi non ita pridem apud Helvetios inita, eam non minùs nullam, & invalidam, quàm injustam, & iniquam meritò pronunciaverit, ut liquidò nimirùm appareat illam à Nobis, & ab hac Sancta Sede semper damnatam fuisse, ac reprobata. Quoniam verò parùm prodesset verbis dumtaxat, hoc est solo protestationum medio, iis contradicere, quæ in Ecclesiæ, Sedis Apostolicæ, & Religionis detrimentum gesta sunt,

sunt, ac geruntur, nisi simul etiam omni ope, ac studio enteremur, ut ea factis, rebusque ipsis corrigerentur, ac opportunè sarcirentur: persuasum Vobis esse volumus, VENERABILES FRATRES, Nos hunc in finem non omisisse, non omittere, nec omisiuros esse eas omnes obire partes, quas Ministerii nostri ratio à Nobis postulat; nec profectò spe destituimur fructum aliquem ex laboribus nostris quamprimùm percipiendi, tametsi ea de re palàm disserere non adhuc Nobis liceat. Enixis interea, accuratisque precibus Deum Optimum Maximum rogare non prætermittite, ut conatus nostros cœlesti sua ope juvare dignetur, ac in primis Divinam ejus Bonitatem in contritione cordis obsecrate, quatenus voci nostræ dare velit vocem virtutis, ac fructuosas potissimùm esse faciat monitiones, cohortationes, imò etiam preces illas, quibus vehementiori paterni nostri cordis affectu Christianos Principes incitavimus, ac jugiter incitamus, ut quando jam è diuturnè nimium, atrocique inter ipsos bello, non sinè præcipuo Divinæ Misericordiæ beneficio, exempti reperiuntur eo maximè tempore, quo nefarius Turcarum Tyrannus, ingenti apparatu terra, marique suscepto, in Christianas ditiones irrumpere molitur, confociatis studiis, viribusque obviam eant periculo, quod Christianæ Reipublicæ intentant Barbari: opponant fortiter murum pro Domo Israel: studeant ipsorum Barbarorum cruore detergere, ac prorsus delere maculas illas, quas Christianorum armis Christianus sanguis asperxit: translataque in Infidelium Terras eorundem Armorum procellâ, non alia in posterum, quàm bella Domini præliantur.



Cædēt Superbus et Corruet. Jerem. 50.

IN CONSISTORIO SECRETO

Habito die 20. Februarii 1715.

A R G U M E N T U M.

Causas exponit, quibus ad extinguendum, ac penitus abolendum prætensæ Apostolicæ in Regno Sicilia Legationis, & Monarchiæ nuncupatæ Tribunal adductus fuerat. Mox specialem Constitutionem hac ipsa die eâ de re promulgatam, nec non Breve modum præscribens, quo Causæ ad forum Ecclesiasticum pertinentes in dicto Regno deinceps judicari debeant, eadem pariter die editum recitari mandat.

VENERABILES FRATRES.

LXL.



Ovimus omnes, firmæque fide credimus, & profitemur Redemptorem, ac Dominum nostrum Jesum Christum illi uni Apostolorum Principi, cui ante Sacratissimam suam Passionem dixerat: *Tu es Petrus, & super hanc petram ædificabo Ecclesiam meam; & Tibi dabo claves Regni Cælorum; & quodcumque ligaveris super Terram, erit ligatum & in Cælis; & quodcumque solveris super Terram, erit solutum & in Cælis*: Post suam à mortuis resurrectionem pro supremi Apostolatus complemento,

novaque instituti jam in eo visibilis Ecclesiæ Capitis confirmatione, similiter dixisse: *Pasce Agnos meos: pasce oves meas.*

Hanc porrò singularem, atque præcipuam Sanctæ hujus Sedis prærogativam Beato Petro concessam, ac per illum, ejusque Successores ad Nos, tametsi prorsus immerentes, à Domino transmissam, si non verbis, re ipsâ certè in controversiam vocari, quin etiam apertè jam Nobis impugnari quoad Regnum Siciliæ ab illius Tribunalis Ministris, quod inibi Monarchiam appellant, nemo est, qui ignoret; quemadmodum nemo planè est, cui intolerandi excessus ab eodem Tribunali, novissimis præsertim hisce annis, admissi non innotuerint. Nemini etiam propterea mirum videbitur, quod Nos, postquam longâ nimium patientiâ, tot, tantasque Ecclesiasticæ libertati, ac Pontificiæ authoritati illatas injurias pertulimus: postquam itidem diuturniorem longanimitatem nostram nihil in posterum profuturam perspicuè cognovimus; quin potius ex eâ multiplicanda Christifidelium scandala, conscientiam nostram gravius onerandam, majoribusque in dies periculis animarum salutem objiendam fore perspeximus; Divinò primùm enixis tum publicis, tum privatis precibus, implorato præsidio: multorum insuper in Sacrà Theologia Magistrorum, & in Decretis Doctorum non minùs pietate, quàm doctrinâ præstantium, auditis sententiis, maturaque desuper cum pluribus ex Fraternitatibus Vestris deliberatione præhabita, de unanimi illorum consilio, & assensu, deploratæ, ac reprobatæ diu abominationis radicem Apostolicâ tandem securi præcidere, & Babylonicam Turrim funditùs evertere decreverimus; abolendo scilicet, supprimendo, atque extinguendo præfatam Monarchiam Siculam, ejusque Tribunal per specialem nostram perpetuò valituram, & hac ipsa die promulgandam Constitutionem, quæ à Secretario Brevium nostrorum Secretorum mox perlegetur.

Hic

*Hic ingressus fuit Consistorium R.P.D.Oliverius Secretarius Bre-
vium Secretorum, legitque Constitutionem à Sanctissimo hac
ipsa die editam super extinctione, & abolitione prætensæ Apo-
stolicæ in Regno Siciliæ Legationis, & Monarchiæ nuncupatæ;
ejusque Tribunalis Judicis, & Officialium quorumcumque,
qua perlecta sua Sanctitas reassumpsit orationem in hæc
verba.*

Audietis modò quænam iniverimus consilia, ut Causæ Re-
gni Siciliæ ad Forum Ecclesiasticum pertinentes, quæ
ante hac in abolito Monarchiæ Tribunali, etsi minùs legiti-
mè disceptari consueverant, rectè, ac ordine in posterum in-
trà idem Regnum cognosci, & definiri possint, ac debeant,
donec alià ratione à Nobis, & ab hac Sancta Sede Siculo-
rum commodis, ac indemnitati uberioribus gratiis consula-
tur. Legantur igitur literæ, quas Nos hac ipsâ die Venerabili-
bus Fratribus Archiepiscopis, & Episcopis, nec non Dilectis
Filiis tam sæculari, quàm Regulari Clero, reliquisque omni-
bus Christifidelibus supradicti Regni Siciliæ hac de re per-
scribimus.

*Hic iterum ingressus fuit Consistorium præfatus R.P.D.Olive-
rius, legitque Breve Sanctitatis Sux ad Archiepiscopos, &
Episcopos, nec non utrumque Clerum tam sæcularem, quàm
Regularem, reliquosque omnes Christifideles Regni Siciliæ,
quibus præscribitur modus, quo causæ dicti Regni ad Forum
Ecclesiasticum pertinentes in posterum, etiam abolito Monar-
chiæ Siculæ Tribunali, judicari possint, ac debeant in eodem
Regno, donec alià ratione à Sanctitate Sua, & Sede Apo-
stolica indemnitati, & commodis Nationis Siculæ plenius,
ac uberius consulatur; quo perlecto Breve Sua Sanctitas ita
orationem absolvit.*

HÆc habuimus, VENERABILES FRATRES, quæ Vobis hodie significaremus, ut ea, quæ gravissima hac in re suscepimus, consilia, ardua quidem, sed necessaria, Vobis, ut par est, innotescant: Et, cùm nihil profectò in illis quæsierimus, præter Dei gloriam, Ecclesiæ honorem, & salutem animarum, eodem planè zelo, quo Vos Pastoralem sollicitudinem nostram jugibus laboribus sublevare non prætermittitis, felicem consiliorum hujusmodi eventum vestris apud Deum votis, & precationibus juvare possitis, sicuti perspecta pietas, & Religio vestra, ac perpetuum Petræ illius studium, unde excisi estis, abundè Nobis pollicentur.





IN CONSISTORIO SECRETO

Habito die 6. Maji 1715.

A R G U M E N T U M.

Regem Catholicum laudat, quòd rescissis Decretis contra D. Cardinalem Judice Inquisitorem Generalem Hispaniarum, ipsumque Inquisitionis Tribunal latis, eundem Cardinalem in Hispanias honorificè revocaverat. Deinde S. R. E. Cardinalem creat R. P. D. Fabium Oliverium.

VENERABILES FRATRES.

LXII.



Uemadmodum præteritis mensibus satis, superque, vel ipso rumore publico nunciante, Vobis innotuisse non dubitamus tempestatem illam, quæ Charissimi in Christo Filii Nostri Philippi Hispaniarum Regis Catholici obtento nomine, non tam adversus Dilectum Filium Nostrum Franciscum S. R. E. Cardinalem Judice nuncupatum, generalem in illis partibus Inquisitorem, non aliâ sanè de causa, nisi quia commissum sibi à Nobis munus strenuè, ac fideliter impleverat, quàm contra ipsum sacrum Tribunal Inquisitionis commota fuit: ita planè uni-
cuique Vestrum exploratum, compertumque esse non ambi-

gi-

gimus, quid novissimè idem Philippus Rex egerit, ut ea, quæ perperam hac in re pravorum Consiliariorum operâ gesta fuerant, detectis jam eorum dolis, cumulatè sarciret. Nihilominus, quia ipsemet Rex suis ad Nos datis literis Regia sua manu conscriptis, quæ nonnisi ante duos dies redditæ Nobis fuerunt, rem adeò lætam, ac non minus sibi gloriosam, & Nobis faustam, quàm egregio Collegæ vestro, adeoque etiam Ordini vestro honorificam significare Nobis voluit: æquum esse arbitramur absque ulla cunctatione ipsâmet Regias literas ex hoc loco Vobis communicare, ut gaudium nostrum in Vobis sit, & gaudium vestrum impleatur.

Hic R. P. D. Battellus Secretarius Brevium, quæ ad Principes scribuntur, legit literas Sanctissimo scriptas à Rege Catholico ex Hispanico idiomate in Italicum versas. Quibus laudis Sanctitas Sua ita allocutionem suam absolvit.

Reliquum nunc est, VENERABILES FRATRES, ut maximas divinæ Bonitati gratias agamus, quæ dedit Regi cor docile ad faciendas justificationes suas, eamque humiliter exoremus, ut illius animum magis inflammet ad perficiendum opus, quod incoepit; unde meritas illas laudes, quas ei omnis posteritas reddet, dum hujus tam præclari facti memoriam recolet, uberiùs Nos ipsi retribuere, ac in dies augere possimus: illiusque illustri exemplo addiscant omnes Catholicum, ac verè sapientem Principem minimè dedecere ea, quæ minùs rectè gesta sunt, retractare, quinimò veram illum, ac solidam gloriam sibi parare, malè acta corrigendo, non ea cum Ecclesiæ, Deique offensione propugnando.

Absolutis præconiis, & propositionibus Ecclesiarum Sua Sanctitas ita rursus locuta fuit.

VENERABILES FRATRES.

LXIII.

Fraternitatum Vestrarum numero adscribere intendimus Dilectum Filium Fabium de Oliveriis Protonotarium Apostolicum, Secretorum Brevium nostrorum Secretarium, ac Palatii nostri Apostolici Propræfectum, cujus honestos mores, sedulitatem, patientiam, ac in primis illibatam fidem longo triginta sex annorum contubernio probavimus.

Quid Vobis videtur?

Auctoritate Omnipotentis Dei, Sanctorum Apostolorum Petri, & Pauli, ac nostrâ creamus S. R. E. Diaconum Cardinalem Fabium de Oliveriis cum dispensationibus, derogationibus, ac clausulis necessariis, & opportunis.

In nomine Patris †, & Filii †, & Spiritus † Sancti. Amen.





IN CONSISTORIO SECRETO

Habito die 29. Maji 1715.

ARGUMENTUM.

Jubileum universale indicit ad implorandam divinam opem contra Turcas. Mox S. R. E. Cardinalem declarat Damianum Hugonem ex Comitibus de Schonborn, aliàs in peccatore reservatum. Creat insuper Cardinalem Henricum de Thyard de Bissy Episcopum Meldensem, ac demum tres alios in peccatore reservat.

VENERABILES FRATRES.



X illa die, qua non sinè gravissimo animi nostri dolore accepimus nefarium Turcarum Tyrannum tot, ac tantarum ante aliquot annos, cum immortalis Christiani nominis gloria acceptarum cladium benè memorem, ac de iis vindictam sumere, seriò cogitantem, collectis tot Provinciarum, ac Regnorum, quæ Tyrannide suâ opprimit, viribus effèratori, quàm unquam rabie, bellum instaurare velle, maximisque tam maritimis, quàm terrestribus copiis Christianorum fines formidabili sua potentia irrumpere decrevisse: Nos imminentibus fi-

de-

deli populo periculis paternâ charitate vehementer commoti, primum quidem privatis nostris sacrificiis ad Deum toto corde clamare non cessavimus, ut effunderet iram suam in gentes, quæ illum non noverunt, & in regna, quæ nomen ejus non invocaverunt: verba illa Josaphat Regis cum ab Ammonitis, & Moabitis impeteretur, humiliter usurpantes: *Dominè Deus Patrum nostrorum, tu es Deus in Cælo, & dominaris cunctis Regnis Gentium; in manu tua est fortitudo, & potentia, nec quisquam Tibi potest resistere. In nobis quidem non est tanta fortitudo, ut possimus huic multitudini resistere, quæ irruit super nos. Sed cum ignoremus quid agere debeamus, hoc solum habemus residui ut oculos nostros dirigamus ad Te.* Indiçtis deinde publicis precibus, Christifideles non solum in Alma Urbe nostra, sed etiam in universa Italia, eique adjacentibus Insulis degentes, ad iram Dçi, quæ peccatis hominum assidue laceffitur, per salutaris pœnitentiæ lamenta, jejunia, eleemosynas, sincerasque obsecrationes placandam excitare studuimus. Id ipsum nunc demum à toto Christiano populo faciendum esse arbitramur, ut concordi charitatis fervore accedant omnes cum fiducia ad Thronum gratiæ, scissisque per veram pœnitentiam cordibus, ac auctis per jejuniorum labores, & eleemosynarum largitiones viribus orationis, divinam opem in his urgentissimis Ecclesiæ necessitatibus unanimiter implorare connitantur. Potens est enim Oratio Ecclesiæ supplicantis ad Dominum, qui pius est, ac misericors, & propitiatur invocantibus eum in veritate. Hæc tamen ut fructuosius, ac promptius ab omnibus peragantur, ex prisco Romanæ Ecclesiæ more cœlestium munerum thesauros, quorum dispensationem fidei nostræ commisit divina dignatio, aperire, & liberali manu erogare decrevimus: concedendo scilicet plenariam omnium peccatorum Indulgentiam in forma Jubilei omnibus Christifidelibus in Urbe quidem

existentibus, qui intra spatium duarum sequentium hebdomadarum jejunaverint quarta, & sexta feriis, ac Sabbato alterius ex hebdomadis hujusmodi, nec non Ecclesias, seu Basilicas S. Joannis in Laterano, Principis Apostolorum, & Sanctæ Mariæ Majoris, vel earum aliquam visitaverint, & ibidem oraverint, ac peccata sua confessi sacram Communionem sumperint, pauperibusque eleemosynam, prout sua cuilibet pietas suaserit, erogaverint. Cæteris verò extra Urbem præfatam commorantibus, qui Ecclesiam, seu Ecclesias ab Ordinario designandam, vel designandas visitaverint, & alia omnia præmissa adimpleverint; prout in literis desuper de more expediendis uberius explicabitur. Agite ergo, VENERABILES FRATRES, atque opportuno potissimum recurrente tempore, quo Divinus Spiritus repentino sonitu super Apostolos venit, mentesque carnalium in sui amorem permutavit, & foris apparentibus linguis igneis, facta sunt intus corda flammantia, Patrem Misericordiarum, & Deum totius consolationis suppliciter invocemus; ut fideles suos, ac præsertim Catholicos Principes veræ charitatis indissolubili nexu firmiter vinciat, induatque illos fortitudine, quæ de Cælo est; Unde hostes Christiani nominis, qui in multitudine contumaci, & superbia venientes, Regna, Provincias, & Principatus evertere, cladibusque involvere meditantur, protegente Domino, in cujus manu est salvare in multis, & in paucis, dissipentur, & disperdantur, atque à Christianorum cervicibus longè repellantur.

IN EODEM CONSISTORIO.

Absolutis præconiis, & propositionibus Ecclesiarum ita profectus est.

VENERABILES FRATRES.

LXV.

AD Omnipotentis Dei gloriam, Sanctæque Romanæ Ecclesiæ utilitatem, ac decus, palàm hodiè evulgare, & declarare intendimus Cardinalem illum, quem dudum in Consistorio nostro secreto habito die 30. Januarii. 1713. creavimus, & in pectore reservavimus, videlicet: Dilectum Filium Damianum Hugonem ex Comitibus de Schonborn non minùs pietate, quàm literis in hoc Collegio Germanico de Urbe ante viginti annos educatum.

Præterea creare similiter intendimus alium Cardinalem, nempe Venerabilem Fratrem Henricum de Thyard de Bissy Episcopum Meldensem, cujus eximia in Nos, in Ecclesiam universam, imò & in ipsam Catholicam Religionem merita, five pro Ecclesiastica libertate tuenda, cum Ecclesiæ Tullensi præesset, five pro Orthodoxæ doctrinæ veritate propugnanda, postquam ad Meldensem translatus fuit, satis Vobis comperta sunt, & nota; atque huic demùm tres alios adjungere constituimus, quos tamen rationabilibus ex causis in pectore reservare decrevimus, arbitrio nostro quandocumque evulgandos.

Quid Vobis videtur?

Auctoritate Omnipotentis Dei, Sanctorum Apostolorum Petri, & Pauli, ac nostrâ declaramus, & respectivè creamus S. R. E. Cardinales

Damianum Hugonem ex Comitibus de Schonborn.

Henricum de Thyard de Bissy Episcopum Meldensem.

Alios tres in pectore reservamus arbitrio nostro quandocumque declarandos.

In nomine Patris †, & Filii †, & Spiritus † Sancti. Amen.



IN CONSISTORIO SECRETO

Habito diē 23. Septembris 1715.

ARGUMENTUM.

Christianissimi Galliarum Regis Ludovici XIV. obitum, qui prima die mensis Septembris contigerat, Sacro Collegio de more nunciat, ejusque virtutibus, ac rebus gestis amplissimo præconio decoratis, Exequias pro suffragio illius Animæ in Pontificio Sacello celebrandas indicit.

VENERABILES FRATRES.



Ingentem dolorem, quem Vos unà Nobiscum suscepisse non dubitamus, ubi primùm, fama ipsa vulgante, Christianissimum Regem Ludovicum XIV. decessisse audivistis, acerbis hodie renovare, inflictumque animis nostris vulnus exasperare cogimur: dum hunc ipsum tristissimum nuncium Nobis per literas novi Regis, ac Ducis Aurelianensis Regni Rectoris, insignibus utriusque eorum in Nos, & hanc Sanctam Sedem filialis observantiæ notis refertas, nuperrimè confirmatum, Vobis ex hoc loco, ut moris est, communicamus. Quomodò enim non maximè dolebimus gravissimam hanc non Galliarum tantùm, sed universæ prorsus Christianæ Reipublicæ jacturam? Dolemus profectò splendidissimum, ævi nostri lumen, ac grande decus extinctum. Dolemus Nobilium quarumvis disciplina-

Lxvi.

rum, ac bonarum artium fautorem munificum sublatum. Virtutes omnes, ac præsertim Catholico homine dignas, sive dolis infensæ hæreseos agitata, sive etiam sævientis fortunæ injuriis jactatas certo, ac firmissimo præsidio destitutas dolemus. Dolemus ereptum Evangelii Præconibus in remotioribus Infidelium plagis Patronum beneficentissimum: orbatam Filio Charissimo Apostolicam Sedem: & quod animum nostrum acriori planè sensu percellit, potentissimo Defensore, ac imperterrito Vindice Orthodoxam Religionem viduatam dolemus. Non ita tamen dolemus, ut quæ meritò lenire possunt mœrorem nostrum, solatia respuamus. Eædem scilicet inclyti Regis virtutes, justitia, pietas, religio, prudentia, animi magnitudo, quæ dejectis in ejus Sepulchrum oculis lugere Nos cogunt, eis in sublime erectis de illius piè credita felicitate lætari Nos jubent. Hanc præ ceteris sperare Nos facit mirificus ille zelus Domus Dei, quo Religiosissimus Princeps semper exarsit, sed tunc præcipuè cum jam ante triginta annos, omnibus humanæ prudentiæ rationibus penitus neglectis, Edicta illa abrogavit, quæ perduelles hæretici ab ipsius Majoribus Regibus inter bellorum æstus, & pericula dudum extorserant: novisque editis Decretis, quibus illius sectæ hominibus omnis Templorum usus, ac coeundi libertas interdicebatur, brevi paucorum mensium spatio universam planè Galliam ab ea superstitione liberavit, quæ populos illos civilibus diù bellis miserè afflixerat ingenti cum periculo orthodoxæ fidei, & publicæ incolumitatis. Auget spes nostras indefessum studium, quo Rex Optimus Catholicæ Doctrinæ tuendæ, eliminandisque erroribus: præsertim verò radicitus extirpandis Jansenianæ hæreseos malis germinibus, propugnandisque latè adversus eam Sanctæ hujus Sedis judiciis, per tot annorum decursum tam ferventer adlaboravit, ut etiam in eo morbo, qui postremus illi laborum mortalium fuit, novissimæ nostræ hac potissimum

in re editæ Constitutioni inobedientes compescere, omnique ad id suæ potestatis validiori præsidio Ecclesiasticam auctoritatem fulcire paratus, cœpto jamdudum operi supremam manum adjicere summoperè exoptaverit. Silebimus alia; sed injecta jam postremi morbi mentione silere non possumus invictam illam, ac verè Christianam fortitudinem, qua Rex præstantissimus charorum sibi Caputum funeribus jampridem assuetus, ita in ejusmodi morbo se gessit, ut nemo ex veteris Philosophiæ Sectatoribus tam magnificè contemptum mortis decantaverit in Scholis, quàm Ille fortiter exercuit in arena. Hæc sanè omnia, & alia plurima, quæ tacemus, suadere faciliè possent Ludovicum XIV. non tam diuturno dudum enitentiæ naturæ labore, quàm indulgentis dono providentiæ serò terris, post longam scilicet Parentum sterilitatem, à Cœlo concessum, serò itidem emerito Cœlo fuisse à terris redonatum. Verùm quia, ut Sacræ literæ Nos admonent, & Nos dolentes dicimus: *Judicium durissimum his, qui præsumunt, fiet*, ideo & ratione ducimur, & debito charitatis urgemur, ut sacrificiis, orationibus, & obsecrationibus demortui Regis animæ solatium comparemus. Id porro, & privatim Nos agere hætenùs non prætermisimus, & Vos una Nobiscum prosequi enixè optamus, hoc ipsum suo tempore publicis in Pontificio nostro Sacello Exequiis, statâ die Vobis indicendâ, juxta Prædecessorum nostrorum morem solemni ritu præstituri. Deum interim Opt. Max., in cujus manu sunt corda Regum, enixè rogemus, ut novi Christianissimi Regis Ludovici XV. tenellam ætatem custodiat, dirigatque semper ejus gressus in viam mandatorum suorum, quatenùs sapientiâ juxta, ac annis proficiens expectationi, quæ de illius egregiâ indole maxima est, abundè respondeat ad subditarum sibi gentium quietem, ad Ecclesiæ bonum, ad Catholicæ Religionis præsidium, Christianæque Reipublicæ felicitatem.



IN CONSISTORIO SECRETO

Habito die 16. Decembris 1715.

ARGUMENTUM.

Ante præconia, & propositiones Ecclesiarum declarat Urbini de Latere Legatum Jo: Antonium S.R.E. Cardinalem de Via.

VENERABILES FRATRES.

LXVII.



Rbini Patriæ nostræ Legationem, quam Venerabilis Frater Noster Sebastianus Antonius Episcopus Tusculanus S. R. E. Cardinalis Tanarius, tresdecim ferè annorum spatio, etiam inter maximas, quæ interim contigerunt, rerum, ac temporum difficultates, summâ fide, prudentiâ, ac sedulitate administravit, committere nunc intendimus Dilecto Filio Nostro Joanni Antonio ejusdem S. R. E. Cardinali de Via, de cujus fide, doctrinâ, integritate, rerum usu, ac in præcipuis Apostolicæ Sedis muneribus gerendis experientia plurimum in Domino confidimus.

Quid Vobis videtur?

Auctoritate Omnipotentis Dei, Sanctorum Apostolorum Petri, & Pauli, ac nostrâ declaramus, ac deputamus nostrum, & hujus Sanctæ Sedis de Latere Legatum Urbini præfatum Cardinalem de Via ad triennium cum facultatibus solitis, & clausulis opportunis.

In nomine Patris †, & Filii †, & Spiritus † Sancti. Amen.

IN

IN EODEM CONSISTORIO.

Post præconia, & propositiones Ecclesiarum, creat quatuor S. R. E. Cardinales, ac subinde tres illos Cardinales declarat, & palàm evulgat, quos in Consistorio die 19. Maji proximè præteriti habito creaverat, & in pectore reservaverat.

VENERABILES FRATRES.

LXVIII.

Volumus hodie antiquissimum sequi morem Prædecessorum nostrorum, qui nimirum per sexcentos, & amplius annos continuatâ serie, nonnisi mense Decembri Ordinationes suas facere consueverunt. Non minùs propterea illorum vestigiis, quàm editæ hac de re à fel. rec. Sixto Papa V. Prædecessore nostro Constitutioni inhærentes, qua scilicet eximius ille Pontifex novorum S. R. E. Cardinalium creationes in temporibus dumtaxat, seu diebus jejuniorum hujus mensis habendas esse sancivit: septuagenarium Fraternitatum Vestrarum numerum, ad majorem Omnipotentis Dei gloriam, Sanctæque Romanæ Ecclesiæ utilitatem, ac decus, complere constituimus. Intendimus igitur creare Cardinales

Nicolaum Caracciolum Archiepiscopum Capuanum, à tribus, & ultra annis cum facultatibus Vicario Urbis concedi solitis Vicesgerentem.

Joannem Patritium Archiepiscopum Seleuciæ Thesaurarium nostrum generalem.

Ferdinandum Nuptium Archiepiscopum Nicænum Congregationis Episcoporum, & Regularium, ac etiam Congregationis Aquarum Secretarium.

Nicolaum Spinulam Archiepiscopum Thebarum, Cameræ Nostræ Apostolicæ Auditorem generalem.

Quorum omnium plenè nota, ac comperta sunt merita,

quæ

quæ illorum quilibet in gravissimis hujus Sanctæ Sedis Ministeriis domi, forisve laudabiliter exercendis sibi cumulavit. Intendimus insuper hac ipsa die declarare, & palam evulgare tres illos Cardinales, quos in Consistorio nostro secreto die 29. Maji proximè præteriti habito creavimus, & in petore reservavimus, videlicet.

Innicum Caracciolum Episcopum Averfanum, cujus præclaras, ac Sacro Antistite verè dignas virtutes, nemo ex Vobis est, qui ignoret.

Bernardinum Scottum Rotæ Romanæ Auditorem, Almæque Urbis nostræ Governatorem, pari cum justitiæ, ac prudentiæ laude, utroque munere perfunctum.

Ac demum Carolum de Marinis, quem, ut probè nostis, in ipso Pontificatus nostri primordio jam à decennio, & ultra sub duobus Prædecessoribus nostris Cameræ nostræ Apostolicæ generalem Auditorem, adeoque tam ante, quàm post suppressionem venalitatis ejusmodi Officii illo fungentem invenimus: indè verò post alios ferè novem annos ab eo in eodem munere transactos ad Pontificii nostri Cubiculi Præfecturam, quam sex, & ultra annis exercet, transtulimus.

Quid Vobis videtur?

Auctoritate Omnipotentis Dei, Sanctorum Apostolorum Petri, & Pauli, ac nostrâ declaramus, & respectivè creamus S. R. E. Cardinales: Presbyteros quidem

Innicum Caracciolum Episcopum Averfanum.

Bernardinum Scottum,

Nicolaum Caracciolum Archiepiscopum Capuanum,

Joannem Patritium Archiepiscopum Seleuciæ

Ferdinandum Nuptium Archiepiscopum Nicænum, ac

Nicolaum Spinulam Archiepiscopum Thebarum.

Diaconum verò Carolum de Marinis.

In nomine Patris †, & Filii †, & Spiritus † Sancti. Amen.



IN CONSISTORIO SECRETO

Habito die 13. Januarii 1716.

A R G U M E N T U M.

Ingruentia Christianæ Reipublicæ, Italiæ potissimum, ac ipsimet Urbi à Barbarorum armis pericula, & quæ ad ea avertenda gesserat, ac gerere meditabatur, exponit; deinde DD. Cardinales ad subsidia in usum tam necessarii belli, & communis defensionis liberaliter conferenda enixè hortatur.

VENERABILES FRATRES.



Uanta in solitudine, ac mœrore versemur ob immanem, & ante hac inauditum terrestrium, maritimarumque copiarum apparatus, quo infensissimus Turcarum Tyrannus, secundis armorum suorum initiis elatus, nihilque sibi jam impervium fore confidens, non Venetas tantùm, sed Christianas planè omnes Provincias, nostramque in primis Pontificiam Ditionem, imò & hanc ipsam veræ Religionis Arcem aggredi meditatur, non est cur Vobis, qui hæc omnia nostis, ac unà Nobiscum impensissimè doletis, pluribus explicemus. Nostis profectò omnia, ut diximus: adcoque etiam nostis, jamdudum Nos gravif-

LXIX.

vissima hæc nostra, imò & universæ Christianæ rei, ac Orthodoxæ Fidei discrimina prævidisse; pluries propterea non solum in hac alma Urbe, ac deinde per Italiam, eique adjacentes Insulas, sed novissimè etiam per totam Ecclesiam indictis precibus Christifideles omnes excitasse ad exercituum Dominum humiliter exorandum, ut effunderet iram suam in gentes, quæ illum non noverunt, & in Regna, quæ nomen ejus non invocaverunt. Nostis itidem pluries Nos ad Charissimos in Christo Filios Nostros, in Imperatorem Electum, aliosque Reges, ac Principes Catholicos totius Christiani Populi vota, ac suspiria detulisse, illosque præsertim, à quibus id ipsum, quod Nos petebamus, sacri fœderis adversus Barbaros olim initi ratio postulabat, vehementiori, quo potuimus, studio rogasse, atque obsecrassè, ut omni abrupta morâ ad communem salutem, contra nefaria eorumdem Barbarorum molimina propugnandam accurrerent. Nostis demum Nos ipsos periclitanti publicæ incolumitati iis omnibus, quæ attritæ Apostolici Ærarii, ac subditorum nostrorum vires Nobis permiserunt, collatis subsidiis, nullatenus hucusque defuisse. Verùm, nondum oblito Domino delicta populi sui, ac de peccatis nostris graviolem forsan vindictam sumere parante, omnes has curas nostras optato, quem sperabamus, fructu omninò hætenus vacuas experti sumus. In summum proinde discrimen non modò temporalis ditionis nostræ, sed verius universæ Christianæ Reipublicæ, Ecclesiæ Catholicæ, ac Orthodoxæ Religionis causam prorsus adductam lacrymantibus Pontificiæ charitatis oculis intuemur. Quid enim Nobis, quid Vobis, quid Italiæ, quid Romæ, si Veneta Respublica (quod Deus avertat) in eo, quod proximo vere sibi paratur, bello succumberet, à victricibus Turcarum armis, eorumque intestino in Christianos odio, ac inexplicabili cupiditate metuendum foret, longè facilius Vobis erit per Vos ipsos intelligere, quàm Nobis explicare.

care. Nos tamen hæc inter, licet maxima, impendentium malorum pericula, aliasque multiplices, quibus undequaque circumdamur, calamitates, in Illius ineffabili bonitate confisi, qui dat lasso virtutem, & his, qui non sunt, fortitudinem, & robur multiplicat, non concidimus animo; sed Pastoris Evangelici exemplo, qui animam suam libenter ponit pro ovibus suis, quamvis sustentemur pane tribulationis, & aqua angustiae, officium nostrum non dimittimus, nec dimitemus. Novis idcirco, atque iteratis officiis ad imminentem hanc sævissimam tempestatem avertendam Orthodoxorum Regum opem, ut majori, quo poterunt, bellicarum navium numero Venetam classẽ incunctanter augere velint, per citatos Tabellarios enixè imploramus. Nova etiam Nos ipsi, & quidem ampliora subsidia, quantum rerum, ac temporum asperitas patitur, in gravem hanc, & omninò necessariam causam, in quam sacra quoque vasa impendi æquum esse novimus, parare non prætermittimus. Cumque inter cætera animadverterimus Basilicæ Vaticanæ Fabricam, nostri Pontificatus tempore, integrum æs alienum quingentorum scutorum millium, quo pridem obstringebatur, dissolvissẽ: ac insuper exploratum habeamus majorem reddituum partem ejusdem Fabricæ non aliunde provenire, quàm ab eleemosynis percipi solitis ex pecunia illa, quæ juxta tenorem Indultorum à Prædecessoribus nostris concessorum pro sola tuitione Christianarum Provinciarum adversus Infidelium molimina impendenda est; rem munere nostro dignam, & ab eorundem Prædecessorum nostro rum mente non alienam Nos egissẽ existimavimus mandando prout jam mandavimus, ut eadem Fabrica novam nunc contrahat æs alienum in summa trecentorum millium scutorum pro emendis potissimùm, seu conducendis bellicis aliquot navibus eroganda, Triremium nostrarum Classi in auxilium Venetorum adjungendis. Ad hæc subditorum nostrorum utrius-

D d

que

que Maris litora incolentium securitati adversùs Barbarorum Piratarum injurias, validioribus adhibitis mediis opportunè prospicere constituimus. Hæc facimus: plura alia etiam supra vires meditamur, ut majora, quemadmodum rei gravitas postulat, in dies faciamus. Verè tamen etiam, postquam illa fecerimus, non aliam, quàm in divina ope spem habentes, ad Eum, qui dives est in misericordia, ac Servos suos non deserit in tempore tribulationis, clamare non cessamus, ut non tradat bestiis animas confitentes sibi, nec det hæreditatem suam in opprobrium, ut dominantur eis Nationes. Porro ut hoc ipsum illi speciatim Christifideles, qui in hac Religionis Sede commorantur, concordibus votis agere pergant, eorum ad id pietatem prolatis in proxima Festivitate Romanæ Cathedræ Beatissimi Apostolorum Principis cœlestium munerum thesauris incitare non omittemus: ipsius Apostolorum Principis patrocínio confisi, ut nullis permittat Nos Dominus perturbationibus concuti, quos in Apostolicæ Confessionis Petra solidavit. Hæc Vobis, VENERABILES FRATRES, qui Nobiscum in administratione Ecclesiæ Dei operam, curasque vestras sedulò impendere non desistitis, indicare voluimus, ut enixis primùm ad Dominum precibus: ope deinde, ac subsidiis vestris, quemadmodum aliàs non semel, leviori etiam urgente periculo, à Majoribus vestris, imò & à Vobis ipsis piè, ac liberaliter factum fuit, gravissimam hanc causam, in qua publicæ salutis Catholicæ Religionis ratio conjuncta est, juvare possitis, vestroque exemplo discant alii, qui Ecclesiasticos redditus obtinent, bona illa, quæ sunt vota fidelium, pretia peccatorum, patrimonia pauperum, sanctiorem in usum erogari non posse.



IN CONSISTORIO SECRETO

Habito die 30. Martii 1716.

ARGUMENTUM.

Iterum de Turcico bello fusè differit, quæque ad propulsandos hostiles conatus gesserat, & à Christianis etiam Principibus gesta fuerant, disertè commemorat. Decimarum subsidium indicit. Cardinali Ursino Germanicam professionem remittit.

VENERABILES FRATRES.



Instat jam tempus, quo solent Reges ad bella procedere; instat & illud, quo nefarius Turcarum Tyrannus, felicibus præteriti anni successibus elatus, validiori, quàm unquam antea, armorum robore, quemadmodum aliis super alios certissimis nunciis ad Nos affertur, Christianæ Classis adventum antevertere satagit, Catholicas ditiones iterum oppugnaturus. Insonat jam auribus nostris, ut cum Prophetâ loquamur: *Vox flagelli, vox impetus rotæ, & equi frementis, & Quadrigæ ferventis, & Equitis ascendentis: & micantis gladii, & fulgurantis hastæ*: animoque jugiter, atque oculis nostris obversantur gravissima Christiani gregis discrimina, quæ fortiter clamare nos cogunt: *Exivit*

Lxx.

Leo de cubili suo, & prædo gentium se levavit. Egreffus est de loco suo, ut ponat terram nostram in solitudinem: Quia tamen parum esset mala hæc deplorare, nisi & illa omni virium, & animi contentione avertere conaremur; idcirco præter enixas, quas ad Deum hætenus fudimus, & adhuc quotidie fundimus, preces, ut non obliviscatur misereri, nec contineat in ira misericordias suas, Orthodoxos Principes iteratis officiis excitare non omisimus, ut validis Triremium, aliarumque bellicarum Navium suppetiis inclytam Venetorum Rempublicam juvare quamprimum velint, nè aliàs vel iniquas, & publicæ causæ luctuosas pacis condiciones à superbo victore accipere, vel ingruentem Othomanici furoris tempestatem sola propemodum excipere, ac sustinere cogatur. Eum hætenus, ut probè nostis, ab ejusmodi officiis fructum, benedicentē Domino, percepimus, quòd Charissimus in Christo Filius noster Philippus Hispaniarum Rex Catholicus cum immortalī sui nominis gloria ad publicam causam à Barbarorum conatibus asserendam sex bellicas Naves, & quinque Triremes ære suo instructas mittere decreverit: imò & multa peditum, equitumque millia, si ea vellemus, in eundem usum Nobis adderet: qua sanè re eximiam pietatem suam cum singulari publici boni studio conjunctam luculentissimè declaravit. Firmam insuper spem adhuc habemus fore, ut illustre illius exemplum alii quoque Catholici Principes, ac potissimum Charissimus itidem in Christo Filius noster Joannes Portugalliæ, & Algarbiorum Rex Illustris, nec non Dilecti Filii Nobiles Viri Dux, & Gubernatores Reipublicæ Januensis alacriter imitentur. Unde ubi Triremes nostræ, ac bellicæ Naves, quas pecunia nostrâ jam conduximus, adjungantur, iisque etiam Triremes Dilecti Filii Nobilis Viri Cosmi Etruriæ sibi subiectæ Magni Ducis unà cum bellicis itidem Navibus, atque Triremibus Melitenisbus adjiciantur, non exiguum Venetæ Classi incrementum allatum iri confidimus.

Maximo prætereà cum animi nostri solatio certiores nuperrimè facti fuimus, Charissimum etiam in Christo Filium Nostrum Carolum Romanorum Regem in Imperatorem Electum non tam officiis, ac precibus nostris adductum, quàm veridè singularis pietatis suæ stimulis incitatum, deliberato jam esse animo ad Christiani nominis hostes propulsandos, nullisque novis adhortationibus indigere ad aggrediendum opus, pro quo, ut ipsemet ad Nos scripsit, ingentes belli apparatus ex Regnis, & Provinciis sibi subditis indefessio studio, omni conatu, summoque labore jam collegit. Supervacaneum proindè rati calcaria currenti admovere, consilium suscepimus remittendi Venerabili Fratri Nostro Vincentio Mariæ Episcopo Portuensi S. R. E. Cardinali Ursino protectionem ad Aulam Viennensem, quam ipse, quacumque vel hyberni temporis, vel itineris asperitate contempta, ut laboranti Christianæ Reipublicæ opem ferret, libenter aggredi paratus erat: eaque mente, ubi primùm requisitus à Nobis fuerat, ad almam hanc Urbem omni sublata mora se contulerat. Poterit itaque ipse jam redire ad suam Ecclesiam Beneventanam, novâ hac, & sanè præclara laude cumulat, quod agnita rei Christianæ necessitate, ut ei, quantum in se erat, subveniret, nullum incommodum, nullumque laborem detrectaverit, ac eximium publicæ causæ studium, quale profectò verum Romanæ Ecclesiæ Senatorem decet, palàm ostenderit. Cæterum ad magis confirmandum in suo, *ven. laudabili* proposito eundem Imperatorem Electum, illius postulatis quoad decimas in huiusmodi belli sumptus exigendas ex bonis Ecclesiasticis utriusque Cleri, quæ in ejus ditionibus consistunt, promptè, ac libenter satisfacimus; eique insuper, erecto supra vires animo, quingenta florenorum millia intra præsentem annum statis temporibus, ac conditionibus persolvenda obtulimus: exiguam quidem summam, si tanti belli moles, & desiderii nostri magnitudo spectetur: magnam verò, imò

& maximam, si eam conditione temporum, ærarii nostri, subditorumque nostrorum inopia, & aliarum undique occurrentium impensarum necessitate metiamur. Hæ profectò angustia, (quæ majoribus hac de causa in dies faciendis sumptibus semper graviores erunt) animum nostrum adegerunt ad decimarum subsidium, quas Romani Pontifices Prædecessores nostri pro Christianæ Reipublicæ defensione ab Italico Clero exigere consueverunt. Illas proindè quamprimùm indicare, ac imponere decrevimus, Fraternitates Vestras, quæ Nobiscum in administratione Ecclesiæ Dei curas, operasque impendunt, ab iis, ut moris est, eximentes, sicuti in Apostolicis literis, quæ ad unumquemque vestrum suo tempore deferentur, expressum videbitis. Hæc indicare Vobis volumus, ut pro parte sollicitudinis, ad quam vocati estis, conatus nostros juvetis tum opéra, & consilio, tum assiduis ad Deum precibus, hoc potissimum acceptabili tempore ferventiùs effundendis, sicuti perfecta pietas, & Religio vestra, ac perpetuum causæ publicæ studium pollicetur. Galeam igitur salutis assumamus, & gladium spiritus, quod est Verbum Dei, per omnem orationem, & obsecrationem orantes omni tempore in spiritu, & quiescere faciet Dominus superbiam infidelium; potens est enim, quod aliàs in manu forti peregit, perfidam illorum Classẽ disjicere, jamdiù assuetis Divino imperio undis absorbendam.





IN CONSISTORIO SECRETO

Habito die 2. Septembris 1716.

ARGUMENTUM.

Insignem de Turcis Victoriâ in Hungariâ partam DD. Cardinalibus communicat. Principem Eugenium à Sabaudia meritis ornat laudibus, eique Pileum, & Ensem solempni ritu benedictos largiri constituit.

VENERABILES FRATRES.



Umulatum gaudium, quo animos vestros uberrimè perfusos novimus, ubi primùm superioribus diebus innumeras in Hungaria Turcarum Copias Cæsareis Armis penè ad internecionem obtritas, ac disiectas fuisse audivistis, impensius adhuc, & plenius percepturos hodie Vos esse non dubitamus: dum hunc ipsum, faustissimum nuncium per literas Charissimi in Christo Filii Nostri Caroli Romanorum Regis in Imperatorem Electi ante duos dies à Dilecto Filio Nostro Vvolfgango Annibale S. R. E. Cardinalide Schrottembach Nobis redditas confirmatum, Vobiscum ex hoc loco, ut æquum est, nullâ interpositâ morâ communicamus. Quomodò enim non effusè lætabimur, ubi ingentes Barbarorum vires in exitium Christiani nominis con-

LXXI.

tractas, florem scilicet Othomanicæ Militiæ, numero ferocientem, opibus exultantem, animoque clades nostras superbè præcipientem, profligatum esse percipimus? Ubi captis castris, Ærarium, commeatum, tormenta supra centum, & septuaginta, totidemque ferè vexilla, bellicum omnem apparatus, prædamque opulentissimam in Christianorum Militum potestatem pervenisse intelligimus? Ubi demùm inter ipsa belli auspicia, quod sperare post plurium præliorum aleam vix potuissimus, divinitus Nobis contigisse conspiciamus? Opus sanè dexteræ Excelsi, qui fecit virtutem, & percussit inimicum. Levantes igitur cor, & oculos nostros in Montem excelsum, & Sanctum, undè omne Nobis auxilium effluxit, sacrificemus bonorum omnium largitori Deo hostiam laudis, & jubilemus ei in voce exultationis.

Cùm tamen abundè omnibus compertum, ac longè perspicuum sit validissimam in primis B. Virginis opem, quam toties repetitis precibus imploravimus, prosperos hosce successus mirificè provexisse, ratio omnis postulat, ut maximas æquè, ac publicas in Liberianâ Basilicâ eidem Augustissimæ Virgini Sacrà Omnipotenti quidem Deo pro largè collatis, Sanctissimæ verò ejus Matri pro clementer impetratis beneficiis gratias agamus: Partæ scilicet victoriæ Nos Dominus compotes esse fecit eo die, in quem anniversaria admirandæ Dedicationis dictæ Basilicæ memoria recurrebat; ac cum in ea solemnioribus cæremoniis Sacratissimus dies ejusdem Virginis in Cælum assumptæ celebraretur, primum ad Nos rei prosperè gestæ nuncium pervenire voluit, ut non minus pugnantibus victoriam, quàm orantibus lætitiâ, Gloriosissima Virgine, utrisque suffragante, provenisse apertè cognosceremus.

Quin imò, nec sinè peculiari Divinæ Providentiæ consilio evenisse arbitramur, ut confirmatum Victoriæ nuncium Vobis hac ipsâ die significaremus, quâ Buda ante triginta annos

Chri-

Christianis Armis expugnata fuit . Neque enim in diem auspiciorem incidere id poterat, quàm cum Sancti Stephani Hungariæ Regis Festum celebramus, qui præcellam Dei Genitricem, quam ardentissimè venerabatur, amplissimo in ejus honorem constructo Templo, Hungarici Regni Patronam instituit, ab eâdem vicissim Virgine receptus in Cælum ipso suæ Assumptionis die, quem Hungari ex Sancti Regis instituto Magnæ Dominæ diem appellant . Proxima itaque Dominica die in præfatâ Basilicâ debitum, ut diximus, gratiarum officium persolvemus, ibique ex Turcicis Signis, quæ memoratus Imperator Electus, veluti quasdam victoriæ primitias, pro sua in hanc Sanctam Sedem observantia, ad Nos misit, illud præcipuè, quod insignius est, & juxta superstitionem impiæ gentis sacrum, Liberiano Tholo suffixum relinquemus, ad illustre non minùs Christianæ Religionis trophæum, quàm Cæsareæ pietatis, ac divini beneficii monumentum . Ita enim cùm Christifideles ereptum Turcis vexillum ad Præsepe Domini pendens intuebuntur, Deum Optimum Maximum ferventiùs exorabunt, ut instantibus victoriæ fortissimis Christianæ rei propugnatoribus, etiam Christi Sepulchrum, atque ipsa Urbs Sancta Jerusalem à diuturna, ac teterrima nefariorum hostium captivitate aliquando redimatur . Latere Vos interim nolumus, quòd Nos oblata Nobis Barbarorum spolia speciali aliquo Pontificiæ benevolentiae dono compensare cupientes, Dilectum Filium Nobilem Virum Principem Eugenium à Sabaudia, fortissimum Cæsarei Exercitus Ducem, cujus scilicet inclyta virtute, ac sapientia potissimùm effectum est, ut immanissimi hostes, tametsi initio prælii, quemadmodùm ipsemet Electus Imperator ad Nos scribit, acriter non minùs, quàm inaudito hætenùs ordine pugnaverint, partim nihilominùs cæsi, partim capti, partim præcipiti fuga, vel absumpti, vel dispersi, ac dissipati fuerint : Pileo, & Ense per Nos solemni ritu benedictis, quibus nimirum

præclaros Orthodoxæ Religionis Assertores insignire interdum consueverunt Romani Pontifices Prædecessores nostri, donare decrevimus; ut ejusmodi muneris inflammatus mysteriis, Gladio quidem circa femur suum potentissimè accingatur, Pileo verò, veluti galea salutis induatur, & ad magis, magisque in dies Christianæ Reipublicæ hostes conterendos excitetur. Reliquum nunc est, ut Dominus Exercituum opus, quod cœpit, pro sua in Nos clementia perficiat: in primis verò Italicas oras, ac præsertim temporalis nostræ ditionis Populos ad Corcyrensis obsidionis discrimen trepidantes benignè respiciat. Accedamus igitur, VENERABILES FRATRES, cum fiducia ad thronum gratiæ; Patremque Misericordiarum humiliter obsecremus, ut terrestrem in Hungaria triumphum maritima ad Corcyram victoria cumulatè velit, atque ita hostium immanitate terra, marique confracta, omnem à Christianorum Provinciis metum, & cladem in barbaras Infidelium terras avertat.





V E R B A.

Quibus Eminentissimus, & Reverendissimus D. Wolfgangus Annibal S.R.E. Cardinalis de Schrottembach quatuor Vexilla, in Hungarico prælio Turcis erepta, Sanctissimo Patri CLEMENTI XI. obtulit in Basilicâ Liberianâ die 6. Septembris 1716., cum ibidem solemnî ritu Omnipotenti Deo de Christianorum Armarum felicitate gratiæ agerentur.

BEATISSIME PATER.



Acra Cæsarea, Regiaque Catholica Majestas debitâ filiali observantia ad Sanctissimos pedes Tuos prosternit hæc Vexilla, quæ in exordio belli cruentissimo conflictu immâni Christiani nominis hosti erepta fuere; Cui enim magis debentur hæc Trophæa, quàm Tibi, qui indefesso labore, apertis ærariis, assiduis precibus, ipsa etiam certaminis hora, in Liberianâ Basilicâ ingentem hanc Victoriâ Orbî Catholico procurasti? Age igitur, SANCTISSIME PATER, & fove benigno affectu populum Tibi devotum, populum, qui pro Deo, fide, Ecclesia, bono denique publico fortiter pugnat. Et quod summum, maximumque est, idque enixè rogamus, adde preces precibus, & Nos favente Deo sub protectione Magnæ Dominæ addemus Victoriis Victorias.

E c 2

San-

Sanctissimi Patris CLEMENTIS XI. responsum.

LXXII.

UBerem lætitiā, quam ante aliquot dies ob insignem victoriam ab exercitu Charissimi in Christo Filii Nostri Caroli Romanorum Regis in Imperatorem Electi de teterrimis Christiani nominis hostibus in Hungaria reportatam: Et hac ipsa die ob illius optatissimum fructum, Corcyram scilicet ab arctissima obsidione mirabiliter liberatam, suscepimus; plurimum nunc augent barbara hæc signa, quæ à Turcarum manibus invicta Cæsareorum Militum fortitudo feliciter abstraxit, quæ Tu, Dilecte Fili Noster, tam disertis ejusdem Electi Imperatoris in Nos, & hanc Sanctam Sedem filialis observantiæ significationibus Nobis offers: quæque Nos demum ad perennem beneficii memoriam, quod Omnipotentis Dei bonitas, Augustissima ejus Genitrice suffragante, Nobis concessit, tum in hoc Liberiano Templo, tum in Sacra Æde Lauretana appendi mandabimus. Eximiam sanè in illis egregiorum Christianæ Reipublicæ Propugnatorum virtutem agnoscimus simul, & commendamus. Post debitas idcirco Patri Misericordiarum de tam effusè collatis donis persolutas gratias, victorem Cæsarem, illiusque exercitum amplissimis præconiis, & benedictionibus cumulamur: feliciores eis semper successus ad Catholicæ Religionis incrementum apprecantes. Nos certè successus hujusmodi, quantum in Nobis est, omni, qua possumus, via, quemadmodum hætenus adjuvimus, ita & in posterum juvare non omittemus; in primis autem preces addemus precibus, ut exoptas: Illum qui potens est in prælio, continenter exorantes, ut piis æquè, ac strenuis Cæsareorum Pugilum conatibus adesse velit, novosque in dies recentibus triumphis triumphos adjiciat. Tibi interim, Dilecte Fili Noster, ex intimo paterni nostri cordis depromptam Apostolicam benedictionem peramanter impertimur.

IN



Publici Secreti

IN CONSISTORIO SECRETO

Habito die 7. Decembris 1716.

ARGUMENTUM.

Ad Ecclesiam Patriarchalem Ulyxbonensem Occidentalem noviter creptam transfert R. P. D. Thomam de Almeida Episcopum Portugallensem.

VENERABILES FRATRES:



Nitio labentis anni, cùm immaniſſimus Turcarum Tyrannus proximâ, ac felici Peloponnesi expugnatione ſummoperè elatus, nihilque jam ſibi impervium fore confidens, ingenti terreſtrium, maritimarumque copiarum apparatu, non Venetas tantùm, ſed & alias Chriſtianas Provincias ferociter aggredi, cladibusque involvere moliretur: potiffimùm verò Inſulam, & Arcem Corcyræ, ſecuritatis Italicæ propugnaculum, oppugnare intenderet; Nos, ut benè noſtis, tot, tantique Eccleſiæ, ac Reipublicæ, imò & temporalis noſtræ ditionis periculis vehementer commoti, primùm quidem ad Illum, qui potens eſt in prælio, toto corde clamavimus, ut ſecundùm multitudinem miſerationum ſuarum eriperet Nos à malis, nec traderet beſtiis animas confi-

ten-

Lxxiii.

tentes sibi: deinde verò Catholicos Principes omni paternæ charitatis contentione hortari non prætermisimus, ut periclitanti publicæ incolumitati opem ferrent, ac eademmet, quibus nuper inter se digladiati fuerant, arma in Barbaros converterent. Hos inter Charissimus in Christo Filius Noster Joannes Portugalliæ, & Algarbiorum Rex Illustis, nulla sanè ditiones suas amplificandi cupiditate illectus, nulla itidem ingruentis sibi à Turcarum armis periculi propinquitate adductus, sed suæ dumtaxat eximiæ pietatis, filialisque in Nos, & hanc Sanctam Sedem devotionis stimulis incitatus, in auxilium Christianæ Classis quamplurium bellicarum, munitissimarumque Navium subsidium, nullis incommodis, nullisque expensis, tametsi gravissimis parcens, majori, qua potuit, celeritate transmisit, validius etiam verè proximo communi Causæ, ut confidimus adfuturus. Hinc Nos ad tam præclara, omnisque humanæ laudis præconium longè supergressâ ejusdem Joannis Regis promerita Paternæ dirigentes considerationis intuitum, eique gratum nostrum animum luculento aliquo, ac singulari Pontificiæ largitatis argumento exhibere cupientes, cum probè sciremus ipsum Regem nihil impensius, vehementius nihil à pluribus annis exoptasse, quàm ut Civitatem Ulyxbonensem, sui Regni Metropolim, illiusque Diœcesim, ingenti ambas populorum numero refertas in duas partes, Orientalem scilicet, & Occidentalem, æqualiter divideremus: earumque alterâ versùs Orientem antiquo Archiepiscopatui Ulyxbonensi jamdudum vacanti relicta, aliâ verò versùs Occidentem novo Archiepiscopatui cum Patriarchali denominatione erigendo assignatâ, insignem Collegiatam in eâdem parte Occidentali, videlicet in Cappellâ Regii Palatii dictæ Civitatis existentem, quæ sex Dignitatibus, & octodecim Canonicis constat, in ejusmodi Metropolitanam, & Patriarchalem Ecclesiam erigeremus; auditâ sententiâ peculiaris Congregationis super hoc negotio à Nobis

ſpecialiter deputatæ piis, enixis, ac pluries repetitis memorati Regis votis annuimus; unde expeditis deſuper Apoſtolicis literis Civitatem, & Diœceſim prædictas in duas partes, Orientalem ſcilicet, & Occidentalem æqualiter diviſimus, facta tam antiquæ taxæ, quàm fructuum æquali itidem diviſione; relictâque antiquo Archiepiſcopatui Orientali parte, in alia Occidentali, certis expreſſis finibus, novum Archiepiſcopatum cum titulo, ac denominatione Patriarchali, ad inſtar Patriarchalis Eccleſiæ Venetiarum, addita reſervatione antiqui Regii Patronatus ereximus, & inſtituimus, ac eandem inſignem Collegiatam in Cappella Regii Palatii ſub invocatione Divi Thomæ, ſicut præmiſimus, exiſtente præviâ ſuppreſſione prioris tituli, nomine, ac titulo Metropolitanæ, & Patriarchalis Eccleſiæ ſub invocatione Aſſumptionis Beatiffimæ Virginis Mariæ inſignivimus, & tam ei præficiendum Patriarcham, quàm illius Capitulum, & Canonicos variis prærogativis ad illorum honorificentiam pertinentibus decoravimus: adjectis demum pro felici, ac quieto utriuſque Eccleſiæ Regimine, nonnullis Decretis ad evitandas juridiſtionales controverſias, quæ ex huiusmodi diviſione, ac reſpectivè erectione inter illarum Antiſtites oriri poſſent.

Hæc itaque Metropolitana, & Patriarchalis Eccleſia in parte Occidentali Civitatis Ulyxbonenſis ſic erecta quinquaginta mille Domos, & tercentum mille circiter continet habitatores, qui præfato Regi in temporalibus parent.

Quatuor Episcopos, nempe Leyrienſem, Lamacenſem, Funchalenſem, & Angrenſem præfatæ Eccleſiæ ſuffragari juſſimus: ſex inſuper Dignitates, quarum prima eſt Decanatus, ac octodecim Canonicos antiquæ Collegiatæ, ex quibus tamen trium Præbendas in Pœnitentiariam, Theologalem, & Doctorem erigi mandavimus, nec non duodecim Beneficiatos Præbendatos nuncupatos, alioſque Eccleſiaſticos Mini-

ſtros

stros eidem infervire decrevimus.

Cura animarum, ut priùs, exercebitur per Presbyterum amovibilem in præfata Ecclesiâ, in quo adest Fons Baptismalis, ac Sacrarium Sacrâ Supellectili etiam ad exercenda Pontificalia ditissimè instructum.

Præter hanc extant in eâdem parte Occidentali Civitatis aliæ viginti Parochiales Ecclesiæ, vigintiquatuor Virorum, & quindecim Monialium Cœnobîa, quamplures Confraternitates, & Hospitale; caret autem Domo Patriarchæ habitationi specialiter assignatâ, nec non Seminario, ac Monte Pietatis.

Fructus, ut præmisimus, divisi taxantur in mille florenis, ascendunt verò ad quadraginta millia Cruciatorum illius monetæ nonnullis antiquis Pensionibus onerati.

Ad Metropolitanam, & Patriarchalem Ecclesiam prædictam in sui primævâ erectione nunc vacantem transferre intendimus Venerabilem Fratrem Thomam de Almeyda Episcopum Portugallensem, cujus qualitates ab hac Sancta Sede approbatæ fuerunt, cùm Ecclesiæ Lamacensi in Episcopum præfectus, & deinde ad Portugallensem Ecclesiam, cui à septennio laudabiliter præest, translatus fuit. Quid Vobis videtur? Auctoritate Omnipotentis Dei, Sanctorum Apostolorum Petri, & Pauli, ac nostra absolvimus prænominatum Thomam à vinculo, quo tenetur, Ecclesiæ Portugallensis, & transferimus ad Ecclesiam Ulyxbonensem Occidentalem, præficientes eum in Patriarcham, & Pastorem, cum retentione compatibilium, & Decreto, quod fidei professionem emitte, & ad Urbem infra præfixum tempus transmittere, ac Juramentum fidelitatis præstare omninò tenéatur, quodque in dicta Civitate Ulyxbonensi Occidentali Domus Patriarchalis constructioni pro viribus incumbat, Seminarium instituat, Montemque pietatis erigi curet, ejus conscientiam super his onerantes.

In nomine Patris †, & Filii †, & Spiritus † Sancti. Amen.

IN



Præsent. Les Dames. Ap. del. et Scul.

IN CONSISTORIO SECRETO

Habito die 4. Januarii 1717.

ARGUMENTUM.

Communicat DD. Cardinalibus deditionem à Turcis Augustissimo Imperatori factam munitissimi Oppidi Temesvariae, & Cappellam sancto Epiphaniae die in Liberiana Basilica pro gratiarum actione habendam indicit.

VENERABILES FRATRES:



Etsi unicuique Vestrum jampridem compertum esse non ignoremus Oppidum Temesvariae non tam natura loci, quam artis operibus munitissimum, ac insuper validissimo Infidelium praesidio firmatum, postquam ab Imperio Christianorum avulsam per annos quatuor, & sexaginta supra centum; Othomanicam tyrannidem pertulerat, à Caesareis militibus vehementissimâ obsidione oppugnatum, penè ante tres menses ad deditionem redactum fuisse; tanta tamen est ejusmodi eventus felicitas, tantisque coelestis auxilii argumentis illustrata, ut licet de eâ iterum, ac saepius agi contingat, numquam profectò possit sinè novo voluptatis sensu, novâque lætitiæ accessione com-

Ff

me.

Lxxiv.

memorari. Hinc ubi primùm illum accepimus per literas Charissimi in Christo Filii Nostri Caroli Romanorum Regis in Imperatorem electi, die quidem vigesimaprima Mensis Octobris proximè præteriti ad Nos datas, sed Nobis per Dilectum Filium Ferdinandum Comitem à Lambergh supremum unius ex Cæsareis Legionibus Locumtenentem, quem idem Imperator electus ad Nos hac de causâ allegavit, nonnisi quinto ab hinc die redditas, confestim Vobiscum gaudia nostra communicare, conceptamque dudum animis vestris lætitiâ jucundissimâ commemoratione renovare, & augere æquum duximus; Præsertim cùm hanc ipsam optatissimi nuntii tarditatem ingenti scœnore, hoc est, nova aliarum ab eodem Comite à Lamberg Nobis allatarum rerum felicitate abundè compensatam esse videamus. Ab illo siquidem, qui non minùs Temesvaricæ obsidioni, quàm Hungarico inter Savum, & Danubium ante quinque menses inito prælio, quo innumeræ Barbarorum copię profligatæ fuerunt, interfuit, tamquam ab oculato teste, non solùm luculentius, & enucleatius omnem utrobique prosperè gestarum rerum rationem ediscere, sed novos etiam, & quidem uberrimos utriusque victoriæ fructus, expugnata scilicet alia hostium præsidia, ac latius in dies prolata Christianorum signa, nonnisi maxima cum jucunditate audire potuimus. Decet itaque, VENERABILES FRATRES, ut qui vestras pro Christiana Republica curas, preces, & vota, obsecrationibus, studiis, & sollicitudini nostræ sociare non omititis, lætitiâ quoque vestram gaudiis nostris societis, & quos ad implorandam cœlestem opem ministerii, ac pietatis vinculo fœderatos habuimus, eosdem ad gratias divinæ bonitati pro tot collatis donis agendas socios habeamus. Illa porrò Nobis est præcipua gaudendi materia, quòd ita sacri hujus belli successus fortunaverit Deus, ut & humiles Fidelium preces de excelsò suæ gloriæ Solio exaudissè, & Sanctissimæ Matris pro Nobis oblata

sus-

suffragia misericorditer suscepisse, non obscuris indiciis testatus fuerit. Cum enim nonnullis ab hinc mensibus opportunum illibatæ Virginis patrocinium, Auxilium Christianorum, comparaturi, ad illius Psalterium, seu Rosarium quotidie, ac devotè recitandum tam privatim, quàm publicè supplicationibus habitis, non semel Christifideles Edictis, adhortationibus, concessisque Indulgentiis excitare studuissimus: novissimè verò festum ejusdem Rosarii diem cum Officio, & Missâ propriis per universum terrarum Orbem celebrandum decrevissemus, statim ac hujus solemnitatis octiduum expletum fuit, die nimirum duodecima memorati Mensis Octobris, deditionis Signum Barbari sustulerunt, non solùm scilicet fractâ Christianorum militum viribus Infidelium pertinaciâ, sed potissimum Religione Fidelium perfidiam Turcarum expugnante, ac Cœlorum Reginâ Cæsareis Armis, & Ecclesiæ rationibus opitulante. Unde cum victoriam quidem, sed cruentam, nec sinè multâ Christianorum cæde, & sanguine post plurima præliorum discrimina reportandam speraremus, Omnipotens misericordiarum Pater, qui merita supplicum excedit, & vota, & milites propugnatores suos à largiori sanguinis effusione servavit, & palmam eis adhuc detulit triumphalem; Quinimò, ut alia etiam Nobis præberet argumenta gratulationis, eo ipso die Dilectum Filium Nobilem Virum Principem Eugenium à Sabaudia præclarâ novæ hujus victoriæ laureâ donare voluit, quò missâ ad eundem meritissimum Principem Ensis, & Pilei solemnî ritu per Nos benedictorum munera pervenerunt; Domino nimirum, cujus misericordia, & veritas manet in æternum, mirificè confirmante se Ministrorum suorum precibus clementer adesse, & Sanctæ hujus Sedis benedictionibus obsecundare. Verè igitur in diebus nostris factus est Dominus exercituum corona gloriæ, & sertum exultationis populo suo. Gaudentes proinde in eo, qui dedit victoriam,

debita illi gratiarum officia persolvamus. Quod quidem privatim Nos facere hæcenus non prætermisimus, & Vos similiter fecisse non dubitamus, communibus id ipsum Nobiscum, ac publicis votis proximo Festo Sanctissimæ Epiphaniæ in Liberiana Basilica ad Præsepe Dominicum præstatorios; ut sacratissimi illius temporis, locique Religione admonente, spem nostram Catholicæ Fidei iterum invehendæ in amplissimas Orientis Provincias, unde illa in Occidentem perlata fuit, alacrius excitare possimus: futurumque in Domino confidamus, ut qui primitias gentium in Magis adoratoribus Christi in eodem Præsepe jacentis, depulsis ignorantia, ac superstitionis tenebris, ab ipso Oriente vocavit in admirabile lumen suum, Beatissima Virgine suffragari pergente, in pristinam Sedem, ac jura, atque in easdem Regionem, ubi primùm illuxit, ubi feliciter adolevit, ubi diù regnavit, Sacrosanctæ Religionis suæ cultum restituat. Reliquum nunc est, VENERABILES FRATRES, ut constantis, ac veræ pietatis officiis, quæ sunt arma fidei potentia Deo, ferventiùs insistamus, ne illum unquam Nobis ad iracundiam provocantibus, exaltet dexteram deprimentium Nos, & lætificet inimicos nostros. Dei itaque Filium, per quem abundat consolatio nostra, novo charitatis, omniumque virtutum ardore, ac studiis vehementioribus obsecremus, ut quos ad amplificandam sui Nominis gloriam, suæque intemeratæ Genitricis cultum propagandum largitus est triumphos, novis in dies incrementis adaugeat, ac Imperatorem Electum Orthodoxæ Fidei causam fortiter, & feliciter agentem, nec non cæteros Christianos Principes Machometicæ superstitionis debellatores suo numine tueatur; atque in manu potenti, & brachio excelsò ad trophæum Crucis suæ barbaris arcibus inferendum, eat ante illos, ac portas æreas conterat, & vectes ferreos confringat: dissipet verò gentes, quæ bella voluerunt, ut Sancta nostra conculcarent, tradatque illas in opprobrium sempiternum.



IN CONSISTORIO SECRETO

Habito die 15. Martii 1717.

ARGUMENTUM.

Creat S.R. E. Cardinalem Gibertum Borromeum Patriarcham Antiochenum, Episcopum Novariensem, & Pontificii Cubiculi Præfectum.

VENERABILES FRATRES:



D majorem Dei gloriam, Sanctæque Romanæ Ecclesiæ utilitatem, ac decus, ex duobus Cardinalibus, qui ad Fraternalitatem Vestrarum numerum complendum, nunc desunt, creare intendimus unum, videlicet: Venerabilem Fratrem Gibertum Borromeum Patriarcham Antiochenum, Episcopum Novariensem, ac Cubiculi nostri Præfectum, insignibus sanè suæ gentis Cardinalibus, qui amplissimo Vestro cœtui maximo ornamento fuerunt, non tam morum innocentia, quàm aliis sacro Præfule dignis virtutibus æmulantem.

Quid Vobis videtur?

Au-

Lxxv.

Auctoritate Omnipotentis Dei, Sanctorum Apostolorum Petri, & Pauli, ac nostra creamus S. R. E. Presbyterum Cardinalem Gibertum Borromeum Patriarcham Antiochenum, & Episcopum Novariensem, cum clausulis necessariis, & opportunis.

In nomine Patris †, & Filii †, & Spiritus † Sancti Amen.





IN CONSISTORIO SECRETO

Habito die 12. Aprilis 1717.

ARGUMENTUM.

*Transfert à Legatione Urbini ad Legationem Romandiola
D. Cardinalem Joannem Antonium de Via, & declarat
Bononiæ de Latere Legatum D. Cardinalem Curtium Origum.*

VENERABILES FRATRES.



Quatuor, & ultra mensibus lapsum est tempus, ad quod Legationem Romandiolæ demandavimus Dilecto Filio Nostro Ulyssi Josepho S. R. E. Cardinali Gozzadino, qui eam pari cum justitiæ, & prudentiæ laude sustinuit. Ad eandem nunc Legationem transferre intendimus à Legatione Urbini Dilectum pariter Filium Nostrum Joannem Antonium ejusdem S. R. E. Cardinalem de Via, qui hanc Urbini Legationem non quidem à multo tempore, sed multa cum laude administrat.

Quid Vobis videtur?

Auctoritate Omnipotentis Dei, Sanctorum Apostolorum Petri, & Pauli, ac nostra transferimus à Legatione Urbini ad Legationem Romandiolæ præfatum Cardinalem de Via ad triennium, cum facultatibus solitis, & clausulis opportunis.

In nomine Patris ꝑ, & Filii ꝑ, & Spiritus ꝑ Sancti. Amen.

L2.

Lxxvi.

Labitur itidem triennium, ad quod Legationem Bononiensem commisimus Dilecto Filio Nostro Augustino S. R. E. Cardinali Cusano, qui eam sedulò, ac fideliter exercuit. Eidem propterea Legationi præficere nunc intendimus Dilectum pariter Filium Nostrium Curtium ejusdem S. R. E. Cardinalem Origum, de cujus fide, doctrina, & prudentia plurimùm in Domino confidimus.

Quid vobis videtur?

Auctoritate Omnipotentis Dei, Sanctorum Apostolorum Petri, & Pauli, ac nostra declaramus, & deputamus nostrum, & hujus Sanctæ Sedis de Latere Legatum Bononiæ præfatum Cardinalem Origum ad triennium, cum facultatibus solitis, & clausulis opportunis.

In nomine Patris †, & Filii †, & Spiritus † Sancti. Amen.





IN CONSISTORIO SECRETO

Habito die 12. Julii 1717.

ARGUMENTUM.

Quæ Rex Catholicus egerat, ut in ejus Regnis Apostolicæ Sedis Autoritas pristinum in statum restitueretur, exponit, ac deinde Abbatem Julium Alberonum, cujus opera præfatus Rex in gravissimo hoc negotio usus fuerat, S. R. E. Cardinalem creat unâ cum alio, quem in pectore reservat.

VENERABILES FRATRES.



Uæ, & quanta ab octo, & amplius annis in Hispaniarum Regnis non minùs adversùs sanctiora quævis Ecclesiæ Jura, & libertates, quàm adversùs nostram, & Apostolicæ Sedis dignitatem, ac jurisdictionem perpetrata fuerint, satis Vobis comperta sunt, & nota.

LXXVII.

Nota itidem Vobis sunt, & comperta quæ, & quanta vicissim à Nobis acta fuerint, ut ibidem Ecclesiæ, ac Sedis præfatarum indemnitati auctoritate nostra consuleremus, eosque insuper, qui utramque læserant, ad illatas utrique injurias convenienter sarcindas adduceremus. Cuncta hæc propterea Vobis, qui illa benè nostis, singillatim recensere prætermitt-

Gg

ti-

timus: nunc præsertim, quando divinæ bonitati placuit, ut his tandem in rebus possimus Vobis hodie lætiora nunciare. Nuper scilicet Charissimus in Christo Filius Noster Philippus Hispaniarum Rex Catholicus, inclinante Domino cor ejus ad faciendas justificationes suas, pro eo, quo se teneri declaravit, Ecclesiæ jura tuendi singulari studio, disertè mandavit, ut quibuscumque ordinationibus, seu Decretis tam ab ipso, quàm ab ejus Administris aliàs in contrarium editis, minimè refragantibus, vetitum jamdudum Hispanæ Nationi cum hac Romana Curia commercium prorsus in integrum restituatur: quæcumque præterea Apostolicæ literæ sublati impedimenti debita, ut priùs, executioni de cætero demandentur: Noster itidem, & hujus Sanctæ Sedis in illis Regnis Nuncius, ejusque Tribunal, Ministri, & Officiales quilibet ad prærogativas, honores, facultates, ac jurisdictiones omnes, quibus antea frui, & potiri consueverant, ac potissimum ad liberam Spoliorum, & Vacantium in illis partibus Ecclesiarum fructuum ad Cameram Nostram Apostolicam spectantium administrationem plenè redintegrentur; prout re ipsa Venerabilis Frater Pompejus Archiepiscopus Neocæsareæ, quem nostrum, & dictæ Sedis Nuncium in eisdem Regnis deputavimus, jam redintegratus fuit: omnia demùm quibuscumque in rebus tam ad Ecclesiam, quàm ad Apostolicam Sedem pertinentibus in eum, quo erant, statum tam initio Regni ipsius Philippi Regis, quàm tempore cla. me. Caroli Secundi, dum vixit, Hispaniarum Regis Catholici ejus Prædecessoris penitus reponantur, & reposita esse intelligantur; ita ut ejusmodi in rebus id totum, quod tunc servabatur, etiam in posterum similiter servetur, ac servari debeat. Quam sanè postremam declarationem plurimi faciendam esse ad novas quascumque Ecclesiasticæ jurisdictionis, ac Apostolicæ auctoritatis offensas cumulatè reparandas nemo est, qui possit ambigere. Hæc omnia pertractata, acta, gesta, ac tandem ad eum,

quem

quem audistis, felicem exitum perducta, & stabilita fuerunt enixo potissimum studio Dilecti Filii Abbatis Julii Alberoni, cuius scilicet unius operâ præfatus Philippus Rex in ejusmodi negotiis usus fuit. Accedit ad ipsius Alberoni commendationem, quod idem hic est, qui memorati Philippi Regis jussu sedulò curavit, ut anno præterito plurium bellicarum Navium, ac trirremium agmen munitissimum adornaretur, quod ab eodem Rege rogatu nostro in auxilium Christianæ Classis adversus Turcas transmissum fuit; nec sanè imparem adhibuit curam, ut etiam hoc anno à prædicto Rege in eundem finem mitteretur aliud validius sexdecim bellicarum Navium subsidium, quod omnibus necessariis optimè instructum è Portu Gadicensi jam solvisse nuperrimè accepimus. Æquum propterea existimamus præsertim, ut nostram erga Regem, qui Nobis, & Ecclesiæ satisfacere non erubuit, paternam charitatem luculento aliquo testimonio comprobemus, Virum hunc ei gratum, simulque de Apostolica Sede, ac de publica causâ præmissis nominibus benè meritum Fraternitatum Vestrarum numero adscribere: ut alacriùs ad alia, & quidem majora in posterum peragenda, quæ Christianæ Reipublicæ, & Catholicæ Ecclesiæ læta esse possint, & utilia, tam Rex ipse, quàm idem ejus Minister Alberonus amplissimo hoc Pontificiæ largitatis munere vehementiùs inflammentur. Prætereà ut Fraternitatum Vestrarum numerus compleatur, & sic completus, quemadmodum Vobis intimo paterni nostri cordis affectu à Domino apprecamur, cum prospera, ac diuturna omnium Vestrum incolumitate ad plurimos annos integer perseveret, creare intendimus etiam alium Cardinalem, qui ad ejusmodi numerum complendum in præsentī deest: illum tamen rationabilibus ex causis volumus in pectore reservare.

Quid Vobis videtur?

Auctoritate Omnipotentis Dei, Sanctorum Apostolorum Petri, & Pauli, ac nostra creamus S. R. E. Cardinalem Julium Alberonum, ac alium, quem in pectore reservamus, quovis loco, & tempore arbitrio nostro declarandum cum clausulis necessariis, & opportunis.

In nomine Patris †, & Filii †, & Spiritus † Sancti. Amen.





IN CONSISTORIO SECRETO

Habito die 1. Octobris 1717.

ARGUMENTUM.

Novam de Turcis relatum in Hungaria victoriam, & Albæ Græcæ deditionem DD. Cardinalibus significat. Cappellam in Ecclesia S. Mariæ super Minervam pro gratiarum actione, & iusta Christianæ pietatis officia in Pontificio Sacello pro Defunctis tam in Hungarica Acie, quàm in Navalibus ad Orientem præliis indicit.

VENERABILES FRATRES:



Estis recurrentibus diebus Gloriosissimæ Cælorum Reginæ dicatis, cujus auspiciis superiori anno amplissimos de Turcarum Tyranno triumphos Christiana Religio deportavit, plenior hoc anno integratus est Nobis cursus lætitiæ, & felicitatis; Ita scilicet anniversaria Magnæ Dominæ celebritas rediit, ut anniversarias itidem Sacrosanctæ Ecclesiæ victorias afferret, conversoque anni circulo novas Nos de eodem hoste immanissimo palmas, tamquam tempestivos Virginei præsidii fructus colligeremus. Hæc profectò jucundissima recordatio animum nostrum

LXXVIII

strum incredibili voluptate perfuderat, cum sub finem præteriti Mensis Augusti, lætissimi ex Hungaria nuntii suas primùm ad Albam Græcam Turcarum copias, mox Urbem ipsam à Cæsareis Militibus subactam esse significarunt. Cùm verò ipsemet Charissimus in Christo Filius Noster Carolus Romanorum Rex in Imperatorem Electus, per Dilectum Filium Nobilem Virum Joannem Vvenceslaum Comitem de Gallas suum apud Nos, & hanc Sanctam Sedem Oratorem, de iisdem felicissimis armorum suorum successibus certiores Nos fecerit, Vobiscum etiam ex hoc loco lætitiâ hanc nostram communicandam esse censuimus: ut conjunctis gaudiis narrantes laudes Domini, celebremus mirabilia ejus, quæ fecit, prodigia ejus, & judicia oris ejus. Ac sanè qui totam rerum gestarum rationem perpenderit, inter præclara opera dexteræ Excelsi partæ nuper victoriæ felicitatem recensere non dubitabit. Quantum enim in discrimen res nostræ adductæ fuerint, & quàm levi momento belli fortuna penderet, nemo ex Vobis est, qui ignoret, Albam Græcam nimirùm naturâ, situ, mœnibus, operibusque validissimè communitam, nec tam militari præsidio, quàm justo propè exercitu firmatam ita obsidebant Christiani, ut simul ipsi innumeris Barbarorum copiis undique obfiderentur; quæ multitudine exultantes, ac præteritarum cladum memoria efferatæ potiùs, quàm fractæ; inaudita temeritate, ut plurimum literæ nunciabant, Christianorum vires parvi admodùm facere præseferabant. Animum proindè nostrum non levis formido concusserat, nè, si quid secùs eveniret, superiorum victoriarum fructus interire posset, Christianisque armis, ac terris gravissima pericula imminerent. Verùm trepidus hic rerum status tamdiù perduravit, donec illucescente die Beatissimæ Virginis in Cœlum Assumptæ triumphis consecrato, mirifica periculorum conversio facta fuit, & nova rerum facies emerfit; Illo siquidem faustissimo die, quo

Nos

Nos, publicis indiſtis precibus, ad Montem Domini aſcendimus, ac ferventioribus votis in Liberiana Baſilica ejuſdem intemeratæ Matris patrocinium Vobiſcum imploravimus: propoſitâ inſuper peccatorum indulgentia iis, qui per octo conſequentes dies eamdem Baſilicam adiſſent, Patrem Miſericordiarum per Immaculatæ Virginis ſuffragia exoraturi; Dilectus Filius Nobilis Vir Princeps Eugenius à Sabaudia, Cæſarei Exercitus Dux inclytus, novâ indutus virtute ex alto, militumque ſuorum alacritatem conſpicatus, moræ diuturnioris pertæſus, & barbaricæ arrogantiæ impatiens, taciè copias è vallo educere conſtituit, ut hoſtem ferocientem intrâ aggereſ, & foſſas ſuas improvifus adoriretur. Strenuo autem conſilio divinitus immiſſo divina deinceps beneficia obſecundarunt; Nebula enim tam opportunè incedentium Chriſtianorum agmen obtexit, ut priùs expugnari caſtra, quàm hoſtem adventare Barbari intelligerent; tamquam ſcilicet renovatis Iſraelitici temporis ſignis (quod ſinè lætitiæ lacrymis commemorare non poſſumus) Beatiffima Virgo, quam in antiquo fœdere Nebulæ typus adumbraverat, perſpicuo inditio operi prætendens, ſuos ſe milites protegere teſtaretur, qua illi Duce non tam ad pugnam, quàm ad certam victoriam properarent. Adhùc tamen Barbari ad plures certaminis horas acriter reſtiterè, donec ultra viginti quinque millibus cæſis, captiſque caſtris, præcipitem in fugam verſi, ingentem apparatus ex vaſtiſſimis Provinciis ſumma vi contractum, bellica tormenta quadraginta, & amplius ſupra centum, vexilla plurima, comeatuum, opeſque penè omnes Cæſareis copiis diripienda reliquerunt. Tum altero poſt die Alba Græca, ſublato dedicationis ſigno, implorataque Victoris fide, in Chriſtianorum poteſtatem redacta eſt. Quis igitur, VENERABILES FRATRES, paribus grati animi ſenſibus, verbisque in tanta ſecundarum rerum proſperitate loquetur potentias Domini, auditas faciei

om-

omnes laudes ejus? Cùm enim perfidæ gentes in sua feritate confiderent, & acceptas hætenus calamitates reparare niterentur, multiplicata est in eis ruina; Nobis verò divinam opem per Beatam Virginem, auxiliùm Christianorum, invocantibus, geminata lætitia est, immensamque Turcarum aciem aut cæsam, aut fugatam, captamque munitissimam Arcem uno propè tempore accepimus; neque id profectò tanta cum Christianorum militum jactura contigit, quantam in sola Urbe expugnanda futuram conjiciebamus. Agamus propterea Omnipotenti Deo gratias, quas possumus maximas, neque eas privatim reddidisse sit satis, sed publicis etiam officiis amplissimas persolvamus. Quamobrem proximâ die Dominica, quæ erit prima inchoati Mensis Octobris, qua scilicet Festum Rosarii, seu Psalterii ejusdem Sacratissimæ Virginis celebrari consuevit, quæque triumphalem superiorum temporum memoriam, ac partam olim sub iisdem auspiciis ad Echinadas Insulas insignem adversus eosdem Turcas Christianorum victoriam repræsentat, ad Ecclesiam S. Mariæ super Minervam convenientes, solemni ritu gratiarum actionem Altissimo Domino celebrabimus, qui ad tuendam Ecclesiam suam, & amplificandam suæ Genitricis gloriam, fecit nobiscum misericordiam suam. Eidem præterea acceptum referemus, quod etiam maritimis præliis Christiana Classis tam strenuè hoc anno Turcicam exceperit, ut nihil in Militibus Christi desiderari potuerit, aut alacritatis ad dimicandum, aut fortitudinis ad resistendum; quorum scilicet virtute immanes hostium conatus depulsi sunt, qui Christianis Insulis, Terrisque bellum, & perniciem inferre moliebantur. Tertiâ autem feriâ sequentis hebdomadæ in Pontificio nostro Sacello justa Christianæ Religionis officia persolvemus propugnatoribus Christi, qui fortiter decertantes tam in Hungarica acie, quàm in Navalibus ad Orientem conflictibus, pro Dei causa gloriose occubuerunt. Cæterùm quia fecit Dominus

potentiam in brachio suo, ut sinè timore serviamus illi, studeamus VENERABILES FRATRES, in sanctitate, & iustitia divinorum beneficiorum fructum augere, ac Religionis pugiles novis obsecrationum nostrarum subsidiis confirmemus; ne illi ad contemnendam mortem, ac fundendum pro re Christiana sanguinem alacriores esse videantur, quàm Nos ad fundendas preces, & coeleste præsidium pugnantibus implorandam; præsertim verò tam luculentis eventibus edocti, præsentissimum B. Virginis patrocinium piis exercitationibus, studiis, votisque magis nobis in dies conciliare satagamus: eamque jugiter obsecremus, ut omnia bellicæ hujus felicitatis impedimenta amoliantur, nec adversi quidquam incidere sinat, quo secundus contra Turcas Christianorum Armorum cursus intersistat, aut retardetur; Quam in rem cum operam, & sollicitudinem omnem conferre hætenus non omiserimus, nec in posterum omitturum sumus, decet conatus nostros communibus etiam vestris apud Deum precibus adjuvari; ut Provincias olim florentissimas ab avita Religione, & Christianis sacris abstractas, extincta tandem Barbarorum tyrannide, & superstitione deleta Christo redditas, atque in pristinam Evangelii libertatem revocatas Authori Deo Vobiscum aliquando gratulemur.

IN EODEM CONSISTORIO.

Post propositiones, & præconia Ecclesiarum declarat S. R. E. Cardinalem Emericum Csaky Archiepiscopum Colocensem, quem in alio Consistorio habito die 12. Julii ejusdem anni creaverat, & in pectore reservaverat.

VENERABILES FRATRES.

UT Hungaricis Victoriis plenior hac die lætitiæ cumulus addatur, ad gloriam Omnipotentis Dei, sanctæque Romanæ Ecclesiæ utilitatem, ac decus, palàm hodie evulgare, ac

LXXIX

H h

de-

declarare intendimus illum Cardinalem, quem in Consistorio secreto die 12. præteriti Mensis Julii habito creavimus, & in pectore reservavimus, videlicet Venerabilem Fratrem Emericum Csaky Archiepiscopum Colocensem; congruum enim, ac valdè opportunum existimamus hoc tempore Hungaricum Præsulem non tam generis claritate, quàm virtutibus præstantem, amplissimo Ordini vestro adscribere, ut tam ipse, quàm alii illius Apostolici Regni Episcopi ad agrum sibi creditum excolendum nunc maximè alacriores reddantur, cum Messis amplior majorem Operariorum sedulitatem exquirat: ipsumque Regnum speciali quodam jure huic Sanctæ Sedi addictum, quippe quod ei jamdudum à Sancto Stephano Rege oblatum fuerat, novo hoc, & præclaro Pontificiæ largitatis argumento lætari valeat.

Quid Vobis videtur.

Auctoritate Omnipotentis Dei, Sanctorum Apostolorum Petri, & Pauli, ac nostra declaramus S. R. E. Presbyterum Cardinalem Emericum Csaky Archiepiscopum Colocensem cum derogationibus, & clausulis necessariis, & opportunis.

In nomine Patris †, & Filii †, & Spiritus † Sancti. Amen.





IN CONSISTORIO SECRETO

Habito die 11. Octobris 1717.

ARGUMENTUM.

Abjurationem Lutheranae haereseos à Friderico Augusto Principe Regio Poloniae, & Electorali Saxoniae ante quinquennium Bononiae peractam DD. Cardinalibus significat, & plures illius literas ea de re ad Sanctitatem Suam datas recitari mandat.

VENERABILES FRATRES.



X quo supremum hoc Catholicæ Ecclesiæ culmen non minùs inviti, quàm immerentes, Deo sic disponente, conscendimus, nulla Nobis antiquior cura fuit, quàm ut Charissimi in Christo Filii Nostri Augusti Poloniae Regis Natus, in eà, qua tunc erat, tenerrimâ ætate aures præbere assuesceret sermonibus Domini, quorum declaratio illuminat, & intellectum dat parvulis: adeoque Catholicis institutis in Romanæ Religionis professione educaretur; Neque enim aliter magnas illas spes, quas olim Sancta Dei Ecclesia in ejusdem Augusti Regis ad eam reversione collocaverat, impleri posse compertum habebamus. Nullas propterea Pastoralis sollicitudinis partes, nullumque

Lxxx

officiorum genus prætermisimus, quo Regium Genitoris animum ad nostra de Pueri Principis educatione consilia impigrè suscipienda traduceremus. Verùm, tametsi ille pro ea, qua præditus est, animi docilitate pronis quidem studiis voluntati nostræ obsequi optaret: humani tamen generis nequissimus hostis, & sapientia carnis, quæ inimica est Deo, assiduus conatibus nostris acriter obsistebant. Hinc nimirum occurfabant Poloniæ res turbulentissimæ, quæ cum Regnum illud miserè dilacerarent, Regem deterrebant, ne A catholicorum animos exulceraret, quorum ope, fide, & studio maximè nitebatur. Inde Principis Mater, & Avia hæreticis erroribus innutritæ, nè ab infelici communione, complexibusque suis Princeps ipse abstraheretur, pertinaciter obluſtabantur; ut alia plurima silentio prætereamus, quæ fusiorem historiam adæquarent. Divino tamen præsidio freti, spem perficiendæ rei numquam abjecimus, neque ullis difficultatibus depulsi ab incœpto destitimus. Unde cum Dilectum Filium Nostrum Annibalem, S. R. E. Cardinalem Albanum nostrum secundùm carnem ex Fratre Nepotem ante octo annos in Germaniam legavimus, inter præcipua, & potiora mandata arduam hujusce negotii provinciam eidem dedimus: Deoque largiente ita illi res feliciter cessit, ut præter alia multa benevolæ voluntatis argumenta sibi à Rege delata, illudque potissimùm, quod ipsius Cardinalis rogatu Ecclesiam in Civitate Lipsiæ ad usum Catholicorum in illâ degentium aperiri jussisset: ab eo insuper literas ad Nos datas obtinuerit, quibus Regiam suam fidem obstrinxit daturum se quamprimùm Principi Filio Institutores, & Familiares Orthodoxos: cumque jam non amplius Puerum, ut ab hæreticorum consuetudine, & contagione procul abesset, ac cum integra libertate animæ suæ salutem consulere possêt, ad peragrandas Catholicas Provincias dimissurum. Et sanè cum fidem Nobis suam Rex liberasset, optatissimum tandem tam

novæ institutionis, quàm itineris fructum percepimus; Cùm enim Bononiam Adolefcens Princeps perveniffet, in manibus Dilecti Filii Joannis Baptiftæ Salerni Societatis Jefu Presbyteri, necessariis ad id facultatibus per Nos instructi (cujus fidem, studium, fedulitatẽ, & prudentiam hac in re sapientiffimè gerendâ fatis commendare non possumus) coram Dilecto itidem Filio Nostro Laurentio S. R. E. Cardinali Cafono tunc Bononiæ nostro, & Apostolicæ Sedis Legato, ac uno ex Cardinalibus in totâ Republicâ Christianâ contra hæreticam pravitatem generalibus Inquisitoribus ab eadem Sede specialiter deputatis, die xxvii. Novembris anni millesimi septingentesimi duodecimũ, post maturam, ac diuturnam plurimum mensum deliberationem, post prævisum ingruentium sibi domi, forisquẽ molestiarum non levem cumulum: solâ agnitæ veritatis ratione excitatus, solo æternæ suæ salutis desiderio incensus, Lutheranz hæreseos, in quâ natus, & educatus fuerat, ejuravit errores, literasque suæ erga Nos, & hanc Sanctam Sedem obedientiæ, gratique erga Dei vocantis misericordiam animi testes ad Nos dedit; prout ex authentico Abjurationis testimonio; ipsiusque Principis literis ad Nos tunc datis, mox legendis plenius percipietis.

Hic ingressus fuit Consistorium R. P. D. Battellus Archiepiscopus Amasenus, Apostolicorum Brevium ad Principes à Secretis, legitque primũ Abjurationem Lutheranz hæresis à Principe Regio Poloniæ, & Electorali Saxoniz factam in manibus R. P. Salerni Societatis Jefu Presbyteri Bononiæ die 27. Novembris 1712., & mox epistolam ab ipsomet Principe ad Sanctissimum de eodem argumento perscriptam ibidem, die 14. Decembris ejusdem anni; quibus lectis Sua Sanctitas ita Orationem profecuta fuit:

Cæterum humanæ illæ rationes, quæ Dilectissimum in Christo Filium Nostrium Fridericum Augustum Regium Poloniæ,

niz,

niæ, ac Electoralem Saxoniz Principem erroribus mancipatum tamdiu detinuerant, eadem prohibuerunt, ne per integrum ferè quinquennium gloriosissimi facti notitia vulgaretur. Inter eà verò, & si occultè, syncerè tamen Ipse Catholicam Religionem professus est; non solum enim à profanis hæreticorum ritibus prorsus abstinuit, sed etiam Sacrosancto Missæ Sacrificio quotidie interfuit, Sacramenta Pœnitentiæ, & Eucharistiæ crebrò percepit, aliaque dedit veræ pietatis, & religionis documenta, quæ Romanæ Ecclesiæ Filium apprimè decent. Sæpè insuper Nobis per literas testatus fuit gravatissimè se ferre impositam occultandæ Religionis necessitatem: nec sibi gratius quidquam futurum, quàm ut ad hanc almam Urbem accedere possët, & coram Nobis publica edere Romanæ communionis testimonia. Qua de re, cùm plurimas ejus epistolas ex variis, in quibus morabatur, Civitatibus ad Nos transmissas acceperimus, paucas selegimus, quas nunc audietis.

Leetæ hîc fuerunt à prædicto R. P. D. Battello septem aliæ Epistolæ à memorato Principe ad Sanctitatem Suam datæ: prima nempe Florentiæ die 14. Aprilis 1713., secunda Veronæ die 30. Octobris ejusdem anni, tertia Parisiis die 24. Septembris 1714., quarta Venetiis die 2. Maji 1716., quinta ibidem die 3. Octobris ejusdem Anni, sexta ibidem die 5. Maji 1717., septima ibidem die 17. Julii ejusdem anni; quibus perlectis Sua Sanctitas ita prosecuta fuit.

Placuit tandem Patri Misericordiarum, tam nostris, quàm ipsius optimi Principis precibus clementer annuere, eaque impedimenta remove, quæ tam diuturnam utriusque nostrum votis moram injeceant. Ille siquidem à Patre Rege potestatem aliquandò obtinuit, ut Catholicam Religionem, quam per quinque hætenus annos occultè coluerat, palàm profiteretur, atque exerceret. Hac proinde de re confestim ad Nos literas dedit, obsecravitque, ut quod jam Ipse publicis

nostræ Religionis officiis Viennæ in Austria, in ipsa Cæsareæ Aulæ celebritate, totiusque Germaniæ luce, vulgare parabat, nostræ simul vocis præconio ad divinæ bonitatis laudem, & catholicæ Ecclesiæ lætitiâ, in hac etiam veræ Religionis Arce sinè morâ promulgaretur, quemadmodum ex iisdem literis per celerem cursores ad Nos novissimè allatis intelligetis. *Hic perlecta fuit ab eodem R. P. D. Battello alia Epistola à prædicto Principe ad Sanctitatem Suam conscripta, ac per certum cursores missa ex oppido San Pelten die 27. Septembris 1717. cujus expleta lectione Sanctissimus ita Orationem absolvit.*

Videt unusquisque Vestrum, VENERABILES FRATRES, quantis Nos divitiis misericordiæ suæ in hoc Catholicæ veritatis triumpho locupletaverit Deus, & quàm opportunè bellicorum successuum, de quibus adeò lætati sumus, felicitati Apostolicæ doctrinæ victorias inferuerit. Cantemus igitur Domino canticum novum, quia in conspectu Gentium revelavit iustitiam suam, debitasque ei pro collatis donis gratias humiliter agentes, eundem jugiter obsecremus, ut qui jam ex clarissima Domo non solum Poloniæ Regem, & Principem ejus Filium, sed nuper etiam Dilecti Filii Nostri Christiani Augusti Cardinalis de Saxoniâ germanum Fratrem natu majorem, ejusque ex altero Fratre Nepotem ad agnitionem veritatis adduxit, reliquos etiam ex eadem Domo Principes, qui supersunt, à vera Christi Ecclesiâ, & semitâ salutis adhuc abrepti, vocare dignetur in admirabile lumen suum, quò ii omnes, qui Saxoniam Domum in hæresi tuendâ olim secuti sunt errantem, aliquandò sequantur resipiscentem, ac Sacrosanctâ Religione illustribus eorum exemplis propagata, major sit gloria domus istius novissimæ plus, quàm primæ. Ceterum cum ad uberiores gratias pro Hungaricis Victoriis Deo agendas concessâ peccatorum Indulgentiâ quoscumque Christifideles ad Ecclesiam Beatæ Mariæ de Animâ Nationis Theutonicæ sive hefterna, sive hodierna

die visitandam excitaverimus, par est, ut Nos quoque. Omnipotenti Deo utramque ibidem Catholicæ Religionis tam de Mahometicâ superstitione, quàm de hæretica pravitate victoriam gratulemur: geminumque triumphum ad universæ Ecclesiæ gloriam, prædictæque Nationis Theutonicæ utilitatem, ac decus potissimum redundantem conjunctis hodie gratiarum actionibus celebremus. Reliquum est, VENERABILES FRATRES, ut non solum annunciemus opera Dei in exultatione, sed ad implendam Sanctorum gaudiorum perseverantiam exhibeamus Nosmetipsos sicut Dei Ministros in charitate non fictâ, in Spiritu Sancto, in virtute Dei per arma justitiæ, quæ sola possunt destruere omnem altitudinem extollentem se adversus scientiam Dei, & ab Ecclesiæ finibus errores omnes, & calamitates arcere.





Suspensam ad aliquot non ferre aliquo vel ferre maius voluisti. Ag. Conf.

IN CONSISTORIO SECRETO

Habito die 6. Decembris 1717.

A R G U M E N T U M.

Plenariam Indulgentiam in formâ Jubilei indicis ad divinam opem in periculis, quæ Italicæ tranquillitati imminere prospicit, implorandam.

VENERABILES FRATRES.



Eptemdecim jam lapsi sunt anni, magnum profectò æui mortalis spatium, ex quo nullo licèt meritorum nostrorum suffragio, placuit Divinæ bonitati, cui proprium est infirma mundi eligere, humilitatem nostram ad supremi Apostolatus fastigium evocare.

Quantis interea, & quàm gravibus malorum procellis agitati fuerimus, optimè nostis, quippequi in partem sollicitudinis nostræ vocati, magnam etiam calamitatum nostrarum partem sustinuisitis. Lætiora quidem in posterum sperare Nos fecerant præclaræ illæ victoriæ, quas Dominus Exercituum Christianis armis adversùs Turcas novissimè largitus est: Opus sanè dexterae Excelsi, qui fecit virtutem, & percussit inimicum. Verùm non minùs ea, quæ imminet Italicæ tranquillitati, pericula,

Ii

quàm

LXXXI

quàm nova in dies, ac semper acerbiora, quæ Ecclesiasticæ libertati, Pontificiæ authoritati, imò etiam ipsimet Orthodoxæ Religioni infliguntur, vulnera satis superque Nos admonent nondum oblitum esse Dominum delicta nostra. Idcirco divinam indignationem placaturi ad vestras in primis, deinde ad reliquorum hujus Almæ Urbis Christifidelium preces confugere decrevimus, concedendo, ut id ipsum alacrius peragatur, plenariam Indulgentiam in forma Jubilei iis omnibus, qui quarta, & sexta feriis, ac Sabbato proximè venturæ hebdomadæ, quæ erit tertia Adventus; jejunaverint, nec non Ecclesias, seu Basilicas Sancti Joannis in Laterano, Principis Apostolorum, & Sanctæ Mariæ Majoris, vel earum aliquam intrà spatium ejusdem hebdomadæ saltem semel visitaverint, & ibidem oraverint, & peccata sua confessi SS. Eucharistiæ Sacramentum in Dominica die immediatè sequenti, vel alia die intrà eandem hebdomadam reverenter susceperint, pauperibusque aliquam elemosynam, prout sua cuilibet pietas suaserit, erogaverint. Hunc ipsum subinde cœlestem thesaurum ad reliquos etiam Christifideles Italiæ universæ, & Insularum illi adjacentium, extendemus. Agite igitur, VENERABILES FRATRES, opportuno hoc, atque acceptabili tempore Dominici Adventus Deum Optimum Maximum, qui est multæ misericordiæ omnibus invocantibus Eum, jugiter obsecrate, ut confortet Nos in potentia virtutis suæ, effundatque super Nos spiritum consilii, & fortitudinis, quo inter tot rerum, ac temporum difficultates, & quæ agenda sunt, videamus, & ad implenda, quæ viderimus, convalescamus. Aderit Nobis Dominus, aderit Ecclesiæ, aderit causæ suæ, si Nos officium nostrum impleverimus, si Vos vestro non defueritis.



IN CONSISTORIO SECRETO

Habito die 10. Januarii 1718.

ARGUMENTUM.

Ferrariæ de Latere Legatum declarat D. Cardinalem Joannem Patritium.

VENERABILES FRATRES.



Errariensem Legationem, quam Dilectus Filius Noster Julius S. R. E. Cardinalis Piazza longè ultra triennium, ad quod ei illa à Nobis demandata fuerat, pari cum iustitiæ, ac prudentiæ laude administravit, committere nunc intendimus Dilecto pariter Filio Nostro Joanni ejusdem S. R. E. Cardinali Patritio; de cujus fide, doctrinâ, rerum usu, probatâque in gravissimis ab eo laudabiliter gestis muneribus integritate plurimum in Domino confidimus.

Quid Vobis videtur.

Auctoritate Omnipotentis Dei, Sanctorum Apostolorum Petri, & Pauli, ac nostra declaramus, ac deputamus nostrum, & hujus Sanctæ Sedis de Latere Legatum Ferrariæ præfatum Cardinalem Patritium ad triennium, cum facultatibus solitis, & clausulis opportunis.

In nomine Patris ꝑ, & Filii ꝑ, & Spiritus ꝑ Sancti. Amen.



IN CONSISTORIO SECRETO

Habito die 15. Martii 1719.

ARGUMENTUM.

Matrimonii inter Fridericum Augustum Electoralem Saxoniae, Regiumque Poloniae Principem, & Mariam Archiducissam Austriae cla. mc. Josephi Imperatoris Filiam natu majorem stabiliti nuncium DD. Cardinalibus communicat.

VENERABILES FRATRES.

LXXXIII



Eptemdecim jam lapsi sunt menses, ex quo Vobis, magno cum animi nostri gaudio ex hoc loco nunciavimus Dilectissimum in Christo Filium Nostrum Fridericum Augustum Electoralem Saxoniae, & Regium Poloniae Principem Catholicam Religionem, quam longè prius, nempe ante quinquennium, Lutheranis erroribus ejuratis, per Dei gratiam susceperat, ac subindè sincère quidem, & piè, sed multis de causis occultè coluerat, in Cæsareæ tandem Aulæ frequentia, ac celebritate publicè professum fuisse. Nec fanè ex animo nostro unquam excident effusissimæ illæ Fraternitatum Vestrarum gratulationes, quibus lætissimum nuncium, Nobis promulgantibus, exceperitis:

Pro-

Probè enim Nobiscum intelligebatis, quanta fieret veræ Christi Ecclesiæ, & Catholicis rationibus ex illius Principis resipiscentiâ amplitudinis, & securitatis accessio. Quis autem Vestrum non simul etiam fore tunc prævidit, ut Apostolicæ doctrinæ hostes, tanto partium suarum amisso præsidio, veluti gravissimo accepto vulnere, furentes infremerent. Et quidem explicari vix potest quos conatus, quas artes, quas minas adhibuerint, ut pessimæ causæ consulerent, ac Principem ad Petri Ovile reversum, ejusque Genitorem, Charissimum scilicet in Christo Filium Nostrum Augustum Poloniæ Regem à Rei Catholicæ tuendæ studio deterrent. Nequaquam proptereâ Nos concidimus animo, sed de illius ope confisi, adversus quem non est consilium, & populi meditantur inania, in eam potissimum rem incumbendum, omnemque operam conferendam esse censuimus, ut cum jam de Uxore eidem Electorali Principi adjungendâ cogitaretur, prævalido aliquo opportunoque Matrimonii fœdere adversus inimicorum insidias, & impetus Apostolica Religio communiretur; quod non solum potentissimi Principis affinitate de futuris Catholicis Saxonie Ditionis hæredibus spes nostras confirmaret, verum etiam ab omni in posterum novandarum rerum molimine Aatholicos penitus depelleret. Idcirco per Dilectum Filium Religiosum Virum Joannem Baptistam Salernum Societatis Jesu Presbyterum, cujus fidem, dexteritatem, & prudentiam in memorato Principe ad Christi Ecclesiam revocando feliciter impensam experti eramus, apud Charissimum in Christo Filium Nostrum Carolum Romanorum Regem in Imperatorem Electum assiduis officiis, precibus, ac suasionibus institimus, ut ex duabus clame. Josephi, dum vixit, eorundem Romanorum Regis similiter in Imperatorem Electi Fratris, ac Prædecessoris sui Filiabus alterutram ipsi Electorali Principi in Matrimonium collocari vellet; Quæ sanè res, dum in Cæsarea deliberatione diù,

mul-

multumque versaretur, tametsi præfatus Religiosus Vir nec mandatis nostris, nec zelo suo, nec negotii gravitati ulla ex parte umquam defuerit, diurnam tamen sollicitudine curas nostras exercuit; Ast Patre tandem Misericordiarum clementiæ suæ aurem ad preces nostras inclinante, placuit nuper Cæsari pro eximio illo, quo in Orthodoxæ Religionis amplificationem incensus est, studio, animi sui sententiam, cujus præclara erit semper, & felix in Ecclesiæ annalibus recordatio, palàm aperire; qua scilicet non modò petitioni nostræ benignè obsecundare voluit, sed ut plenius Poloniæ Regis votis satisfaceret, Dilectissimam in Christo Filiam Nostram Mariam prædicti Josephi Regis in Imperatorem electi Filiam natu Majorem eidem Electorali Principi Saxonie nuptui se locaturum disertè pollicitus est. Quem sanè optatissimum nuncium cum nudius tertius per celerem Cursorem acceperimus, nullâ interjecta morâ, singulare hoc Altissimi in Ecclesiam suam beneficium duximus Vobis ex hoc loco significandum: hortantes Vos, ut Omnipotenti Deo, qui Nos inter gravissimas curas, quas in hisce perturbatissimis Christianæ Reipublicæ temporibus assidue sustinemus, prospero hoc Catholicæ Religionis eventu clementer consolatur, debitas gratiarum actiones Nobiscum rependatis: omnesque insimul orationibus instantes, ac pietatis operibus, hoc præsertim acceptabili tempore, ferventiùs insistentes, nova semper, ac majora Orthodoxæ Fidei incrementa à Divina bonitate impetremus.





IN CONSISTORIO SECRETO

Habito die 29. Martii 1719.

ARGUMENTUM.

*Constituit D. Cardinalem Albanum S. R. E. Camerarium loco
bo: me: Cardinalis Jo: Baptista Spinulae proxime defuncti, cum
emolumentorum Sigilli dismembratione, eorumque in Camera
Apostolicae beneficium applicatione.*

VENERABILES FRATRES.



Acante nuper officio Camerariatus nostri, & S. R. E. per obitum bo: me: Jo: Baptista Cardinalis Spinulae nuncupati, concedere illud intendimus Dilecto Filio Nostro Annibali S. Mariae in Cosmedin Diacono Cardinali Albano nuncupato, nostro secundum carnem ex Fratre germano Nepoti ad ejus vitam. Quia tamen inter maximas, quibus jugiter premimur, Pastoralis muneris nostri curas, illa etiam nunc est, quae ad gravissimas Apostolici Aërii angustias ea, qua possumus, ratione, sublevandas quotidie Nos urget; ac prætereà benè memores sumus arctissimi illius juramenti, quod de inviolabiliter observandâ Constitutione moderatoriâ donationum, ac distributionis red-

di-


dituum Ecclesiasticorum in Confanguineos, vel Affines Romani Pontificis pro tempore existentis à fel. rec. Innocentio Papa XII. Prædecessore nostro editâ, non semel præstitimus: illudque, divinâ adjuvante gratiâ, exactè adeò, ac religiose usque ad extremum vitæ nostræ spiritum adimplere cupimus; ut à quovis etiam remoto periculo ejusmodi juramentum violandi abesse velimus; Idcirco Officium Camerariatus supradictum eidem Cardinali Albano ita conferre intendimus; ut non modò moderationes, restrictiones, ac limitationes, quas idem Innocentius Prædecessor noster, tam per aliam suam Constitutionem anno Incarnationis Dominicæ 1698. quarto Idus Augusti Pontificatus sui anno octavo editam, quàm aliàs quomodocumque hac in re præscripsit, omninò servandæ sint: eaque potissimum fructuum, reddituum, proventuum, Jocalium, obventionum, aliorumque cujusvis generis emolumentorum quocumque nomine nuncupatorum, & undecumque provenientium dismembratio, quam dictus Prædecessor noster ab eodem Camerariatus Officio in perpetuum fecit, cum eorum applicatione ad favorem sive Camere nostræ Apostolicæ, tunc suæ, sive publicæ medicamentorum Officinæ pro pauperibus Urbis institutæ, salva prorsus sit, & esse debeat; sed illa insuper emolumenta ex Sigillo ejusdem Officii provenientia, quæ sola memoratus Prædecessor noster Camerario pro tempore existenti reservavit, quæque novissimè defunctus Cardinalis Spinula, usque ad sui obitum integrè percepit, eidem Camere nostræ Apostolicæ, quoad dictus Cardinalis Albanus vixerit, & Officium ipsum obtinuerit, in omnibus, & per omnia applicata sint, & esse censeantur: adeò ut plenè verum sit, & esse debeat, quod ipse Cardinalis Albanus Officio hujusmodi cum omnibus quidem facultatibus, jurisdictionibus, honoribus, ac prærogativis Camerario pro tempore à præfato Prædecessore nostro reservatis potiri debeat: sed illud absque ullo penitus

emolumento five certo, five incerto, five ordinario, five extraordinario exercere omninò teneatur.

Quid Vobis videtur.

Auctoritate Omnipotentis Dei, Sanctorum Apostolorum Petri, & Pauli, ac nostra Officium Camerariatus nostri, & Sanctæ Romanæ Ecclesiæ concedimus præfato Annibali Cardinali Albano, eumque in nostrum, & ejusdem S. R. E. Camerarium ad ejus vitam creamus, facimus, ac deputamus, non solum cum moderationibus, restrictionibus, ac limitationibus à memorato Innocentio XII. Prædecessore Nostro hac in re præscriptis: sed etiam addita ad favorem Cameræ nostræ Apostolicæ, quoad idem Cardinalis Albanus vixerit, & Officium prædictum obtinuerit, dismembratione, seu separatione emolumentorum ex Sigillo officii hujusmodi provenientium, quæ sola idem Prædecessor noster Camerario pro tempore reservaverat, quæque Nos modò eidem Cameræ Apostolicæ, durante ipsius Cardinalis Albani vita, sicut præmittitur, applicamus, cum clausulis, & derogationibus, quæ in Decreto, seu scheda Consistoriali, ac in literis desuper expediendis latissime extendendæ erunt, quas ex nunc approbamus; prout similiter approbamus, ac quatenus opus sit, confirmamus ea omnia, quæ forsàn idem Cardinalis Albanus, servata ceteroqui forma præsentis Decreti, hætenus gessit, seu in posterum usque ad expeditionem dictarum literarum geret vigore specialis nostri Chirographi, quod Nos, ne consuetum negotiorum tursum ob diuturniorem memorati Officii vacationem retardari contingeret, ante quatuor dies signavimus cum omnibus clausulis, conditionibus, & declarationibus in hoc eodem Decreto insertis, ac insuper cum retentione omnium, quæ ipse Cardinalis Albanus obtinet, quam ei denuò nunc concedimus.

In Nomine Patris †, & Filii †, & Spiritus † Sancti. Amen.



IN CONSISTORIO SECRETO

Habito die 26. Aprilis 1719.

ARGUMENTUM.

Permittit D. Cardinali Astallio optionem Ecclesiarum Ostiensis, & Veliternensis cum Decanatu Sacri. S. R. E. Cardinalium Collegii.

VENERABILES FRATRES.

LXXXV.



Atis Vobis notum est, atque compertum quæ, & quales occasione obitus bo: me: Nicolai S. R. E. Cardinalis Acciajoli Episcopi, dum viveret, Ostiensis, & Veliternensis, vestrique Collegii Decani dubitationes efferint circa sensum Constitutionis fel. rec. Pauli PP. IV. Prædecessoris nostri, qua sancitur Decanatum Collegii prædicti perpetuis futuris temporibus nonnisi ad Episcopum Cardinalem Antiquiorem in Romana Curia præsentem, aut ex causâ publica absentem, atque extra eamdem Curiam per Romanum Pontificem destinatum, devenire posse. Ambigebatur siquidem à plerisque, an Constitutione hujusmodi adversus Cardinales à Curia absentes latâ comprehenderentur, vel potius excluderentur Cardinales promotione antiquiores,

qui

qui incidente ejusdem Decanatus vacatione ab eadem quidem Curia abfuerint, sed apud illas Metropolitanas, seu Cathedralis Ecclesias refederint, quibus eos unà cum aliqua ex iis Cathedralibus Ecclesiis, quæ ipsis Cardinalibus antiquioribus propriis titulis, seu denominationibus assignari solent, præesse contigerit. Et sanè ejusmodi rei ambiguitas, cum nullis hætenus hujus Sanctæ Sedis definitionibus discussa, ac dirempta esse videretur, animum nostrum adduxerat, ut eam expendendam, librandamque demandaremus sive Dilectis Filiis Rotæ Romanæ Auditoribus, sive aliis hujus Curie Præsulibus integritate, doctrinaque præstantibus, quorum sententiis, judiciisque suffragantibus id demum, quod rationi, & æquitati consentaneum visum Nobis fuisset, decerneremus. Verùm dum in ea deliberatione versæremur, Venerabilis Frater Noster Vincentius Maria Episcopus Portuensis S. R. E. Cardinalis Ursinus nuncupatus, quem unum, tamquam cæteris suis Collegis promotione priorem, tam ad Decanatus Dignitatem, quàm ad prædictas Ostiensem, & Veliternensem Ecclesias (memoratâ Pauli IV. Constitutione seposita) antiquitatis jura vocabant, secum animo reputans rem hanc absque aliqua contentione transigi minimè posse, suorum primùm in hac eadem Curia negotiorum Gestori, mox etiam aliis disertè significavit se probè memorem esse verborum Apostoli Timotheum suum admonentis: *Seruum Domini non oportet litigare*: ideòque firmiter constituisse super istiusmodi negotio à quavis concertationis, seu litis specie prorsus abstinere. Ad hæc non solum datis ad Nos literis ex suburbano secessu S. Pastoris conscriptis, sed coram etiam post biduum animi sui sententiam Nobis testatus est, cujus summa fuit se Beneventanæ Ecclesiæ jamdudum obstrictum reperiri: Sacri verò Collegii Decano, eidemque Ostiensi, ac Veliternensi Episcopo multiplices curas, nec levem pro animarum regimine vigilantiam incumbere;

Optare se propterea, atque etiam obtestari, ut quacumque sui ratione posthabita Dignitatem Decanatus Cardinali Episcopo ex residentibus in Romana Curia antiquiori deferre vellemus, eidemque Ecclesiarum Ostiensis, & Veliternensis optionem permitteremus: ea tamen adjecta declaratione, ut simili in posterum occurrente Decanatus vacatione, salva, & illæsa remanerent, si quæ essent, jura Cardinalium Episcoporum, qui Cardinalatu quidem essent antiquiores, sed extra Romanam Curiam in prioribus suis Episcopatibus tunc residerent, quemadmodum ex ipsis ejusdem Cardinalis Ursini ad Nos scriptis literis mox legendis plenius cognoscetis.

Hic Consistorium ingressus fuit R. P. D. Battellus Archiepiscopus Amasenus Apostolicorum Brevium ad Principes à Secretis, & palàm recitavit epistolam ad Sanctitatem Suam à D. Cardinali Ursino conscriptam ex secessu S. Pastoris die 27. Martii 1719. Qua perlecta Sua Sanctitas ita Orationem profecta fuit.

Tam enixis, ac piis optimi Cardinalis precibus annuere æquum duximus, prout similiter non minùs congruum censuimus ea jura amplissimè præservare, quæ de cætero similibus in casibus quovis modo competere possent Cardinalibus Episcopis antiquioribus extra Romanam Curiam, apud suas primas Ecclesias tunc residentibus, dummodò è converso salva itidem, & inviolata persisterent jura aliorum quorumcumque antiquiorum Cardinalium in eadem Romana Curia tunc commorantium; prout ex Responso, quod eidem Cardinali Ursino dedimus, meliùs percipietis.

Hic idem Archiepiscopus Amasenus legit Responsum à Sanctitate Sua prædicto Cardinali Ursino datum apud S. Petrum sub Annulo Piscatoris die 8. Aprilis 1719.; quo lecto Sua Sanctitas ita Orationem absolvit.

Hæc omnia, VENERABILES FRATRES, Vobis de quorum,
juri-

juribus agitur, ex hoc loco communicare non modò æquum, verùm etiam necessarium esse existimavimus, ut ita qua ratione, quibus de causis, ac quibus cum declarationibus, & clausulis optionem Ostiensis, & Veliternensis Ecclesiarum, hodie permitturi simus, plenissimè dignosceretis. Imò, quoniam declarationes, ac rationes hujusmodi in nostris ad eundem Cardinalem Ursinum datis literis, quæ modo recitatæ fuerunt, fusè explicantur, Dilecto Filio Nostro Petro S. Laurentii in Damaso Diacono Cardinali Otthobono S. R. E. Vice-Cancellario injungimus, ut eas unà cum Epistola ipsius Cardinalis Ursini ad Nos perscripta, quam similiter audivistis, inter Acta hujus Consistorii ad perpetuam rei memoriam consignet, ac servet. Cæterum ne prædicta Pauli IV. Constitutio ancipiti diutius, varioque sententiarum judicio in ambiguum, atque incertum trahatur, neve in posterum super ea controversiæ ullæ, aut dissensiones inter Cardinales oboriantur, fixum Nobis, decretumque est Viros doctrina, prudentia, & pietate insignes deligere, qui & ipsam Pauli IV. Constitutionem diligenter excutiant, & siquæ alia ad causæ momentum contulerint, attentè exquirant, & accuratè perpendant, ut ita matura deliberatione adhibita, illud tandem hac in re statuere possimus, quod ad majorem Dei gloriam, & cultum, ad hujus Sanctæ Sedis utilitatem, ad Ordinis Vestri honorem, atque ad animarum salutem conducibilius esse arbitramur.





Singulariter in Spe Constituisti me. Ps.

IN CONSISTORIO SECRETO

Habito die 18. Septembris 1719.

ARGUMENTUM.

Relato Religionis Christianæ statu in Sinarum Imperio, ac iis omnibus, quæ post editam super Ritibus, & Cæremoniis Sinenfibus Constitutionem ibidem evenerant, commemoratis, exponit susceptum à se consilium illuc rursus mittendi novum Visitatorem Apostolicum, & ad ejusmodi Ministerium deligit R. P. D. Carolum Ambrosium Mediobarbam Papiensem V. S. Referendarium, quem mox Patriarcham Alexandrinum creat.

VENERABILES FRATRES.

LXXXVI



EX quo supremum hoc Catholicæ Ecclesiæ culmen non minùs inviti, quàm immerentes, Deo sic disponente, conscendimus: probè intelleximus, singularem illam animi propensionem, qua priùs erga Sinenfes Missiones ferebamur, præcipuam jam nostram sollicitudinem evasisse, ideoque ad Pastoralis Officii nostri debitum quàm maximè pertinere Christifideles illarum partium intima, ac peculiari dilectione ita complecti, ut comper-

tum

tum omnibus fieret neminem eorum, qui verum Deum per veram fidem agnoscunt, magno quamvis intercedente terrarum spatio, tam dissitum loco à Nobis esse, quin paterno cordi nostro charitate proximus efficiatur. Minimè Vos latet quot, quantasque Pontificiæ vigilantiae nostræ curas adhibuerimus, ut arctissimum hoc nostrum, ac benè Nobis perspectum debitum pro viribus impleremus, nihilque quantum in Nobis erat, intentatum relinqueremus, quatenus Vineæ Domini, quæ est Ecclesia, quam scilicet ipsè sua dextera plantatam, & sui sanguinis pretio reparatam Nobis custodiendam tradidit, palmites suos usque ad mare, & ultra ejus terminos propagines suas latius in dies, atque felicius extenderet. Neque etiam Vos latet quàm longo, quàm maturo, & quàm diligenti præhabito examine dudum, videlicet tempore fel. rec. Innocentii Papæ XII. Prædecessoris nostri inchoato, ac deinde jussu nostro per plures annos continuato, acerrimas illas contentiones jampridem inter Sinenses Missionarios exortas, semperque in dies magis invalescentes, tam circa quasdam Voces Sinicas ad Sanctum, & ineffabile Dei Nomen exprimendum inibi usurpatas, quàm circa nonnullos earum gentium ritus, veluti supersticiosos à quibusdam ex Missionariis prædictis reprobatos: ab aliis verò, utpotè eos civiles tantum afferentibus, permisos Apostolici judicii censurâ dirimere studuerimus, ut ita sublatis dissidiis Christianæ Religionis, Catholicæque Fidei propagationem turbantibus, omnes tandem idipsum dicerent in eodem sensu, & in eadem sententiâ, unoque ore glorificaretur Deus ab iis, qui sanctificati sunt in Christo Jesu. Similiter nec ignoratis quot, quantisque studiis, atque laboribus nova illa, quæ his peractis inimicus homo supereminavit, zizania, ut eorum, quæ à nobis hac in re decreta fuerant, observantiam eluderet, evellere curaverimus: eâ nimirum ante quatuor annos editâ Constitutione, qua decreta

hujusmodi exacte, integrè, atque inviolabiliter observari præcepimus, quibuscumque rationibus, seu excusationibus ad illorum executionem declinandam allatis, ampliuscè rejectis. Nostis præterea, quæ, & quanta clapsò anno ex Sinarum partibus nunciata fuerint, de novis ibi excitatis turbis, postquam memorata nostra Constitutio vix illuc pervenerat. Nostis difficultates, impedimenta, discrimina, quæ illius promulgationi intercesserunt, Nostis minas, ærumnas, perturbationes adversus Europæos omnes, ac potissimum Evangelii præcones exortas. Nostis demum quinam vulgatus fuerit rumor de Sinensis Imperatoris indignatione, susceptoque inde non inani metu, quòd ex universo illius Imperio Missionarii omnes quamprimum ejiciendi essent, simulque illic gravibus indicendis poenis Christianæ legis non tantum prædicatio, sed etiam professio omnino inhibenda esset. Placuit nihilominus Patri Misericordiarum, & Deo totius consolationis, qui consolatur Nos in omni tribulatione nostrâ, non modicum hoc anno angustiiis nostris levamen afferre; Ex unâ siquidem parte, videlicet Charissimi in Christo Filii Nostri Joannis Portugalliæ, & Algarbiorum Regis Illustris nomine certiores facti sumus Regem ipsum suis Indiarum Administris, ac potissimum Goanis, & Machaonenfibus, pro perspecta illâ, ac ubique gentium celebrata pietate suâ, districtè mandaturum esse, ne ullum executioni supradictæ nostræ Constitutionis impedimentum interponant, & si quod fortè hætenus interpositum fuisse contingeret, sedulo illud removeri curent, ut eadem nostra Constitutio integrum suum, ac plenarium, ut patet, sortiatur effectum. Ex aliâ verò parte, nempe ex ipso Sinarum Imperio novissimè accepimus longius in præsens abesse pericula illa, quæ ibidem superiori anno Christianæ legis professoribus imminere assercebantur; quin imò justè à Nobis sperari posse, ut quivis eorum timor prorsus abscedat,

ubi

ubi celeri in eas partes allegatione alicujus pii, prudentis, atque illic summopere exoptati Apostolici Administri illius Imperatoris benevolentiam Nobis uberius conciliare studeamus, simulque ipsius Apostolici Administri strenuâ, solertique operâ inter Evangelicos earumdem partium Operarios, quorum ceteroqui in promovendo Christi Regno labores magnam in Domino laudem promerentur, Spiritus ille pacis, mutuxque charitatis diligenter foveatur, atque excitetur, qui eorum vocationi maximè convenit, quique accuratissimè à Nobis hætenus illis commendatus fuit, atque etiam de cetero enixè commendabitur. Hunc propterea in finem, ac insuper ut certi reddamur, quod iidem Evangelici Operarii præfatam Constitutionem nostram, quemadmodum interpositâ jurisjurandi Religione sese omnes obstrinxerunt, re ipsâ observent, ac nihilominus Ministerium suum fideliter, & cumulatè obeant, nec illud obire à quoquam impediuntur: divino prius per Nos diuturnis, atque accuratis precibus invocato præsidio, habitâque super præmissis cum particulari Congregatione Fraternitatum Vestrarum negotiis Propagandæ Fidei præpositarum deliberatione maturâ, Virum aliquem morum integritate, doctrina, pietate, atque prudentiâ præstantem Visitatorem Apostolicum cum potestate Legati de Latere ad Imperium Sinarum, aliaque finitima Indiarum Orientalium Regna, unâ cum congruo non modò selectorum Missionariorum, sed etiam aliorum non vulgari bonarum artium, & laudabilium disciplinarum peritiâ excellentium Virorum comitatu quamprimùm mittere constituimus. Ipsi verò sic à Nobis mittendo Visitatori consilium cepimus præscribendi, ut unâ cum suis Sociis eâ utens facultate, quam fel. rec. Paulus V., Urbanus VIII., & Clemens X. Romani Pontifices Prædecessores nostri per suas hac in re editas Apostolicas Literas, non modò Episcopis, & Vicariis Apostolicis, sed etiam quibuscvis Presbyteris, sive se-

cularibus, five regularibus cujuscumque Ordinis, & Instituti, imò etiam Laicis ad Indias Orientales, & partes Sinarum accedentibus amplissimè concesserunt, suum scilicet iter, & navigationem per quasumque vias sibi benè visas suscipiendi, liberè per Lusitaniam proficiscatur, atque indè navigationem ad Sinas suscipiat. Hanc porrò deliberationem hac vice amplexi sumus non eo quidem animo, ut in usum revocemus antiquiora illa decreta, quibus Religiosi Viri Ordinum Mendicantium ad partes Orientis, ut inibi Sanctum Evangelium prædicent, profecturi aliam, quàm Lusitanæ viam tenere prohibebantur: adeòque Missionariis, & Ministris Apostolicis illam adimamus libertatem, quam præfatæ recentiores Pontificæ Sanctiones ipsis indulgent per quasumque alias, quas maluerint, vias illuc proficiscendi, multoque minùs eo consilio, ut Visitatori Apostolico nunc mittendo, ac ei adjungendis Missionariis à quoquam impetremus, vel etiam ipsis tribui patiamur licentiam ullam, aut permissionem obeundi in Sinarum Imperio, aliisque Indiarum Orientalium Regnis Ministerium, quod illis injunximus; cum omnibus satis perspectum, atque exploratum sit Romanum Pontificem supremam, & independentem pro spiritali animarum regimine in universo terrarum Orbe authoritatem habere, nec ad mittendos Operarios, qui Religionem Christianam, Fidemque Catholicam apud Infideles prædicent, annuncient, roborent, & promoveant, ullius fidelis, vel infidelis cujusvis status, gradus, conditionis, & dignitatis etiam Regiæ existat, licentia, vel consensu indigere. Ejusmodi autem consilium ea dumtaxat ratione inivimus, ut memorati Visitatoris operâ debitas Regi Portugalliæ gratias agamus, quod opem, præsidiumque suum pro felici hujus nostræ expeditionis eventu benignè Nobis obtulerit; ac ipsemet Visitator, ejusque Socii Regii patrocinii fructum, & commoda

exp eriri incipiant , unde omnibus perspectum reddatur Joannem V. Portugalliæ Regem constanti sua erga Apostolicam Sedem reverentiâ , ac studio planè filiali minimè vinci voluisse à clarissimis Majoribus suis inclytæ memoriæ Regibus , qui non tam bellorum contra Infideles fortiter gestorum , gloriâ , ac Orthodoxæ Religionis ferè ultra solis , annique vias propagatione , quàm fideli , strenuâque ejusdem Religionis tutela magnam apud homines laudem , & majora apud Deum Optimum Maximum sibi merita pepererunt . Cæterum , quò idem Visitator majori cum honorificentia ad Dei gloriam , animarumque pretiosissimo Domini Nostri Jesu Christi Sanguine redemptarum salutem tanto sibi à Nobis demandato Ministerio fungi valeat , Patriarchali eum titulo decorare intendimus celeberrimæ Ecclesiæ Alexandrinæ , quæ scilicet jure optimo à primis Christianæ Religionis temporibus , tanquam peculiaris hæreditas Beatissimi Apostolorum Principis haberi meruit , quippequi per suum in Christo Filium Evangelistam Marcum , ejusque salutarem Sacrosancti Evangelii prædicationem sibi illam comparavit ; unde eandem Ecclesiam Alexandrinam meritò primam post hanc Romanam fuisse constat usque ad Lateranensem Concilium sub Innocentio III. , qui subinde ejusmodi honorem Ecclesiæ contulit Constantinopolitanæ .

Vacat igitur Patriarchalis Ecclesia Alexandrina per obitum boni viri Gregorii Josephi Cajetani de Aragonia ultimi illius Patriarchæ .

Alexandria , Urbs Ægypti , cognomento Magna , fuit olim non minus Antistitum suorum gloria , quorum plerique fidei causa aspera quæque , & acerba perpassi fuerunt , quàm Incolarum multitudine clarissima ; Ex quo autem Tyrannico Turcarum jugo succubuit , antiquo etiam in temporalibus honore destituta lacrymis potiùs , quàm elogio digna reperitur ;

quocirca præsentem deplorandum ejus statum referre prætermittimus. Eidem Patriarchali Ecclesiæ præficere intendimus eum, quem, ut diximus, uti Visitatorem Apostolicum cum potestate etiam Legati de Latere ad Sinarum, aliaque Indiarum Orientalium Regna mittere decrevimus, videlicet Dilectum Filium Carolum Ambrosium Mediobarbum de legitimis nuptiis ex Catholicis, Nobilibusque Parentibus in Civitate Papiensi ortum, in trigésimo quarto suæ ætatis anno, & Sacro Presbyteratus Ordine constitutum, juris utriusque Doctorem, & in utraque Signatura nostra Referendarium, qui munere Cubicularii nostri, honoris nuncupati, & deindè Gubernatoris, primùm quidem Civitatis Tuderti, ac demùm Provinciæ Sabinensis probè, & laudabiliter functus est: Virum sanè pietate non minùs, quàm doctrinâ, integritate, & prudentiâ commendatum, atque à memorata particulari Congregatione Fraternitatum Vestrarum negotiis propagandæ Fidei præposita plenè approbatum.

Quid Vobis videtur.

Auctoritate Omnipotentis Dei, Sanctorum Apostolorum Petri, & Pauli, ac nostrâ providemus Ecclesiæ Patriarchali Alexandrinæ de persona præfati Caroli Ambrosii, præficientes eum in Patriarcham, & Pastorem, cum retentione omnium, quæ obtinet; simulque divinam bonitatem humiliter obsecramus, ut det illi Spiritum Sapientiæ, & Intellectus; Spiritum Consilii, & Fortitudinis; Spiritum Scientiæ, & Pietatis, quo sanctè, ac salubriter roboratus commissum sibi à Nobis arduum Ministerium fideliter, ac feliciter implere valeat.

In Nomine Patris †, & Filii †, & Spiritus † Sancti. Amen.



Pl. in Gloria. f. 1000

IN CONSISTORIO SECRETO

Habito die 29. Novembris 1719.

ARGUMENTUM.

Creat decem S. R. E. Cardinales, novem evulgat, & unum in pectore sibi reservat.

VENERABILES FRATRES.



LXXXVII

D laudem, & gloriam Omnipotentis Dei, Sanctæque Romanæ Ecclesiæ utilitatem, ac decus, Fraternitatum Vestrarum numerum complere decrevimus. Memores autem illorum verborum, quibus Sanctus Bernardus Eugenium suum admonens, ut Col-laterales, ac Coadjutores suos undecumque sibi adscisceret, & evocaret, ita eum allocutus fuit: *An non eligendi de toto Orbe, Orbem judicaturi?* omnium Christianitatis Nationum, juxta Concilii Tridentini monitum, quantum Nobis fas est, rationem habebimus, ut ita de iis, qui personas SS. Apostolorum repræsentare debent, verè dici valeat: *In omnem terram exivit sonus eorum:* Creare itaque intendimus S. R. E. Cardinales.

I. Leo-

1. Leonem de Gesures Archiepiscopum Bituricensẽm .

Hic per plures annos , ut benè nostis, in hac almâ Urbe Collegio Protonotariorum Apostolicorum de numero Participantium adscriptus, acceptus omnibus, invisus nemini, modestissimè vixit: ac interim utriusque Signaturæ Referendarium laudabiliter egit. Discessit ab hac Aulâ corpore non animo, quippe quem retinuit semper erga Apostolicam Sedem obsequentissimum, erga Romanam Curiam amantissimum .

2. Georgium Spinulam Archiepiscopum Cæsareæ .

3. Cornelium Bentivolum Archiepiscopum Carthaginensem .

Ambo commissâ sibi à Nobis gravissima munera, alter scilicet in Nunciatura Viennensi, in Parisiensi alter, ut alia ab utroque priùs gesta prætereamus, non sinè diuturnis laboribus, angustiis plurimis, rerumque, ac temporum asperitatibus maximis, summâ fide, summâque sedulitate expleverunt.

4. Josephum Pereyra de la Cerda Episcopum Pharâonensem.

Novo hoc, ac planè singulari, imò & insueto erga Nationem Lusitanam Pontificiæ benevolentiæ testimonio declarare cupimus nequaquam Nos immemores esse magnanimæ illius alacritatis, qua superioribus annis Charissimus in Christo Filius Noster Portugalliæ Rex tantâ cum sui nominis laude, non tam officiis, ac precibus nostris adductus, quàm verius eximiæ suæ pietatis stimulis incensus prævalido, iteratoque quamplurium bellicarum, ac munitissimarum Navium subsidio Christianam Classẽm adversùs Turcas adjuvit. Præterea eundem Regem hac ipsâ paternæ charitatis nostræ præclarâ significatione incitatum nuperæ, quam fecimus, ad Sinas expeditioni Regio suo patrocinio, quo illam ceteroqui, utpote ad majorem Divini Nominis gloriam, Catholicæque Religionis feliciora incrementa, unicè directam plurimùm fovendam esse non dubitamus, uberius semper, impensius, ac benignius adfuturum confidimus.

5. Michaellem Fridericum ex Comitibus de Althann Episcopum Vacciensem.

Præfulem hunc ab adolescentia suâ non minus pietate, quàm literis inter Seminarii Romani Convictores in Urbe educatum: pluribus deindè Ecclesiasticis proventibus ab hac Sancta Sede cumulatam: insigni postea Romanæ Rotæ Auditorum Cœtui in ipsâ florentiori sua ætate aggregatum: Vaccienſi demùm Ecclesiæ nondum à sesquianno præfectum: si nova cum modò, & quidem ampliori, imò & amplissimâ dignitate augeri contingat, gratum Urbi, gratum Ecclesiæ, gratum Apostolicæ Sedi usquequaque futurum ambigere non possumus; ita siquidem egregia ejus indoles, claritas generis, honesti mores, optima institutio abundè Nobis pollicentur.

6. Joannem Baptistam Salernum Societatis Jesu Presbyterum.

Perspecta Vobis sunt, ac fusè aliàs à Nobis ex hoc loco relata Religiosi hujus Viri merita, quæ sibi maxima comparavit tum in Electorali Saxonix Principe ad Ecclesiæ gremium revocando, tum in aliis feliciter peragendis, quæ magnas spes nostras de similiter futuris Catholicis Saxonica ditionis hæredibus validissimè roborarunt. Reliquum nunc est, ut debitam ejus laboribus mercedem rependamus: quam quidem, ut videtis, alacriter paramus quavis aliâ majorem, quam Nos ei retribuere possimus. Longè tamen illâ minorem, quam ipse à bonorum operum retributore Deo Optimo Maximo, cujus causam strenuè, ac fideliter egit, meritò poterit expectare.

Istis sex Viris, vestro accedente consilio, ad Cardinalatus honorem promovendis tres alios addere constituimus: nullis quidem humanis rationibus id suadentibus, sed solùm Apostolici Ministerii debito Nos impellente; cui, ut plenè coram Deo satisfaciamus, molestias, angustias, & ærumnas quascumque, æquo animo perferre parati sumus. Tres alios itaque lectissi-

mos

mos Præfules creare fimiliter intendimus Cardinales: eosque profectò de Apostolicâ Sede, de Ecclesiâ univerfa, de Orthodoxâ doctrina, imò & de Catholicâ Religione optimè meritos, videlicet:

7. Franciscum de Mailly Archiepiscopum Rhemensem.

Verè malleum, ut ejus cognomen Gallicè sonat, sed malleum Jansenistarum. Diximus Archiepiscopum Rhemensem. Laudavimus satis. Neque enim quisquam Vestrum ignorat quæ, & quanta strenuus ille, atque imperterritus Constitutionis nostræ UNIGENITUS propugnator pro ea fecerit: quæ, & quanta pro ea passus fuerit. Nemo idcirco Vestrum itidem erit, qui etiam non censeat omninò æquum esse, ut ei, & in eo illis omnibus Gallicanæ Ecclesiæ Antistitibus non minus sapientiâ, & doctrinâ, quàm pietate, & studio tuendæ Religionis illustribus, qui ejus exemplo prædictæ Constitutioni nostræ debitam obedientiam præstiterunt, gratum nostrum animum luculentiori, quo possumus, Apostolicæ largitatis argumento exhibeamus.

8. Thomam Philippum de Alfatia de Bouffu Archiepiscopum Mechliniensẽ.

Plura hic referre possemus de hujus illustis Præfulis eximiâ vigilantia, quam, ubi primum ad suæ Metropolitanæ Ecclesiæ Regimen admotus fuit, adhibuit semper, & adhuc constantissimè adhibet, ut omnes Catholici Belgii Christifideles, præsertim verò commissæ sibi oves, quæ ut contagii locis, ita & periculis propinquiores sunt, à venenatis pravarum doctrinarum pascuis sedulò arceantur. Sed unum dumtaxat dicere sufficiat; quod nimirum ipse ex cunctis Catholicæ Ecclesiæ Episcopis primus fuit, qui Constitutioni nostræ, quæ incipit PASTORALIS, humiliter obsequens, nostroque inhærens exemplo, eos omnes, qui aliam nostram Constitutionem, quæ incipit UNIGENITUS, debita submissione suscipere recusarunt, aut in posterum recusassent, ut veros S. R. E. filios se minimè agnoscere disertissimè declara-

verit,

verit, fibique cum illis nullam deinceps communionem Ecclesiasticam extitutam palam pronunciaverit, donec integrè respicerent, rejectaque penitus audacia refragandi, per verè obedientiæ exhibitionem, pristinae charitati, & unitati ab hac Sancta Sede restitui mererentur.

9. Ludovicum Belluga Episcopum Carthaginensem.

Orthodoxæ veritatis Zelatorem maximum: Pontificiæ auctoritatis intrepidum Defensorem: Ecclesiasticæ libertatis assertorem fortissimum: magnum Religiosissimæ Nationis Hispanicæ lumen, & opusculum.

Decimum, qui ad complendum Fraternitatum Vestrarum numerum deest, justis ex causis in pectore reservare intendimus, arbitrio nostro quandoquæ evulgandum.

Novimus VENERABILES FRATRES, ac ut ingenuè fateamur, non sine aliquo paterni cordis nostri dolore conspiciamus per hanc, quam erga tot exteros, ac putissimum erga tres postremos Antistites, tamen si iustissimè, exercere volumus largitatem, non paucis emeritis militibus, hoc est egregiis Præsulibus, qui in Apostolicæ Sedis, ac præsertim in hujus Romanæ Curiae præcipuis muneribus, strenuam, diuturnam, ac fidelem operam navarunt, præmia illa retardari, quæ eorum laboribus jam deberentur. Eam tamen de præclarâ illorum virtute gerimus opinionem, ut firmam in spem adducamur ipsos privatis quibuscumque rationibus suis publicam Sanctæ hujus Sedis, Catholicæ Ecclesiæ, ac Orthodoxæ Religionis Causam libenti animo prælaturos; præsertim cum merito sperare valeant ab ejusdem Apostolicæ Sedis inconcussa iustitiâ debitam sibi, suisque meritis remunerationem, tamen si dilatam, minimè tamen defuturam.

Novimus insuper aliquorum ex iis, quos Vobis indicavimus, promotionem non omnibus acceptam futuram. Confidimus tamen illam minimè ingrati futuram scrutatori cor-

dium Deo, cui soli hac in re placere contendimus; ad cujus scilicet tremendum Tribunal, villicationis nostræ rationem reddituri, non minus ab ineunte jam Pontificatus nostri anno vigesimo, quàm à gravi nostra ætate infirmitatibus circumdatâ brevi sistendos Nos esse admonemur.

Quid igitur Vobis videtur?

Auctoritate Omnipotentis Dei, Sanctorum Apostolorum Petri, & Pauli, ac nostra creamus S. R. E. Presbyteros Cardinales

1. Leonem de Gesures Archiepiscopum Bituricensem.
 2. Franciscum de Mailly Archiepiscopum Rhemensem.
 3. Georgium Spinulam Archiepiscopum Cæsareæ.
 4. Cornelium Bentivolum Archiepiscopum Carthagenensem.
 5. Thomam Philippum de Alfatia de Bouffu Archiepiscopum Mechliniensem.
 6. Ludovicum Belluga Episcopum Carthagenensem.
 7. Josephum Pereyra de Lacerda Episcopum Pharaonensem.
 8. Michaellem Fridericum ex Comitibus de Althann Episcopum Vacciensem.
 9. Jo: Baptistam Salernum Presbyterum Societatis Jesu.
- Cum dispensationibus, derogationibus, & clausulis necessariis, & opportunis.

Alium in pectore reservamus arbitrio nostro quandocumque declarandum.

In nomine Patris †, & Filii †, & Spiritus † Sancti. Amen.





Prima Leo Rexius Nov. 16. et 17. 1720.

IN CONSISTORIO SECRETO

Habito die 20. Martii 1720.

ARGUMENTUM.

*Rationes explicat, quibus adductus consilium suscepit præci-
piendi Ludovico de Belluga, & Moncada Episcopo Carthagi-
nensi in virtute Sanctæ obedientiæ, ut ei delatam Cardina-
litiam Dignitatem acciperet.*

VENERABILES FRATRES.



Bi nuper de Viris pietate, & doctrina præstantibus, & de hac Sancta Sede præclare meritis, Cardinalibus creandis deliberavimus, obversata in primis fuit oculis nostris eximia virtus Dilecti Filii Nostri Ludovici de Belluga, & Moncada Episcopi Carthaginensis, jam pridem digna, quæ excelsiori loco posita non amplius intrâ unius Ecclesiæ limites coarctaretur, sed latius se effunderet in Ecclesiæ universæ utilitatem. Illum propterea, sicuti nostis, cum pluribus aliis egregiis, ac benemeritis Viris, in amplissimum Vestrum Ordinem cooptavimus, ac S. R. E. Cardinalem renunciavimus, ad nostræ solitudinis adjumentum, ad Apostolicæ Sedis subsidium, ad

M m 2

mi-

LXXXVIII

ministerium Vestri, laborisque consortium. Verumtamen nostra hæc non minùs iustitiæ, quàm benevolentiae sententia, tametsi Fraternitatum Vestrarum suffragiis commendata, & publicis, privatisque cæterorum gratulationibus excepta, ipsum dumtaxat modestissimum, ac religiosissimum Episcopum, contristavit; itaut per datas ad Nos literas precibus, obsecrationibus, & obtestationibus plurimis collatum sibi honorem declinare tentaverit, neque solùm causas plerasque suæ cunctationis attulerit, sed aliorum etiam apud Nos officia ad obtinendam demandati Ministerii immunitatem per multas tam Vobis, quàm aliis scriptas epistolas imploraverit, tantoque studio conatus sit, ut Dignitatis amplitudinem defugeret, quantum vix filii hujus sæculi adhibere possent, ut honores arripiant. Inter cæteras verò moræ suæ causas voti cujusdam antea emissi, ac fortasse etiam jurisjurandi religione à novis ejusmodi honoribus, ac muneribus accipiendis se submoveri significavit. Hæc tamen optimi Antistitis cunctatio, cum novum, ac firmissimum Nobis ediderit ejus virtutis testimonium, non modò Nos à proposito non deduxit, verùm in persolvendi præmii judicio amplius confirmavit. Quamobrem, divino priùs enixis precibus invocato præsidio, habitâque super hac re cum nonnullis ex Fraternitatibus Vestris, aliisque pietate, prudentiâ, ac doctrinâ præstantibus Viris deliberatione matura, de illorum unanimi consilio, ac etiam motu proprio, & ex certa scientia nostris, deque Apostolicæ potestatis plenitudine, quem antea meritissimum quidem, sed nec cogitantem in Sacrum Vestrum Collegium adscripseramus, hærentem modò, nolentem, & renuentem, ac propterea magis merentem, in virtute sanctæ obedientiæ ad accipiendam Cardinalatus Dignitatem compellendum censuimus, eique tam voti, quàm etiam, si opus esset, jurisjurandi vinculum relaxavimus per literas nostras in forma Brevis, quas ad

illum

illum per celerem Curforem jam misimus, præcipuum propediem ex ejusdem Dignitatis Insignibus, Birretum scilicet Purpureum, de more missuri. Integram hujusce rei seriem Vobis ex hoc loco aperiendam duximus, ut de tantæ virtutis laude, ac societate gaudium vestrum impleatur. Et si enim communis ea sit omnibus causâ lætitiæ, debet tamen in peculiarem Ordinis Vestri gratulationem redundare, ad quem nimirum solam à Pastorum Principe cœlestem coronam expectant. Carthagenensis Episcopus, non ancipitem, aut lubricam, sed certam, tutamque viam sibi munivit, atque ut intraret, salutari metu, ac Religione deterritus, meruit etiam compelli; cum summo pietatis candore, ac Christianæ humilitatis synceritate, nec Dignitatis vestræ sublimitatem meritis æquasse, nec ferendo oneri parem se viribus esse fateretur. Quemadmodum igitur Nos officii nostri esse duximus ad præmissa devenire, ne tam illustre virtutis specimen Sacri Collegii Vestri splendori subtraheretur: ita Vos, VENERABILES FRATRES, de præclaris hisce exemplis, quæ præcipua sunt gradus, locique vestri ornamenta, debitas virtutum Domino gratias agite; simulque divinam opem gravissimis aliis consiliis nostris ejusdem Ordinis Vestri existimationem, & honorem non minùs, imò etiam ampliùs, respicientibus, propitiam assiduus, atque accuratis precibus implorate.





IN CONSISTORIO SECRETO

Habito die 6. Maji 1720.

A R G U M E N T U M.

Professionem Patriarchæ Alexandrini ad Civitatem Ulyssiponensem, & præcipua honoris, benevolentiæ, ac liberalitatis argumenta, quibus à Rege Lusitaniæ exceptus, & postmodum ad Sinas honorificentissimè dimissus fuerat, eleganter exponit.

VENERABILES FRATRES:

LXXXIX



Udum Vobis ex hoc loco significavimus, quibus rationum momentis adducti Visitatorem Apostolicum ad Sinas, aliaque Indiarum Orientalium Regna destinaverimus: quibus itidem facultatibus, ac mandatis instructum ad ejusmodi Provinciam Venerabilem Fratrem Carolum Ambrosium Patriarcham Alexandrinum delegerimus: quid demùm Nobis consilii fuerit, cum illum per Lusitaniam iter tenere, atque indè in Sinas solvere decrevimus. Hodie miserentis Dei ope saluberrimo huic operi obsecundante, prospera arduæ hujus expeditionis auspicia Vobis ex eodem loco renunciamus. Eximia enim Charissimi in

Chri-

Christo Filii Nostri Joannis Portugalliæ, & Algarbiorum Regis Illustris pietas, ejusque in hanc Sanctam Sedem reverentia, nec non dilatandæ rei Christianæ studium Regio animo dignissimum, spes nostras de conciliando susceptis consiliis Regali patrocínio ratas fecit; prædictum scilicet Patriarcham præcipuis honoris testimoniis prosecutus amantissimè excepit, liberaliter tractavit, honorificentissimè dimisit: ac non modò illum, ejusque sacræ Militiæ socios pecuniâ, & comœatu instruxit, nauli impensas ex Regio suo Ærario erogandas mandavit, neque ullas benevolentiæ partes sibi reliquas fecit; verùm etiam injuncto ei à Nobis muneri utiliùs, ac felicitiùs obeundo, quod potissimùm optabamus, Regiæ suæ auctoritatis præsidium amplissimè pollicitus fuit. Præterea Patriarcham ipsum graviter, ac sapienter per hæc rerum curandarum initia se gessisse, ac nostra apud Lusitanam Aulam mandata prudenter, fideliter, ac feliciter implevisse gavisus sumus. Æquum idcirco censuimus læta hæc ad animarum salutem, divinique nominis gloriam amplificandam primordia, tametsi fama ipsa nunciante unicuique Vestrum ea jam innotuisse non dubitemus, Vobiscum in hac Consistoriali Aula congregatis honorificentius communicare; ut ita animos vestros communi Nobiscum solitudine de tam ancipitis, sed tamen salutaris, ac necessariæ expeditionis successu suspensos lætificemus: simulque ad preces divinæ bonitati alacrius fundendas excitemus, ut quod cœpit opus Clementissimus Dominus, ipse perficiat; cumque illa ipsa die, qua anniversaria Dominicæ Incarnationis memoria recolitur, nempe vigesima quinta Mensis Martii, novum hoc Evangelicorum Præconum agmen una cum suo Duce ex Ulyssiponensi litore solverit, tanti Mysteriorum fidem, ac fructum inferat gentibus ambulantibus in tenebris, & auspiciatissimo Beatissimæ Virginis nomine vera salus ægris, ac perditis populis annuncietur.

IN



IN CONSISTORIO SECRETO

Habito die 30. Septembris 1720.

ARGUMENTUM.

Exposita Epidemicæ luis inter Massilienses grassantis calamitate solemnem supplicationem indicit ab Ecclesia Sanctæ Mariæ Angelorum ad Basilicam S. Mariæ Majoris ad ejusmodi gravissimi flagelli cessationem à Divina Misericordia implorandam.

VENERABILES FRATRES.

x.C.



Um primùm ad Nos, diuturnis cæteroqui, ac multiplicibus amaritudinibus repletos, acerbus de Epidemica lue inter Massilienses grassante nuncius allatus fuit, omnes, quas potuimus, Pontificiæ providentiæ curas ad publicæ incolumitatis præsidium contulimus, nec modò Almam hanc Urbem, sed universam Ecclesiasticam nostram ditionem vigili sollicitudine custodire studuimus. Indictis insuper pro vitanda mortalitate precibus celestem opem implorare non prætermisimus, ut divinæ iracundiæ flagella ab iis, quos calamitas premit, avertere satageremus: ab aliis verò, quos tantæ cladis metus invasit, pericula

non

non immeritò formidanda propulfaremus. At quoniam peccatis nostris Deum magis in dies ad iram provocantibus, nec Angeli percutientis cessavit manus, neque periculi suspicione, ac formidine soluti sumus; intelligimus profectò iniquitates nostras contendere contra Nos, adeòque non aliàs, quàm per veræ, ac salutaris pœnitentiæ lamenta, humilesque, & unanimes obsecrationes, atque orationes placandum esse Dominum, ut quiescat à malo, quod cogitavit facere populo suo. Frustrà enim vigilamus, nisi Dominus custodierit Civitatem, ac temerè adversùs delictorum ultionem portas occludimus, & munimus, nisi peccatorum pestes arceamus, ac vitia nostra, quæ calamitates invehunt, emendemus. Decrevimus propterea solemnem supplicationem indicere ab Ecclesiâ Sanctæ Mariæ Angelorum in Thermis ad Basilicam ejusdem Sanctæ Mariæ Majoris nuncupatæ habendam die sexta imminentis Mensis Octobris in quam scilicet, ultra Festum S. Brunonis Confessoris, quod eâ die in præfata Ecclesia S. Mariæ Angelorum de more celebrabitur, incidet hoc anno etiam prima Dominica dicti Mensis, solemnitati Sacratissimi Rosarii ejusdem Gloriosissimæ Virginis dicata, cujus patròcinium in aliis etiam depellendis calamitatibus, ac periculis præsentissimum, ut probè nostis, semper experti fuimus. Is porrò Christifidelibus, qui præmissio jejuniis, nec non eleemosynis, cæterisque Christianæ pietatis operibus in peculiari Edicto præscribendis plene adimpletis, eidem supplicationi, quam Nos unà cum Fraternitatibus Vestris, univèrsoque Clero, & populo hujus Urbis, benediciente Domino, agemus, devotè interfuerint, aut alia in eodem Edicto proponenda peregerint, cœlestium munerum thesauros, quorùm dispensationem Fidei nostræ commisit divina dignatio; liberali manu elargiemur, ut ita eosdem Christifideles ad dignos pœnitentiæ fructus faciendos magis incitemus. Cum autem Vestris precibus adjuvandam infirmitatem nostram, ve-

stræque pietatis exemplis vehementiùs aliorum animos inflammandos esse non dubitemus; Vobis primùm hæc nostræ sollicitudinis consilia significamus, ut unanimiter in oratione perseverantes, stemus in consractione in conspectu Domini, ut mirificet misericordias suas, qui salvos facit sperantes in se. Eja igitur, VENERABILES FRATRES, sacrificemus Deo nostro, ne fortè accidat Nobis pestis, itemque obsecremus, ut qui dissimulat peccata hominum propter pœnitentiam, non secundùm iniquitates nostras retribuatur nobis; sed immittat Angelum suum in circuitu nostro, ut ipse Nos custodiat, nec accedat ad Nos malum, nec flagellum appropinquet tabernaculo nostro. Præterea cùm charitas Christi urgeat Nos, ut operemur bonum ad omnes, maximè autem ad Domesticos fidei, rogemus similiter Dominum, ut mittat Verbum suum, & sanet eos, qui vexati sunt à tribulatione malorum, eripiatque illos de interitionibus eorum, ut vivant, & narrent opera Domini, qui non vult mortem peccatorum, sed ut convertantur, & vivant.

IN EODEM CONSISTORIO.

Post Præconia, & Propositiones Ecclesiarum creavit S. R. E. Presbyteros Cardinales Carolum Borgia Patriarcham Indiarum, & Alvarez Cienfuegos Soc. Jesu Presbyterum, nec non declaravit ejusdem S. R. E. Cardinalem Jo. Franciscum Barbadicum Episcopum Brixientem, quom in Consistorio habito die 29. Novembris 1719. in pectore reservaverat.

VENERABILES FRATRES.

xCl.

GRavissimis ex causis non tam Apostolicæ Sedis, quàm Ecclesiæ universæ bonum respicientibus adducti, Fraternitatum Vetrarum numerum complere decrevimus; ideoque creare intendimus S. R. E. Cardinales:

Ca.

Carolus Borgiam Patriarcham Indiarum, &
Alvarum Cienfuegos Societatis Jesu Presbyterum.

Præterea palam evulgare, ac declarare intendimus etiam alium
Cardinalem, quem dudum, nempe in Consistorio nostro
Secreto habito die xxix. Novembris anni proximè præteriti,
una cum aliis novem Cardinalibus creavimus, sed in pectore
reservavimus, videlicet:

Joannem Franciscum Barbadicum Episcopum Brixiensem.

Quid Vobis videtur?

Auctoritate Omnipotentis Dei, Sanctorum Apostolorum Pe-
tri, & Pauli, ac nostra declaramus, ac respectivè creamus
S. R. E. Presbyteros Cardinales

Jo: Franciscum Barbadicum Episcopum Brixiensem.

Carolus Borgiam Patriarcham Indiarum.

Alvarum Cienfuegos Societatis Jesu Presbyterum.

Cum dispensationibus, derogationibus, & clausulis necessariis,
& opportunis.

In nomine Patris ꝛ, & Filii ꝛ, & Spiritus ꝛ Sancti. Amen.





Castel Superbus et Corrupt. Sum. 30

IN CONSISTORIO SECRETO

Habito die 16. Decembris 1720.

A R G U M E N T U M.

Sacro Collegio nuncium communicat insignis victoriæ, quam Rex Catholicus de Mauris reportaverat, & Septensem Civitatem à diuturna eorumdem hostium obsidione feliciter liberaverat.

VENERABILES FRATRES.

xCII.



J. G. Bouché del. et sculp.

Ngentem lætitiâ, qua Vos magna cum animi nostri voluptate perfusos vidimus, cum primùm elapsis diebus, ipsâ scilicet anniversaria die Coronationis nostræ, à Dilecto Filio Nostro Francisco S. R. E. Cardinali Aquavivâ insignem Victoriâ ab exercitu Charissimi in Christo Filii Nostri Philippi Hispaniarum Regis Catholici de Mauris, hoc est, teterrimis Christiani nominis hostibus reportatâ, simulque Civitatem Septensem à diuturna illorum obsidione liberatâ audivistis, cumulatiùs adhuc, & plenius precepturos hodie Vos esse non dubitamus, dum hunc ipsum faustissimum nuncium per literas prædicti Philippi Regis hac eadem die paulò antequam Consistorium ingrederemur,

à præ-

à præfato Cardinali Nobis redditas confirmatum, Vobiscum ex hoc loco, ut æquum est, nullâ interpositâ morâ communicamus. Ex iisdem literis, quæ mox legentur, intelligetis pariter ipsum Regem pro sua in hanc Sanctam Sedem filiali observantiâ unum ex bellicis Vexillis, quæ à Barbarorum manibus Hispanorum Militum Fortitudo feliciter abstraxit, ad Nos misisse; quod sanè ad facti memoriam sempiternam in hac veræ Religionis arce illustre, ac perenne erit non minùs Christianæ Fidei trophæum, quàm Regiæ pictatis, ac Divini beneficii monumentum.

Hic ingressus fuit Consistorium R. P. D. Battellus Archiepiscopus Amasenus Secretarius Brevium, quæ ad Principes scribuntur, legitque supradictas literas Regis Catholici ad Sanctitatem Suam scriptas, ex Hispanico idiomate in Italicum versas. Quibus lectis Sanctitas Sua allocutionem suam reasumpsit, ut sequitur.

Levantes igitur cor, & oculos nostros in Montem excelsum, & Sanctum, unde Nobis maximum hoc, & longè opportunum angustiiis illis, quibus ob gravissimas, ac nimium notas Ecclesiæ, & Reipublicæ calamitates assidue premimur, levamen effluxit, sacrificemus Patri Misericordiarum, & Deo totius consolationis hostiam laudis, & jubilemus ei in voce exultationis. Rogemus itidem accuratis precibus exercituum Dominum, ut piissimum Regis animum in dies magis inflammet ad instandum victoriæ, nec alia in posterum, quàm bella Domini prælianda. Hæc quidem privatim Nos facere non prætermitemus, & Vos similiter facturos esse non ambigimus, donec communibus hæc eadem Nobiscum votis solemniori ritu præstabitis.



IN CONSISTORIO SECRETO

Habito die 3. Februarii 1721.

ARGUMENTUM.

Novam Victoriâ à Rege Catholico de Mauris in Africa relatam Sacro Collegio communicat.

VENERABILES FRATRES.

xCIII.



Cce jam tertio dextera Domini percussit inimicum; repleatur propterea os nostrum laude, & lingua nostra exultatione. Mauri scilicet ab invictis armis Charissimi in Christo Filii Nostri Philippi Hispaniarum Regis Catholici semel, atque iterum cæsi, & profligati, cum copias denuò, & vires undique contraxissent, in multitudine sua gloriantes, ipsisque acceptis cladibus ferocientes, Castra Hispanorum incredibili audaciâ, ac temeritate aggressi die 21. Mensis Decembris proximè elapsi, tantâ Christianorum Militum virtute excepti sunt, ac repulsi, ut octo fere millibus amissis terga dederint, & qui superiorum calamitatum dedecus ingenti apparatu, conatuque reparare susceperant, nova clade obtriti, novoque opprobrio perditioni recesserint; Dominus enim quasi vir pugnator, extendens manum suam,

suam, arrogantiam fortium humiliavit, & in multitudine misericordiæ suæ deposuit adversarios suos. Novam hanc Christiani Nominis felicitatem, quam Rex Catholicus ad suæ erga Deum pietatis, atque erga hanc Sanctam Sedem filialis observantiæ argumentum, Nobis significavit, ex ejusdem Regis literis ab Hispanico idiomate in Italicum versis, quas Ipse per extraordinarium Cursorem ad Nos misit, ac Dilectus Filius Noster Franciscus S. R. E. Cardinalis Aquaviva ante tres dies Nobis reddidit, plenius intelligetis.

Hic ingressus fuit Consistorium R. P. D. Battellus Archiepiscopus Amasenus Secretarius Brevium, quæ ad Principes scribuntur, legitque supradictas literas Regis Catholici ad Sanctitatem Suam scriptas; Quibus lectis Sua Sanctitas allocutionem suam reasumpsit, ut sequitur.

Cum autem, VENERABILES FRATRES, prosperi hujus successus lætitiâ ex hoc loco Vobiscum communicamus, simul etiam hortamur Vos, & obsecramus, primum quidem, ut Omnipotenti Deo, qui fortis in prælio fecit Victoriâ, ex intimo animi sensu juges, debitasque Nobiscum gratias agatis, ac simul loquamur potentias Domini, & enarremus mirabilia ejus: deinde ut eximium Catholici Regis pro dilatanda Dei gloria zelum collaudantes, ejusque ad inferenda barbaris arcibus Christi signa piis votis obsecundantes, Hispanorum Militum virtutem tantis hætenus contra Crucis hostes experimentis testatam, precum vestrarum subsidiis adjuvare, pergatis; Cumque illi pro tuenda, & amplificanda Christiana Religione pericula gravissima adire, & sanguinem fundere mira alacritate gestiant, Nos pari studio, & ardore Divinæ Misericordiæ præsidium in contritione cordis implorare contendamus, ut quod Dominus incœpit, opus pro sua in Nos clementia perficiat. Hunc porrò in finem Dilectus Filius Noster

in hac Alma Urbe Vicarius in spiritualibus generalis confue-
tas preces contra Paganos iussu nostro in Missis omnibus,
quæ in singulis ejusdem Urbis Ecclesiis celebrabuntur, quous-
que opus fuerit, recitandas quamprimùm indicet, ut in ma-
gnitudine brachii Domini irruat super barbaras illas gentes
formido, & pavor, ac tandem cognoscant, quia Deus noster
in spiritu furoris sui pugnat pro Nobis.





IN CONSISTORIO SECRETO

Habito die 3. Martii 1721.

ARGUMENTUM.

Controversiam exponit rursus obortam circa Decanatum Sacri Collegii vacantem per obitum Cardinalis Ascallii, ac de eo juxta Consilium particularis Congregationis à Sanctitate Sua deputatæ decedit pro Cardinali Tanario, cui etiam Ostiensis, & Veliternensis Ecclesiarum optionem permittit.

VENERABILES FRATRES.



Uo jam lapsi sunt anni, ex quo occasione obitus bo: me: Nicolai S. R. E. Cardinalis Acciajoli, Episcopi, dum viveret, Ostiensis, & Veliternensis, Vestrique Collegii Decani orta fuit dubitatio circa sensum Constitutionis fel. rec. Pauli Papæ Quarti Prædecessoris nostri, qua ejusdem Collegii Decanatum perpetuis futuris temporibus, nonnisi ad Episcopum Cardinalem antiquiorem in Romana Curia præsentem, aut ex causa publica absentem, atque extra eandem Curiam per Romanum Pontificem destinatum devenire posse sancitur; Ambigebatur. si-

Oo qui-

quidem à plerisque, num Constitutione prædicta adversus Cardinales à Curia hujusmodi absentes lata comprehenderentur, seu potius excluderentur Cardinales promotione antiquiores qui occurrente Decanatus vacatione ab ipsâ quidem Curia abessent, sed apud illas Ecclesias residerent, quas eis in administrationem retinere etiam unâ cum aliqua ex illis Ecclesiis Suburbicariis, quæ Cardinalibus antiquioribus assignari solent, ex consueta hujus Sanctæ Sedis indulgentia permissum esset. Et sanè eiusmodi rei ambiguitas, cum nullis adhuc præfatæ Sanctæ Sedis definitionibus discussa, ac disceptata esse videretur, animum nostrum adduxerat, ut eam expendendam, librandamque demandaremus, sive Dilectis Filiis Rotæ Romanæ Auditoribus, sive aliis hujus Curie Prælati, quorum sententiis, judiciisque suffragantibus id demum, quod rationi, & æquitati consentaneum visum Nobis fuisset, decerner e potuissemus. Verum dum in hac deliberatione versaremur, ut probè no-
stis, Venerabilis Frater Noster Vincentius Maria Episcopus Portuensis S. R. E. Cardinalis Ursinus, quem unum, tanquam cæteris suis Collegis promotione priorem, tam ad Decanatus Dignitatem, quam ad Ostiensem, & Veliternensem Ecclesias (memorata Pauli IV. Constitutione seposita) antiquitatis jura vocabant, secum animo reputans rem hanc absque aliqua contentione transigi minimè posse, disertè, & quidem non semel, Nobis significavit, se firmiter constituissè super istiusmodi negotio à quavis concertatione, seu litis specie prorsus abstinere, addiditque insuper se Beneventanæ Ecclesiæ jamdudum obstrictum reperiri. Sacri verò Collegii Decano, eidemque Ostiensi, ac Veliternensi Episcopo multiplices curas, nec levem pro animarum regimine vigilantiam incumbere; optare se proindè, atque etiam obtestari, ut quacumque sui ratione posthabita, Dignitatem Decanatus tunc vacantem Episcopo Cardinali ex residentibus in Romana Curia an-

tiquiori deferre vellemus, illique pariter Ecclesiarum Ostiensis, & Veliternensis optionem permetteremus: eâ tamen adjunctâ declaratione, ut simili in posterum occurrente Decanatus vacatione, salva, & illæsa remanerent, si quæ essent, jura Episcoporum Cardinalium, qui Cardinalatu quidem essent antiquiores, sed extra eandem Curiam in prioribus suis Episcopatibus tunc residerent. Hinc Nos tam enixis, ac verè laudabilibus optimi Cardinalis precibus annuentes, bo: me: Fulvio tunc Episcopo Sabinensi ejusdem S. R. E. Cardinali Astallio, qui ex Episcopis Cardinalibus in Romana Curia residentibus antiquior erat, prædictam Decanatus dignitatem deferri, simulque earumdem Ostiensis, ac Veliternensis Ecclesiarum optionem absque ulla majori cunctatione permisimus; salvis tamen, & amplissimè præservatis juribus, quæ de cætero similibus in casibus quovis modo competere possent Episcopis Cardinalibus antiquioribus extra dictam Curiam apud suas priores Ecclesias residentibus, dummodò è converso salva itidem essent jura aliorum quorumcumque antiquiorum Cardinalium in eadem Curia tunc commorantium. Quinimò ne prædicta Pauli IV. Constitutio accipiti diutiùs, varioque sententiarum judicio in ambiguum, atque incertum traheretur, neve de cætero super ea controversiæ ullæ, aut dissensiones inter Cardinales oborirentur, Vobis ea occasione similiter declaravimus fixum, decretumque Nobis esse Viros aliquot doctrina, ac prudentia insignes deligere, qui & ipsam Pauli IV. Constitutionem diligenter excuterent, & siquæ alia ad causæ momentum contulissent, attentè inquirerent, & accuratè perpenderent, ut ita matura deliberatione adhibita, illud tandem hac in re statuere possemus, quod ad majorem Dei gloriam, & cultum, ad Apostolicæ Sedis utilitatem, ad Ordinis Vestri honorem, atque ad animarum salutem conducibilis esse arbitraremur. Verùm hoc ipsum à Nobis susceptum consilium, ac Vobis ex

hoc eodem loco significatum exequi distulimus, quia cum Decanatus dignitatem, ac simul supradictas Ostiensem, & Veliternensem Ecclesias obtinuisset memoratus Cardinalis Astallius, cujus vegeta ætas, ac integra valetudo longè diuturnioris vitæ spem Nobis meritò faciebant, ejusmodi negotium quamcumque moram faciliè pati posse censuimus. Cùm tamen inscrutabili Divinæ Providentiæ consilio factum sit, ut prædictus Cardinalis Astallius opinione nostra celerius ab humanis decesserit, statim secuto ejus obitu, ut quod à Nobis jamdudum statutum fuerat, absque ulteriori mora implemus, septem hujus Curie Præsules doctrina, atque integritate præstantes deputavimus, illisque rem totam commisimus, ut probè, ac maturè discussis, ac perpensis rationum momentis, quæ hinc inde afferri poterant, & de quibus eos plenè instrui curavimus, suum circa verum sensum memoratæ Constitutionis Pauli IV. judicium proferrent, quidque in hujusmodi negotio justitiæ, ac veritati consonum ipsis visum esset, Nobis indicarent. Iisdem porrò Præsulibus commisimus pariter aliam controversiam super eodem Decanatu excitatam inter Venerabiles Fratres Nostros Sebastianum Antonium Episcopum Tusculanum Tanarium, ac Franciscum Episcopum Prænestinum S. R. E. Cardinales Judicem respectivè nuncupatos; primum quidem antiquiorem in Episcopatu, sed juniorem in Cardinalatu, secundum verò juniorem in Episcopatu, sed antiquiorem in Cardinalatu, atque ex specialibus in suo casu concurrentibus rationibus minorem Episcopatus antiquitatem sibi minimè obesse contendentem. Verùm cùm idem Cardinalis Judice, priusquam secunda hujusmodi controversia deputatorum Præsulum examini subjiceretur, cuicumque suo juri cedere existimaverit, ea dumtaxat adjecta conditione, quòd in futuris Decanatus vacationibus nullum ex sua cessione præjudicium illatum intelligeretur iis Cardinalibus, quibus similia jura competerent, nihil circa eamdem

secundam controversiam, (petita iurium huiusmodi præservatione excepta) à prædictis Præsulibus actum fuit. Quid jam Præsules ipsi concordibus suffragiis in primâ controversia senserint: quid itidem in secunda, ut de cætero indemnitati Cardinalium similia jura foyentium consultum esset, Nobis proposuerint, mox audietis.

Hic ingressus fuit Consistorium R. P. D. Riviera Sacri Collegii Secretarius, legitque Consilium, seu Decretum septem Prælatorum à Sanctissimo Domino nostro super ejusmodi negotio deputatorum, die 28. mox elapsi mensis Februarii ab eis editum; Quo lecto Sanctitas Sua allocutionem suam reasumpsit, ut sequitur.

Istiusmodi Prælatorum Consilium, seu Decretum statim ac Nobis relatum fuit, ut audistis, benignè approbavimus, ac perpetuis futuris temporibus inconcussè observari mandavimus. Id ipsum nunc iterum enixius mandamus, ac insuper duo ejusdem Decreti authentica exemplaria unâ cum Summariis rationum, seu, ut ajunt, Votis, quibus singuli Præsules propriam sententiam unanimiter confirmarunt, tradi volumus, unum quidem Dilecto Filio Nostro Petro S. Laurentii in Damaso Diacono Cardinali Otthobono S. R. E. Vice-Cancellario, aliud verò Dilecto Filio Collegii Vestri Secretario, ut ambo non tam ipsum Decretum, quàm præfata Summaria, seu Vota, quorum duo itidem authentica exemplaria eis hunc in finem dari jubemus, inter Acta præsentis Consistorii ad perpetuam rei memoriam asservent, atque custodiant.

Hæc omnia, VENERABILES FRATRES, Vobiscum in præsens communicanda existimavimus, ut in eiusmodi re ad Ordinem Vestrum pertinente, quid hætenus actum fuerit, plenè compertum, ut par est, ac penitus exploratum habeatis. Cæterum nunc ad majorem gestorum firmitatem, ac quascumque futuras

controverſias penitùs extinguentes , novam deſuper Apoſtolicam Conſtitutionem , ſeu declarationem edi , ac promulgarì expediat , poſtquam ſingulorum Præſulum Vota à Nobis viſa , ac perpenſa fuerint , maturiùs deliberabimus .

Obiit prædictus Sanctiſſimus Pontifex CLEMENS XI. brevifſimo duorum dierum morbo è vivis raptus potiùs , quàm ſublatus , feria iv. die xix. Martii 1721. horâ circiter decimâ octavâ cum dimidia in Palatio Apoſtolico Quirinalli, omnibus Eccleſiæ Sacramentis ritè , ſummâque pietate perceptis .
Vixit Ann. 71. Menſ. 7. dies 25.
Sedit Ann. xx. Menſ. 3. dies 26.





I N D E X

A R G U M E N T O R U M

S I N G U L A R U M O R A T I O N U M

Juxta temporis ordinem dispositus.



Die 15. Decembris 1700.

- I. **D**E sua ad summum Pontificatum assumptione Sacro S. R. E. Cardinalium Collegio gratias agit. fol. 1.

Die 21. Februarii 1701.

- II. Obitum Caroli II. Hispaniarum Regis Catholici impensè dolet. Defuncti laudes commemorat, & solemniū Exequiarum in Pontificio Sacello pro illius anime suffragio celebrandarum diem designat. Postremò universale Jubileum ad divinam opem suā Pontificatus initio, & pro occurrentibus Ecclesie necessitatibus implorandam indicit. f. 3.

Die 18. Aprilis 1701.

- III. Audax facinus Friderici Marchionis Brandenburgensis, qui nomen, & insignia Regis Prussie, insciā Sede Apostolicā, sibi arrogaverat, improbat, ac damnat, simulque palam facit se monuisse Catholicos Principes, ne presumptos à dicto Marchione bonores ullo officii genere illi tribuant. f. 6.

Die 8. Augusti 1701:

- IV. Suum, & Apostolicæ Sedis de Latere Legatum deputat D. Cardinalem Archintum ad Sabaudicæ Principissam, Philippi V. Hispaniarum Regis Catholici Sponsam, brevè ex Italia discessuram. f. 8.

Die

Die 3. Octobris 1701.

- V. Obitum Jacobi Secundi Magnæ Britannie Regis DD. Cardinalibus significat, ejusque laudes, & quæ pro Orthodoxa Religione subierat, damna honorificæ commemoratio profequitur. £ 10.

Die 21. Novembris 1701.

- VI. Propositis, quæ Italia, Europa, & Ecclesia impendebant, gravissimis malis ob exortum inter Imperatorem, & duos Reges de Hispanica successione atrox bellum, ac paternis commemoratis officiis ad illud amoliendum frustra adhibitis, DD. Cardinalibus consilium aperit, quod susceperat, mittendi Nuncios extraordinarios ad eosdem Catholicos Principes, ut eos ad Christianam Concordiam, & Pacem revocare pro viribus studeat, ac publice tranquillitati propiciat. £ 13.

Die 5. Decembris 1701.

- VII. Christiana Religionis statum in Sinarum, & aliis finitimis Indiarum Orientalium Regnis exposito, exortisque nuper inter Missionarios Apostolicos illarum partium dissidiis commemoratis, DD. Cardinalibus proponit susceptum à Sanctitate Sua consilium mittendi ad eas Regiones Visitatorem Apostolicum cum potestate Legati de Latere, congruo Missionariorum comitatu beneßatum. Mox ad id Ministerium eligit Carolum Tbomam Maillard de Tournon Taurinensem, Pontificum Cubicularium honoris nuncupatum, quem demum Antiochene Ecclesiæ Patriarcham constituit. £ 16.

Die 8. Maji 1702.

- VIII. Deputat D. Cardinalem Carolum Barberinum suum, & Apostolicæ Sedis de Latere Legatum ad Philippum V. Hispaniarum Regem Catholicum Neapoli commorantem. £ 19.

Die 20. Julii 1702.

- IX. Excipit benignè D. Cardinalem Carolum Barberinum ab Apostolica Legatione, de qua proximè, reducem. £ 21.

Die 15. Januarii 1703.

- X. Concussa ingenti terræmotu proximâ nocte, ac magnoperè deterrita Urbe, DD. Cardinales admonet recentem hanc calamitatem perspicuum esse cœlestis ira peccatis hominum lacescit argumentum, eosque ad illa edenda vera pœnitentia, & Christiane pietatis exempla, quibus Divina Misericordia concilietur, accendit. £ 23.

Die 19. Februarii 1703.

- XI. Concussa iterum vehementiori terræmotu Urbe in Festo Purificationis B. V., quo tempore Pontifex cum DD. Cardinalibus in Sixtino Sacello Sacris operabatur, Sanctitas Sua honorificè primum commemorat Christiane pietatis exempla, quæ tum DD. Cardinales, tum populus universus, ediderant ad avertendam atrox Divine iracundie flagellum. Indicit subinde Cappellam solemnè ritu celebrandam in Basilica Vaticana die 22. prefati Mensis Februarii pro agendis Deo gratiis ob preservationem Urbis à periculo ejusdem nuperi terræmotus, nec non ad Divinam opem in posterum implorandam. Denique pervigilium Festi Purificationis B. V. deinceps Romæ quotannis cum jejuniis servari, ac in eodem Festo post solemne Sacrum, quod in Pontificia Cappella de more peragitur, hymnum Te Deum laudamus perpetuò decantari decernit. £ 25.

Die 17. Decembris 1703.

- XII. Creat S. R. E. Presbyterum Cardinalem Franciscum Pignastellum Archiepiscopum Neapolitanum. £ 27.

Die

Die 18. Maji 1705.

- XIII. Leopoldi I. Romanorum Regis in Imperatorem electi obitum DD. Cardinalibus denunciat, ejusque virtutes honorifica laudatione commemorat. f. 29.

Die 17. Maji 1706.

- XIV. Creat viginti S. R. E. Cardinales, ex quibus novendecim evulgat, unum vero in pectore reservat, arbitrio suo quandocumque declarandum. f. 31.

Die 7. Junii 1706.

- XV. & XVI. Cardinalatus recusationem à R. P. D. Gabriele Philippuccio rite factam admittit, et in ejus locum S. R. E. Presbyterum Cardinalem creat Reverendissimum D. Michaelem Angelum de Comitibus Archiepiscopum Tarfensem. f. 35.

Die 6. Decembris 1706.

- XVII. Rationes exponit, quibus ad promulgandum bido ante Jubileum adductus fuerat. Subinde DD. Cardinales ad implorandam emixius à Deo inter Christianos Principes pacem excitat. Ac demum eos, ut et assidua bonorum operum, illustriumque virtutum exempla ipsi edant, et domesticorum suorum vigilem curam habeant, ac illos precipue, qui ordinis sunt Clericali, urgeant ad Sanctionem de Clericali habitu disciplina, quam propediem evulgare decreverat, exacte observandam adhortatur. f. 39.

Die 21. Februarii 1707.

- XVIII. Petri Portugallie, et Algarbiorum Regis obitum, extrema devoti ejus in se, et Apostolicam Sedem studii declaratione honorifice commemorata, DD. Cardinalibus nunciatur, tum paterna monita, quibus novum Regem defuncti Natum ad emulanda Majorum suorum de Catholica Fide optimi meritorum exempla incitaverat, exponit. f. 43.

Die 8. Junii 1707.

- XIX. Gestis aliquot ante dies in causa electionis Episcopi Monasteriensis breviter commemoratis, exponit Episcopum Paderbornensem, et Canonicos Monasteriensis Ecclesie, qui eum elegerant, humili retractatione emendasse quidquid contra Pontificium mandatum de proroganda Episcopi Monasteriensis electione quovis modo peccaverant, et recitatis literis tum ab Episcopo Paderbornensi, tum etiam à prædictis Canonicis ea de re ad Sanctitatem Suam datis, ad propositionem ejusdem Monasteriensis Ecclesie de more procedit. f. 45.

Die 1. Augusti 1707.

- XX. Quæ Ecclesiastica libertati, et Autoritati in Regno Neapolis, in Ducatu Sabaudia, et Principatu Pedemontii, ac nuperrime in Ducatu Parma, et Placentie à laica potestate illata fuerant, gravissimis detrimentis summatim commemoratis, passim facit sibi decretum, fixumque esse, quando in irritum ceciderant interpositæ pluries paterne admonitiones, severiora remedia inscriptis Ecclesie vulneribus adhibere, ac ea, quæ Pastoralis officii ratio postulabat, viriliter exequi. Quod re ipsa, et illico præstitit, promulgatis eo ipso tempore, quo Sua Sanctitas hac in Consistorio disserbat, publicisque, et confusis locis Urbis affixis tribus literis Apostolicis typis editis [Brevia vocant] quibus ea omnia, quæ in antedictis Dominiis gesta fuerant, Ecclesiastica jurisdictioni, ac immunitati præjudicialia damnavit, et nulla ac irrita declaravit, pluraque alia pro Ecclesie libertate, et Pontificie Autoritatis tuitione constituit. f. 47.

In eodem Consistorio.

XXI. Declarat S. R. E. Presbyterum Cardinalem Josephum Vallentium Archiepiscopum Atheniensem Palatii Apostolici Praefectum, quem in Consistorio secreto habito die 17. Maji 1708. apud cum alios novendecim Cardinalibus creaverat, et in pectore reservat. Præterea alium similiter Presbyterum Cardinalem anathematizavit, ac renuntiavit; videlicet R. P. D. Carolum Thomam Maillard de Tournon Patriarcham Antiochenum in Sinarem, et alios Indiarum Orientalium Regnis eodem potestate Legati de Latere Gentium Praefectorem Apostolicum.

Die 15. Aprilis 1709.

XXII. Creat S. R. E. Cardinales Olysses Josephum Gorgadinum Archiepiscopum Theodosiae, Pontificiorum Brevium ad Principes a Secretis, ac etiam alium, quem in pectore reservat.

Die 19. Junii 1709.

XXIII. Cardinalitiae Dignitatis abdicationem à D. Cardinali Francisco Maria Mediceo sponte factam admittit.

Die 22. Julii 1709.

XXIV. R. P. D. Annibalem Albanum Sapientiam Suae Germani Fratriæ. Filium deputat Nuncium extraordinarium ad Imperatorem, aliosque Reges, et Principes, ut in Pacis tractationibus inter eos propediem ineundis Apostolica Sedis dignitatem, et orthodoxæ Fidei rationes pro viribus tueatur.

In eodem Consistorio.

XXV. Declarat S. R. E. Presbyterum Cardinalem Antonium Franciscum Sanvitalialem Archiepiscopum Urbinatem, Pontificii Cubiculi Praefectum, quem in Consistorio secreto habito die 15. Aprilis proximè præteriti una cum Eminentissimo Gorgadino Cardinalem creaverat, et in pectore reservaverat.

Die 9. Septembris 1709.

XXVI. Suos, et Apostolica Sedis de Latere Legatos deputat, ac declarat, Bononie Laurentium Casonum, Romandiole Thomam Ruffum, et Ferrarie Laurentium Corsinum S. R. E. Cardinales.

Die 14. Octobris 1709.

XXVII. Consilium, quod susceperat, Serenissimum Austriæ Archiducem Carolum honestandi titulo Regis Catholici Hispaniarum ad normam Clementinae: Si Summus Pontifex Sec. DD. Cardinalibus aperit.

Die 19. Februarii 1710.

XXVIII. Quæ cum à Carolo Hispaniarum Rege Catholico, tum ab ejus Administris in Ducatu Mediolanensi, ac in Regno Neapolis gesta fuerant, ut detrimenta utrobique Ecclesiasticæ auctoritati illata sarcirentur; quæque insuper à Sanctitate Sua, ejusque permisso à DD. Cardinalibus Archiepiscopis Mediolanensi, et Neapolitano peracta fuerant, ut uberius Ecclesiæ satisfaceret, DD. Cardinalibus luculenter exponit.

In eodem Consistorio.

XXIX. Transfert D. Cardinalem Ruffum à Legatione Romandiole ad Legationem Ferrariam.

Die

Die 7. Maji 1710.

XXX. *Expositis primùm iis, quæ decernenda censuerat de Pacificationis tractatu ab Augusto Poloniae Rege dudum cum Succis inito: tum etiã iis, quæ idem Rex egerat, ut inusitam ex eodem tractatu Regio Nomini labem prorsus abstergeret, et Pontificia voluntati obsequeretur: DD. Cardinalibus susceptum consilium aperit præficiendi viduatis Poloniae Ecclesiis personas, pro quibus idem Rex de more supplicaverat. Demum plura subiicit admodùm honorifica de filiali ipsius Regis in Sanctam Sedem obsequio, ac de Regia deliberatione adjungendi quamprimum Principi ejus nato pios, probosque viros, qui illum orthodoxæ Fidei præceptis, ac ritibus imbuant.* £ 76.

Die 19. Maji 1710.

XXXI. *Sacro Collegio nunciat Antonium Ulricum Ducem Brunsvicensem, et Lunenburgensem, ejurata palam Lutberana heresi, Catholicam Religionem suscepisse.* £ 81.

Die 1. Decembris 1710.

XXXII. *Quæ à Leopoldo Lotbaringie, et Barri Duce piè non minùs, quàm justè peracta fuerant pro revocandis iis, quæ in Codice Leopoldo nuncupato jussu ejusdem Ducis jampridem edito, et à Sanctitate Sua damnato adversùs Ecclesiæ jura continebantur, aliisque inde secutis plenè emendandis, latè exponit.* £ 84.

Die 27. Aprilis 1711.

XXXIII. *Immatutum, ac verè inopinatum obitum cla. me. Josephi I. Romanorum Regis in Imperatorem electi DD. Cardinalibus d. nunciat, eaque occasione ad defuncti Principis laudem refert consilium ab illo susceptum Apostolicæ Sedi ea omnia, quæ obediensissimum S. R. E. Filium decebant, per Oratorem suum cumulatè exhibendi. Accepit siquid. à Majoribus suis more suas jam ad id literas miserat ab eodem Oratore Sanctissimæ Sui solemniter reddendas, aliæque omnia hac in re ita disponi curaverat, ut quæ Romæ demum agenda supererant, antiquis Romanæ Ecclesiæ moribus plenè conformarentur.* £ 89.

Die 11. Maji 1711.

XXXIV. *Gallie Delphini obitum DD. Cardinalibus nunciat, commemoratisque ejus virtutum laudibus Exequias pro refrigerio illius Animæ in Pontificio Sacello de more celebrandas indicit.* £ 93.

Die 14. Octobris 1711.

XXXV. *Obitum piæ recordationis Caroli Thomæ S. R. E. Cardinalis de Tournon Macai in Sinarum Imperio die 8. Junii 1710. secusum DD. Cardinalibus communicat, ejusque præclaris in Ecclesiæ, Apostolicæ Sedem, Catholicamque Religionem meritis suis commemoratis, Exequias pro suffragio ejus Animæ in Pontificio Sacello solemniter celebrandas indicit.* £ 95.

In eodem Consistorio.

XXXVI. *Deputat deinde suum, et Apostolicæ Sedis de Latere Legatum Josephum Renatum S. R. E. Diaconum Cardinalem Imperialem ad Carolum III. Hispaniarum Catholicum, nec non Hungariæ, et Bobemiæ Regem Illustræ, qui nuperrimè à Civitate Barcinonensi in Italiam profectus Mediolani confisterat, et hinc Germaniam repetere constituerat.* £ 98.

Die

Die 23. Decembris 1711.

- XXXVII. *Creat S. R. E. Diaconum Cardinalem Annibalem Albanum Sanctitatis Suae ex Fratre germano Nepotem, utriusque Signaturae Referendarium, Camera Apostolica Praesidem, ac nuper ad Tractum Rheni, aliasque partes inferioris Germaniae Nuncium Apostolicum extraordinarium.* £ 100.

Die 30. Januarii 1712.

- XXXVIII. *Excipit D. Cardinalem Iosephum Renatum Imperialem, qui ab Apostolica Legatione ad Carolum III. Hispaniarum Regem Catholicum Mediolani obita feliciter ad Urbem redierat.* £ 102.

Die 16. Martii 1712.

- XXXIX. *Acerbum Galliae Delphini obitum, qui alteri Delphino ejus Patri ante paucos menses defuncto successerat; DD. Cardinalibus nunciat, relatisque amplissime ejus laudibus, Exequias pro suffragio illius Animae in Pontificio Sacello de more celebrandas indicit.* £ 104.

Die 20. Aprilis 1720.

- XL. *Consilium suum promovendi Canonizationem beatorum Pii V., Andreae Avellini, Felicis à Cantalicio, et Catharinae de Bononia Sacro DD. Cardinalium Collegio aperit, eorumque sententias exquiri.* £ 106.

Die 6. Maji 1712.

- XLI. *Sententias DD. Cardinalium, Patriarcharum, Archiepiscoporum, et Episcoporum super Canonizatione B. Pii V. exquiri.* £ 110.

Die 9. Maji 1712.

- XLII. *Sententias DD. Cardinalium, Patriarcharum, Archiepiscoporum, et Episcoporum super Canonizatione B. Andreae Avellini exquiri.* £ 113.

Die 11. Maji 1712.

- XLIII. *Sententias DD. Cardinalium, Patriarcharum, Archiepiscoporum, et Episcoporum super Canonizatione B. Felicis à Cantalicio exposcit.* £ 115.

Die 18. Maji 1712.

- XLIV. *Sententias DD. Cardinalium, Patriarcharum, Archiepiscoporum, et Episcoporum super Canonizatione B. Catharinae de Bononia exquiri.* £ 118.

In eodem Consistorio.

- XLV. *Creat octodecim S. R. E. Cardinales, ex quibus tamen undecim tantum evulgat, reliquos septem in pectore, ut vocant, reservat arbitrio suo quandocumque evulgandos.* £ 121.

Die 11. Julii 1712.

- XLVI. *Accensum inter Helvetios bellum, et gravia inde Orthodoxae Religioni impendentia pericula dolet. Subsidia illis Catholicis missa, ac officia cum Principibus, qui ipsis opitulari possunt, adhibita commemorat. In tanto tamen rerum discrimine divinam in primis opem implorandam esse monet, eumque in scopum Christianifideles Urbis prolatis Indulgentiarum thesauris se incitare velle significat. Demum DD. Cardinales ad gravissimam hanc Causam consiliis, ope, precibus anxie juvandam hortatur.* £ 124.

Die

Die 26. Septembris 1712.

XLVII. *Declarat quatuor dumtaxat ex septem S. R. E. Cardinalibus, quos aliis, nempe in Consistorio secreto habito post Semipublicum die 18. Maji proxime prateriti, una cum aliis undecim Cardinalibus tunc publicatis creaverat, et in pectore reservaverat.* f. 127.

Die 5. Octobris 1712.

XLVIII. *Principem Franciscum Ludovicum ex Comitibus Palatinis Rheni Electum Prioratensem, Administratorem Ecclesie Uratislaviensis, nec non Thrononice Militie Magnum Magistrum deputat Coadjutorem Archiepiscopi Moguntini, et quia ille de Apostolicis Nunciis honorifice excipiendis, nec non de Altranstadiensibus Passionibus, ac recessu Religionis pro inferiori Palatinatu, ita habendis, perinde ac si nunquam emanassent, pollicitus fuerat, DD. Cardinalibus palam facit, recitatis tum ejusdem Francisci Ludovici literis ad Sanctitatem Suam datis, tum etiam plurium aliarum literarum exemplis, que Sanctitas Sua ad Imperatorem, Electorem Palatinum, ac ipsum Principem Franciscum Ludovicum bis de rebus perscripserat.* f. 129.

Die 30. Januarii 1713.

XLIX. *Commemoratis quamplurimum S. R. E. Cardinalium brevi tempore extinctorum funeribus, ac inter eos Cardinalis Thomasi novissime defuncti virtutibus precipua laude celebratis, declarat reliquos tres Cardinales, qui supererant ex iis, quos praterito anno creaverat, et in pectore reservaverat, nimirum Emmanuelem Arias Archiepiscopum Hispalensem, Benedictum Sala Episcopum Barcinonensem, Melchiorum de Polognac Rotæ Romanæ Auditorem. Creat insuper duos alios Cardinales, nempe Benedictum Odyscalcum Archiepiscopum Mediolanensem, et alium, quem in pectore reservat, arbitrio suo quancumque evulgandum.* f. 136.

Die 28. Aprilis 1713.

L. *Cum aliquot ante dies ad Urbem venisset Religiosus Vir Joannes Joseph Maetz Ordinis Fratrum Minorum S. Francisci de Observantia nuncupatorum Professor à Venerabili Viro Samuele Capasulis Patriarcha Alexandrino Ritus Græci missus, ac Procurator ad infra scripta specialiter constitutus, literasque attulisset ejusdem Patriarchæ Græco idioma conscriptas, quibus ille Sanctissimo Patri significabat se divino illustratum lumine vetus Græcorum Schisma, ejusque errores ejurasse, ac Orthodoxæ Fidei professionem emisisse, transmissis ea de re opportunis documentis: eundem propterea Summum Pontificem, quem ut verum B. Petri Successorem agnoscebat, humiliter obsecrans, ut suum Alexandrinæ Ecclesiæ Presulatum Apostolica auctoritate confirmaret, eique Pallium mittere dignaretur: attributa demum antedicto Maetz plena facultate supplendi quicquid à se omissum fuisset, suoque nomine agendi ea omnia, que in præmissis necessaria, ac opportuna Sanctitati Suae visa fuissent. Idem Sanctissimus Pater, ne quid in re tanti momenti, nisi qua par erat, maturitate, ac serâ adhibita consultatione decerneret, scripta, et postulata memorati Patriarchæ discutienda commisit primum quidem Congregationi DD. S. R. E. Cardinalium negotiis propagandæ Fidei prepositorum, subinde verò particulari Congregationi nonnullorum ejusdem S. R. E. Cardinalium, et aliquot Romana Curie Prelatorum, ac Theologorum à Sanctitate Suae specialiter ad id deputatorum, quos ipsamet Sanctitas Sua coram se de hac re differenter audire voluit. Illorum itaque auditis sententiis, nec non auditis pariter, et sæpe pluries Sacrarum Cæremoniarum Magistris, ac iis omnibus, que ad actionem riti, et ordine, ac prorsus ex dignitate Sanctæ Sedis Apostolicæ perficiendam*

conducere visa sunt, sedulo expensis, dispositis, et constitutis, Sua Sanctitas Consistorium indixit, in quod hac ipsa die habitum ab uno ex DD. Ceremoniarum Magistris, antequam fores de more clauderentur, introductus fuit R. P. D. Prosper de Lambertinis, utriusque Signaturæ Referendarius, Prelatus Domesticus Pontificius, et Advocatus Consistorialis, simulque introducti etiam fuere prædictus Joannes Josephus Mazet Patriarcha Alexandrini Procurator, nec non duo Monachi Ordinis Sancti Basilii Ritus Græci, qui ab eodem Patriarcha pariter ablegati fuerant, illius literas, aliæque ab eo transmissa documenta elevatis manibus deferentes, à pluribus Græcis, qui in eorum comitatu erant, associati.

Quibus omnibus, nec non Prelatis, et Nobilibus plurimis, qui frequentissimi conveniant, ac præsertim Episcopis, quos Pontificii Solii Assistentes nuncupant, et nonnullis Proto-notariis Apostolicis presentibus, antedictus R. P. D. Prosper de Lambertinis à regione Pontificie Sedis constitutus, flexis genibus luculentam habuit Orationem, in qua nomine prædicti Patriarchæ debitam filialem obedientiam Sanctitati Suae præstitit, et ab ea Pallium humiliter postularit. Sanctissimus delatam obedientiam paterno affectu excepit, petiitque Pallium benigne concessit. Demum ceteris omnibus dimissis, clausoque Consistorio, DD. Cardinalibus rationes exposuit, quibus adductus fuerat ad indulgendum, ut hæc-nus dilata Cathedralium Ecclesiarum in Regno Hispaniarum vacantium provisio non amplius retardaretur. f. 139.

Die 22. Maji 1713.

- LI. Præficit Ecclesiæ Tornacensi in Episcopum, et Pastorem Jo: Ernestum ex Comitibus à Louvenstein absque ulla prævia cujusquam nominatione, et cum narrativa, quod ejusdem Ecclesiæ provisio ob cessationem Indulti à Clemente IX. Regi Christianissimo, ejusque Successoribus dudum concessi, ad Sedem Apostolicam liberè omnino pertineat. f. 157.

Die 18. Septembris 1713.

- LII. Confirmat electionem de persona Raymundi Ferdinandi ex Comitibus de Rabatta in Episcopum Ecclesiæ Passaviensis ab illius Capitulo, et Canonicis, tametsi eadem Ecclesiæ per obitum bo. me. Cardinalis de Lamberg vacaret, adeoque Sedis Apostolicæ dispositioni specialiter reservata existeret, ritè factam, attento peculiari Indulto à S. M. Innocentio XII. ante promotionem defuncti Cardinalis, tunc Episcopi, ad Sacram Purpuram, præfatis Capitulo, et Canonicis benignè concessio: prævia cassatione Capitulationum ab ipsis initarum, et cum suppletionem quorumcumque defectorum. f. 160.

Die 27. Novembris 1713.

- LIII. Declarat, ac deputat suum, Sedisque Apostolicæ de Latere Legatum Romanodiocles Cardinalis Gorradinum. f. 164.

Die 16. Februarii 1714.

- LIV. Excipit benignè coram sex DD. Cardinalibus, videlicet de Abdua, Sacripante, Paulutio, Imperiali, Columna, et Albano, Marchionem de Priè Caroli Sexti Romanorum Regis in Imperatorem electi Oratorem, specialiter à Majestate Sua delegatum ad illa omnia ejus nomine Sanctitati Suae præstanda, et ad ea respectivè postulanda, quæ illius Majores in Romanorum Reges, et Imperatores recens electi Romanis Pontificibus præstare, et ab iis respectivè postulare consueverunt. f. 165.

Die

INDEX ARGUMENTORUM.

303

Die 16. Aprilis 1714.

LV. *Declarat Bononiæ de Latere Legatum D. Cardinalem Cusanum.*

£ 170.

Die 7. Maji 1714.

LVI. *Antonii Ulrici Ducis Brunsvicensis, et Luneburgensis obitum cum honorifica illius virtutum commemoratione DD. Cardinalibus nunciat, ejusque anima refrigerium publicis Exequiis in Ecclesia Collegii de Propaganda Fide coram illis Cardinalibus, qui ejusdem Propaganda Fide negotiis prepositi sunt, celebrandis comparari mandat. £ 171.*

Die 28. Maji 1714.

LVII. *Ferraria de Latere Legatum declarat D. Cardinalem Piazza.*

£ 174.

Die 20. Augusti 1714.

LVIII. *Suum, et Apostolica Sedis de Latere Legatum deputat D. Cardinalem Goxgadinum ad Principissam Parmensem Philippi V. Hispaniarum Regis Catholici Sponsam, brevi ex Italia discessuram.*

£ 175.

Die 7. Decembris 1714.

LIX. *Gravibus malorum procellis, quibus ab ipso suscepti Pontificatus initio agitatus semper fuerat, novisque in dies acerbioribus vulneribus, qua Ecclesiastica libertati, Pontificie auctoritati, imò etiam Orthodoxæ Religioni inferebantur, commemoratis, consilium aperit suum imparido, strenuoque animo exequendi ea, qua Pastoralis officii ratio postulabat, eumque in scopum DD. Cardinales vehementer hortatur, ut occasione Indulgentiæ à Sanctitate Sua in forma Jubilei nuperrimè concessæ per accuratas eorum preces divinam illi opem tam necessario tempore conciliare studeant.*

£ 177.

Die 21. Januarii 1715.

LX. *Nupere Pacificationis inter Imperatorem, et Imperii Principes ex una, ac Regem Christianissimum ex altera partibus in Oppido Badenensi stabilita Capitibus, Orthodoxæ Fidei, Ecclesiæ, Sanctæque Sedis tum favorabilibus, tum etiam prejudicialibus explicatis: recitari mandat Protestationem ibidem à R. P. D. Passoneo jussu Sanctitatis Suae factam, deinde differt de ingenti bellico apparatu, quem Turcarum Tyrannus adornabat, et DD. Cardinales hortatur, ut Deum obsecrent, quatenus fructuosas esse velit Pontificias monitiones, et preces, quibus Christianos Principes ad fortiter occurrendum periculo rei Christiane à Barbaris impendenti vehementer pro Pastoralis officii debito incitaverat.*

£ 180.

Die 20. Februarii 1715.

LXI. *Causas exponit, quibus ad extinguendum, ac penitus abolendum pratensa Apostolica in Regno Sicilia Legationis, et Monarchiæ nuncupata Tribunal adductus fuerat. Mox specialem Constitutionem hac ipsa die ea de re promulgatam, nec non Breve modum præscribens, quo Causæ ad forum Ecclesiasticum pertinentes in dicto Regno deinceps judicari deberent, eadem pariter die editum recitari mandat.*

£ 190.

Die 6. Maji 1715.

LXII. *Regem Catholicum laudat, quod rescissis Decretis contra D. Cardinalem Judice Inquisitorem Generalem Hispaniarum, ipsumque Inquisitionis Tribunal latius, eundem Cardinalem in Hispanias honorifice revocaverat.*

£ 194.

In eodem Consistorio.

LXIII. *S. R. E. Diaconum Cardinalem creat R. P. D. Fabium Oliverium Prænotarium Apostolicum, Secretorum Brevium Secretarium, ac Palatii Apostolici Pro Præfatum.*

£ 196.

Die

Die 29. Maji 1715.

- LXIV. *Jubilæum universale indicit ad implorandam divinam opem contra Turcas. Mox S. R. E. Cardinalem declarat Damianum Hugonem ex Comitibus de Schonborn, aliis in pectore reservatum.* £197.

In eodem Consistorio.

- LXV. *Creat S. R. E. Cardinalem Henricum de Thiard de Bissy Episcopum Meldensem, ac demum tres alios in pectore reservat.* £200.

Die 23. Septembris 1715.

- LXVI. *Christianissimi Galliarum Regis Ludovici XIV. obitum, qui prima die mensis Septembris contigerat, Sacro Collegio de more nunciat, ejusque virtutibus, ac rebus gestis amplissimo preconio decoratis, Exequias pro suffragio illius Anima in Pontificio Sacerdotio celebrandas indicit.* £201.

Die 16. Decembris 1715.

- LXVII. *Ante preconia, 19^a propositiones Ecclesiarum declarat Urbini de Latere Legatum D. Cardinalem de Via.* £204.

In eodem Consistorio.

- LXVIII. *Post preconia, 19^a propositiones Ecclesiarum, creat quatuor S. R. E. Cardinales, ac subinde tres illos Cardinales declarat, 19^a palam evulgat, quos in Consistorio die 19. Maji proximè præteriti habito creaverat, 19^a in pectore reservaverat.* £205.

Die 13. Januarii 1716.

- LXIX. *Ingruentia Christiane Reipublice, Italia potissimum, ac ipsimet Urbi à Barbarorum armis pericula, 19^a que ad ea avertenda gesserat, ac gerere meditabatur, exponit; deinde DD. Cardinales ad subsidia in usum tam necessarij belli, 19^a communis defensionis liberaliter conferenda enixe hortatur.* £207.

Die 30. Martii 1716.

- LXX. *Iterum de Turcico bello fusè disserit, quæque ad propulsandos hostiles conatus gesserat, 19^a à Christianis etiam Principibus gesta fuerant, disserit commemorat. Decimarum subsidium indicit. Cardinali Ursino Germanicam protectionem remittit.* £211.

Die 30. Septembris 1716.

- LXXI. *Insignem de Turcis Victoriæ in Hungaria partem DD. Cardinalibus communicat. Principem Eugenium à Sabaudia meritis ornat laudibus, cique Pileum, 19^a Ensem solemniter benedictos largiri constituit.* £215.

Die 6. Septembris 1716.

- LXXII. *Excipit in Basilica Liberiana quatuor vexilla in Hungarico prælio Turcis erepta, que D. Cardinali de Schrotenbach nomine Augustissimi Imperatoris Sanctissitæ Sus reverenter offert.* £219.

Die 7. Decembris 1716.

- LXXIII. *Ad Ecclesiam Patriarchalem Ulyxbonensem Occidentalem noviter erectam, transfert R. P. D. Thomam de Almeida Episcopum Portugallensem.* £221.

Die 14. Januarii 1717.

- LXXIV. *Communicat DD. Cardinalibus dedicationem à Turcis Augustissimo Imperatori factam munissimæ Oppidi Temesvaric, 19^a Cappellam sancto Epiphanij die in Liberiana Basilica pro gratiarum actione habendam indicit.* £225.

Die

Die 15. Martii 1717.

- LXXV. *Creat S. R. E. Cardinalem Gibertum Borromeum Patriarcham Antiochenum, Episcopum Novariensem, et Pontificii Cubiculi Praefectum.* f. 229.

Die 12. Aprilis 1717.

- LXXVI. *Transfert à Legatione Urbini ad Legationem Romandiole D. Cardinalem Joannem Antonium de Via, et declarat Bononiae de Latere Legatum D. Cardinalem Curium Origum.* f. 231.

Die 12. Julii 1717.

- LXXVII. *Que Rex Catholicus egerat, ut in ejus Regnis Apostolicae Sedis Auctoritas pristinum in statum restitueretur exponit, ac deinde Abbatem Julium Alberonum, cujus opera praefatus Rex in gravissimo hoc negotio usus fuerat, S. R. E. Cardinalem creat una cum alio, quem in pectore reservat.* f. 233.

Die 1. Octobris 1717.

- LXXVIII. *Novam de Turcis relatum in Hungaria victoriam, et Albe Graecae deditionem DD. Cardinalibus significat. Cappellam in Ecclesia S. Mariae super Minervam pro gratiarum actione, et justa Christianae pietatis officia in Pontificio Sacello pro Defunctis tam in Hungarica Acie, quam in Navalibus ad Orientem praefatis indicit.* f. 237.

In eodem Consistorio.

- LXXIX. *Post propositiones, et praconia Ecclesiarum declarat S. R. E. Cardinalem Emericum Csaky Archiepiscopum Colocensem, quem in alio Consistorio habito die 12. Julii ejusdem anni creaverat, et in pectore reservaverat.* f. 241.

Die 11. Octobris 1717.

- LXXX. *Abjurationem Lutheranae heresim à Friderico Augusto Principe Regio Poloniae, et Electorali Saxonia ante quinquennium Bononiae peractam DD. Cardinalibus significat, et plures illius literas ea de re ad Sanctitatem Suam datas recitari mandat.* f. 243.

Die 6. Decembris 1717.

- LXXXI. *Plenariam Indulgentiam in forma Jubilei indicit ad divinam opem in periculis, quae Italicae tranquillitati imminere prospicit, implorandam.* f. 249.

Die 19. Januarii 1718.

- LXXXII. *Ferrariae de Latere Legatum declarat D. Cardinalem Joannem Patritium.* f. 251.

Die 15. Martii 1719.

- LXXXIII. *Matrimonii inter Fridericum Augustum Electorem Saxoniae, Regiumque Poloniae Principem, et Mariam Archiducissam Austriae cla. me. Josephi Imperatoris Filiam natu majorem stabiliti nuncium DD. Cardinalibus communicat.* f. 252.

Die 29. Martii 1719.

- LXXXIV. *Constituit D. Cardinalem Albanum S. R. E. Camerarium loco boi me; Cardinales Jos. Baptista Spinule proxime defuncti, cum emolumentorum Sigilli dismembratione, eorumque in Camera Apostolicae beneficium applicatione.* f. 255.

R r

Die

Die 26. Aprilis 1719.

- LXXXV. Permittit D. Cardinali Astallio optionem Ecclesiarum Ofiienfis, & Veliternenfis cum Decanatu Sacri S. R. E. Cardinalium Collegii. f. 258.

Die 18. Septembris 1719.

- LXXXVI. Relato Religionis Christianae statu in Sinarum Imperio, ac iis omnibus, quae post editam super Ritibus, & Ceremoniis Sinenfibus Constitutionem ibidem evenerant, commemoratis, exponit susceptum à se consilium illuc rursus mittendi novum Visitatorem Apostolicum, & ad ejusmodi Ministerium deligit R. P. D. Carolum Ambrosium Medio-barbam Papiensem V. S. Referendarium, quem mox Patriarcham Alexandrinum creat. f. 262.

Die 29. Novembris 1719.

- LXXXVII. Creat decem S. R. E. Cardinales, novem evulgat, & unum in pectore sibi reservat. f. 269.

Die 20. Martii 1720.

- LXXXVIII. Rationes explicat, quibus adductus consilium susceperat precipiendi Ludovico de Belluga, & Moncada Episcopo Caribaginenfi in virtute Sanctae obedientiae, ut ei delatam Cardinalitiam Dignitatem acciperet. f. 275.

Die 6. Maji 1720.

- LXXXIX. Protectionem Patriarchae Alexandrini ad Civitatem Olyssiponensem, & precipua bonoris, benevolentiae, ac liberalitatis argumenta, quibus à Rege Lusitaniae exceptus, & postmodum ad Sinas honorificentissime dimissus fuerat, eleganter exponit. f. 278.

Die 30. Septembris 1720.

- XC. Exposita Epidemica luis inter Massilienses grassantis calamitate solemnem supplicationem indicit ab Ecclesia Sancta Maria Angelorum ad Basilicam S. Mariae Majoris ad ejusmodi gravissimi flagelli cessationem à Divina Misericordia implorandam. f. 280.

In eodem Consistorio.

- XCI. Post Praemia, & Propositiones Ecclesiarum creat S. R. E. Presbyteros Cardinales Carolum Borgiam Patriarcham Indiarum, & Alvarum Cienfuegos Soc. Jesu Presbyterum, nec non declarat ejusdem S. R. E. Cardinalem Jo. Franciscum Barbadicum Episcopum Brixensem, quem in Consistorio habito die 29. Novembris 1719. in pectore reservaverat. f. 282.

Die 16. Decembris 1720.

- XCII. Sacro Collegio nuncium communicat insignis victoria, quam Rex Catholicus de Mauris reportaverat, & Septensem Civitatem à diuturna eorumdem hostium obsidione feliciter liberaverat. f. 284.

Die 3. Februarii 1721.

- XCIII. Novam Victoriam à Rege Catholico de Mauris in Africa relatum Sacro Collegio communicat. f. 286.

Die

Die 3. Martii 1721.

XCIV. *Controversiam exponit rursus obortam circa Decanatum Sacri Collegii vacantem per obitum Cardinalis Assallii, ac de eo juxta Consilium particularis Congregationis à Sanctitate Sua deputata decidit pro D. Cardinali Tanario, cui etiam Ostiensis, & Verulanensis Ecclesiarum optionem permittit.* f. 289.

FINIS.



R E G E S T U M.

... A B C D E F G H I K L M N O P Q R S T V X Y Z

Aa Bb Cc Dd Ee Ff Gg Hh Ii Kk Ll Mm Nn Oo

Omnes sunt Duerniones, præter Pp Qq Rr, quæ sunt folia simplicia.

THE
OF THE
OF THE
OF THE

